

Xtiidx Dios



New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
fb4ebcb8-e1f4-5bfc-b08c-f590e137d86d

Contents

San Matew	1
San Marcw	40
San Lujc	65
San Juan	105
Ni been ree apóstoles	135
Gui'ch par ree bén Rom	171
Gui'ch yaløj par ree bén Corinto	187
Gui'ch barøj par ree bén Corinto	202
Gui'ch par ree bén Galacia	212
Gui'ch par ree bén Éfeso	217
Gui'ch par ree bén Filipos	222
Gui'ch par ree bén Colosas	226
1 Ts	229
2 Ts	232
Gui'ch yaløj par Timoteo	234
Gui'ch barøj par Timoteo	239
Gui'ch par Tito	242
Gui'ch par Filemón	244
Gui'ch par ree bén Hebreos	245
Gui'ch bacaa Santiaaw	257
Gui'ch yaløj bacaa San Pedr	261
Gui'ch barøj bacaa San Pedr	265
Gui'ch yaløj bacaa San Juan	268
Gui'ch barøj bacaa San Juan	272
Gui'ch bayon bacaa San Juan	273
Gui'ch bacaa San Judas	274
Ni balüü Jesucrist loj San Juan	276

Xtiidxza'c Jesucrist ni bacaa San Matew

Xdiaagual Jesucrist

(Lc. 3:23-38)

¹ Guie zëéd laj ree bën naj xdiaagual Jesucrist, bën zëéd ree loj xdiaa rey Davi në loj xdiaa Abraham.

² Abraham brii laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. ³ Dxel Judá cwa'man Tamar, abi' guyu xi'n reeman brii laj reeman Fares con Zara. Fares gojc xdad Esrom, Esrom gojc xdad Aram. ⁴ Aram gojc xdad Aminadab, Aminadab gojc xdad Naasón, Naasón gojc xdad Salmón. ⁵ Salmón gojc xdad Booz, guiáad xniaa Booz brii laj Rahab. Booz cwa'man Rut, abi' xi'n reeman brii laj Obed. Obed gojc xdad Isái, ⁶ Isái gojc xdad rey Davi. Dxel rey Davi con bën goc lacheel Urias guyu xi'n reeman brii lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa. ⁸ Asa gojc xdad Josafat, Josafat gojc xdad Joram, Joram gojc xdad Uzias. ⁹ Uzias gojc xdad Jotam, Jotam gojc xdad Acáz, Acáz gojc xdad Ezequías. ¹⁰ Ezequías gojc xdad Mainán, Mainán gojc xdad Amón, Amón gojc xdad Josías. ¹¹ Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguiib.

¹² Chi ma barii reeman Babilonia lod guzu reeman zi'c bën yu' ladxguiib, gojl Salatiel, xdadaman gojc Jeconías. Dxel Salatiel gojc xdad Zorobabel. ¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, ¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud, ¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob. ¹⁶ Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguiib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

Gojl Jesucrist

(Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. ¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. ²⁰ Per la'tgaj cayünman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëédix. ²¹ Tijb xindoniguiaaw gac xi'n Li, yagu'l lajx "Jesús", din por laax gra ree xbejnx gac perdon xtol.

²² Gra ree ni guie gojc persi guzobj xtiidx Dios zi'c gunee bën badëë xtiidxaman loj ree bejn, chi rëbaman:

²³ Tijb biinxdüb chu' xi'n,

abi' chi galix grii lajx Emanuel,

rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li, ²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

2

Bignaj ree bën rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bën rajc, Jerusalén, laa reeman naj magos, za reeman niz oriente. ² Abi' gunabdiidx reeman, rëb reeman:

—¿Con xrey ree bën Israel, bën ma gojl? Din dunujn diizd duladxan baguiaan xbjalaman xanyabaa, zeel zio'pan din yazuxiban lojman.

³ Chi biguien rey Herodes zian, dád guyunawëëgaman, nëgajc gra ree bën Jerusalén guyunawëëg. ⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. ⁵ Dxel rëb reeman:

—Belén naj galaman, tijb guiedx naaz Judea, din ze bacaa bën badëë xtiidx Dios loj ree bejn:

⁶ Lüj Belén, tijb guiedx naaz Judea,

majsi guiedx dobëz najl loj gra ree guiedxro' naaz Judea.

Per lasajquil din luguiedx Belén guin grii tijb bén nabee guiniaj tēēman da bén Israel reen.

⁷Dxel ralanzi gurejdx rey Herodes bén rajc guin ree, persi gunabdiidxaman goc balüüloj bajl xanyabaa guin loj reeman. ⁸Abi' guxhaalaman laa reeman Belén, rēbaman loj reeman: —Gol wej, gol bignabdiidxchaaw graczi xcwent xindobēz guin. Abi' chi yadxejlidi laax, laa gol bagojn gajc naj, din nē naj chigzuxib lojx.

⁹Chi gulox rēb Herodes loj reeman zian, dxel zē reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobēz guin guzudxen. ¹⁰Chi baguiaa reeman bajl guin, dād babaa reeman. ¹¹Abi' chi guyu reeman lēnū guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, nē yaal, nētēē mirra par xindo guin. ¹²Chi ma guidxin dxej yaza reeman, dxel bagojn Dios laa reeman loj bacaal chitēē yayejc reeman niz lod za' Herodes, zianan zeel bayejc reeman niz lood ren.

Zē reeman Egipto

¹³Chi ma zia ree bén rajc guin ladx reeman, dxel balüüloj tijb xianjl Dios loj Xiēb loj bacaal, rēbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lējt, din zaguiil Herodes laax din gugūjtaman laax.

¹⁴Dxel bixche Xiēb, cwa'man xindobēz guin con xniaax, abi' guxhin guin brii reeman zē reeman niz Egipto. ¹⁵Ni guzu reeman xt gūjt rey Herodes. Zian guzobj xtiidx Dios ni gunee bén badēē xtiidxaman loj ree bejn, chi rēbaman: “Babedx da xi'nan Egipto.”

Gunabee Herodes guiēt ree xindobēz

¹⁶Chi gogbee Herodes guial basquiee ree bén rajc guin laaman, dād bidxe'chaman. Dxel gunabeaman guiēt gra ree xindongiuaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén nē gra ree guiedx riga' niz ni, guial yu'guijcaman ni rēb ree bén rajc guin guial ma gojc tio'p ijz ni baguiaa reeman bajl guin. ¹⁷Zian gojc cumplid ni bacaa Jeremias, bén badēē xtiidx Dios loj ree bejn, chi rēbaman:

¹⁸Biguien cha' tijb bejn guiedx Ramá, yu' guialroon nē guialrbixdiaj, Raquelan cayoon por ree xi'nman, abi' ad rile't chu gusquiejn laaman guial gūjt ree xi'nman.

¹⁹Per chi gūt Herodes, dxel balüüloj tijb xianjl Dios loj Xiēb loj bacaal lod zojb reeman, Egipto, abi' rēbaman lojman:

²⁰—Bixche, cwa' xindobēz guin con xniaax. Gol baguiaj niz Israel, din ma gūjt ree bén guyēn nugūjt laax.

²¹Dxel bixche Xiēb cwa'man xindobēz guin con xniaax, bayejc reeman niz Israel. ²²Per chi gogbee Xiēb guial Arquelao, xi'n Herodes, naj bén canabee niz Judea, bidxebaman naguij reeman niz ni. Dxel bagojn Dios laaman loj bacaal din che reeman niz Galilea, dxel zē reeman. ²³Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bén badēē xtiidx Dios loj ree bejn, guial grii laj Jesús bén Nazaret.

3

Diidx gunee Waj bén baroobnijs bejn ree

(Mr. 1:1-8; Lc. 3:1-9, 15-17; Jn. 1:19-28)

¹Lēn ree dxej ni bidxin Waj, bén baroobnijs bejn ree, loj yujbidx niz Judea catie'chaman xtiidx Dios. ²Rēbaman:

—Gol bayūjn xgab por xtolidi din ma zidyob xguialrniabee Dios.

³Xcwent Waj guinan bacaa Isaías, bén badēē xtiidx Dios loj ree bejn, chi rēbaman:

Rguien cha' tijb bén rbidxa' niz loj yujbidx, rēbaman:

“Gol beenchaaw xnejz dux Dad ree Dios,

gol guxhal tijb nejz nali.”

⁴Con guidxlad camell gojcnē xab Waj, abi' lēnman bixii tijb guid. Gudaw tēēman bi'tsu con dxijn yu' dajn. ⁵Dxel bén Jerusalén ree nē los demazri ree bén Judea nētēē gra ree bén zojb gadēd ro' guiiw Jordán, brii reeman bicaagdiaj reeman ni rniece Waj. ⁶Dxel guxhoobdol reeman, abi' baroobnijs Waj laa reeman loj guiiw Jordán guin.

⁷Per chi baguiaa Waj zien ree bēnfarišew nē ree bēnsaducrew bidxin din tiobnijs reeman, rēbaman loj reeman:

—iXi'n xindxab! ¿Chu bagojn lējt din laadi loj castiro' ni zēēd? ⁸Gol gubajn zagdxe din guiguien guial waliquidi ma bayūjndi xgab por xtolidi, ⁹abi' ad bal rlies xvalorgajquidi, rēbidi: “Dunuñ zio'p loj xdiaa Abraham”, din naj rni lējt xt guiaj guie ree zile' yayūjn Dios xdiaa Abraham. ¹⁰Abi' ree bén ad zinalt xnejz Dios zi'c rayal, ma zidyob dxej ni güünnē Dios

laa reeman zi'c rüjnnë bejn tijb yag chi ad rtiatan, rutüügaman laan din che'can. ¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp gualrniabee guial lon, abi' ni'qui xgurëchaman ad rayalt gaxhiecan. ¹² Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiäad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

Gurobnijs Jesús

(Mr 1:9-11; Lc. 3:21-22)

¹³ Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. ¹⁴ Per ad nuyëntaman nuroobnijsaman Jesús, rëbaman lojman:
—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxe yagueen gra zi'c rniabee Dios.

Dxel cwëjb Waj baroobnijsaman laaman. ¹⁶ Chi gulox guroobnijsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. ¹⁷ Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë' tëën.

4

Gojc Jesús prueb

(Mr 1:12-13; Lc. 4:1-13)

¹ Dxel binë xSprijt Dios Jesús niz loj yujbidx, din güün xinxab laaman prueb.

² Ni guzuman tiuu dxej tiuu guiaal sin guialraw, dxel gulaanman. ³ Abi' bidxin xinxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guidataxl.

⁴ Per badxi' Jesúsán rëbaman:

—Loj xtiidx Dios rëb: “Ad ganaxtizi guidataxl guiban bejn, nëgajc gra diidx rniee Dios.”

⁵ Dxel binë xinxab guin laaman Jerusalén, abi' gulë'pix laaman guijc yadooro' zojb luguiedxzii, ⁶ abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman

chitëë ladx ni'czi tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xinxab guin laaman tijb guijc guia' ya da't, lod balüüx laaman gra ree guiedx riga' loj guidataxlüj në ree guialnaza'c yu' loj reen. ⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesúsán, rëbaman:

—Biquied, xinxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

¹¹ Dxel biquied xinxab guin lojman, abi' bi't tio'p choon ree xianjl Dios persi been reeman laaman sirv.

Rzuloj Jesús rtie'chaman xtiidx Dios niz Galilea

(Mr 1:14-15; Lc. 4:14-15)

¹² Chi gogbee Jesús guial yu' Waj ladxguuib, bayejcaman Galilea. ¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabolón në Neftalí. ¹⁴ Zian gojc persi gojc cumplid ni bacaa Isaías, bën badëë xtiidx Dios loj ree bejn, chi rëbaman:

¹⁵ Bën Zabolón con ree bën Neftalí, në ree bën zojb gajxh ro' nijsdo, nëtëë ree bën zojb xijch guiiw Jordán con gra ree bën zojb niz Galilea, lod zojb ree bën ad najt bën Israel,

¹⁶ gra reeman gubajn loj xcay.

Yan ma brii tijb biani par laa reeman,

abi' biani guin guxhal xquiarguejn ree bën ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëëd gajxh xguialrniabee Dios.

Rbejdx Jesús tajp ree bën gac xbejnman

(Mr 1:16-20; Lc. 5:1-11)

¹⁸ La'tgaj каза Jesús gajxh ro' nijsdoo Galilea, baguiaaman Simón bén la gajc Béd con bijchaman Andrejs. Cuzaal reeman guijxh loj nijs din guiniaaz reeman béjl. Guial laan naj xchiin reeman. ¹⁹ Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi béjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, ²² abi' basa'n reeman barcw guin con xdad reeman, dxel laa zinal gajc reeman laaman.

Ruliüü Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiüdx Dios, rëbaman loj reeman xhienaag naj xguialrniabee Dios, abi' bayüjnman bén rdoob ree në gra ree bén rajc xhietëz guialgujdxan. ²⁴ Guidibczi niz Siria bire'ch xtiüdx Jesús, abi' bidnë reeman bén cusagdiaj ree gadzagayaa ni mal në graloj ree guialgujdx, bén yu' ree xindxab luxdoo, në ree bén rëjtya', nëtëë ree bén ad rilet' sulí, abi' bayüjn Jesús laa reeman. ²⁵ Dád zien ree bejn binal laaman, bén Galilea ree, bén zëéd ree Decápolis, bén Jerusalén ree, bén zëéd ree niz Judea në ree bén zëéd stíblad ro' guiiw Jordán.

5

Ni baliüü Jesús tijb guijc guia'

¹ Chi baguiaa Jesús bén guixiuj ree, wë'paman tijb guijc guia' abi' gurejman, dxel gubig ree xbejnman lojman. ² Abi' guzuloj culüüman laa reeman, rëbaman:

Xiquilbaa ree bejn

(Lc. 6:20-23)

³ —Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

⁴ Xiquilbaa ree bén yu'naya, din Dios yagu' luxdoo reeman zagdxë.

⁵ Xiquilbaa ree bén naj bén chaawladx, din laa reeman tia' guidxliuj ni rëb Dios gudëédaman loj reeman.

⁶ Xiquilbaa ree bén rzajc zi'c chi rliiaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ Xiquilbaa ree bén raya lasa', din zian yaya Dios laa reeman.

⁸ Xiquilbaa ree bén naya loj Dios, din laa reeman guguiaa laaman.

⁹ Xiquilbaa ree bén rüjn naguiejn cwedxenë lasa', din laa reeman grii laj xi'n Dios.

¹⁰ Xiquilbaa ree bén cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹ Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi da bejnan. ¹² Gol badxe' luxdoodi nix, gol badaa tëë din naroob naj ni gunee Dios lojdi xanyabaa. Abi' lëjt ragbee guial ziangajc basagzi reeman bén badëë ree xtiüdx Dios loj ree bejn gocli chi gadídi gui't loj guidxliuj.

Lëjt naj zi'c zëd në zi'c bajl

(Mr. 9:50; Lc. 14:34-35)

¹³ Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴ Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijc guia' abi' ad zajct guiguie'chan. ¹⁵ Ad ritiaguuj tëët tijb guij par guida'cwan lën tijb yagalm, rtiaguijn persi rzojban ya din gusnin loj gra ree bén yu' lëñü. ¹⁶ Ziangajc lëjt, gol gojc zi'c biani loj ree bejn, din chi guguiaa reeman ni zagdxë cayüjndi guza't reeman xDadidi Dios zagdxë bén yu' xanyabaa.

Ruliüü Jesús xcwent ley

¹⁷ Ad naladxidi zialan par günan ley tíblad, ley ni badëë Dios loj Moisejs o ni balüü ree bén badëë xtiüdx Dios loj ree bejn, zialan par günanan cumplid. ¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. ¹⁹ Zianan zeel bén ad ruzoobt tijb mandamient ni zëéd loj ley guin majsi nidobëz naj mandamient guin, bal rullüü tëëman bejn ree güün reeman zian, laaman lasajc ta'nzi lod rniabee Dios. Per bén ruzoob gra ree mandamient ni zëéd loj ley guin, rullüü tëëman bejn ree guzooob reeman laan, laaman naj mazri Bén lasajc lod rniabee Dios. ²⁰ Zeel naj rni lojdi,

bal id zabajndi mazri zagdxé guial loj ree mextr rajc ley në ree bénfarisew, ad zayaltidi lod rniabee Dios.

Ruliüü Jesús xcwent guialrdxe'ch lasa'
(Lc. 12:57-59)

²¹ 'Lëjt ragbee guial rëb Dios loj ree xbéngulalidi: "Ad gugüjtil bejn, din bën gugüjt bejn yayalaman casti." ²² Per naj rni lojdi, chutééz bën rdxe'chnë lasa', yayalaman casti, në bën niee diidxguijdx lasa' xt loj guxtis zajc cheman, guiáad bën rëb loj lasa' achet sirv lüj, laaman yayal loj bajl yu' gabijl.

²³ 'Zeel bal zinël gon lën yadoo abi' yagaj rusaaladxil guial yu' bën rdxe'chil, ²⁴ basa'n sii xgonl yagaj, yalojxgaj babenë bën rdxe'chil zagdxé, dxel ma zile' yayejqul din gusa'n xgonl.

²⁵ 'Bal chu bën rudëed lüj loj guxtis, baya'nnëman diidx zagdxé la'tgaj yu' tiamp, chitéé yayüman lüj loj guxtis, abi' guxtis guin nabee chu'l ladxguuib. ²⁶ Naj rni lüj, ad zariitil ladxguuib guin xtczi quixil gra ni na guxtis guin.

Ruliüü Jesús xcwent guialrzunë lacheel ben ren

²⁷ 'Lëjt ragbee guial loj ley rëb: "Ad sunël lacheel ben ren." ²⁸ Per naj rni lëjt, chutééz bën rüjn xgabmal chi ruguiaaman tijb béngunaa, con laan ma beenmal dol lën luxdooman por béngunaa guin.

²⁹ 'Bal laagajc guiaal loj ladbeel rüjn din güünl dol, mazri zagdxé naj gulëen bazaalan zijt. Din mazri zagdxé naj nit tiblax guiaal loj luar che guidibil gabijl. ³⁰ Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxé naj nit tiblax yaal luar che guidibil gabijl.

Ruliüü Jesús xcwent guial rala' lasa' bejn
(Mt. 19:9; Mr. 10:11-12; Lc. 16:18)

³¹ 'Ma bacaagdiag tëedi: "Chutééz bën rala' lacheel, rayal gudëédaman gui'ch lojman guial ma bala' lasa' reeman." ³² Per naj rni lëjt: Xinguaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

Ad rayalt guza't xlia' bejn Dios

³³ 'Rëb tëe Dios loj ree xbéngulalidi: "Ad guza't xlia'di Dios, rayal güündi cumplid ni rëbidi gudëëdi lojman." ³⁴ Per naj rni lojdi: Ad rayaltci guza'tidi Dios, ni'qui xanyabaa par chililadx reeman lëjt din ni zojb Dios, ³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. ³⁶ Ad guza't tëe guijquidi par chililadx reeman lëjt, din ni'qui tijb guidxguijquidi ad zajct güündi ni ya's o ni naquich ya. ³⁷ Zagdxeli con gol güjdx "an" o "a'n", din los demazri ree ni guineeidi loj xindxab zan.

Ad yadxi'di ni mal por ni mal
(Lc. 6:29-30)

³⁸ 'Lëjt ragbee guial loj ley rëb: "Bën cwëë guiaal loj, gulëë gajc guiaal lojman. Guiáad bën cwëë layil, gulëë gajc layaman." ³⁹ Per naj rni lëjt: Ad yadxi'di ni mal por ni mal, bal chu chëéz xhajg ladbeedi, gol badëë stibladan chëézaman. ⁴⁰ Bal chu bën tilë lüj din cwëëxuman xmaguil, badëë në xchamarril tia'man. ⁴¹ Abi' bal rüjn reeman lüj nagueijn güül tijb yuu din sanëlan tib kilometro, guzanën tio'p kilometro. ⁴² Chutééz bën rniab xhienin loj, badëëdan, bal chu tëe rgui'n xhienin loj ad bal cwexuul gudëëdilan.

Guyën bën rdxe'ch lüj
(Lc. 6:27-28, 32-36)

⁴³ 'Ragbee tëedi rëb ree bejn: "Guyën bën rën lüj, bidxe'ch tëe bën rdxe'ch lüj." ⁴⁴ Per naj rni lojdi: Gol guyën bën rdxe'ch lëjt, gol gurejdx tëe Dios por ree bën rzunal lëjt, din güün reeman lëjt ni mal. ⁴⁵ Din zian gaquidi xi'n xDadidi Dios bën yu' xanyabaa, din laaman ruslejn xgubijdxaman par ree benza'c në par ree benmal, rusal tëeman guia par ree bën naban zi'c rayal në par ree bën ad nabant zi'c rayal. ⁴⁶ Din bal rëndi ganaxzi bën rën lëjt, çxhieza tia'di loj Dios zian? Din xt bëndol ree rüjn zian. ⁴⁷ Abi' bal ganaxzi bën rëndi rugajpdiozidi, çxhieza ni zagdxé cayüjndi? Din xt bën ad nünbeet ree Dios rüjn zian. ⁴⁸ Zeel gol gojc benza'c, zi'c naj xDadidi Dios bën yu' xanyabaa.

6

Xhienaag gagnë lasa' bejn

¹ 'Ad güündi ni zagdxé niz loj ree bejn naabzi par yadxal loj reeman lëjt. Din bal güündi zian, xDadidi Dios bën yu' xanyabaa achet guneeaman lojdi. ² Zeel chi güünl yudar bën ryaadx xhienin, ad gutie'chil diidx par gagbee bejn xhie cayüjn zi'c rüjn ree bën rusquiee,

lèn ree yadoo nè ree lunejz, din guilies bejn xvalor reeman naj reeman benza'c. Per diidxliczi rmin lojdi, laazan naj ni rayal reeman. ³ Zeel chi güün! yudar Bén ryaadx xhienin, ni'czi loj xmiwda'til ad gül diidx ni cayüjn! ⁴ Mazri zagdx lüjzi gagbee ni cayüjn, abi' xDadil Dios laaman cuguiaa ni cayüjn lüjzi, laaman gunee ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ Chi cwedx guiniabidi Dios, ad güündi zi'c rüjn ree Bén rusquiee, Bén ruladx ree rzuli par cwedx guiniab reeman Dios lèn ree yadoo nè ree xquin nejz, din yadxaløj bejn laa reeman. Din naj rni lojdi, laazan naj ni rayal reeman. ⁶ Per lüj chi cwedx guiniabil Dios, bayu lènü lidxil, basiaaw ro' port, dxel gurejdx gunab Dios Bén za'nè lüj. Abi' laaman cuguiaa ni cayüjn lüjzi, laaman gunee ni rayalil.

⁷ Chi rbejdx rniabidi Dios, ad radxi'di diidx guin guiè'tzi guiè't naabzi par gacxhie jxtiidxidi, zi'c rüjn ree Bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. ⁸ Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. ⁹ Zeel chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rën! loj guidxliuj zi'c rajc xanyabaa.

¹¹ Baneer ni yadaawan guixie guixie.

¹² Been dunujn perdon gra ree ni mal ma baguieenan zi'c raguieenan perdon Bén rüjn ree dunujn ni mal.

¹³ Ad guslaal dunujn yaguieenan dol, babëë dunujn loj gra ni mal.

¹⁴ Din bal güündi perdon Bén rüjn lëjt ni mal, ziangajc xDadidi Dios Bén yu' xanyabaa züjn gajcaman perdon xtoldi. ¹⁵ Per bal id züjndi perdon Bén rüjn ree lëjt ni mal, ziangajc xDadidi Dios ad züjntaman lëjt perdon.

Xcwent guialrba'n

¹⁶ Chi rba'ndi ad güün lojdi naya, zi'c rüjn ree Bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. ¹⁷ Per lüj, chi rba'nl, gudiib lojl gudüjn tëë guijquil ¹⁸ chitëë gagbee ree bejn guial naba'nl. Tijbzi xDadil Dios Bén za'nè lüj naj bejn gagbee laan, abi' laaman gunee lüj ni rayal tia'l.

Guialnaza'c yu' xanyabaa

(Lc. 12:33-34)

¹⁹ Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaaan cwan laa reen. ²⁰ Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tëët xingubaaan cwan laa reen. ²¹ Lod gapil guialnaza'c guin yagaj su luxdool.

Guiaaløj bejn naj zi'c biani

(Lc. 11:34-36)

²² Guiaaløj bejn naj zi'c tijb biani par xcuerpaman. Zeel bal cayüjn ni zagdx, guidib xcuerpil rajp biani. ²³ Per bal cayüjn ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

²⁴ Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios nè loj milia.

Achetdzi rayal chu' bejn xgab

(Lc. 12:22-31)

²⁵ Naj rni lëjt: Ad chu'di xgab por ni gawidi nè por ni guiè'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. ²⁶ Gol baguiaa ree be rzuj xanyabaa, ad rxübint reeb, ad rato'p tëët reeb guialnaza'c, ad naj tëët lod cu'chaaw reeb guialnaza'c guin. Per xDadidi Dios Bén yu' xanyabaa rudëëd ni raw reeb. Abi' mazri lasajquidi guial loj reeb. ²⁷ Abi' tëë, ¿wen guial ru da'tidi xgab ma güün lëjt mazri ziool ya?

²⁸ ¿Chexquiza zeel dád rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tëët reen, ²⁹ per ni'qui rey Salomón ad guzujchaawt zi'c

za'chaaw ree guiaa majsi mast guzujchaawaman. ³⁰ Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt Bén ad rliadxza'ct ree laaman, nid zuneeman ni gacwidi ya. ³¹ Zeel ad rudi xgab xhie gawidi, o xhie gui'è'di, o xhie gacwidi. ³² Din Bén ad nünbeet ree Dios rün zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. ³³ Per yalojxgaj gol baguuil güündi zic' rniabee Dios, gol been tëë zic' rënman, dxel laaman gunee gra ree ni ryaadxidi. ³⁴ Ad chu'di xgab por ni gac guixie, gol basa'nan par guixie, gol gaxdxeli gol guyu xgab tib dxejgaj.

7

Xcwent gualrula'ch

(Lc. 6:37-38, 41-42)

¹ 'Ad gula'chidi bejn chitëë saquidi zian. ² Din bal rula'chidi bejn ziangajc saquidi, zic' rüjnnëdi bejn ziangajc güünnë reeman lëjt. ³ Ad gula'chidi Bén ren por falt dobëz ni rajpaman, zagdxeli gol guyu xgab por falt narooob ni rajpidi. ⁴ Abi' bal mazri falt narooob rajpidi, ζoxa gui'è'bidi loj stijb bejn: "Ad laat naj ni rünjnl"? ⁵ ;Bén rusquiee! Yalojxgaj gol been zic' rayal, chi ma rüjndi zian dxel ma zile' gui'è'bidi loj stijb bejn: "Ad laat naj ni rünjnl." ⁶ 'Ad güündi naguiejn güüncwent ree Bén ad rënt güüncwent xtiidx Dios, chitëë xhie güünnë reeman lëjt. Din bal güündi zian, laan naj zic' chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

Ni guiniabidi zaca'dan

(Lc. 11:9-13; 6:31)

⁷ 'Naj rni lëjt: Gol gunab loj Dios, abi' laaman gunee ni rniabidi. Gol baguuilaman, zadxejlidi laaman. Gol gurejdx gunabaman, züjncwentaman lëjt. ⁸ Din Bén rniab, zaca'man. Abi' Bén rguuil, zadxejlaman, guiáad Bén rbejdx rniab laaman, züjncwentaman laaman.

⁹ 'Lëjt najdi dad, ζwen zudëëdi tijb guiaj loj xi'ndi ya chi guiniabix guiadxtil?, ¹⁰ ζo zudëëdi tijb bëël ya chi guiniabix bëjl? ¹¹ Nacli lëjt najdi béndol rajc rudëëdi ni rën xi'ndi. ;Diidxgui xDadidi Bén yu' xanyabaa, nid zudëëdaman ni zagdxel loj ree Bén rniab laan ya!

¹² 'Gol beennë ree bejn zic' rëndi güünnë reeman lëjt. Din zian rniabee xley Dios në ni bacaa ree Bén badëë xtiidxaman loj ree bejn.

Port nadëë

(Lc. 13:24)

¹³ 'Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin. ¹⁴ Per port nadëë guin në nejz nadëë guin laa reen naj ni rnë bejn lod yu' gualnaban tiblayaa, abi' ta'nzi ree bejn zë loj nejz guin.

Por ni rüjndi zayünbee ree bejn lëjt

(Lc. 6:43-44)

¹⁵ 'Gol gojp cudad con ree Bén rusquiee rëb rudëëd reeman xtiidx Dios. Din rulüü dád Bén chaawladx reen, per rünzi reeman par gusquiee reeman bejn. ¹⁶ Per zayünbeedi laa reeman por ni rün reeman, din ad rtiat uv loj yaquiejch ad rtia tëët higo loj gui'xh guiëjch. ¹⁷ Zeel gra yag zagdxel rtia ni zagdxel lojn. Guiáad gra yag guijdx rtia ni guijdx lojn. ¹⁸ Ad rtiat ni guijdx loj yag zagdxel, ad rtia tëët ni zagdxel loj yag guijdx. ¹⁹ Gra yag ad rtiat ni zagdxel, rirugan dxel re'can. ²⁰ Ziangajc lëjt zayünbeedi laa reeman por ni rün reeman.

Ad grat bejn chu' lod rniabee Dios

(Lc. 13:25-27)

²¹ 'Ad grat ree Bén na lon: "Dad, Dad," chu' lod rniabee Dios, ganaxzi ree Bén rün zic' rën da Dadan, Bén yu' xanyabaa. ²² Dxejzii, zien ree Bén na lon: "Dad, Dad, por lüj batie'chan xtiidxil, abi' gual baza'tan lajl balëën xindxab ree luxdoo ree bejn, baguieen tëën zien ree milagr gual baza'tan lajl." ²³ Dxel guiën loj reeman: "Ad benbeetczan lëjt, gol gubi'ca lon béndol."

Tio'p loj cimiant

(Lc. 6:47-49; Mr. 1:22)

²⁴ 'Chutëëz Bén rucaagdiaj da diidxan abi' rünman ni rën, laaman naj zic' tijb Bén nasin gules xcimiant lidx loj guiaj. ²⁵ Abi' gol guia, dxel biguiaj nijs ro' gubi' tëë bidoxh, gulaj reen lad yu guin, per ad gulenxantan gual naj xcimiantan loj guiaj. ²⁶ Per Bén rigueijn da diidxan abi' ad rünntaman ni rën, laaman naj zic' tijb Bén ad nasint bazooob lidx loj üx. ²⁷ Abi' chi gol guia biguiaj nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tilda'nan ad baya'nt.

²⁸ Chi gulox guneenë Jesús bën guin ree, graczi reeman badxa da't loj zi'c balüüman laa reeman, ²⁹ guial rullüüman laa reeman zi'c bën rajp guialrniabee, ad zi'c rullüüt ree mextr rajc ley.

8

Rayüjn Jesús tijb bën rajc guialguijdx la lepra
(Mr. 1:40-45; Lc. 5:12-16)

¹ Chi baza Jesús ruguia' guin, dád zien bejn nal laaman. ² Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman. ⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bën suldad rniabee ree suldad
(Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, ⁶ rëbaman:

—Dad, laa da mojsan naga' lidxan ragxuux. Ad rilet' chixchex, dád cusagzi guialguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bën rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan. ⁹ Din zi'c naj yu' ree bën rniabee naj, ziangajc naj yu' ree da suldad xan rniabeen. Chi rën loj tijb reex: “Wej”, rejx, chi rën loj stjibix: “Guda,” ri'tix. Abi' chi rë loj da mojsan: “Been ni guin”, rüjnxan.

¹⁰ Chi bigueijn Jesús zian, dád badxalojman abi' rëbaman loj ree bën zinal laaman:

—Naj rni lojdi, ni'qui Israel ad wadxaaglojtan tijb bën rliadx Dios zi'c rliadx bën guin Dios. ¹¹ Naj rni lëjt, dád zien ree bën gralad yayal gawnë Abraham, në Isaac, në Jacob lod rniabee Dios. ¹² Guiáad ree bën rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

¹³ Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs bën guin.

Rayüjn Jesús xnasuegr Bëd
(Mr. 1:29-31; Lc. 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa. ¹⁵ Dxel gunaazaman yaaman, abi' bariman xliaa guin, dxel bixchewan guzuloj cayaanman laa reeman.

Rayüjn Jesús zien ree bënragxu
(Mr. 1:32-34; Lc. 4:40-41)

¹⁶ Chi ma caxhin, binë ree bejn zien ree bën yu' xindxab luxdoo loj Jesús. Abi' con tijb diidx ni guneeman babëeman xindxab guin luxdoo reeman, bayüjn tëëman gra ree bënragxu. ¹⁷ Zian gojc persi gojc cumplid ni rëb Isaías, bën badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

Bën rën chinal Jesús
(Lc. 9:57-62)

¹⁸ Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. ¹⁹ Dxel gubig tijb mextr rajc ley loj Jesús, rëbaman:

—Mextr, rënan guidnaan lüj bantëéz guin chel.

²⁰ Abi' rëb Jesús lojman:

—Bëz ree yu' xbilaa reeb, abi' ree biguijn yu' xguixbitia's reeb. Per Bën guxhaal Dios ni'qui lod quixh guijcaman ad yu't.

²¹ Dxel rëb stjib ree bën zinal laaman:

—Dad, baslaa naj gabenë' da dadan xt chi guiëtaman.

²² Per rëb Jesús lojman:

—Tanal naj, basa'nman con ree bén ad rënt guidnal naj, laa reeman guquie'ch laaman chi guiëtaman.

Racwëz Jesús bidoxh
(Mr 4:35-41; Lc 8:22-25)

²³ Guyu Jesús loj barcw con ree xbejnman, ²⁴ abi' la'tgaj zë reeman loj nijs guin dxejlci gubi' tijb bidoxh, ma cazëëbczi barcw guin xan nijs. Per Jesús naga'yëjsaman. ²⁵ Dxel bicwëën ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad rliadxza'ctidi naj?

Dxel bixcheman abi' gunabeeman bacwëëz bi guin në nijs guin. Loj hor ziigajc babedxe reen. ²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxaman?

Tio'p ree bén yu' xindxab luxdoo
(Mr 5:1-20; Lc 8:26-39)

²⁸ Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xindxab luxdoo brii reex lad ree baa abi' wej reex loj Jesús. Dád nadoxh reex, zeel ad rilet' chu téd lunejz guin. ²⁹ Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cüch, cayaw reeb, ³¹ abi' guzajc ree xindxab guin liaadx loj Jesús, rëb reex:

—Bal yabëël dunujn, banee mod yadxu'n lën ree cüch guin.

³² Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

³³ Abi' ree bén cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo. ³⁴ Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayiijn Jesús bén nëjt xcuerp
(Mr 2:1-12; Lc 5:17-26)

¹ Dxel bayu Jesús loj tijb barcw, badëdaman stiblad ro' nijs guin abi' badxin ladxaman. ² Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliadx reeman laaman, rëbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.” ⁴ Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal? ⁵ ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? ⁶ Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par günan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidxix. ⁸ Chi baguiaa ree bén guin zian, bidxeb reeman, abi' baza't reeman Dios zagdx por guialrniabee ni badëëman loj ree bejn.

Rbejdx Jesús Matew
(Mr 2:13-17; Lc 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. ¹¹ Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree bëndol?

¹² Chi biguejn Jesús ni rëb reeman, dxel rëbaman:

—Bénnadaan ree ad ryaadxt reeman doctor, bénnragxuu ree laa reeman ryaadx doctor.
 13 Gol chej, gol basiid xhie rên guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mr. 2:18-22; Lc. 5:33-39)

14 Dxel ree xbejn Waj, bën baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bénnfarisew dád zienvolt raba'n'an, guiáad ree xbejnl ad rba'nt reeman?

15 Badxi' Jesúsán rëbaman:

—Lod yu' guialruxhliia, ¿wen runaya ree biooz ya chi za'në xin cuxhliia guin laa reeman? Per guidxin dxej chiquiedix, dxel guiba'n reeman.

16 ‘Achut rata’ lajd cüb loj lajd yojx din zaxü'n lajd cüb guin, abi' mazri quixya'n lajd yojx guin. 17 Ad rgu' téët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

Bayajc xi'n Jairo në béngunaa bagaal xab Jesús

(Mr. 5:21-43; Lc. 8:40-56)

18 La'tgaj canee Jesús zian, bidxin tijb bën rniabee lën xyadoo ree bën Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

19 Dxel zinë Jesús laaman con ree xbejn Jesús. 20 Abi' tijb béngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús abi' bagaalaman guia' xabaman, 21 guial gunaladxaman: “Bal gugaalaman majsi xabzaman, zayajcaman.” 22 Per badxi' loj Jesús, abi' baguiaadxijchaman béngunaa guin, dxel rëbaman lojman:

—Zagdxé bagu' luxdool, xi'n. Ma bayajquil guial bililadxil naj.

Abi' loj hor züigajc bayajc bën guin.

23 Chi bidxin Jesús lidx bën rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. 24 Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. 25 Chi ma barii reeman, zianz guyuman. Gunaazaman yaa bindo guin dxel bixchem. 26 Abi' guidib niz yagaj bire'ch diidx ni goc.

Rayüjn Jesús tio'p bénlutia'p

27 Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

28 Chi badxin Jesús lod zojbaman, dxel bibig ree bën guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan léjt?

Badxi' reeman laan rëb reeman:

—Raliduladxan, Dad.

29 Dxel bagaal Jesús guiaaloj reeman, rëbaman:

—Gac zi'c rliladxidi.

30 Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

31 Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayüjn Jesús tijb bengop

32 Chi baza ree bën bayüjn Jesús guiaaloj, dxel bidxinnë ree bejn tijb bengop, yu' xindxab luxdooan. 33 Abi' guloxzi babëë Jesús xindxab guin luxdoo bengop guin, laa guzuloj gajc caneean. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

34 Per ree bénnfarisew rëb reeman:

—Bën guin rabëë xindxab luxdoo ree bejn por xguialrniabee gajc xindxab rniabee ree xindxab.

Raya Jesús bejn ree

35 Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn téëman graloj guialrdoob në graloj guialguijdx ni rajc ree bejn. 36 Chi baguiaa

Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. ³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bën gulüü laa reeman yu'.

³⁸ Zeel gol gunab loj Dios din guixhiaalaman mazri ree bën gulüü laa reeman.

10

Gulej Jesús chiptio'p ree apóstoles

(Mr. 3:13-19; Lc. 6:12-16)

¹ Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

² Bën guie ree naj guidxiptio'p ree xi apóstoles Jesús: Simón bën gulëëljman Bëd, con bijchaman Andrejs, në Jacob con Waj, bën naj ree xi'n Zebedeo. ³ Në Felip, Tol, Tumajs con Matew bën baquijx impuest, nëtëë Jacob xi'n Alfeo con Lebeo bën la gajc Tadeo ⁴ në Simón bën bi'ch loj ree bën Cananistas con Judas Iscariote bën yayü Jesús.

Rxhiaal Jesús gra ree xbejnman chiglüü reeman xtiidx Dios

(Mr. 6:7-13; Lc. 9:1-6)

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zobj ree bën ad najt bën Israel, ni'qui ree guiedx riga' niz Samaria, ⁶ gol chejli niz lod zobj ree bën Israel bën ad zinalt ree xnejz Dios. ⁷ Gol güjdx loj reeman guial ma zëëd gajxh xguialrniabee Dios. ⁸ Gol bayüjn bënragxuu ree, gol basban bën ma güjt ree, gol bayüjn bën rajc ree guialguijdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

⁹ Ad chinëdi or, ni'qui plajt, ni'qui cobr, ¹⁰ ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagriiadxidi, din bën rüjn dxiin rayal gudëëd ree bejn ni gawaman.

¹¹ Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. ¹² Abi' chi chu'di lënu guin, gol güjdx loj ree bën zobj yagaj: “Yabe'cdxe Dios luxdoodi.” ¹³ Bal rayal reeman guialnaza'c guin, zaya'n nan con laa reeman guiáad bal id rayal reeman laan zayejcan con lëjt. ¹⁴ Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. ¹⁵ Naj rni lëjt guial dxej ni yadëëd ree bejn cwent loj Dios, mazri casti naroob yayal reeman guial loj ree bën Sodoma në Gomorra.

Guialzi ni zëëd

¹⁶ Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëë, gol gojc tëë nadoo zi'c palom. ¹⁷ Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. ¹⁸ Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bën ad zinalt xnejz Dios. ¹⁹ Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. ²⁰ Din ad lëjt tan guiniee, xSprijt xDadidi Diosan guiniee por lëjt.

²¹ 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. ²² Gra bénguidxliuj guidxe'ch lëjt guial najdi da bejnan, per bën sudxi'ch loj guial rliladxaman naj xt dxej chigra guibanman, laaman yayal xanyabaa. ²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bën guxhaal Dios.

²⁴ 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. ²⁵ Bën cusid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëlj ree bejn naj Beelzebú, diidxgui lëjt najdi da bejnan.

Chu rayal guidxeb bejn

(Lc. 12:2-9)

²⁶ Ad guidxebidi bejn ree, din achet ni ralan yu' ni ad zaguiënt, ni'qui tijb ni naguie'ch ad yu't ni ad zagbeet bejn. ²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. ²⁸ Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDaddi Dios. ³⁰ Guiáad lëjt xt guidxguijquidi graczan nayab loj Dios. ³¹ Zeel ad rdxebidi din mazri lasajquidi guial loj zien da't ree biguijndoo.

Bén rëb loj ree bejn guial najman xbejn Jesucrist
(Lc. 12:8-9)

³² Bén guieb niz loj ree bejn guial da bejnanan, ziangajc naj guie loj da Dadan Dios bén yu' xanyabaa guial da bejnanan. ³³ Per bén guieb niz loj ree bejn guial ad da bejntanan, ziangajc guie loj da Dadan Dios bén yu' xanyabaa guial ad da bejntanan.

Por Jesús rlia' lasa' ree bejn
(Lc. 12:51-53; 14:26-27)

³⁴ Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadjil. ³⁵ Din guial chililadx bejn naj, zadxe'ch xinguaaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. ³⁶ Abi' laagajc bén zojb ree lënülidxidi guidxe'ch lëjt.

³⁷ Bén rën xdad o xniaa mazczi guial lon, ad zajct gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajct gacaman da bejnan. ³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan. ³⁹ Bén rniajchi' guialnaban rajpaman loj guidxliuj guie, zadxin dxej gunijtaman laan, per bén guiet por naj, zajpaman guialnaban tiblayaa con Dios.

Ni tia' ree bejn
(Mr. 9:41)

⁴⁰ Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. ⁴¹ Bén ridxga' tijb bén rudëë xtiidx Dios loj ree bejn, guial zëëdaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén nabán zi'c rën Dios, zaca'man lasa' ni rayal tia' bén guin loj Dios. ⁴² Abi' chutëëz bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

11

Bigneenë ree xbejn Waj Jesús
(Lc. 7:18-35)

¹ Chi gulox rëb Jesús loj guidxiptio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

² Abi' Waj, la'tgaj yu'man ladxguuib, cwa'man ruson gra ree ni caytjn Jesús. Dxel guxhaal tio'p choon ree xbejnman, ³ bignabdiidx reeman lojman, rëb reeman:

—¿Lüj naj Cristo ya bén naj guit, o yalëjzan ben ren ya?

⁴ Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajquidi. ⁵ Gol güjdx lojman guial ma ruguiaa ree bënütia'p, ma rajc rza ree bencoj, ma bayajc tëë ree bén rajc guialgüjdx la lepra, ma riguejn ree bén nacwa't guiáad ree bengüt ma baban reeman, abi' ree bënprob ma caguiejn reeman xtiidx Dios. ⁶ Xiquilbaa ree bén ad zucwëëz chililadx naj.

⁷ Chi baza ree bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui ni runiib bi? ⁸ ¿O xhienaag naj bén biquiaadi? ¿Najman tijb bén najcw lajd zagdx ya? Lëjt ragbee guial bén rajcw ree lajd zagdx lën palas zojb reeman. ⁹ ¿Chuzá biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zojbloj guial loj bén rudëëd xtiidx Dios loj ree bejn. ¹⁰ Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,

ben güünchaaw xnejzil.

¹¹ Naj rni lëjt, loj graczi ree bënguidxliuj, ad wayut bén mazri zojbloj guial loj Waj. Per majsi zian, bén ad zojblojt loj xguialrniabee Dios, laaman mazri zojbloj guial loj Waj.

¹² Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bén rüjn da't naguiejn laa reeman chu' lod rniabeeman. ¹³ Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman gunee xcwent xguialrniabee Dios. ¹⁴ Abi' bal chililadxidi ni ganin lëjt, naj rni guial Wajn naj Elías bén badëë xtiidx Dios loj ree bejn. ¹⁵ Bén rën ree gucaagdiajg, gol bacaagdiajg.

¹⁶ ¿Xhienaag ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: ¹⁷ “Bacwejdjan bidxa,

per ad baya'tidi, badoolan ni naya ree per ad biintidi.”¹⁸ Din bi't Waj bèn baroobnijs bejn ree, ad rawtaman ad rē' tēētaman vin, abi' rēbidi xindxab yu' luxdooan.¹⁹ Yan, bi't Bèn guxhaal Dios, rawaman rē' tēēman vin abi' rēbidi nalaman ruladx tēēman guiē'man, ruchajg tēēman bēndol ree con ree bèn ruquijx impuest. Per ree bèn ma ca' xgualrniabee Dios, por laa reeman rguien guial gra ni rŷjn Dios naj zagdx.

Bèn ad bazoobt ree xtiidx Dios
(Lc. 10:13-15)

²⁰ Dxel guzuloj Jesús cadilēman bèn zojb ree guiedx lod beenman mazri zien ree milagr. Din bèn guin ree ad bayŷjnt reeman xgab por xtol reeman, abi' rēbaman loj reeman:

²¹ —i'Probza lējt bèn Corazín! i'Probza lējt bèn Betsaida! Din bal luguiedx Tiro nē luguiedx Sidón niaje ree milagr ni goc ladxidi, diidz gocli nayŷjn reeman xgab por xtol reeman, niajcw reeman lajd ya's nuroob tēē cobdēj guijc reeman zi'c tijb sen guial ma bayŷjn reeman xgab por xtol reeman. ²² Per rnin lējt guial dxej yadēēd ree bejn cwent loj Dios, mazri casti narooob yayalidi guial loj ree bèn Tiro nē ree bèn Sidón. ²³ Guiād lējt bèn Capernaum, ad naladxidi yayalidi xanyabaa, lējt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. ²⁴ Per rnin lojdi guial dxej yadēēd ree bejn cwent loj Dios, mazri casti narooob yayalidi guial loj ree bèn Sodoma.

Gol guda lon din yaziiladxidi
(Lc. 10:21-22)

²⁵ Lēn ree dxejzii rēb Jesús:

—Dad, ruzatan lŷj zagdx, din ni baquie'chil loj ree bèn rajc nē loj ree bèn rignia', laan ma balŷŷl loj ree bèn ad rajt. ²⁶ Zian gojc Dad, din zian guyēn.

²⁷ 'Da Dadan banee gra lon. Abi' achut nŷnbee Jesucrist xi'n Dios, tijbzi Dios, achu tēēt nŷnbee Dios, tijbzi Jesucrist xi'nman, con ree bèn rēnman gŷŷnbee Dios. ²⁸ Gradi, bèn ma badxag rŷjn xhienin din yaya'ndi zagdx loj Dios, ma badxag tēēdi nŷŷ xtolidi. Gol guda lon, naj gune gualraziiladx lojdi. ²⁹ Gol bazoob da diidxan, gol basiid tēē gaquidi benza'c nē bèn chaawladz zi'c naj, din yabedxe luxdoodi loj Dios. ³⁰ Din ad nawēēgt guial guzoobidi da diidxan, ad nawēēg tēēt guial gŷŷndi zi'c rēnan.

12

Rgui'ch ree xbejn Jesús trigo dxej raziiladx ree bèn Israel
(Mr. 2:23-28; Lc. 6:1-5)

¹ Tijb dxej raziiladx ree bejn, chi cadēd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. ² Abi' chi baguiaa ree bēnfarisew ni cayŷjn reeman, rēb reeman loj Jesús:

—Baguiaa ree xbejnl nial cayŷjn reeman ni ad rayalt gŷŷn reeman dxej raziiladx ree bejn.

³ Dxel rēb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyu Davi lēn xyadoo Dios abi' cwa'man guidxttil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. ⁵ ¿O gadidi gool loj xley Moisejs ya guial achet dol rŷjn ree bixhioz chi rŷjn reeman dxiin lēn yadoo majsi ad raziiladx reeman dxej raziiladx ree bejn? ⁶ Abi' naj rni lējt guial naj, bèn za'nē lējt mazri lasajcan guial loj yadoo. ⁷ Bal rignia'di xhie rēn guiēb loj xtiidx Dios lod rēb: “Ni rēnan naj guial yaya lasa'di, ad guial guneetidi gon lon.” Bal rignia'di diidz guin ree ad zudxiibtidi guijc ree bèn ad rajt dol. ⁸ Abi' Bèn guxhaal Dios rajpaman gualrniabee dxej raziiladx ree bejn.

Rayajc tijb bèn nējt tibladyaa
(Mr. 3:1-6; Lc. 6:6-11)

⁹ Chi gudēd gojc zian, dxel baza Jesús abi' guyuman lēn tijb yadoo naj niz yagaj. ¹⁰ Lēn yadoo guin za' tijb bèn nējt tibladyaa. Abi' guial ree bēnfarisew raguiil reeman mod xhie gudxiib reeman guijc Jesús, dxel gunabdiidz reeman lojman, rēb reeman:

—¿Zile' yayŷjn bejn tijb bēnragxuu dxej raziiladx bejn ya?

¹¹ Badxi' Jesúsán rēbaman:

—Bal tijb lējt rajp tijb xiil, abi' yabib lēn bala' dxej raziiladx bejn. ¿Nid zabēēdi laab dxej guin ya? ¹² ¿Wen id mazri lasajc tijb bejn guial loj tijb xiil ya? Zeel achet gŷŷnan zajc gŷŷn bejn ni naj zagdx dxej raziiladx bejn.

¹³ Dxel rēb Jesús loj bēnragxuu yaa guin:

—Basli yaal.

Abi' basli yaa bën guin, loj hor ziigajc bayajc yaaman zi'c naj stibladan. ¹⁴ Per chi barii ree bënfarisew guin lën yadoo guin, guzuloj cayü reeman diidx xhienaag güün reeman din gugjüt reeman Jesús.

Bën gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bënragxuu, ¹⁶abi' gunabeeman laa reeman chitëë guttie'ch reeman diidx chu bayüjn laa reeman. ¹⁷ Zian guzojb xtiidx Isaías, bën badëë xtiidx Dios loj ree bejn, chi rëbaman:

¹⁸ Gol baguiaa, bën guie naj bën gulen

din güünman naj sirv,

laaman naj bën rën da'tan,

rabaanë' tēen laaman.

Gudë da Sprijtan lojman

abi' guiëbaman loj ree bēnguidxliuj

xhienaag naj da gualrniabeen.

¹⁹ Achut tilnëman,

ad zabixdiaj tēëtaman

achut tēët guien cha'man niz lunejz.

²⁰ Ad zudëedtaman casti bën ad za'dxi'cht

ree loj da nejzan, nē ree bën ad ridxga'za'ct naj,

xt chi ma beenman gan gac gualguxtis.

²¹ Abi' xt ree bën ad najt bën Israel

cwëz reeman yabëëman laa reeman loj dol.

Rëb ree bejn ca' Jesús xgualrniabee Beelzebú

(Mr. 3:19-30; Lc. 11:14-23; 12:10)

²² Binë ree bejn tijb xinguaaw lod za' Jesús, yu' xindxab luxdoox, natia'p lojx naj tēëx gop. Dxel bayüjn Jesús laax abi' guzuloj rnieex ruguiaa tēëx. ²³ Graczi ree bejn dád badxaløj reeman, abi' rëb reeman:

—¿Id bën guinan zëëd loj xdiaa Davi ya?

²⁴ Chi biguiejn ree bënfarisew zian, dxel rëb reeman:

—Bën guin rabëë xindxab luxdoo ree bejn por xgualrniabee Beelzebú xin rniabee ree xindxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. ²⁶ Ziangajc bal xindxab su contr laagajquix, nayob nitix. ²⁷ Lëjt na guial naj rabë xindxab luxdoo ree bejn por xgualrniabee Beelzebú, per bal zianan, ¿chuza rudëë gualrniabee loj xbejndi din yabëë reeman xindxab? Zeel laagajc reeman ruluü guial ad laat rnieedi. ²⁸ Per naj, bal por xSprijt Dios rabën xindxab luxdoo ree bejn, rën guiëban guial ma za'në xgualrniabee Dios lëjt.

²⁹ 'Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhiigajman laaman? Zian güünman din chile' cwanman ni rajpaman.

³⁰ 'Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

³¹ 'Zeel rnin lëjt: Züjn Dios perdon xhietëëz dolan, nē ree diidxgüijdx ni rnieetzi ree bejn, per ad züjntaman perdon bën rnieegüijdx ree xSprijt Dios. ³² Chutëëz bën guinieegüijdx Bën guxhaal Dios, zajcaman perdon, per bën guinieegüijdx xSprijt Dios ad zajtctaman perdon yan, ni'qui chi yaguialan.

Nünbee bejn tijb yag por ni rtia lojn

(Lc. 6:43-45)

³³ Lëjt ragbee, bal tijb bejn ruzuj tijb yag zagdx, rtia ni zagdx lojn, per bal guzujman tijb yag güijdx, rtia ni güijdx lojn. Din tijb gaj yag nünbee bejnan por ni rtia lojn.

³⁴ ¿Xi'n xindxab! ¿Xoza guinieedi diidx zagdx ree awa benmal lëjt? Din ni yu' luxdoo bejn laan rnieeman. ³⁵ Benza'c rnieeman diidxza'c, din laan yu' luxdoo. Guiáad benmal rnieeman diidxmal din laan yu' luxdoo. ³⁶ Per naj rni lëjt guial dxej ni güün xgualguxtis Dios, gra ree bejn yadëëd cwent lojman por gra ree diidxgüijdx ni rniee reeman. ³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

Rniab ree bënfarisew tijb milagr

(Mr. 8:12; Lc. 11:29-32)

³⁸ Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguaan güünl tijb milagr.

³⁹ Badxi' Jesúsán rëbaman:

—Lëjt benmal, bën ad rüjnt ni rën Dios abi' rëndi günan tijb milagr. Per achetri guguaiaadi, tijbzi zi'c guzac Jonás bën badëë xtiidx Dios loj ree bejn. ⁴⁰ Din zi'c guyu Jonás lën bëjl narooob choon dxej choon guiaal, ziangajc Bén guxhaal Dios, choon dxej choon guiaal chu'man lën baa. ⁴¹ Abi' chi yadëéd ree bejn cwent loj Dios, bën guban ree Nínive zaban reeman abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bën za'në lëjt mazri lasajcaman guial loj Jonás. ⁴² Ziangajc bën goc reina niz sur, zabanman chi yadëéd ree bejn cwent loj Dios, dxel guiëbaman guial ree bën riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bën za'në lëjt mazri lasajcaman guial loj Salomón.

Xindxab ni rayejc

(Lc. 11:24-26)

⁴³ Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: ⁴⁴ “Zagdxeli yaye'can lod guzaan.” Abi' chi rayejquix ruguaiaax luxdoo bën guin najn zi'c tijb lënü lod achut zojbj, lod bilooob lod najcchaaw tëë. ⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bën guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

Xniaa Jesús con ree bijchaman

(Mr. 3:31-35; Lc. 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. ⁴⁷ Abi' yu' tijb bën rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidx bën guin rëbaman:

—¿Chu naj da nan chu tëë ree nin naj da bichan?

⁴⁹ Dxel con yaaman balüü ree xbejnman rëbaman:

—Bën guie ree naj da nan në ree da bichan. ⁵⁰ Din chutëëz bën rüjn zi'c rën da Dadan bën yu' xanyabaa, laaman naj da bichan, da zanan, në da nan.

13

Xcwent bën rtie'ch bin

(Mr. 4:1-9; Lc. 8:4-8)

¹ Dxejzii brii Jesús yu lod zojbaman, bisobaman ro' nijs Galilea. ² Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bën guin za' reeman ro' nijs guin. ³ Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. ⁴ Chi catie'chaman bin guin, ta'nán biajb loj nejz, abi' bi't ree biguijn gudaw reeb laan. ⁵ Sta'nán biajb loj ree guiaj lod ad riga't zien yuj, cari gulejnan guial ad zient yuj riga'. ⁶ Per chi brii gubijdx, baze'can laan, abi' guial ad yu't liujn gubidxan. ⁷ Dxel sta'nán biajb loj ree yaquie'ch, chi guni's ree yaquie'ch guin banidloj reen laan. ⁸ Per sta'nán biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichii. ⁹ Bén rën gucaagdiajg, gol bacaagdiajg.

Chexc zeel rülüü Jesús con ni naj ree zi'c cwent

(Mr. 4:10-12; Lc. 8:9-10)

¹⁰ Dxel gubig ree xbejn Jesús lojman rëb reeman:

—¿Chexquiza zeel rülüül bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman, per bën guin ree ad basa'nt Dios laa reeman chignia' reeman laan. ¹² Din Bén ma rignia', gusnuu chignia'man mazri, abi' zignia' da'taman. Per bën ad rignia'za'ct ad rüjn tëtëetaman naguiejn chignia'man mazri, xt ta'n ni rignia'man zayanladxaman. ¹³ Zeel rniën'n laa reeman con ganaxzi zi'c cwent ree. Din majsi rani loj reeman per rüjn reeman zi'c bën ad ruguaiaat, abi' majsi riguejcn reeman per rüjn reeman zi'c bën ad riguejnt, bën ad rignia' tëtë. ¹⁴ Zian rzojb xtiidx Isafas, bën badëë xtiidx Dios loj ree bejn, chi rëbaman:

Majsi riguejcn reeman, per acheteci chignia' reeman.

Abi' majsi rani loj reeman, per ad ruguaiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tëë guiaaloy reeman.
Chitëë guguiaa reeman,
guiguiejn reeman,
chignia' tëë reeman.

Din ad rënt reeman gui't reeman lon din gūnan laa reeman perdon.

¹⁶ Per xiquilbaadi cuguiaadi cagueijn tëëdi. ¹⁷ Din naj rni lojdi guial dád zien ree bën badëë xtiidx Dios loj ree bejn, nê ree bën guban zi'c rayal, guyën reeman nuguiaa reeman ni cuguiaadi per ad baguiaat reeman laan. Guyën reeman niguiejn reeman ni caguejndi per ad biguejnt reeman laan.

Rusignia' Jesús xcwent bën rtie'ch bin
(Mr. 4:13-20; Lc. 8:11-15)

¹⁸ Yan gol bacaagdiajg xhie rën guiëb ni rnin lojdi xcwent bën bigtie'ch bin. ¹⁹ Bén rigueijn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman. ²⁰ Guiaad bin biajb loj ree guial naj zi'c bën rigueijn xtiidx Dios, abi' dád nix ru luxdooman rigueijnman laan, ²¹ per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni riladxaman. ²² Abi' bin biajb loj ree yaquie'ch naj zi'c bën rigueijn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëëz rucaagdiajgaman xtiidx Dios achet sirv been ni bacaagdiajgaman. ²³ Per bin biajb loj yuj za'c naj zi'c bën rigueijn xtiidx Dios abi' rignia'man laan rüjn tëëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bën badxe' ganax bin zagdxe loj xguiniaa. ²⁵ Per la'tgaj naga'yëjs gra reeman, bidxin bën rdxe'ch laaman guxübinman gui'xhguijdx ree loj trigo guin dxel ziaman. ²⁶ Abi' chi gulen trigo guin brii tëë dojn lojn nê ree gui'xh guin ma yu' lojn. ²⁷ Dxel bicojn ree xmojs bën naj xguiniaa laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?” ²⁸ Badxi'man laan rëbaman: “Wed tijb bën rdxe'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?” ²⁹ Dxel rëbaman loj reeman: “Yajqui, chitëë guial gaxhidi gui'xh guin gaxhidi nê trigo guin. ³⁰ Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bën guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs
(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. ³² Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidxan.

Xcwent levadur
(Lc. 13:20-21)

³³ Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguuj gra cob guin.

Chexc zeel ruliüü Jesús con ni naj ree zi'c cwent
(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent. ³⁵ Zian gojc persi guzobj xtiidx bën badëë xtiidx Dios loj ree bejn, chi rëbaman:
Con ganaxzi ni naj ree zi'c cwent gulün bejn ree,
guiën loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnë Jesús benzien guin ree, dxel bayuman lënu con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

³⁷ Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, ³⁸ abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. ³⁹ Guiáad bén rdxe'ch, bén guxúbin trigo guin naj xindxab. Abi' guial rado'p guialnaza'c guin rên guiëb chi nit guidxliuj, guiáad ree bén yato'p guialnaza'c guin naj ree xianjl Dios. ⁴⁰ Zian zi'c rado'p ree gui'xhguidx guin par che'c reen, zian gac chi nit guidxliuj. ⁴¹ Bén guxhaal Dios guixhiaal ree xianjlanan din yabëë reeman bén rayal ree yaril loj xguialrniabee, bén ruzaalguiiw bejn ree din güün reeman dol në gra ree bén cayün dol. ⁴² Abi' guzaal reeman laa reeman loj bajl lod goon reeman xt gaw lay reeman. ⁴³ Dxel bén naban ree zi'c rên Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rên gucaagdiajg, gol bacaagdiajg.

Xcwent ni lasajc

⁴⁴ Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëeman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ Rni tëën lëjt: Xguialrniabee Dios naj zi'c tijb bén rguuil perl zagdxe din siiman laan. ⁴⁶ Chi rdxejlanan tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. ⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëeb reeman. ⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c. ⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bén rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'n, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bén rbe nicüb në ni yojx loj gra ni rajpaman.

Badxin Jesús Nazaret

(Mr 6:1-6; Lc 4:16-30)

⁵³ Chi gulox gunee Jesús loj reeman zian, zianz bazaman. ⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaløj ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rünjman milagr ree?

⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? ⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bén rudëë xtiidx Dios loj ree bejn, per ladxaman achut rajp laaman respejt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Gijt Waj Bén baroobnijs bejn ree

(Mr 6:14-29; Lc 9:7-9)

¹ Tiampzii Herodes bén canabee niz Galilea, biguejnman ni cayün Jesús. ² Abi' rëbaman loj ree xbejnman:

—Waj bén baroobnijs bejn ree, laaman baban zatijb, zeel rajpaman guialrniabee rünjman milagr ree.

³ Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bén la Felip, ⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyën Herodes nugütaman Waj, per bidxebaman xhie nünj ree bejn laaman guial graczi reeman rëb Waj naj tijb bén rudëéd xtiidx Dios loj ree bejn. ⁶ Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm, ⁷ dxel

rëb Herodes gudëëdaman xhietëez ni guiniabim. ⁸ Abi' xniaam rëb lojm xhie guiniabim, dxel rëbim loj Herodes:

—Banee guijc Waj bën ruroobnijs bejn ree, baneen loj tijb pliajt.

⁹ Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëëd reeman ni gunabim. ¹⁰ Dxel gunabeeman guitü' reeman guijc Waj lën ladxguuib guin, ¹¹ abi' bidxinnë reeman laan loj tijb pliajt badëëd reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn

(Mr: 6:30-44; Lc. 9:10-17; Jn.6 :1-14)

¹³ Chi gogbee Jesús zian, guyuman loj tijb barcw zëman niz lod achutczzi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. ¹⁴ Chi barü Jesús loj barcw guin baguiaaman bën guixiuj ree riga' yagaj, bayaman laa reeman abi' bayüjman bënragxuu zinë reeman. ¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bën guin ma gojl yaguiaj reeman, din che reeman guiedx lod sii ni gaw reeman.

¹⁶ Per badxi' Jesúsán rëbaman:

—Ad rüjnt naguiejn yaguiaj reeman, lëjt gol badëë ni gaw reeman.

¹⁷ Badxi' reeman laan rëb reeman:

—Per gaayzi guidxtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bën guin loj guixya'. Abi' cwa'man guigaay guidxtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guidxtil guin badëëman laan loj ree xbejnman persi gudi's reeman laan loj gra ree bën guin. ²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. ²¹ Bën gudaw guin ree naj reeman cost gaay mil xinguaaaw garenquj ree bëngunaa con ree xindoo.

Riza Jesús loj nijs

(Mr: 6:45-52; Jn.6 :16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. ²³ Chi ma gulox bazaadiidx nëman laa reeman, dxel zë xtijbaman guijc tijb guia' din cweed guiniabaman Dios. Chi gure guiaal xtijbzaman za' guijc guia' guin. ²⁴ Guiaad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. ²⁵ Chi ma cayreguiaal, zibig Jesús loj ree xbejnman rzaman loj nijs guin. ²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

²⁷ Per guneenë Jesús laa reeman rëbaman:

—¡Gol bagu' luxdoodi! ¡Najñ, ad rdxebidi!

²⁸ Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiaajt Bëd loj barcw guin, rzaman loj nijs guin zëman loj Jesús. ³⁰ Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

³¹ Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliadxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin. ³³ Guiaad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

Rayüjn Jesús bënragxuu ree Genesaret

(Mr: 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret. ³⁵ Abi' ree bën niz ni bayünbee reeman Jesús, abi' guidibczzi niz yagaj gutie'ch reeman diidx guial

za'man ni. Dxel binë ree bejn bénragxuu ree lojman, ³⁶ guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bén bagaal xabaman bayajc.

15

Ni rüjn persi rajc bejn béndol

(Mr: 7:1-23)

¹ Bénfarisew ree con ree mextr rajc ley, bén za ree Jerusalén, gubig reeman loj Jesús abi' gunabdiidx reeman lojman, rëb reeman

² —¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tibladd persi zinal xcostumbridi? ⁴ Din Dios rëb: “Gojp respejt xDadil con xniaal”, abi' “Bén rníee diidxguijdx loj xdadaman o xniaaman ya, rayal guiëtaman.” ⁵ Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” ⁶ Rëbidi guial bén guinie zian, ad zile't güün yudar xdadaman con xniaaman, abi' zian rbëëladxidi xtiidx Dios persi zinal xcostumbridi. ⁷ ¡Bén rusquiee! ¡Rüjnzidi guial nabandi xnejz! Waliqiu ni guneé Isaiás, bén badëë xtiidx Dios loj ree bejn, chi rëbaman:

⁸ Bén guie ree rëbzi reeman rníajchi' reeman naj, per ad rënt reeman naj con guidib luxdoo reeman.

⁹ Xlia'czi rníajchi' reeman naj,

abi' ruluü reeman bejn ree ganaxzi ni rbëëguij ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi. ¹¹ Ad ni rawt bejn rüjn laaman béndol, ni ririi ro'man laan rüjn laaman béndol.

¹² Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguiejn reeman ni guneel?

¹³ Badxi' Jesús laan rëbaman:

—Gra ni ad zëëdt por da Dadan Dios bén yu' xanyabaa, yu' dxej nitan. ¹⁴ Zeel gol basa'n reeman din laa reeman naj zi'c tijb bénlutia'p ruluü stijb bénlutia'p ban niz cheman. Abi' bal tijb bénlutia'p guluü stijb bénlutia'p guin, zayajb grop reeman ro' bala'.

¹⁵ Dxel rëb Bëd loj Jesús:

—¿Basignia' dunujn xhie rën guiëb ni guneel?

¹⁶ Badxi' Jesúsán rëbaman:

—¿Wen, ni'qui lëjt ad rignia'tan ya? ¹⁷ ¿Id rignia'di ya guial gra ni raw bejn rej lënman abi' rariin? ¹⁸ Per diidx ririi ro' bejn, luxdoozan zan, abi' laan rüjn laaman béndol. ¹⁹ Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunë lacheel ben ren, guialrban, guialrusquiee në guialrníee diidxguijdx loj lasa'. ²⁰ Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

Tijb béngunaa Canaán bililadx Jesús

(Mr: 7:24-30)

²¹ Chi baza Jesús yagaj zëman niz Tiro në niz Sidón. ²² Abi' yagaj zojb tijb béngunaa za niz Canaán, briiman, rbixdiajman rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

²³ Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguaajman, din rbixdiajman nalaman dunuj ree.

²⁴ Dxel rëb Jesús:

—Dios guxhaal naj din günan yudar ganaxzi ree bén Israel zë loj nejz mal.

²⁵ Per béngunaa guin bigzuxibaman loj Jesús, rëbaman:

—¡Dad, gognë naj!

²⁶ Badxi' Jesúsán, rëbaman:

—Ad zagdxet naj chiquied bejn guiadxtil loj xi'nman din gudëëdaman laan loj ree bë'cw.

²⁷ Badxi' béngunaa guinan, rëbaman:

—Waliquil, Dad, per në ree bë'cw ruto'p guiadxtil laay ni ryajb xan xmex bén naj xbe'cw laa reeb.

²⁸ Dxel rëb Jesús lojman:

—¡Na, waliquil riladxil con guidib luxdool! Gac zi'c rënl.

Loj hor guin gajc bayajc xi'n bén guin.

Rayüjn Jesús zien ree bénragxuu

²⁹ Baza Jesús yagaj, bidxinman ro' nijs Galilea, dxel wë'paman guiic tijb guia' abi' gurejman yagaj. ³⁰ Dád zien bejn bido'p lod za'man. Binë reeman bencoj ree, në ree bénlutia'p, në ree bén ad rüjnt xu'c dxiin, con ree bengop në zien ree bénragxuu ren ree, badxij reeman laa reeman loj Jesús, abi' bayüjnman laa reeman. ³¹ Dád badxa loj ree bejn chi baguiaa reeman ma rniee ree bengop, ma bayajc xu'c ree bén ad rüjnt dxiin xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxé xDios ree bén Israel.

*Ruyaan Jesús tajp mil bejn**(Mr. 8:1-10)*

³² Abi' gurejdx Jesús bén naj ree xbejnman, rëbaman loj reeman:
—Rayan bén guin ree, din ma gojc choon dxej za' reeman con naj, abi' achet ni gaw reeman. Ad réntan yagu'nejzan laa reeman sin guialraw ad nial yadaj reeman niz lunejz.

³³ Dxel rëb ree xbejnman lojman:

—Per çban guin yuca'n ni gaw ree benzien guin, zi'c naj guie lod achutczí bejn zobj?

³⁴ Gunabdiidx Jesús loj reeman, rëbaman:

—çBël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj. ³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. ³⁷ Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. ³⁸ Bén gudaw ree naj reeman tajp mil xinguaaaw, garenqui ree béngunaa con ree xindoo. ³⁹ Dxel bazaadiidxné Jesús laa reeman, abi' guyuman loj barcw ziaman niz Magadán.

16*Rniab reeman güün Jesús tijb milagr**(Mr. 8:11-13; Lc. 12:54-56)*

¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. ² Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxé gac guixie din naxnia xanyabaa.” ³ Guiáad rsil chi naxnia xanyabaa yu' tëë çaj, rëbidi: “Ad laat gac yandxej.” çBén rusquiee!, bal ragbeedi xhie rën guiëb sen yu' xanyabaa, çchexc ad rignia'tidi xhie rën guiëb gra ni cuguaadi yan? ⁴ Bén mal, ad rliadxtidi abi' rniabidi günan tijb milagr, per achet gugiaadi, tijbzí zi'c guzac Jonás.

Dxel basa'n Jesús laa reeman, ziataman.

*Xlevadur ree bénfarisew**(Mr. 8:14-21)*

⁵ Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. ⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—çChexc zeel rëbidi guial ad ca'tidi guiadxtil? Ta'nnijt rliadxidi naj. ⁹ çStaczi ad rignia'tidi ya? çNid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? ¹⁰ çNid zaladx tëëdi ya chi gudi'san gajdx guiadxtil loj tajp mil bejn, abi' zabël dxüman bato'pidi? ¹¹ çChexc zeel ad rignia'tidi guial ad guiadxtilman cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

¹² Dxel bignia' ree xbejnman guial ad xlevadurt guiadxtilman cuza'taman loj reeman, rëbaman zian din gap reeman cudad con ni rulüü ree bénfarisew në ree bénsaducew.

*Rëb Bëd guial Jesús naj Cristo**(Mr. 8:27-30; Lc. 9:18-21)*

¹³ Chi bidxin Jesús niz Cesarea de Filipo, gunabdiidxaman loj ree xbejnman, rëbaman:

—çChu rëb ree bejn, naj Bén guxhaal Dios?

¹⁴ Badxi' reeman laan, rëb reeman:

—Yu' reeman rëb guial Wajn, bën baroobnijs bejn ree. Yu'za reeman rëb guial Elíasan, bën badëë xtiidx Dios loj ree bejn, yu' tëë reeman rëb guial Jeremíasan, bën badëëd xtiidx Dios loj ree bejn o stíjb ben ren ya, bën badëëd xtiidx Dios loj ree bejn.

¹⁵ Dxel rëbaman loj reeman:

—Laadx lëjt, çxhie nadi, chu naj?

¹⁶ Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

¹⁷ Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bën yu' xanyabaa laaman naj bën guna lojl. ¹⁸ Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bën gac da bejnan abi' ni'qui guialgüjt ad zuníjt laa reeman. ¹⁹ Naj gune lüj guialrniabee ni za xanyabaa, abi' gra ni tiëbil gac loj guidxliujt guie ma naj gacan xanyabaa, guiáad ni ad zatiëjbtíl gac loj guidxliujt guie ad najt gacan xanyabaa.

²⁰ Dxel gunabee Jesús loj gra ree xbejnman guial achu loj guiëb reeman guial laaman naj Cristo.

Rugojn Jesús guiëtaman

(Mr. 8:31-9:1; Lc. 9:22-27)

²¹ Diizd naxdel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman. ²² Dxel gulëëcaan Bëd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquil zian!

²³ Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëëd ree xgab ni rüjnl, xixgab bénguidxliujn rüjnl.

²⁴ Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, siibnejzaman guialzi ni tédzaman abi' guidnalaman naj. ²⁵ Din bën mazri rën xguialnaban ni rajpaman loj guidxliujt guie zadxin dxej guníjtaman laan. Per bën guiët por naj, zajpaman guialnaban tiblayaa con Dios. ²⁶ Xhieci gan gap bejn gra ni yu' loj guidxliujt, abi' nitaman loj Dios. Din ad zile't sii bejn xguialnabanman xanyabaa. ²⁷ Abi' Bën guxhaal Dios, gui'taman con xguialrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn. ²⁸ Diidxliczi rnin lojdi guial yu' ree bën riga' guie ad zëjtt reeman chi gad reeman guguiaa Bën guxhaal Dios, gui'taman con xguialrniabeeman din nabeeman.

17

Bidxaa Jesús loj choon ree xbejnman

(Mr. 9:2-13; Lc. 9:28-36)

¹ Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guíjc tijb guia' ya. ² Ni bidxaa Jesús niz loj reeman. Dád balaa bacha' lojman zi'c rulaa gubíjdx bacha', guiáad xabaman bayajcan naquich, balaa tëën bacha' zi'c guíj. ³ Abi' loj hor guin baguiaa reeman Moisejs con Elías cayünë reeman Jesús diidx. ⁴ Dxel rëb Bëd loj Jesús:

—Dad, ¡zagdxe naj nadxu' ree guie! Bal rën, günan choon ranch, tijban par lüj, tijban par Moisejs, stíjban par Elías.

⁵ La'tgaj canee Bëd zian, biguiajt tijb zaj xt guíjc reeman ridiinan bacha', loj zaj guin brii cha' bejn rëbaman:

—Bën guie naj da Xi'nan, bën rën da'tan, bën rabaanë' tëën, gol bacaagdiajg xtiidxaman.

⁶ Chi bigueijn ree xbejn Jesús diidx guin ree, bazuxib reeman basajb loj reeman xt luyuj, dád bidxëb reeman. ⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxëbidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bën guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

¹¹ Badxi' Jesúsán, rëbaman:

—Walican guial yaloj Elías gui't, laaman guzuxnejz gra. ¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bën guxhaal Dios.

13 Dxel gogbee ree xbejnman guial Wajn bën baroobnijs bejn ree cuza'taman.

Rayün Jesús tijb xin rëjtya'
(Mr. 9:14-29; Lc. 9:37-43)

14 Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

15 —Dad, baya da xi'nan, din dád rzagdiajx rëjtya'x. Bëlczí volt riyajbix lojguij o lojnijs ya.

16 Bidnë'n laax loj ree xbejnl, per ad rajct rayün reeman laax.

17 Badxi' Jesúsán, rëbaman:

—jBenguijdx, bën ad rliładxt! ¿Xt goc gazunë'n lëjt? ¿Xt goc gadaanán lëjt? Gol tanë xinzii guie.

18 Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

19 Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

20 Dxel rëb Jesús loj reeman:

—Guial ta'nzi rliładxidi. Naj rni lojdi bal naj xguialrliładxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetzi gac nawëëg par lëjt. 21 Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman
(Mr. 9:30-32; Lc. 9:43-45)

22 La'tgaj za' Jesús niz Galilea con ree xbejnman, rëbaman loj reeman guial yayü reeman Bën guxhaal Dios loj ree bejn, 23 abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

24 Chi badxin Jesús con ree xbejnman guiedx Capernaum, bën ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

25 Badxi' Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

26 Badxi' Bëd laan rëbaman:

—Benzit ree.

Dxel rëb Jesús:

—Abi' ree bën ladx reeman ad rguijxt reeman laan. 27 Per chitëë guidxe'ch reeman, wej ro' nijs, bazaal xiansuëll, dxel bëjl yaloj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

18

¿Chu mazri zobjloj?

(Mr. 9:33-37; Lc. 9:46-48)

1 Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zobjloj lod rniabee Dios?

2 Dxel gurejdx Jesús tijb xindoo, bazujman laax galay reeman, 3 abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tëëdi zi'c tijb xindoo, ad zutidi lod rniabee Dios. 4 Bën güün naya loj Dios, gac tëëman zi'c xindo guie, laaman gac bën mazri zobjloj lod rniabee Dios. 5 Abi' bën yaca' tijb xindoo, por naj, najn raca'man.

Bën rüjn persi ryajb ree bejn loj dol
(Mr. 9:42-48; Lc. 17:1-2)

6 'Bal chu gusajb tijb bën qui rliładxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. 7 jProbza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per jprobza bën gusajb bejn ree loj dol!

8 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tbladzi yaal o con tbladzi guia'l, luar chu'l con groplad yaal o groplad guia'l loj bajl ni ad yu't dxej yayü'. 9 Abi' bal laagajc guiaalojl rusajb lüj loj dol, gulëën bazaalan zijt, zagdxeli chu'l con tbladzi guiaalojl xanyabaa, luar chu'l con gropladan loj bajl yu' gabijl.

Xcwent xtiil gunit
(Lc. 15:3-7)

¹⁰ Ad guiniajgaadi loj ree bèn qui riladxri naj. Din diidxliczi rnin lèjt guial xanyabaa yu' ree anjl rniäj laa reeman zianczi za' reeman loj da Dadan Dios bèn yu' xanyabaa. ¹¹ Guiáad Bén guxhaal Dios zèédaman par ree bèn ad zinalt xnejz Dios din laa reeman loj dol.

¹² ¿Xhie naladxidi? Bal tijb bejn rajp tibgayuu xiil, abi' rizèèb tijbib, ¿nid zusa'nman zatajppajlchiinbitapib dajn ya din chigdiilaman be bizèèb guin? ¹³ Abi' bal yadxejlaman laab, diidxliczi rnin mazri yabaanèman laab guial loj tajppajlchiinbitap be ad bizèèb guint. ¹⁴ Ziangajc dux Dad ree Dios bèn yu' xanyabaa ad rëntaman nit ni'czi tijb ree bèn qui riladxri laaman.

Xhienaag yaguieen perdon du lasa' ree
(Lc. 17:3)

¹⁵ 'Bal xhie tijb ni mal güün lasa'l lüj, guneenèman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenèl laaman zagdxe. ¹⁶ Bal id ridxga'man lüj, binè zatijb o zatio'p bejn, din chigneenèdi laaman din con xtiidx tio'p o choon bejn guiguien guial ma bigneenèl laaman. ¹⁷ Dxel bal ni'qui xtiidx reeman ad ridxga'taman, bagojn ree bèn zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bèn ad riladxt Dios o zi'c tijb bèn ruquijx impuest par Rom.

¹⁸ Diidxliczi rnin, gra ni ad zatièjbtidi gac loj guidxliuj guie ad rajctan xanyabaa, guiáad ni tièbidi gac loj guidxliuj guie mal rajcan xanyabaa.

¹⁹ Rni tèèn lèjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bèn yu' xanyabaa, laaman gunee laan. ²⁰ Din lod rado'p tio'p o choon bejn por naj, laa naj za' galay reeman.

²¹ Dxel gubig Bèd gunabdiidxaman loj Jesús, rëbaman:

—Dad, ¿bèl volt rayal günan perdon lasa'n, bal güünman naj xhienin? ¿Xt gajdx volt ya?

²² Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

Xcwent bèn ad rüjnt perdon lasa'

²³ Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman. ²⁴ Chi guzulojman caybèèman cwent guin, bidxin tijb xmojsaman lojman bèn ral zro' da't. ²⁵ Abi' guial achet rajp bèn guin din yaguixxaman ni ralaman, gunabee rey guin to'man loj ree bejn nè lacheelaman con ree xi'nman nètèè gra ni rajpaman din chile' yaguixxaman di'n guin. ²⁶ Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” ²⁷ Zianz baya rey guin laaman, beenman laaman perdon gra ni ralaman, abi' baslaaman laaman ziaman. ²⁸ Per chi barii mojs guin yagaj, badxajgaman tijb bèn rüjnnèman dxiin, ralaman ta'nzi milia lojman. Dxel gunaazaman laaman guzuloj caguajman yèjnman, rëbaman: “¡Baguixx ni ralil lon!” ²⁹ Dxel bazuxib bèn guin lojman beenman naya rëbaman: “Gojp naj pacens zaguixcan graczi ni ralan lojl.” ³⁰ Per ad guyènt bèn guin, badxe'man laaman ladxguuib xt lodzi yaguixxaman di'n guin. ³¹ Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. ³² Dxel gurejdx rey guin mojs guin, zianz rëbaman lojman: “¡Mojs guijdx! Benan perdon gra ni ralil lon guial beenl naya. ³³ ¿Nid nègajc lüj rayal naya xcompniaril ya, zi'cgajc bayan lüj?” ³⁴ Abi' guial tant balen rey guin, gunabeeman badxe' reeman laaman ladxguuib xt lodzi baguixx gra ni ralaman.

³⁵ Basnuu Jesús rëbaman:

—Ziangajc güünnè da Dadan lèjt, bèn yu' xanyabaa, bal id züjn perdon lasa'di con guidib luxdoodi ni rüjnnè reeman lèjt.

19

Rulüü Jesús xcwent guial rala' lasa'
(Mr. 10:1-12; Lc. 16:18)

¹ Chi gulox gunee Jesús zian, bazaman niz Galilea, zèman niz Judea, niz stiblad ro' guiiw Jordán. ² Zien ree bejn binal laaman, yagaj bayüjnman bènragxuu ree.

³ Abi' tio'p choon ree bènfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

⁴ Badxi' Jesúsán rëbaman:

—¿Nid wayoolidi loj xtiidx Dios ya, guial diidz guia'xchej Dios “been xinguaaw nè bəngunaa”? ⁵ Rëb tèèman: “Zeel xinguaaw gusa'n xdad xniaax din guibannè lacheelix, dxel

grop reex ma gac zi'c tijbzi bejn." ⁶ Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

⁷ Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëédaman gui'ch guial ma bala' lasa' reeman?

⁸ Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diidx guial'xchej. ⁹ Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

¹⁰ Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan. ¹² Yu' bejn diidx rajlaman ad zëëdtaman loj guidxliuj par guxhliaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.

Rüjnle Jesús xindoo ree

(Mr. 10:13-16; Lc. 18:15-17)

¹³ Binë ree bejn xindoo ree lod za' Jesús, din guixhioob yaaman guijc reex cwedx guiniab tëëman Dios por laa reex, per ree xbejnman guzuloj cadilë reeman bën zinë ree laa reex.

¹⁴ Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bën naj zi'c laa reex.

¹⁵ Abi' guxhoob yaa Jesús guijc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxë günan din ga'pan guialnaban tiblayaa con Dios?

¹⁷ Dxel rëb Jesús lojx:

—¿Chexc zeel rniabdiidxil lon conin naj ni zagdxë? Achut naj benza'c, tijbzi Dios. Per bal rën! gapil guialnaban tiblayaa con Dios, been zi'c rëb ree mandamient.

¹⁸ Dxel gunabdiidxix loj Jesús rëbix:

—¿Con ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëël xtiidx bejn, ¹⁹ gojp respejt xdad xniaal, guyën tëë ree lasa'l zi'c rën lüj gajc.

²⁰ Dxel rëbix:

—Gra ree ni guin cayünan diidx najn xindoo, ¿xhieri ryaadx günan yan?

²¹ Badxi' Jesúsán, rëbaman:

—Bal rën! gaquil benza'c loj Dios, bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinrijcwan.

²³ Dxel rëb Jesús loj ree xbejnman:

—Diidxliczi rnin lojdi: Dád nawëëg chu' benrijcw lod rniabee Dios. ²⁴ Naj rni lëjt. Adli nawëëgt tëd tijb camell xan gagux, guial chu' tijb benrijcw lod rniabee Dios.

²⁵ Chi biguiejn ree xbejn Jesús zian, dád badxalój reeman, abi' rëb reeman:

—¿Chuzazajc gac perdon loj Dios?

²⁶ Dxel baguiaa Jesús loj reeman, rëbaman:

—Nawëëg gac zian par bénguidxliuj, per par Dios achet ni nawëëg yu'.

²⁷ Abi' rëb Béd lojman:

—Ma basa'nan graczi ni raya'pan, persi zudnaalan lüj. Abi' ¿xhieza yayalan?

²⁸ Badxi' Jesúsán, rëbaman:

—Diidxliczi rnin lojdi chi guidxin dxej yacüb gra, guidxin tëë dxej cwe Bën guxhaal Dios luar lod nabeeman, në lëjt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel. ²⁹ Abi' gra ree bën basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tëë reeman guialnaban tiblayaa con Dios. ³⁰ Per zien ree bën naj bën yalój, gac reeman bën bigra, abi' zienza ree bën naj bën bigra, gac reeman bën yalój.

¹ Rëb tëë Jesús:

—Xgualrniabee Dios naj zi'c tijb bën rajp tijb guiniaaro', rsildoo briiman zitiilaman mojs güün dxiin loj xguiniaaman. ² Baya'nnëman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. ³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. ⁴ Zianz rëbaman loj reeman: “Gol biguieen dxiin loj da guiniaan, naj gaguix lëjt zi'c rayal.” Dxel zë reeman. ⁵ Cost garol dxej briiman stijb, abi' briei gajman cost raca choon wadxe ziangajc rëbaman loj ree bën riga' yagaj, bën achet xchiin. ⁶ Cost raca gaay wadxe wejman galay luguiedx guin stijb, abi' bidxaaglojman ben ren ree, bën achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” ⁷ Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” ⁸ Chi ma gurej guiaal, rëb bën naj xguiniaan loj bën naaz dxiin guin: “Gurejdx ree mojs guin din guixil laa reeman, per yalojxgaj gudijx ree bën bigra guyu, zianz quixil bën guyu ree yaloj.” ⁹ Chi bidxin ree bën guyu loj dxiin guin raca gaay wadxe, gojx tijbgaj reeman xieen tibdxej. ¹⁰ Dxel chi bidxin ree bën guyu loj dxiin diidx rsil, gunaladx reeman niiajx reeman mazri, per nëgajc reeman gojx xieen tibdxej. ¹¹ Abi' chi cayajx reeman, guzuloj cadxe'ch reeman bën naj xguiniaa laan, ¹² rëb reeman lojman: “Bën bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” ¹³ Per rëb bën guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej?” ¹⁴ Cwa' ni bayalil baguiaj. Din naj rënan gaguixan bën bigratë guyu zi'c gudixan lüj, ¹⁵ zajc günnë' da milian ni rëntzan. ¿O nadëdloj ya guial najn benza'c?” ¹⁶ Zianan zeel bën naj ree bën bigra gac reeman bën yaloj, guiaad ree bën yaloj gac reeman bën bigra.

Bayon volt bagojn Jesús guial guiëtaman
(Mr. 10:32-34; Lc. 18:31-34)

¹⁷ Chi zë Jesús Jerusalén, gurejdx guidxiptio'p ree xbejnman tiblax, rëbaman loj reeman:

¹⁸ —Ganin lëjt, ziyu' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabeë guiëtaman, ¹⁹ yayü reeman laaman loj ree benzit, din guze' reeman laaman quin tëë reeman laaman, abi' gucaa reeman laaman loj crüzj, per yayon dxej yabanman.

Ni gunab xniaa Jacob con Waj
(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënnan. ²¹ Gunabdiidx Jesús lojman, rëbaman:

—¿Xhie rën!

Badxi' bën guinan, rëbaman:

—Rënan nabeel cwe tijb da xi'nman xladbeel, stijbim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tëdidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxliczi rmin zajc tëdidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

²⁴ Chi biguiejn zachii ree xbejn Jesús zian dád balen reeman grop bijch reeman. ²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiaad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. ²⁶ Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi. ²⁷ Ziangajc bën rën gac bën zobjloj lojdi, rayal güünman sirv lojdi zi'c bën nado'. ²⁸ Zi'c Bën guxhaal Dios ad bi'ttaman par güün reeman sirv lojman, bi'ttaman par güünman sirv gudëë tëë xgualnabanman din laa zien bejn loj dol.

Rayüjn Jesús tio'p ree bënlutia'p
(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejnman, dád zien ree bejn binal laaman. ³⁰ Dxel tio'p ree bënlutia'p zobj cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

³¹ Abi' rdilë ree ben guin laa reeman din yacwëez ro' reeman, per mazri ribixdiaj reeman rëb reeman:

—jDad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi gūnan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

21

Ru Jesús Jerusalén

(Mr 11:1-11; Lc. 19:28-40; Jn.12 :12-19)

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, ² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiec reeb gol tanë reeb guie. ³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

⁵ Gol güjdx loj ree bën Sión:

“Gol baguiaa laa xreydi zëëd lojdi, ad zëëdtaman nabë, dxiibaman tijb bur,

tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman, ⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. ⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. ⁹ Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—jBenza'c bendxoon naj xdiaa rey Davi! jNünjle' Dios bën guxhaalaman! jBenza'c bendxoon naj Dios bën yu' xanyabaa!

¹⁰ Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

¹¹ Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

Rabëë Jesús bën ruto' ree lën yadoo Jerusalén

(Mr 11:15-19; Lc. 19:45-48; Jn.2 :13-22)

¹² Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. ¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree ringubaan.

¹⁴ Dxel bën lutia'p ree con ree bencoj bibig reeman loj Jesús lën yadoo guin abi' bayünman laa reeman. ¹⁵ Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguiejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. ¹⁶ Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb:

Lüj badëëd ni gool ree xindoo në ree xindobëz sta ré' dud, dín guilies reex xvaloril.

¹⁷ Dxel basa'n Jesús laa reeman, zëman Betania ni baya'nman guxhin guin.

Tijb yag higo ni gubidx

(Mr 11:12-14, 20-26)

¹⁸ Chi bareguiaal rsil la'tgaj zë Jesús Jerusalén stijb, guzuloj gulaanman. ¹⁹ Abi' baguiaa-man zobj tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—jAd yu'tri dxej tial higo!

Loj hor guin gajc gubidx yag guin. ²⁰ Chi baguiaa ree xbejnman zian, dád badxaloj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliładxidi Dios abi' ad zunawëęgtidi, ad ni bentzan con yag higo guin zajc güündi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian.

²² Gra ni guiniabidi loj Dios, bal rliładxidi laaman, zuneeman laan.

Xgualrniabee Jesús

(*Mr. 11:27-33; Lc. 20:1-8*)

²³ Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. ²⁵ ¿Chu guxhaal Waj chigroobnijsaman bejn ree, Dios ya o bęnguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” ²⁶ Abi'za bal yaguie'ch ree: “bęnguidxliuj guxhaal laaman”, radxeb ree yalen ree bejn din gra reeman rliładx guial Waj naj bën badëed xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

Tijb bën guyu tio'p xi'n

²⁸ Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxę biguieen dxiin loj guiniaa yu' uv.” ²⁹ Badxi'xan, rëbix: “Ad zatan.” Per dxelri bayüjnx xgab zianz wejx. ³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejti. ³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaloj guin.

Dxel rëb Jesús loj reeman:

—Diidxliczi rnin, bën ruquijx ree impuest con ree bęgunaa naban nadxuudx, yalojl laa reeman chu' lod rniabee Dios guial lojdi. ³² Din bi't Waj, bën baroobnijs bejn ree par gulüüman lëjt xhienaag guibandı, per ad bililadxtidi xtiidxaman. Guiád ree bën ruquijx impuest con ree bęgunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxidi laaman.

Xcwent ree mojs guiјdx

(*Mr. 12:1-12; Lc. 20:9-19*)

³³ Rëb tēë Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tēëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

“Zianz badëëdaman laan garol loj ree bën güün dxiin lojn, zëteman zijt. ³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxi reeman ni rayalaman.

³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguaј reeman. ³⁶ Dxel bën naj xguiniaan guxhaalaman mazri ree mojs guial loj ree bën we yaloj, per ziangajc beennë ree bën guin laa reeman.

³⁷ “Ni bigra, guxhaal xi'nman guial gunaladxaman: “Zajpqui reeman da xi'nan respejt.”

³⁸ Per chi baguiaa ree bën guin xi'nman, rëb loj lasa' reeman: “Xin guinan naj xin tia' guidxliuj guin, yagüjt reex din gacan du xieen ree.” ³⁹ Abi' gunaaz reeman laax, babëë reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree bën caneenëman, rëbaman:

—Chi yadxin bën naj xguidxliuj laan, ¿xhie naladxidi güünnëman bën guin ree?

⁴¹ Abi' rëb reeman loj Jesús:

—Ad zayataman gugüjtaman bën guin ree, dxel gudëëman guidxliuj guin garol loj ree ben ren, bën yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bën rüjn yu.

Laan goc ni mazri been sirv gojcnë yu guin.

Laan naj ni been Dios,
abi' dád radxa du loj ree.

⁴³ Zeel rnin lojdi, zariicadi loj xgualrniabee Dios abi' ben ren ree yayu xluaridi, bën wali ree güün zi'c rënman. ⁴⁴ Abi' chutééz bën yab guijc guiaj guin, zarooxaman, guiáad bal yab guiaj guin guijcaman zanidlojman.

⁴⁵ Chi bigueijn ree bixhioz rniabee ree bixhioz con ree bënfarisew guin ni cayü Jesús zi'c cwent, dxel gogbee reeman guial laa reeman cuza'taman. ⁴⁶ Abi' guyën reeman niniaaz reeman laaman, per bidxeb reeman bejn ree guial riladx reeman laaman naj bën rudëéd xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rëbaman:

² —Xgualrniabee Dios naj zi'c tijb rey bën been lanijro' chi baxhliaa xi'nman. ³ Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. ⁴ Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.” ⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, ⁶ yu' tée reeman gunaaz mojs guin ree gudijn reeman laa reeman abi' bagüjt reeman laa reeman. ⁷ Chi gogbee rey guin zian, dád bidxe'chaman. Guxhaalaman bën naj ree xsuldadaman persi bagüjt reeman bën guin ree baze'c tée reeman lidx reeman. ⁸ Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bën gunen ad najt guial ni't reeman. ⁹ Yan, gol wej lod radxaag lasa' ree nejz, gol güjdx loj ree bën guidxaalojtzi din gui't reeman loj guialruxhliaa guin.” ¹⁰ Abi' brii ree mojs guin wej reeman luejz guin ree, bato'p reeman gra ree bën bidxaalojtzi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ 'Per chi guyu rey guin din guguaaman biooz guin ree, baguaaaman tijb bën ad najcwt xab ni rayal gacwaman loj guialruxhliaa guin. ¹² Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb bën guin. ¹³ Zianz rëb rey guin loj ree bën cagui's guialraw: “Gol guxhii guia'x në yaax, gol bazaal téeex xchu lod nacay da't lod goonx gaw tée layix.” ¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree bënfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. ¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniee diidxli, abi' walil rulüül guial xhienaag rën Dios guiban bejn, ad ridxga' téeetil chu naj bejn. Din lojl tiblojz naj bejn. ¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayüjn reeman, abi' rëbaman loj reeman:

—Bën rusquiee, ¿chexc zeel raguüilidi mod xhienaag gutidia'di naj? ¹⁹ Gol balüü tijb cintabl lon ni rguijxnëdi impuest.

Dxel badëéd reeman tijban lojman, ²⁰ abi' gunabdiidx Jesús loj reeman, rëbaman:

—¿Chu loj ca lojn chu tée laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëéd loj César ni naj xieen César, guiáad loj Dios gol badëéd ni naj xieen Dios.

²² Chi bigueijn reeman zian, dád badxaloj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

²⁴ —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhlianë béngunaa bizëjb guin din chu' xi'n reex luar bijchix.

²⁵ Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'nx, dxel bijch barojpix baxhlianë béngunaa guin. ²⁶ Per ziangajc guzajc

xin barojn guin abi' ziangajc guzajc xin bayon guin, xt bagajdx reex guzajc zian. ²⁷ Chi bara reex güjt dxel güjt béngunaa guin. ²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliané laaman?

²⁹ Badxi' Jesúsán, rëbaman:

—jRagdxadi guial ad nünbeetidi xtiidx Dios ad nünbee tēetidi xhienaag naj xguialrniabee-man! ³⁰ Din chi yaban ree bengüt, ad zuxhliaatri reeman ad zudēēd tēetri xi'n reeman guxhliaa, ma gac reeman zi'c ree anjl yu' xanyabaa. ³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb: ³² “Naj naj xDios Abraham, xDios Isaac né xDios Jacob?” Abi' Dios ad najtaman xDios ree bengüt, najman xDios ree bën naban.

³³ Chi biguejn ree bejn zian, dád badxaloj reeman zi'c rulüüman laa reeman.

Mandamient mazri zojbloj

(Mr: 12:28-34)

³⁴ Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. ³⁵ Abi' tijb ree bënfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zojbloj loj gra ree mandamient ni zēēd loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guijc guidib ladxil.” ³⁸ Laan naj mandamient mazri zojbloj. ³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.” ⁴⁰ Con grop ree mandamient guie, ma cayüjn bejn cumplid gra ley bacaa Moisejs né ree ni bacaa ree bën badēē xtiidx Dios loj ree bejn.

Chu loj xdiaa za Cristo

(Mr: 12:35-37; Lc: 20:41-44)

⁴¹ La'tgaj nadxag lasa' ree bënfarisew guin, gunabdiidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bën rniabee naj:

“Gurej da ladbeen, xt gabecan

xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutdzi gojc nadxi' xtiidx Jesús, ni'czi tijb diidx. Abi' diidx dxejzii achutdzi bayax niniabdiidx xhienin lojman.

23

Ni rüjn ree mextr rajc ley né ree bënfarisew

(Mr: 12:38-40; Lc: 11:37-54; 20:45-47)

¹ Rëb Jesús loj ree bejn né loj ree xbejnman:

² —Mextr rajc ree ley con ree bënfarisew rulüü reeman xhie rën guiëb ni ca loj xley Moisejs.

³ Zeel gol bazoob xtiidx reeman, gol been tēē gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman. ⁴ Rniabee reeman güün bejn ni nawēēg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. ⁵ Gra ni rüjn reeman, rüjn reeman laan din yadxaloj bejn laa reeman. Ruladx reeman guixhii lucwaj reeman né xu'c reeman tijb cint ni ca xtiidx Dios loj, ruladx tēē reeman gacw reeman lajd zagdx. ⁶ Ruladx reeman cwe reeman lod rayal rbej ree bën zojbloj, loj tijb guialraw, abi' ziangajc rüjn reeman lën ree yadoo. ⁷ Ruladx tēē reeman gugajpdioz bejn laa reeman zagdx. ⁸ Ruladx tēē reeman loj reeman mextr.

⁸ Per lëjt ad sēēbladxidi guinee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. ⁹ Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. ¹⁰ Ad güün tēēdi nagüiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. ¹¹ Bën mazri zojbloj lojdi, laaman rayal güün sirv lojdi. ¹² Din bën rlies xvalor gajc achet lasajcaman. Guiáad bën rüjn naya, zajs xvaloraman.

¹³ jProbza lëjt mextr rajc ley né lëjt bënfarisew, bën rusquiee!, ad rtiëjtidi gagbee ree bejn xhienaag din gac reeman xbejn Dios, ni'quiza lëjt ad rüjntidi nagüiejn gaquidi xbejn Dios, abi' rudxoondi gac xbejn Dios bën rën ree gac xbejnman.

¹⁴ 'iProbza lëjt mextr rajc ley në lëjt bënfarisew, bën rusquiee!, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

¹⁵ 'iProbza lëjt mextr rajc ley në lëjt bënfarisew, bën rusquiee!, zizadi guidibdoos rguilidi bën gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

¹⁶ 'iProbza lëjt, bénlutia'p!, rëbidi: "Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman." ¹⁷ 'iNatontidi, wed natia'p lojdi! ¿Conin mazri lasajc: Or guin ya o yadoo beenle' or guin? ¹⁸ Rëb tëëdi: "Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman." ¹⁹ 'iBénlutia'p! ¿Conin mazri lasajc par lëjt: Gon guin ya o altar beenle' gon guin? ²⁰ Bén ruza't altar guin ad altar guintzan ruza'taman, nëgajc gra ni dxiib lojn ruza'taman. ²¹ Guiáad bën ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. ²² Abi' bën ruza't xanyabaa, Diosan ruza'taman në lod zojbaman.

²³ 'iProbza lëjt mextr rajc ley në lëjt bënfarisew, bën rusquiee!, rbëecadi bidxtil, anís nëtëë comin ni rayal gudëedi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëëti loj xnejz Dios. Laa reen rayal güündi, per ad cwëëlaxidi gudëedi ni rayal loj Dios. ²⁴ 'iBénlutia'p, rajpidi cudad chitëë guiëbidi tijb bizëdlajs, abi' rgujëjbidi tijb camell!

²⁵ 'iProbza lëjt mextr rajc ley në lëjt bënfarisew, bën rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaaan nëtëë guialrdxe'ch lasa'. ²⁶ 'iBënfarisew lutia'p: Yalojxgaj gol basia, zian guiguien waliquidi nayadi loj Dios!

²⁷ 'iProbza lëjt mextr rajc ley në lëjt bënfarisew, bën rusquiee!, najdi zi'c baa nayë' color naquich, guijcan rguien nix da't, per lënan guidxa ree dxijjt bengüt në graloj ree ni dxuudx. ²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

²⁹ 'iProbza lëjt mextr rajc ley në lëjt bënfarisew, bën rusquiee!, rüjndi xbaa ree bën badëë xtiidx Dios loj ree bejn, abi' rüjnchaawidi xbaa ree bën goc benza'c, ³⁰ dxel rëbidi: "Bal nabajnan xtiamp ree dux béngulalan, ad nët dunujn nagüjt bën badëë ree xtiidx Dios loj ree bejn." ³¹ Abi' con ni guin ree, rayünbeegajquidi guial loj xdiaa bën bagüjt ree bën badëë xtiidx Dios loj ree bejn zëëdidi. ³² 'iGol baloozza ni guzuloj been xbéngulalidi!

³³ 'iBëndol, xi'n xindxab! ¿Xhienaag laadi loj castiro' ni yu' gabijl? ³⁴ Zeel gaxhalan lojdi bën gudëë ree xtiidx Dios, bën rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tëë reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin. ³⁵ Zianan zeel guijquidi yab xtol gra ree bën bagüjt bën goc ree benza'c diizd Abel bën guban xnejz loj Dios xt Zacarias xi'n Berequias, bën bagüjt reeman lule' yadooro' Jerusalén. ³⁶ Diidxliczi rnin lëjt, xcasti gra ree ni guin yab guijc ree bën riga' loj guidxliuj yan.

Roon Jesús por Jerusalén
(Lc. 13:34-35)

³⁷ Rëb tëë Jesús:

—iBén Jerusalén, bën Jerusalén, rugüjtidi bën rudëë ree xtiidx Dios loj ree bejn abi' rucaaguiajdi bën rxhiaal Dios lojdi! iBélci volt guyënan nuchagan lasa'di, zi'c rüjn tijb guid ruchajj lasa' ree xi'nb lën xhiilib, per ad gutiëjbtidi! ³⁸ Zianan zeel yaya'n ladxidi zi'c tijb guiedx lod achut zojb. ³⁹ Abi' rnin lëjt diizd yan ad zuguaatriddi naj, xt chi guidxin dxej guiëbidi: "iNüjnle' Dios bën guxhaalaman!"

24

Rëb Jesús guialyaze'n yadooro'
(Mr. 13:1-2; Lc. 21:5-6)

¹ Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. ² Abi' rëb Jesús loj reeman:

—Diidxliczi rnin, gra ni cuguiaadi yu' dxej ni'qui tijb guiaj guin ad zaya'nt guijc stjiban, gran yaze'n.

Ni gac chi gad guidxliuj nit
(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt. ⁵ Din zien ree bejn gui't guiëb reeman guial por naj zëéd reeman, guiëb tëë reeman: “Naj naj Cristo”, abi' zien bejn gusquiee reeman. ⁶ Per lëjt chi guiguiejndi cayej wadijl o zëëb diidx guial gac wadijl, ad guidxebidi din zian naj gac. Per ad wadxint dxej nit guidxliuj. ⁷ Din til nacion con stijb nacion, në bën rajp gualrniabee con stijb bën rajp gualrniabee. Abi' gui't xudoxh në gubijn niz ni niz guie. ⁸ Gra ree nine ree gac chi ma suloj gualzi guin.

⁹ Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan. ¹⁰ Chi gac zian zien ree bejn gusa'n gualrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman. ¹¹ Gui't tëë zien ree bën gusquiee, guiëb reeman guial rudëéd reeman xtiidx Dios, abi' zien bejn gusquiee reeman. ¹² Abi' guial dád zien ni mal gac, zien da't bën ad zëntri ree lasa'. ¹³ Per bën sudxi'ch loj gualrliladxaman naj, xt dxej chigra guibanman, laaman yayal xanyabaa. ¹⁴ Abi' xtiidx Dios ni canin lëjt yan guire'chan guidibczy guidxliuj din gagbee gra bejnan, dxelri nit guidxliuj.

¹⁵ Zianan zeel chi guguaadi zojb tijb ni dxuudx, ni ad rüjnt sirv lën yadooro' Jerusalén, zi'c guneé Daniel bën badëé xtiidx Dios loj ree bejn (bën gool gui'ch guie ree, gol bignia'), ¹⁶ guial bën zojb ree Judea rayal guxüün reeman che reeman dajñ. ¹⁷ Guiaád ree bën yë'p guijc yulidx dxejzii, ad yayu lëñüldx reeman par tia' xhie xieen reeman. ¹⁸ Abi' ree bën za' dajñ, ad yayejc reeman chigxi' xab reeman. ¹⁹ ¡Proba ree béngunaa nüü xi'n o bën ca' ree xindobëz lën ree dxejzii! ²⁰ Gol gurejdx gunab Dios chitëë gac zian tiamp nyaag o dxej raziiladx ree bejn ya. ²¹ Din nadxel dád gualziro' chu', zi'c ad wayajctzi diidx guia'xchej chi gad guidxliuj gacchaaw ad yu' tëët dxej gac zian. ²² Abi' bal id Dios gucwëëz gualzi chu' lën ree dxej guin, ni'qui tijb bejn ad zalaat, per gucwëëzaman laa reen por ree bën guleman.

²³ Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. ²⁴ Din zi't zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëéd xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bën gulej Dios gusquiee reeman. ²⁵ Ma rni xgajñ lojdi ni gac. ²⁶ Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lëñü ni”, ad bal chililadxidi. ²⁷ Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb. ²⁸ Bén rliladx ree naj gui't reeman lon, zi'c chi rado'p ree golbich lod naga' tijb begüt.

Gui't Bén guxhaal Dios stijb

(Mr 13:24-37; Lc 21:25-33; 17:26-30, 34-36)

²⁹ Chi ma gudëd ree dxej ni gac ree gualzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib. ³⁰ Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguaa reeman Bén guxhaal Dios, rdiinman bacha' zëëdaman loj zaj con xgualrniabeeman. ³¹ Dxel guixhaal ree xianjlanan, abi' rejs da't gucwëjdx reeman trompejt, din yadxajg lasa' ree bën guleman, bën za' ree gralad guidiblagaa guidxliuj.

³² Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëéd tiamp nalaa. ³³ Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. ³⁴ Diidxliczi rnin lëjt guial gra ree ni guin gac chi gad ree bën naban yan guiët. ³⁵ Guidxliuj në xanyabaa zanijt reen, per da diidxan ad zanijttan.

³⁶ Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ Zi'c goc gual chi guban Noé, zian gac chi yaguaad Bén guxhaal Dios. ³⁸ Din chi gad Dios guixhaal guidaoxh loj guidxliuj, bejn ree, raw reeman, rë' reeman, ruxhliaa reeman, rudëé tëë xi'n reeman ruxhliaa, xt chi bidxin dxej guyu Noé lën barcwro' ni beenman. ³⁹ Abi' ad bidxgatzi reeman, dxejlczi gol guidaoxh abi' zinë nijs laa reeman, ziangajc gac chi yaguaad Bén guxhaal Dios. ⁴⁰ Dxej guin, lod za' tio'p ree xinguaaw dajñ, tijbix yaza, stijbix yaya'n. ⁴¹ Guiaád lod cayojt tio'p ree béngunaa, tijbaman yaza, stijbaman yaya'n.

⁴² Zeel gol guzujsin din ad ragbeetidi xhie dxej yaguaad xDadidi. ⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatëjbtaman chu' xingubaan guin lidxaman. ⁴⁴ Zianan zeel gol guzujsin, din ad ragbeetidi dxejlczi yaguaad Bén guxhaal Dios.

*Mojs za'c në mojs guiidx
(Lc. 12:41-48)*

⁴⁵ 'ĶChu lĕjt naj zi'c tijb mojs rusa'n xpatronx lidxaman din gulenx gra ree mojs, gudĕĕ tĕĕx ni gaw reeman chi gal hor? ⁴⁶ Xiquilbaa mojs cayĭjn dxiin zi'c rayal chi yadxin xpatronx. ⁴⁷ Din diidxliczi'c rnin lĕjt, patron guin zusa'n gra xieenman loj mojs guin. ⁴⁸ Per bal naj mojs guin mojs dxuudx, naladxix: "Zaglaari da patronan." ⁴⁹ Zianz suloj gusagzix los demazri ree mojs guin, suloj gawix, guiĕ'nĕ tĕĕx xingu' ree. ⁵⁰ Abi' yadxin xpatronx tijb dxej ni ad ragbeetix ad rbĕz tĕĕtix laaman. ⁵¹ Dxel dád castiro' gudĕĕd patron guin laax, guixhiaal tĕĕman laax lod rayal ree bĕn rusquiee, lod goonx gaw tĕĕ layix.

25

Xcwent chii biinxdüb

¹ Basnuu Jesús rĕbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilĕz reem xin cuhxhliaa guin. ² Gaay reem been xgab xhie güün reem, per za gaay reem ad beent xgab. ³ Biin ad beent ree xgab guin binĕ xguij reem per ad binĕt reem mazri sejt ni che'cnĕ ree guij guin. ⁴ Guiáad ree biin been xgab guin xhie güün reem, binĕ reem za tib lumejt'gaj sejt con xguij reem. ⁵ Abi' guial goglaa badxin xinruxhliaa guin, bi't bacaal loj gra reem, abi' goodyĕjs reem. ⁶ Cost garol guiaal, biguien cha' tijb bejn rĕbaman: "ĶLaa xinruxhliaa guin ma ziaad, gol tagchaaglojxi!" ⁷ Dxel bixche gra ree biinxdüb guin, abi' beenchaaw xguij reem. ⁸ Abi' gaay ree biin ad beent xgab guin xhie güün reem, rĕb reem loj za gaay biin been xgab guin: "Gol baneesii tibda'n xsejtidi, din dux guiyn ma cayü' reem." ⁹ Per badxi' reemin rĕb reem: "Yajqui, din dool ad zadaantan par lĕjt ni'qui par dunujn. Zagdxeli gol wĕj lod rdo'n din siidan par lĕjt gajc." ¹⁰ Abi' la'tgaj zĕ reem zisii reem sejt, bidxin xinruxhliaa guin, abi' za gaay ree biin been xgab guin guyunĕ reem laax loj guialruxhliaa guin dxel bida'cw ro' port. ¹¹ Dxel chi badxin za gaay biin bisii ree sejt guin, rĕb reem: "ĶDad, dad, guxhal din yadxu'n!" ¹² Per badxi'xaban rĕbix: "Diidxliczi'c rnin, ad nünbeetan lĕjt."

¹³ Dxel basnuu Jesús rĕbaman:

—Zeel gol guzusin din ad ragbeetidi goc yaguaaad Bén guxhaal Dios.

Xcwent bĕn badĕĕd milia

¹⁴ Dxel rĕb tĕĕ Jesús:

—Xguialrniabee Dios naj zi'c tijb bĕn ma grii cheman zijt, abi' gurejdx ree xmojsaman, basa'n xmiliaman loj reeman. ¹⁵ 'Loj tijbaman badĕĕman gaay mil cintabl, loj zatijbaman badĕĕman zatio'p milan, guiáad loj zatijbaman badĕĕman za timilan. Loj tijbgaj reeman badĕĕdaman ni naladxaman zajc güünĕ reeman dxiin, dxel briitaman zĕman zijt. ¹⁶ Abi' mojs cwa' gaay mil cintabl guin beennĕman laan dxiin abi' beenman gan za ziant gajcan. ¹⁷ Ziangajc been mojs cwa' tio'p milan, beenman gan za tio'p mil gajcan. ¹⁸ Per mojs cwa' timil cintabl guin bitĕĕnman luyuj persi baquie'chaman cintabl guin ni badĕĕd xpatronman.

¹⁹ 'Gojc xchej da't dxel badxin patron guin abi' babĕĕman cwent con la reeman. ²⁰ Yaloj bidxin mojs cwa' gaay mil cintabl guin abi' bayüman zagaay milan, rĕbaman: "Dad, lĭj baneĕ gaay milan lon, yan, laa za gaay milan guie ni benan gan." ²¹ Dxel rĕb patron guin lojman: "Zagdxen, mojsza'c, zagdxĕ beenl, guial zagdxĕ beenl con tibda'n ni banen, yan, gunen mazri guial loj ni banen. Guyu, babaa con naj." ²² Zianz bidxin mojs cwa' zatio'p mil cintabl guin rĕbaman: "Dad, lĭj baneĕ tio'p milan lon, yan, laa zatio'p milan guie ni benan gan." ²³ Dxel rĕb patron guin lojman: "Zagdxen, mojsza'c, zagdxĕ beenl, guial zagdxĕ beenl con tibda'n ni banen, yan, gunen mazri guial loj ni banen. Guyu, babaa con naj."

²⁴ Per chi bidxin mojs cwa' timil cintabl guin, rĕb loj xpatronman: "Dad, naj ragbee guial ad rayatil bejn, rabĕĕl guialnaza'c lod ad rgu'til bin, rato'p tĕĕl guialnaza'c lod ad rtie'chtil bin. ²⁵ Zeel bidxeban abi' biquiechan xmilial lĕn liuj, yan, laa xmilial guie." ²⁶ Badxi' patron guinan, rĕbaman: "Mojs mal, mojs ploj, bal ragbeel rabĕn guialnaza'c lod ad rgu'tan bin, ratop tĕĕn guialnaza'c lod ad rtiechtan bin. ²⁷ Adil nilu' da milian lĕn bancw, din chi naguialan naca'nan con xi'nan ni beenan gan." ²⁸ Dxel rĕb patron guin loj ree bĕn za' yagaj: "Gol biquied timil cintabl guin lojx, gol badĕĕdan loj xin rajp chii milan. ²⁹ Din bĕn rajp zaca'man mazri, abi' gapaman zro' da't, per bĕn rajp ta'nzi, xt ni rajpaman chiquied lojman. ³⁰ Abi' mojs ad rĭnjt sirv guin gol bazaalix xchuni lod nacay, lod goonx, lod gaw tĕĕ layix."

Xguialguxtis Jesús

³¹ 'Chi gui't Bén guxhaal Dios, gui'taman con xguialrniabeeman, në con gra ree xi-anjlaman din cweman lod nabeeman. ³² Dxel gra ree bĕnguidxliuj yado'p lojman, abi'

cweman laa reeman zi'c rüjn tijb bén rajp xiil chi rabëecaman xiil ree loj ree dxib. ³³ Abi' guzujman bén naj ree xbejnman xladbeeman, guiáad ree bén ad najt xbejnman guzujman xladruvejsaman. ³⁴ Dxel guiëb rey guin loj ree bén za' xladbeeman: "Gol guda bén ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. ³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan. ³⁶ Chi byaadx da xaban, lëjt baneedi ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj." ³⁷ Dxel guiëb ree bén za' ladbee guin: "Dad, ¿goc baguiaan lüj rliaanl, abi' baneeni ni gudawil?, ¿o goc baguiaan lüj we'quill nijs, abi' baneeni nijs gu'l?" ³⁸ ¿Goc baguiaan lüj zizal zi'c tijb benzit, abi' baneeni lod baya'n, o goc biyaadx xabil, abi' baneeni ni gotil? ³⁹ ¿Abi' goc baguiaan lüj ragxuul, o guyul ladxguiib, abi' budganajn lüj?" ⁴⁰ Dxel guiëb rey guin loj reeman: "Diidxliczi rnin lojdi, gra yudar beendi da bejn reen majsi ad najt reeman bén lasajc, najn beendi yudar."

⁴¹ Dxel guiëbaman loj ree bén za' xladruvejsaman: "Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx. ⁴² Din chi gulaanan, ad baneetidi ni niawan, chi we'can nijs, ad baneetidi ni nië'n. ⁴³ Chi bizaan zi'c benzit, ad baneetidi lod naya'nan, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajti naj." ⁴⁴ Dxel guiëb reeman lojman: "Dad, ¿goc baguiaan lüj rliaanl o re'quill nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?" ⁴⁵ Abi' yadxi'man laan guiëbaman: "Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bén lasajc, najn ad beentidi yudar." ⁴⁶ Laa reeman yayal loj casti tiblyayaa, guiáad ree bén been zi'c rayal, laa reeman rayal guialnaban tiblyayaa con Dios.

26

Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn. 11 :45-53)

¹ Chi gulox gunee Jesús diidx guin ree, dxel rëb loj ree xbejnman:

² —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüzj.

³ Lën ree dxejzii badxaag lasa' ree bixhioz rniabee ree bixhioz, con xguxtis ree bén Israel, lidx Caifás quijb bixhioz zojbloj. ⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. ⁵ Per rëb reeman:

—Ad zaguieent ree zian loj lanij guin chitëë gac naquie' luguiedx guin.

Ruroob tijb béngunaa perfum guijc Jesús

(Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bén rniee reeman Leproso, ⁷ bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojb Jesús xan mex, baroobaman perfum guin guijc Jesús. ⁸ Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? ⁹ Zile' nido'n zro' da't din nünjan yudar bénprob ree.

¹⁰ Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxe naj ni beenman naj. ¹¹ Din bénprob guin ree zianczi za'në reeman lëjt, sa'n naj ad ziantczi gazunë'n lëjt. ¹² Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. ¹³ Diidxliczi rnin, bantëéz guin guire'ch xtiidzxa'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, ¹⁵ rëbaman loj reeman:

—¿Plac guneedi din yanen Jesús lojdi?

Abi' badëëd reeman gajlbichii milia plajt lojman. ¹⁶ Diizd dxejzii guzulojman raguuilaman mod xhienaag yayüman Jesús.

Gudawnë ree xbejn Jesús xche

(Mr. 14:12-25; Lc. 22:7-23; Jn. 13 :21-30; 1Co. 11 :23-26)

¹⁷ Dxej ni guzuloj lanij ni raw ree bejn guidxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

¹⁸ Badxi' Jesúsán rëbaman:

—Gol chej Jerusalén lidx Bén guin, gol biguiedx lojman: “Na Mextr: Ma bidxin xihoraman abi' rênman tédaman pascw lidxil con ree xbejnman.”

¹⁹ Dxel been ree xbejnman zi'c rëbaman, been tëë reeman ni gaw reeman guxhin lanij pascw.

²⁰ Chi gure guiaal, zojb Jesús xan mex con guidxiptio'p ree xbejnman. ²¹ Abi' la'tgaj cayaw reeman, rëbaman loj reeman:

—Diidxiczi rnin, tijb gajc lëjt yayü naj.

²² Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

²³ Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. ²⁴ Walican, Bén guxhaal Dios naj guiaal sacaman zi'c rëb loj xtiidx Dios. Per iprobza Bén yayü laaman!, zagdxeli naj par laaman ad niutaman loj guidxliuj.

²⁵ Dxel Judas Bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

²⁶ La'tgaj cayaw reeman, cwa' Jesús guidxttil, badëédaman quixtëë loj Dios. Dxel gula'man guidxttil guin gudi'saman laan loj ree xbejnman, rëbgajman:

—Gol gudaw guidxttil guie, laan naj da cuerpan.

²⁷ Dxel cwa'man tib cojp vin, chi gulox badëédaman quixtëë loj Dios, badëédaman cojp guin loj reeman, rëbgajman:

—Gol gu' gradi loj cojp guie. ²⁸ Din laan naj da rejnán ni gaxhie'n chi guiëtan por zien ree bénguidxliuj. Din por da gualgüjtan guixal tijb nejz cüb xhienaag gap ree bejn perdon loj Dios por xtol reeman. ²⁹ Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

Rëb Jesús guiaal guiëb Bëd ad nünbeetaman laaman

(Mr. 14:26-31; Lc. 22:31-34; Jn.13 :36-38)

³⁰ Chi gulox biil reeman tijb cant par Dios, dxel zë reeman guijc guia' Olivos. ³¹ Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan Bén rajp ree xiil, dxel guire'ch ree xiil guin.” ³² Per chi yabanan, yaløj naj ganeed ga gajn Galilea dxelri gui'tidi.

³³ Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

³⁴ Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guiaal ad nünbeetil naj.

³⁵ Abi' rëb Bëd lojman:

—Majsi guiëtnë'n lüj, per ad yu't dxej guiën guiaal ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemani

(Mr. 14:32-42; Lc. 22:39-46)

³⁶ Chi bidxin Jesús con ree xbejnman tijb luar la Getsemani, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

³⁷ Dxel zinëman Bëd con grop ree xi'n Zebedeo, zianz guzuløj cayunayaman abi' ad nixtri yu' luxdooman. ³⁸ Zianz rëbaman loj reeman:

—Dád yu'naya luxdoon, rulüü ma gugüjt gualyu'naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj gualzi ni gadëëdan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? ⁴¹ Gol batie'ch xbacaalidi gol gurejdx gunab tëë Dios, chitëë güün xindxab lëjt gan, din rënquidi güüdi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' téd gualzi ni naj gadëëdan, bal rüjn naguiejn gadëëdan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. ⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. ⁴⁵ Chi badxinman lod za' ree xbejnman, rëbaman loj reeman: —¿Sta naga'yëjsidi ya, cayziiladx tëëdi? Guiaad Bén guxhaal Dios ma bidxin hor yayü reeman laaman loj ree béndol. ⁴⁶ Gol bixche, yo' ree, gol baguiaa laa bén yayü naj ma zëëd gajxh.

Gunaaz reeman Jesús

(Mr. 14:43-50; Lc. 22:47-53; Jn. 18 :2-11)

⁴⁷ Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidxinneëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree Bén Israel laa reeman. ⁴⁸ Abi' Judas bén bayü laaman mal rëbxgajman loj ree bén guin: “Bén gawan xid xhagj, laaman raguuilidi, gol gunaazaman.” ⁴⁹ Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhagjaman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

⁵¹ Per tijb ree bén za'në Jesús yagaj, gulëë xiespadaman dxel gutü'man guidiagj xmojs quijb bixhioz zobjloj. ⁵² Dxel rëb Jesús lojman:

—Bagu'chaaw xiespadil xluaran. Din bén rdil con espad, con espad rëjtaman. ⁵³ ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj? ⁵⁴ Per ¿xozza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

—¿Chexc zeel zëëdidi con espad në con yag din guiniaazidi naj zi'c tijb xingubaa? Guixie guixie guzunë'n lëjt lën yadooro' Jerusalën balün lëjt xtiidx Dios, abi' ad gunaaztidi naj. ⁵⁶ Per gra ree ni guie cayajc din gac cumplid ni bacaa ree Bén badëë xtiidx Dios loj ree bejn.

Loj hor guin gajc baxüün ree xbejn Jesús, guro'nldax reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn. 18 :12-14, 19-24)

⁵⁷ Bén gunaaz ree Jesús binë reeman laaman lidx Caifás, quijb bixhioz zobjloj, yagaj badxaag lasa' ree mextr rajc ley con ree xguxtis ree Bén Israel. ⁵⁸ Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman Bén rajp ree lidx bixhioz guin, din guguaaman xhie güünnë ree Bén guin Jesús.

⁵⁹ Guiaad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiëtaman. ⁶⁰ Per ad radxejl't xhienaag gutedia' reeman laaman majsi zien ree Bén basquiee. Dxel bibig zatü'p reeman, ⁶¹ rëb reeman:

—Bén guie rëb: “Zile' yase'n nan xyadoo Dios abi' loj choon dxejzi yayüunan.”

⁶² Dxel guzuli quijb bixhioz zobjloj guin, rëbaman loj Jesús:

—¿Nid zadxi'lan ya? ¿Waliqini ni canee ree Bén guin contr lüj ya?

⁶³ Per achet rëb Jesús. Dxel rëb bixhioz guin lojman:

—Por Dios Bén naban, rniabeen lüj guna diidxli. Guna bal lüjn naj Cristo, Xi'n Dios.

⁶⁴ Badxi' Jesúsán rëbaman:

—Waliquil. Rni tëën lëjt, zuguaadi Bén guxhaal Dios zobjbaman xladbee Dios Bén rajp guialrniabee abi' zuguaa tëëdi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rëbaman:

—Diosan canee guijdx Bén guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rnieeguixdxaman Dios. ⁶⁶ Yan, ¿xhie nadi?

Badxi' ree Bén guinan rëb reeman:

—Ryal guiëtix.

⁶⁷ Dxel bacojp xhiejn reeman lojman, gudijn reeman laaman, yu' tëë reeman wëëz ro'man, ⁶⁸ rëb reeman lojman:

—Bal lüjn naj Cristo, guneeya' chu gudín lüj.

Rëb Bëd ad nünbeetaman Jesús

(Mr. 14:66-72; Lc. 22:56-62; Jn. 18 :15-18, 25-27)

⁶⁹ La'tgaj zobj Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, Bén Galilea.

⁷⁰ Per Bëd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguiaa stijb biin rÿjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

⁷² Per Bëd gurexuuman stijb, xt baza'taman Dios, rëbaman:

—Ad nünbeetan bën guin.

⁷³ Dxel ad gojct xhej, gubig ree bën riga' yagaj loj Bëd, rëb reeman lojman:

—Laa rguien gajc në lÿj naj xbejn reeman, din zi'cgajc rniee reeman rnieel.

⁷⁴ Per Bëd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guïd. ⁷⁵ Abi' basaaldxaman guial rëb Jesús lojman: “Chi gad guïd cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

27

Binë reeman Jesús loj Pilato

(Mr. 15:1; Lc. 23:1-2; Jn. 18 :28-32)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. ² Dxel guxhii reeman laaman abi' binë reeman laaman loj gobernador Pilato.

Gÿjt Judas

³ Dxel Judas, bën bayü Jesús, chi baguiaaman guial ma naj guiët Jesús, gyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, ⁴ rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, jÿj gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxë' ree milia guin lën lod ru gon, din con laan bio' bën guiët.

⁷ Dxel be reeman diidx, abi' con milia guin guzii reeman xguidxliuj bën rÿjn trast bajn ree, din gacan lod guiguie'ch ree benzit. ⁸ Zeel xt yan la guidxliuj guin Yuj Rejn. ⁹ Zian gojç cumplid ni gunee Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, ¹⁰ abi' con milia guin guzii reeman xguidxliuj bën rÿjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn. 18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lÿjn naj xrey ree bën Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetçzi radxi'man. ¹³ Dxel rëb Pilato lojman:

—¿Nid riguejnl gra ni canee reeman contr lÿj ya?

¹⁴ Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn. 18 :38-19:16)

¹⁵ Lën ree dxej lanij, ruslaa gobernador Pilato tijb bën yu' ladxguuib bën guiëb ree bënguiedx guin laa, zi'c naj xcostumbr reeman. ¹⁶ Lën ree dxejzii yu' Barrabás ladxguuib, tijb bën nünbee ree bejn niz ni niz guie. ¹⁷ Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bën rëb ree bejn naj Cristo?

¹⁸ Rëbaman zian guial gogbeeman ganaxzi guialnadëdlojn zeel bayü reeman Jesús.

¹⁹ La'tgaj zojç Pilato lod rÿjnman guialguxtis, bidxin xruson lacheelaman, rëbaman lojman: “Adxhie güünnël bën guin achet dol rajpaman, din dád nadxuudx gunë'xchalan laaman nuche.”

²⁰ Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman. ²¹ Gunabdiidx Pilato loj reeman stíjb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

²² Abi' rëb Pilato loj reeman:

—¿Xhieza günnë'n Jesús, bën rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

²³ Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

²⁴ Chi baguiaa Pilato guial achet ríle' güünman, al mazri naquie' cayüjn ree bën guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bën guie, xcwentidan.

²⁵ Badxi' gra ree bën guinan rëb reeman:

—¡Du gujcan, në guicj du xi'nán cwiban guial guiëtaman!

²⁶ Dxel baslaa Pilato Barrabás, zianz gunabeeman gudíjn reeman Jesús abi' bayüman laaman din gucaa reeman laaman loj crüjz.

²⁷ Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. ²⁸ Dxel gulëë reeman xabaman bascajcw reeman laaman tíjb lajd xnia. ²⁹ Abi' beenchaaw reeman tíjb coron guiëjch badxe' reeman laan gujcaman, zianz бага's reeman tíjb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bën Israel!

³⁰ Abi' rucojpp xhiejn reeman lojman, laagajc tëë yag ni ca'man rugaz reeman gujcaman.

³¹ Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn. 19 :17-27)

³² Chi zinë reeman Jesús, badxaagloj reeman tíjb bën Cirene, laman Simón, abi' been reeman laaman naguiejn byaaman xcrüjz Jesús.

³³ Chi bidxin reeman tíjb luar la Gólgota (rën guiëban Xluar Calaver), ³⁴ ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

³⁵ Chi gulox bacaa reeman laaman loj crüjz, dxel gudxíjt reeman suert guicj xabaman din yala' reeman laan. ³⁶ Dxel gurej reeman yagaj din gap reeman laaman. ³⁷ Abi' guicj crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

³⁸ Në tio'p xin gubaan bacaa reeman loj crüjz, tíjbix xladbee Jesús stíjbix xladruvejsaman. ³⁹ Abi' ree bën rdëd, rnieeguijdx reeman Jesús, runij guicj reeman, ⁴⁰ rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

⁴¹ Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

⁴² —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguaíjtix loj crüjz guin, din yaliladx reex. ⁴³ Rililadx Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

⁴⁴ Abi' nëgajc ree xingubaan ca cwë'man ruze' laaman.

Güjt Jesús

(Mr. 15:33-41; Lc. 23:44-49; Jn. 19 :28-30)

⁴⁵ Dxel diízd garol dxej bicajy loj guidib guidxliuj, xt raca choon wadx. ⁴⁶ Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëëladxil naj?

⁴⁷ Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

⁴⁸ Laa baxütin gajc tíjbaman bicajdxaman tíjb xiil loj vinagr, abi' bacaaman laan loj tíjb yag zianz badxigaman laan ro' Jesús din guië'man laan. ⁴⁹ Per rëb los demazri reeman:

—Basa'nx, din yaguaiaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel güjtaman. ⁵¹ Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tää ree guiajro'. ⁵² Guiáad ree baa bixal reen, abi' zien ree bejn bén naj xbejn Dios, bén ma güjt ree baban. ⁵³ Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bén guin.

⁵⁵ Zien ree béngunaa guzanal Jesús diizd Galilea, bén been tää ree laaman yudar, za' reeman zijt ruguiaa reeman ni cayajc. ⁵⁶ Loj reeman no'ch María Magdalena, në Li xniaa Santiaaw con Xiëb nētëë xniaa ree xi'ngaan Zebedeo.

Biguie'ch Jesús

(Mr. 15:42-47; Lc. 23:50-56; Jn. 19 :38-42)

⁵⁷ Chi gure guiaal, bidxin tijb benrijcw laman Xiëb, bén Arimatea, në laaman binal Jesús. ⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. ⁵⁹ Abi' cwa'man cuerp guin batüübaman tijb lajd naya. ⁶⁰ Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. ⁶¹ Abi' zojb María Magdalena con stijb bén la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato, ⁶³ rëb reeman lojman:

—Dad, rasaaduladxn, chi ziz naban bén rusquiee ni, rëbaman guial chi gac choon dxej yabanman. ⁶⁴ Zeel gunabee guiyaawdx'i'ch ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdx'i'ch ro' baa guin zi'c rëndi.

⁶⁶ Abi' zë reeman, dxel basiaawdx'i'ch reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn. 20 :1-10)

¹ Chi gudëd dxej razililadx ree bejn, bareguiaal chidumingw, María Magdalena con stijb bén la gajc Li biquiaa reeman ro' baa guin. ² Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biguedaman guiaj nayaaw ro'n, zianz gurejman guijcan. ³ Dád rliajman bacha' zi'c chi rë'p nijs, guiáad xabaman naquichbëjn. ⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. ⁵ Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús bén cwa loj crüjz. ⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman. ⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tää reeman, ruxüün reeman zia reeman zicojn reeman xbejn Jesús. ⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudüidx reeman guia'man, ¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. ¹² Dxel wej ree bixhioz rniabee guin bigneenë reeman guxtis Israe'l ree persi baya'n reeman diidx xhie güün reeman. Abi' dad zro' milia badëed reeman loj ree suldad guin, ¹³ rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” ¹⁴ Abi' bal gagbee gobernador, dunujn yaneenë' laaman chitëë xhie güünëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

*Rxhial Jesús bën naj ree apóstoles
(Mr. 16:14-18; Lc. 24:36-49; Jn.20 :19-23)*

¹⁶ Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. ¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. ¹⁸ Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. ¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, ²⁰ gol balüü tää reeman din guzoob reeman diidx gra ni ma rnin lëjt. Abi' naj gazuné' lëjt gradxejczy xt chi nit guidxliuj. Amén.

Xtiidxza'c Jesucrist ni bacaa San Marcw

Rzuloj Waj ruliüman xtiidxza'c Jesucrist

(Mt. 3:1-12; Lc. 3:1-9, 15-17; Jn.1 :19-28)

¹ Ze guzuloj xtiidxza'c Jesucrist, Xi'n Dios.

² Guyu tijb bén badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bén ned lojl,
bén güünchaaw xnejzl.

³ Rguien cha' tijb bén rbidxa' loj yujbidx, rëbaman:

"Gol beenchaaw xnejz dux Dad ree, gol guxhal tijb nejz nali."

⁴ Zian bi't Waj bén baroobnijs bejn ree, guzuman niz loj yujbidx, abi' rëbaman loj ree bejn guial rayal yayün xgab por xtol reeman, yayejc reeman con Dios din gac reeman perdon tiobnijs tëë reeman. ⁵ Gra ree bén zojb niz Judea, në ree bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruroobnijs Waj laa reeman loj guiiw Jordán.

⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. ⁷ Chi guneenëman bejn ree, rëbaman:

—Xichan zëëd tijb bén mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon. ⁸ Naj curoobnijs lëjt con nijs, per laaman guroobnijs lëjt con xSprijt Dios.

Rirobnijs Jesús

(Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán. ¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. ¹¹ Dxel biguien cha' bejn xanyabaa, rëbaman:

—Lüj naj da Xi'n'an, rënan lüj rabaanë' tëën lüj.

Been xinxab Jesús prueb

(Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx. ¹³ Ni guzuman tiuu dxej tiuu guiaal, loj ree bedoxh. Abi' been xinxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

Rzuloj Jesús ruliüman bejn ree niz Galilea

(Mt. 4:12-17; Lc. 4:14-15)

¹⁴ Chi mal guyu Waj ladxguuib, wej Jesús niz Galilea bigneeman xtiidxza'c Dios, ¹⁵ rëbaman:

—Ma bidxin dxej zëëd xguialrniabee Dios gajxh, zeel gol bayün xgab por xtolidi, gol billadx tëë xtiidxza'caman.

Rbejdx Jesús tajp ree bén gac xbejman

(Mt. 4:18-22; Lc.5:1-11)

¹⁶ La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. ¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayünchaaw xguijxh reeman. ²⁰ Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiáad laa reeman zinal reeman Jesús.

Rabëë Jesús xinxab luxdoo tijb bejn

(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree bén Israel culüüman laa reeman. ²² Dád radxa loj reeman zi'c rnieenëman laa reeman guial ruliüman laa reeman zi'c tijb bén rniabee, ad ruliütaman zi'c ruliü ree mextr rajc ley. ²³ Lën yadoo guin yu' tijb xin yu' xinxab luxdoo, dxejczy guridxa'x rëbix:

²⁴ —¿Xhie rënl con dunujn, Jesús bén Nazaret? ¿Zëëdil ya zidganijt dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—jBacwëëz ro'l, barii luxdoo xin guin!

²⁶ Abi' been xindxab guin xin guin zi'c bën rëjtya', zianz gurixdiajx rejs, bariix luxdoo xin guin. ²⁷ Graczi ree bën riga' dád badxaløj reeman, riniabdiidx loj lasa' reeman rëb reeman: —¿Xhie ree nicüban rulüü bën guin? ¿Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd

(Mt. 8:14-15; Lc. 4:38-39)

²⁹ Bariiz reeman lën yadoo guin, binë Jesús Jacob con Waj lidx Simón con Andrejs. ³⁰ Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. ³¹ Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuløj cudëëdaman ni gaw reeman.

Rayüjn Jesús zien ree bënragxuu

(Mt. 8:16-17; Lc. 4:40-41)

³² Chi ma gurej guiaal, binë reeman bënragxuu ree lod za' Jesús, në ree bën yu' xindxab luxdoo. ³³ Graczi ree bën luguiedx guin bido'p ruyu lod za' Jesús. ³⁴ Bayüjn Jesús zien ree bën rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtamán mod guiniee ree xindxab guin guial nünbee reex laaman.

Rulüü Jesús xtiidx Dios niz Galilea

(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczj bejn zøjb, persi gurejdx gunabaman Dios. ³⁶ Abi' Simón con ree xcompniaraman bigdiil reeman laaman. ³⁷ Chi badxejl reeman laaman, rëb reeman lojman:

—Gra ree bejn cayguuil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree bën Israel guidib niz Galilea babëë tëëman xindxab luxdoo ree bejn.

Rayüjn Jesús tijb bën rajc guialguijdx la lepra

(Mt. 8:1-4; Lc. 5:12-16)

⁴⁰ Tijb bën rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bën guin abi' baya xcuerpaman. ⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bën guin chi ziaman guzuløj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zøjb. Per gra lad rza ree bejn rej reeman lod za'man.

2

Rayüjn Jesús xin nëjt xcuerp

(Mt. 9:1-8; Lc. 5:17-26)

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, ² tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. ³ Dxel bidxin tajp ree bejn yagaj lejn reeman tijb xin nëjt xcuerp. ⁴ Per ad gojct niünë reeman laax lod za' Jesús guial bën guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. ⁵ Chi baguiaa Jesús guial rililadx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zøjb tio'p choon ree mextr rajc ley, been reeman xgab naladx reeman: ⁷ “¿Chexc zeel rniece xin guin zian? ¿Chexc zeel rüjnx mazri xin zøjbloj guial loj Dios? Achutczj rajc rüjn perdon dol tijbzj Dios.” ⁸ Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? ⁹¿Conin ad nawëëgt gac, guial guiën loj bënragxuu guin ya: “Ma benan xtobil perdon”, o guiën ya: “Bixche, gules ni go'til loj, baguiaj”? ¹⁰Per yan gulün lëjt guial Bén guxhaal Dios rajpaman gualrniabee loj guidxliuj guie din güünman dol ree perdon. Dxel rëbaman loj xinragxuu guin:

¹¹—Lüj rnin, bixche, baca' ni go'til loj baguiaj lidxil.

¹²Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bën riga' yagaj. Abi' gra reeman badxaloj, ruza't reeman Dios zagdxe, rëb reeman: —Ni'qui tijb ad waguiaat ree zi'c naj ni cayguiaa ree yan.

Rbejdx Jesús Leví

(Mt. 9:9-13; Lc. 5:27-32)

¹³Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. ¹⁴Chi cadëdaman, baguiaaman Leví xi'ngaan Alfeo, zojbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵Dxel chi cayaw Jesús lidx Leví con zien ree bën ruquijx impuest në ree bën ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. ¹⁶Chi baguiaa ree bënfarisew con ree mextr rajc ley guial cayawnë Jesús bën guin ree, rëb reeman loj ree xbejnman:

—¿Chexc zeel rawnë xmextridi bën ruquijx ree impuest në ree bëndol?

¹⁷Chi biguejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent gualrba'n

(Mt. 9:14-17; Lc. 5:33-39)

¹⁸Lën ree dxej zii guba'n ree xbejn Waj bën ruroobnijs bejn ree, në ree bënfarisew. Abi' yu' ree bën gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

¹⁹Badxi' Jesús laan rëbaman:

—Wen, ¿zajc guiba'n ree biooz za' loj gualruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. ²⁰Per guidxin dxej chiquiedix loj reeman, abi' chi guidxin dxej guin dxel guiba'n reeman.

²¹'Achut bën rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. ²²Ad rgu' tëët bejn vin cüb lën anfr yojx, din zagüxya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree bën Israel

(Mt. 12:1-8; Lc. 6:1-5)

²³Tijb dxej raziiladx ree bën Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman. ²⁴Dxel rëb ree bënfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

²⁵Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ²⁶Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guidxtil ma nagle' abi' bixhiosi ree rayal gaw laa reen.

²⁷Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. ²⁸Abi' naj, guial najn Bén guxhaal Dios, ra'pan gualrniabee dxej raziiladx ree bejn.

3

Rayajc tijb xin naxü'n tibladyaa

(Mt. 12:9-14; Lc. 6:6-11)

¹Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa. ²Abi' ree bën yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús. ³Dxel rëb Jesús loj xin naxü'n yaa guin:

—Bisu, guzuj galay guin.

⁴Abi' rëbaman loj ree bën guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. ⁵ Dxel rdxe'ch Jesús ruguiaaman loj gra reeman, dád guyunaya luxdooan guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. ⁶ Chi baza ree bënfarisew guin, zianz baya'n reeman diidx con ree xbejn Herodes din gugijt reeman Jesús.

Zien ree bejn riga' ro'nijsdoo

⁷ Per Jesús zë gajcaman ro'nijsdoo Galilea con ree xbejnman. Zien da't ree bën Galilea con ree bën Judea binal laaman, ⁸ në ree bën Jerusalén con ree bën Idumea, në ree bën zojb zatiblad ro' guiwro' Jordán, në ree bën Tiro con ree bën zojb niz Sidón. Dád zien ree bejn wej lod za' Jesús guial gogbee reeman ni rüjnman. ⁹ Zeel rëbaman loj ree xbejnman din guzujsin reeman tijb barcw par laaman chitëë gutëë ree bën guin laaman. ¹⁰ Guial ma bayüjnman zien ree bejn, zeel rbig gra ree bënragxuu lojman din guqui' reeman laaman. ¹¹ Guiáad ree bën yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

¹² Per gunabeeman xindxab guin ree chitëë guiëb reex chu laaman.

Rbe Jesús chiptio'p ree apóstoles
(Mt. 10:1-4; Lc. 6:12-16)

¹³ Dxel wë'p Jesús tijb ruguia', abi' gurejdxaman gra ree bën guleman. Zianz wej reeman, ¹⁴ loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios. ¹⁵ Abi' badëëman guialrniabee din yayüjn reeman bënragxuu ree yabëë tëë reeman xindxab luxdoo ree bejn. ¹⁶ Bën guie ree naj guidxiptio'p ree bën gule Jesús: Simón bën gulëëljajman Bëd, ¹⁷ Jacob con Waj, bën naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); ¹⁸ në Andrejs, Filip, Tol, Matew, Tumajs con Jacob xi'n Alfeo, në Tadeo, nëtëë Simón bën bi'ch loj ree bën Cananistas, ¹⁹ con Judas Iscariote bën bayü Jesús.

Rëb ree bejn ca' Jesús xguialrniabee Beelzebú
(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojbaman. ²⁰ Dád zien ree bejn bido'p yagaj stijb, xt ni'quid bile't niajw Jesús con ree xbejnman. ²¹ Chi gogbee ree xfamil Jesús, dxel bidxin reeman din yaca' reeman laaman guial rëb reeman gujcaman rajc.

²² Abi' ree mextr rajc ley bën zëed ree Jerusalén rëb reeman:

—Bën guin rabëë xindxab luxdoo ree bejn por xguialrniabee Beelzebú, xin rniabee ree xindxab.

²³ Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? ²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, ²⁵ ziangajc tijb famil, bal rdilnë lasa' reeman, nayob la' lasa' reeman. ²⁶ Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

²⁷ 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

²⁸ 'Naj rni lojdi guial yu' perdon par gra dol ni rüjn bejn, yu' tëë perdon par gra diidxguijdx ni rniee bejn chutëëz. ²⁹ Per bën guinieeguijdx xSprijt Dios, ad yu't dxej gacaman perdon, ma banijtaman loj Dios.

³⁰ Rëb Jesús zian guial rëb reeman yu' xsprijt xindxab luxdooan.

Xniaa Jesús con ree bijchaman
(Mt. 12:46-50; Lc. 8:19-21)

³¹ Hor guin bidxin xniaa Jesús con ree bijchaman yu lod za'man, per ad bile't niu reeman zeel guxhaal reeman bën chignee laaman. ³² Dxel ree bën zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

³³ Badxi' Jesús xtiidx reeman rëbaman:

—¿Chunin naj da nan con ree da bichan?

³⁴ Dxel baguiaaman bën zojb ree gadëd lod zojbaman, rëbaman:

—Bën guie ree naj da nan con ree da bichan, ³⁵ din graczi ree bën rüjn ni rën Dios, laa reeman naj da bichan, da zanan në da nan.

4

*Xcwent bén rtie'ch bin**(Mt. 13:1-9; Lc. 8:4-8)*

¹ Zatijb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wé'paman loj tijb barcw yu' lojnijs guin, abi' gurejman lojn guiaád ree bén guin riga' reeman ro' nijs guin. ² Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

³ —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. ⁴ Chi catie'chaman laan, ta'nan biajb lunejz abi' bidxin ree biguijn gudaw reeb laan. ⁵ Zata'nan biajb loj ree guiaj lod ad riga't zien yuj, abi' cari gulejnan guial ad zient yuj riga'. ⁶ Per chi gunan gubijdx, bigoolan abi' guial ad zro't liujn yu', gubidxan. ⁷ Zata'nan biajb loj ree yaquiejch. Abi' chi guni'san, banidloj yaquiejch guin laan, abi' ad cwat ladan. ⁸ Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tée ni cwa tibgayuu.

⁹ Rëb tée Jesús loj reeman:

—Bén rën gucaagdiajg, gol bacaagdiajg.

*Chexc zeel ruliü Jesús con cwent ree**(Mt. 13:10-17; Lc. 8:9-10)*

¹⁰ Chi ma baya'nnë Jesús zata'nz ree bejn con guidxiptio'p ree xbejnman, dxel gunabdid reeman xhie rën guiëb cwent guin. ¹¹ Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad riladxt xguialrniabeeman, con ganaxzi ree cwent naj guial gulün laa reeman. ¹² Din majsi rani loj reeman, per ad zuguaat reeman, majsi rigueijn reeman, per ad zignia't reeman chitëe yayejc reeman loj Dios abi' güünman perdon xtol reeman.

*Rusignia' Jesús xcwent bén rtie'ch bin**(Mt. 13:18-23; Lc. 8:11-15)*

¹³ Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi?

¹⁴ Bén gutie'ch bin guin, laaman naj zi'c bén rtie'ch xtiidx Dios. ¹⁵ Bin biajb lunejz, naj zi'c ree bén rigueijn xtiidx Dios, per rdxin gajc xindxab rquiedix laan luxdoo reeman. ¹⁶ Yu' ree bén naj zi'c bin biajb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. ¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni riladx reeman. ¹⁸ Yu' tée ree bén naj zi'c bin ni biajb loj yaquiejch. Rigueijn reeman xtiidx Dios, ¹⁹ per ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graloj. Abi' guial yu' xgab guin guijc reeman, zianz rucwëez rucaagdiajg reeman xtiidx Dios, abi' achet sirv rüjn ni rucaagdiajg reeman. ²⁰ Per yu' ree bén naj zi'c bin biajb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

*Achet ni naguie'ch yu'**(Lc. 8:16-18)*

²¹ Abi' rëb Jesús loj reeman:

—Achet bén ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. ²² Din achet ni naguie'ch yu' ni ad zaguiant ad yu' tëet ni ralan ni ad zagbeet bejn. ²³ Bén rën gucaagdiajg, gol bacaagdiajg.

²⁴ Rëb tée Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt. ²⁵ Din bén ma rignia' xtiidx Dios, chignia'man mazri. Per bén ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rëb tée Jesús loj reeman:

—Xguialrniabee Dios naj zi'c rzajc bén rxübin loj xguiniaaman. ²⁷ Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. ²⁸ Din yuj guin gajc rusni's laan, yaløj rliejnan najn tijb gui'xhdo, dxel ririin dojn, zianz rtia ladan. ²⁹ Chi ma gojc reen dxel raru' reen guial ma bidxin tiamp yado'p reen.

*Xcwent xhaj moxtajs**(Mt. 13:31-32; Lc. 13:18-19)*

³⁰ Rëb tëë Jesús:

—¿Xhienaag ganin naj xguialrniabee Dios, o xhienaag gún diidx lojdi din chignia'di xhienaag naj xguialrniabeeman? ³¹ Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. ³² Per chi ma guxübin reeman laan, rni'san rajcan mazri narooob loj gra ree cwaan, xt rajc rüjn xguixbitia's ree biguijn xidxan.

Baliü Jesús con ganax cwent
(Mt. 13:34-35)

³³ Baliü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. ³⁴ Ad rülütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxë xhie rën guiëb ree ni rëbaman.

Racwëëz Jesús bidoxh
(Mt. 8:23-27; Lc. 8:22-25)

³⁵ Dxej zii, chi gure guiaal, rëb Jesús loj ree xbejnman:
—Yo' ree zatiblad ro' nijs guin.

³⁶ Dxel basa'n reeman bën riga' ree yagaj, wë'p reeman loj barcw ni yu' Jesús zinë reeman laaman con ree barcw ren. ³⁷ Dxel brii bidoxh loj nijs guin, xt guzuloj cadxa nijs loj barcw guin. ³⁸ Per Jesús naga'yëjsaman loj barcw guin tijb luar naj xijchan, nucuugaman tijb almoaad. Dxel bacwëën reeman laaman rëb reeman:

—¡Mextr! ¿Nid yu'l xgab ya? ¡Ma cayzëëb ree xan nijs!

³⁹ Abi' bixche Jesús, bacwëëzaman bidoxh guin rëb tëëman loj nijs guin:
—¡Bacwëëz, bayajcdxe!

Dxel bayajcdxe bi guin con nijs guin. ⁴⁰ Zianz rëb Jesús loj reeman:

—¿Chexc zeel rdxebedi? ¿Gadzidi chililadx naj ya?

⁴¹ Per laa reeman dád bidxeb reeman abi' rniabdiidx loj lasa' reeman:
—¿Chu bën guin zeel xt bi con nijs ruzoob xtiidxaman?

5

Rayüjn Jesús tijb xin yu' xindxab luxdoo
(Mt. 8:28-34; Lc. 8:26-39)

¹ Chi badxin Jesús con ree xbejnman zatiblad ro' nijsdoo guin, xdajn ree bën Gadara, ² baguiajzti Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, ³ guial nabanx ni. Achutdzi rajc rixhii laax ni'qui con caden. ⁴ Zien volt ma guxhii reeman yaax në guia'x con caden, per rüjngajquix gan ruooxix laan. Achut rüjn laax gan. ⁵ Dxejz guiala rizax niz dajn con lād ree baa, rbixdiajx rguuilguijdx laagajquix con guiaj. ⁶ Zijtri baguiaax Jesús, baxüünx bigchaaglojx laaman abi' bazuxibix lojman. ⁷ Zianz guneex rejs rëbix:

—¿Xhie rën! con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rëbix zian, guial cayëb Jesús lojx:

—¡Xindxab, barii luxdoo xin guin!

⁹ Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

¹⁰ Abi' rëbix lojman chitëë guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb. ¹² Zianz rëb ree xindxab guin loj Jesús:
—Guxhaal dunujn lod za' ree cüch guin din yadxu'n lën reeb.

¹³ Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. ¹⁴ Guiáad ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc. ¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman. ¹⁶ Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. ¹⁷ Dxel guzuloj rëb reeman loj Jesús din yazaman niz ladx reeman.

¹⁸ Chi bayu Jesús loj barcw guin, nagueijn rüjn xin barii xindxab guin ree luxdoo din chinalix laaman. ¹⁹ Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaløj.

Rayajc xi'n Jairo në béngunaa bagaal xab Jesús
(Mt. 9:18-26; Lc. 8:40-56)

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. ²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, ²³ abi' guzajcaman laaman liaadx, rëbaman: —Ma cayëjt da xi'nan. Yo'sii din gudxiib yaal guijqum din yayajqum din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman. ²⁵ Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn. ²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. ²⁷ Chi biguiejnman gra ni rijn Jesús, gudëdaman lad ree bën guin, gubigaman niz xijchaman dxel bagaalaman xabaman. ²⁸ Guial gunal-adxaman: “Gugalzan xabaman, ma bayajc gajcan.” ²⁹ Loj hor zii gajc gulëjz biajbaman rejn, abi' gogbeeman ma bayajcaman. ³⁰ Laa gogbee gajc Jesús guial yu' chu ma bayajc por xgualrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. ³² Per Jesús ruguiaaman gra lad din guguiaaman chu baqui' laaman.

³³ Abi' guidib rnijs béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. ³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdx. Ma bayajquil guialguijdx ni goquil.

³⁵ Sta canee Jesús zian, chi bidxin ree bën guza lidx Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bën riga' laaman, Bëdzi, con Jacob, con Waj bijch Jacob.

³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman.

³⁹ Dxel guyuman lënu' abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniaam con ree bën zinëman, lod naga' bindo guin. ⁴¹ Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

⁴² Loj hor ziigajc bixchem guzuløj cazam. Yu'm chiptio'p ijz. Abi' dád badxa loj ree bën riga'. ⁴³ Per gunabee Jesús laa reeman chitëe chu loj guiëb reeman ni goc, gunabee tëëman gudëëd reeman ni gawim.

6

Radxin Jesús Nazaret

(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman. ² Chi bidxin dxej raziiladx ree bejn, guzuløj culüüman bejn ree lën yadoo. Abi' gra ree bën cucaagdiajg dád badxa loj reeman ni rnieeman, abi' rëb reeman:

—¿Ban basiid bën guin gra ni rnieeman? ¿Ban gulëëman guialrignia' guin abi' chu badëë guialrniabee zeel rijnman milagr guin ree?

³ ¿Nid laaman naj bën carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zojb luguiedx guie.

Abi' ad bidxga't reeman Jesús. ⁴ Per rëbaman loj reeman:

—Guidibczi rajp reeman respejt tijb bën rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nüjn Jesús zien ree milagr yagaj. Bëlzi ree bënragxuu bayünman, badxiib yaaman guijc reeman. ⁶ Dád badxaløjman guial ad bililadxt reeman laaman. Dxel zëman guiedx naj ree gajxh, ziglüüman bejn ree.

Rxhiaal Jesús guidxiptio'p ree xbejnman chiglüü reeman xtiidx Dios

(Mt. 10:5-15; Lc. 9:1-6)

⁷ Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xinxab ree luxdoo ree bejn. ⁸ Dxel gunabeeman din achetctzi chinë reeman par runejz, ni'qui guijxh, ni'qui guialraw, ni'qui

milia, tijbzi yagrliadx reeman, ⁹ con xgurëch reeman, con tijbzi lajd najcw reeman. ¹⁰ Dxel rëbaman loj reeman:

— Yu lod guidxindi, tijbzi yagaj yaya'ndi xt guidxin dxej yazadi luguiedx guin. ¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guial'di zi'c sen guial ad rënt reeman guzoob reeman diidx. Din naj rni lojdi, guial dxej ni yadëed ree bejn cwent loj Dios mazri casti narooob yayal reeman guial loj ree bën Sodoma në Gomorra.

¹² Zianz brii reeman ziguedx reeman loj ree bejn guial rayal yayüjn reeman xgab por xtol reeman. ¹³ Abi' rabëë reeman zien ree xindxab luxdoo ree bejn, zien tëë ree bënragxuu gudëëb reeman sejt, abi' bayüjn reeman laa reeman.

Güjt Waj bën baroobnijs bejn ree
(Mt. 14:1-12; Lc. 9:7-9)

¹⁴ Chi bigueijn rey Herodes ni rüjn Jesús guial ruza't ree bejn laaman guidibczi, rëb reeman:

— Waj, bën baroobnijs bejn ree ma baban, zeel rajpaman guialrniabee rüjnman milagr ree.

¹⁵ Per yu' reeman rëb:

— Elíasan, bën rudëë xtiidx Dios loj ree bejn.

Yu'za reeman rëb:

— Tijb bën rudëë xtiidx Dios loj ree bejnan lasa' ree bën gocli.

¹⁶ Chi bigueijn Herodes rëb reeman zian, rëbaman:

— Wajn, xin gunabeen biru' yëjn, laaxan ma baban yan.

¹⁷ Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguuib por Herodías. Herodías naj xbégunaa Felip bijch Herodes. Per Herodes cwa'man Herodías. ¹⁸ Abi' guial rëb Waj loj Herodes:

— Ad laat tia' xbégunaa bijchil.

¹⁹ Zeel bidxe'ch Herodías Waj, guyënman nugüjtaman laaman. Per ad riletan, ²⁰ din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nüjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

²¹ Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zobjloj niz Galilea. ²² Dxel guay xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

— Gunab ni rëntzil, naj gune laan.

²³ Xt badëë xtiidxaman gudëëman ni guiniabtzim, majsi garol ni rajpaman. ²⁴ Dxel bariim bignabdiidx loj xniaam, rëbim:

— ¿Xhie ganaaban?

Badxi'man laan rëbaman:

— Gunab guijc Waj bën ruuroobnijs bejn ree.

²⁵ Laa bayugajquim lod za' rey Herodes, rëbim lojman:

— Yan gajc rënan guneel guijc Waj, bën ruuroobnijs bejn ree, guneelan loj tijb pliajt.

²⁶ Dád guyu naya Herodes, per mal badëed xtiidxaman guidib loj ree bën riga', zeel ad bile't nibexuuman nudëëman ni gunabim. ²⁷ Dxel gunabee Herodes tijb suldad din chica'x guijc Waj. ²⁸ Zianz wej suldad guin lën ladxguuib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

²⁹ Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

Ruyaan Jesús gaay mil bejn
(Mt. 14:13-21; Lc. 9:10-17; Jn. 6:1-14)

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman. ³¹ Dxel rëb Jesús loj reeman:

— Gol guda, yo' dunujz ree niz lod achut bejn zobj din yaziiladx ree ta'n.

Rëbaman zian guial dád zien ree bën zia zien tëë ree bën zëed, xt ni'qui guial gaw reeman ad riletan.

³² Dxel Jesús con ree bën naj ree apóstoles zë reeman loj barcw tijb luar lod achut zobj.

³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. ³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojb niz guie. ³⁶ Gūjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëëd ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guidxtil ca'di? Gol baguiaa don.

Chi baguiaa reeman, dxel rëb reeman:

—Gaay guidxtil con zatio'p bëjl.

³⁹ Dxel gunabeeman din cwe tibcwaaw gaj reeman loj guixya'. ⁴⁰ Zianz gurej reeman zian, yu' lod gure tibgayuu reeman, yu' lod gure tü'pchii reeman. ⁴¹ Abi' cwa' Jesús guigaay guidxtil guin con grop bëjl guin. Dxel gules lojman xanyabaa, badëëman quixtëë loj Dios, gula'man guidxtil guin badëëman loj ree xbejnman persi gudi's reeman laan loj ree bén riga', gudi's tëëman grop bëjl guin loj gra reeman. ⁴² Graczi reeman gudaw xt bigdxinladx reeman, ⁴³ abi' staczi bacha reeman chiptio'p dxüm guidxtil laay con bëjl ni baya'n. ⁴⁴ Loj ree bén gudaw no'ch cost gaay mil xinguaaw.

Rza Jesús loj nijs

(Mt. 14:22-27; Jn. 6:16-21)

⁴⁵ Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. ⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. ⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. ⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tédnejz. ⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. ⁵⁰ Dád cadxeb reeman por ni cuguiaa reeman. Per goneëd Jesús laa reeman rëbaman:

—¡Gol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, ⁵² din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

Rayüjn Jesús bénraxuu ree Genesaret

(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs. ⁵⁴ Naabzi baguiajt reeman loj barcw guin, laa bayünbee gajc ree bejn Jesús. ⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bénraxuu ree lod riguejntzi reeman za' Jesús. ⁵⁶ Bantëëz zëman, majsi guiedx narooob o guiedx dobëz o ranch ree, rguixh reeman bénraxuu guin ree niz lod tédaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén bagaal xabaman bayajc.

7

Ni rüjn persi rüjn bejn dol

(Mt. 15:1-20)

¹ Tijb dxej, tio'p choon ree bénfariisew con ree mextr rajc ley, bén guza ree Jerusalén, bibig reeman loj Jesús. ² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. ³ (Din bénfariisew në gra ree bén Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. ⁴ Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhiënaag quiiib reeman re, con vajs, con ree trast guiiib, në xloon reeman riguiib reeman.) ⁵ Zeel bénfariisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejn zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj,
per ad rënt reeman naj con guidib luxdoo reeman.

⁷ Xlia'czi rën da't reeman naj,

abi' ruluü reeman bejn ree ganaxzi ni rbëëguijc ree bénguidxliuj.

⁸ Yan, rusa'ndi xtiidx Dios tiblاد persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tiblاد. ¹⁰ Rëb Moisejs: “Gojp respejt xdadil con xniaal”, abi' “Bén guzaal diidxmal guijc xdad o xniaa, rayal guiëtaman.”

¹¹ Per lëjt rëbidi guial zile' guiëb bejn loj xDadaman o xniaaman: “Ad zajct günan lüj yudar, din gra ni ra'pan naj Corbán” (Corbán rën guiëb gran naj par Dios). ¹² Rëbidi, bén guiëb zian, ad zile'tri güün xdad xniaaman yudar. ¹³ Abi' rbëëladxidi xtiidx Dios persi zinal xcostumbridi ni ruluü lasa'di, në zien ree ni ren rüjndi lasa' ree ni guin.

¹⁴ Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin: ¹⁵ Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol. ¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bén guin bayuman lënü, dxel gunabdiidx ree xbejnman xhie rën guiëb ni rëbaman. ¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, ¹⁹ din ni raw bejn ad rejtan luxdooan, rejn lënman, abi' rariin?

Zian basignia'man guial ad rüjnt bejn dol por ni rawzaman. ²⁰ Rëbaman:

—Ni ririi ro' bejn në ni rüjnman, laan rüjn persi rüjnman dol. ²¹ Din guijc bejn zëed graloj xgab mal, guial rüjn ni dxuudx, guialgubaaan, guialrugüjt lasa', ²² guial rzunë béngunaa ren o xinguaaw ren, guialrzëëbladx xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. ²³ Graczi ree ni guin zëed guijc bejn, abi' laan rüjn persi rüjnman dol.

Rayajc xi'n tijb bén Sirofenicia

(Mt. 15:21-28)

²⁴ Chi baza Jesús niz yagaj, zëman niz Tiro në Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman. ²⁵ Din gogbee gajc xniaa tijb bindoo yu' xinxxab luxdoo. Abi' wej xniaam lod za' Jesús zianz bazuxibaman lojman. ²⁶ Ad najtaman bén Israel, najman bén Sirofenicia. Dxel guzajcaman liaadx loj Jesús din yabëëman xinxxab guin luxdoo bindoo guin. ²⁷ Per rëb Jesús lojman:

—Badëëdxgaj mod gaw yaloy ree xindoo, din ad rayalt chiquied bejn guidaxtil loj xi'nman din gudëëman laan gaw ree bë'cw.

²⁸ Badxi' bén guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

²⁹ Dxel rëb Jesús:

—Laaqui guneel. Ma zajc yaguaiajl, ma barii xinxxab guin luxdoo xi'nl.

³⁰ Chi badxin lidx bén guin, baguaaman laa bindo guin naga' loj loon, ma barii xinxxab guin luxdoo.

Bayajc tijb bén nacwa't ad rniee tëëtaman zagdxë

³¹ Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. ³² Ni bidxinnë reeman tijb xinguaaw nacwa'tix ad rajc tëët rnieex zagdxë. Abi' rëb reeman loj Jesús din gudxiib yaaman guijquix. ³³ Zianz binë Jesús laax tiblاد, badxe' xbacwënman lën guidajguix, abi' con xhiejnman bagaalaman lüdxix.

³⁴ Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

³⁵ Loj hor zii gajc baxal ree guidajg xin guin, baban lüdxix dxel guzuloy caneex zagdxë.

³⁶ Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn. ³⁷ Dád badxa loj reeman rëb reeman:

—Xi zagdxë naj gra ree ni rüjnman, xt rüjnman persi rigueijn ree bén nacwa't, abi' ree bengop rniee reeman.

8

Ruyaan Jesús tajp mil bejn

(Mt. 15:32-39)

¹ Tijb dxëj bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan b́en guin ree din ma gojc choon dxej nadxu'né' reeman guie, abi' ad ca't ni gaw reeman. ³ Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zééd zijt.

⁴ Dxel rēb ree xbejnman:

—Per, ¿ban guin yuca'n ni gaw ree b́en guin, achutczy bejn zobj niz guie?

⁵ Dxel gunabdiidxaman loj reeman rēbaman:

—¿Bél guiadxtil ca'di?

Abi' rēb reeman:

—Gajdxan.

⁶ Dxel gunabeeman gurej ree b́en guin luyuj. Zianz cwa'man guigajdx guiadxtil guin, badēeman quixtēé loj Dios, abi' gula'man laa reen badēéd loj ree xbejnman persi gudi's reeman laa reen loj gra ree b́en guin. ⁷ Négajc tio'p choon ree b́ejldoo ca' reeman, abi' badēeman quixtēé loj Dios dxel gunabeeman gudi's reeman nē laa reeb loj ree b́en guin. ⁸ Graczi reeman gudaw xt bigdxinladx reeman, abi' staczi bacha reeman gajdx dxúm guiadxtil laay nē b́ejl ni baya'n. ⁹ B́en gudaw ree naj reeman cost tajp mil. Chi gulox gudaw reeman, dxel bazaadiidxné Jesús laa reeman. ¹⁰ Zianz guyuman loj barcw con ree xbejnman zé reeman niz Dalmanuta.

Rniab ree b́enfarisew tijb milagr loj Jesús

(Mt. 16:1-4; Lc. 12:54-56)

¹¹ Dxel bidxin ree b́enfarisew, guzuloj cadildiidxné reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zéédaman.

¹² Dxel banajladx Jesús, rēbaman:

—¿Chexc zeel rēndi günan tijb milagr? Diidxli ganin, achetczy milagr günan guguaadi.

¹³ Dxel basa'nman laa reeman, bayuman loj barcw zatijb, zigné ree xbejnman stiblad ro' nijs guin.

Xlevadur ree b́enfarisew

(Mt. 16: 5-12)

¹⁴ Bayanladx ree xbejn Jesús niné reeman guialraw, tijbzi guiadxtil ca' reeman loj barcw guin. ¹⁵ Abi' chi rēbaman loj reeman:

—Gol gojp cudad con xlevadur ree b́enfarisew nē xlevadur Herodes.

¹⁶ Dxel guzuloj rēb loj lasa' reeman:

—Naman duloj ree zian guial ad naca't ree guiadxtil.

¹⁷ Abi' gogbee Jesús ni canee reeman, zianz rēbaman:

—¿Chexc zeel rēbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarגיעjndi ya? ¹⁸ Yu' guiaalojdi per ruluü ad ruguaiaatidi, yu' guidiajguidi per ruluü ad riguejntidi. ¿Nid rusaaladxidi ya? ¹⁹ Chi gudi'san gaay guiadxtil loj gaay mil bejn, ¿bél dxúm ni laay bato'pidi?

Badxi' reeman laan rēb reeman:

—Chiptio'pan.

²⁰ Dxel rēbaman:

—Laadx chi gudi'san gajdx guiadxtil loj tajp mil bejn, ¿bél dxúm guidxa baca'di?

Badxi' reeman laan rēb reeman:

—Gajdxan.

²¹ Dxel rēbaman:

—¿Staczi ad waygnia'tidi ya?

Rayüjn Jesús tijb b́en ad ranit loj

²² Chi bidxin Jesús guiedx Betsaida con ree xbejnman. Biné ree bejn tijb b́en ad ranit loj, rēb reeman loj Jesús din gugaalaman guiaalojman. ²³ Dxel gunaaz Jesús yaaman gulēeman laaman luguiedx guin, abi' gudēéb xhiejnman guiaalojman, baqui'man guiaalojman. Zianz gunabdiidxaman rēbaman:

—¿Rajc ruguaial ta'n ya?

²⁴ Dxel guzuloj cuguaaaman, abi' rēbaman:

—Ruguan bejn ree, per ruluü naj reeman zi'c yag ni caza.

²⁵ Dxel bagaal Jesús guiaalojman stijb, abi' rēbaman lojman din guguaadxiychaman, dxel guzuloj cuguaaaman zagdxe, naynidxuj ma ruguaaaman gra. ²⁶ Abi' baxhaal Jesús laaman lidxaman, rēbaman:

—Ad yayul luguiedx guin achu tēé loj guiébil xhienaag bayajc lojl.

Rēb Béd guial Jesús naj Cristo

(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filippo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj najj Waj bën baroobnijs bejn ree, yu'za reeman rëb lüj najj Elías, yu' tëtë reeman rëb lüj najj tıj ree bën badëed xtiidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj najj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman

(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bën guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

³² Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. ³³ Per badxi' lojman baguiaa ree xbejnman, dxel gudilëman Bëd rëbaman:

—¡Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bëngüdxliuj.

³⁴ Dxel gurejdx ree xbejn Jesús con ree bën riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. ³⁵ Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj në por da diidxan, zajpaman guialnaban tiblyaya con Dios. ³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios? ³⁷ Din ad zile't sii bejn xguialnabanman xanyabaa. ³⁸ Din bën yatunë naj në da diidxan niz loj ree bëndol bën ad zinalt ree xnejz Dios, bën riga' ree yan, ziangajc naj, najn Bën guxhaal Dios, yatunë'n laaman chi guialan con xguialrniabee da Dadan con ree xianjlaman.

9

¹ Rëb tëtë Jesús loj reeman:

—Diidxliciz ganin, yu' ree bën za' guie, ad zëjtt xt guguiaa reeman gui't xguialrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tıj ruguia'ya, binëman Bëd, Jacob con Waj. Yagaj bidxaa Jesús niz loj reeman. ³ Balaa xabaman bacha', gojcan naquichbëj, achutczı rguuib lajd zian loj guidxliuj guie. ⁴ Dxel baguiaa reeman Elías në Moisejs cayünë reeman Jesús diidx. ⁵ Abi' rëb Bëd lojman:

—Mextr, ¡zagdxen nadxu'n guie! Yaguieenan choon ranch, tıjban par lüj, tıjban par Moisejs, zatıjban par Elías.

⁶ Per ad ragbeet Bëd xhienin caneeman guial dád bidxeb reeman. ⁷ Loj hor guin biguiajtt tıjban zaj beenan bala guıjç reeman, abi' loj zaj guin biguien cha' bejn rëbaman:

—Bën guie naj da Xi'n'an, bën rën da'tan, gol bazoob xtiidxaman.

⁸ Abi' chi baguiaa reeman gadëd lod za' reeman achutrı za'në Jesús, tıjzı laaman za' yagaj. ⁹ La'tgaj cayguiajtt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bën guxhaal Dios. ¹⁰ Abi' laaz reeman ragbee ni baguiaa reeman, rniabdiidx tëtë loj lasa' reeman xhie rën guiëb guial yabanman loj ree bëngüt. ¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

¹² Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bën guxhaal Dios sagdiaj da'taman ad zën tëtë reeman laaman? ¹³ Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

Rayüjn Jesús tıj xın yu' xındxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman. ¹⁵ Chi baguiaa reeman

zëéd Jesús, dád badxa loj reeman abi' baxüün reeman bicajpdioz reeman laaman. ¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

¹⁷ Abi' rëb tijb bën za' yagaj:

—Mextr, zidnë' da xi'nan lojl guial yu' xindxab luxdoox abi' nusa'nx laax gop. ¹⁸ Bantëëz guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tée ree layix, dxel ratiaguix. Ma gunaaban loj ree xbejnl din nabëë reeman xindxab guin, per ad gojct reeman.

¹⁹ Zeel rëb Jesús:

—jBén ad rliladxt! ¿Xt goc gazunë'n lëjt gadaan téen lëjt? Gol tanë xinzii guie.

²⁰ Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtjüpix ririi tée bichijn ro'x. ²¹ Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diidz xindobëzix. ²² Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

²³ Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

²⁴ Dxel gurixdiaj xdadix rëbaman:

—jRliladxan lüj, gognë naj din chililadxan mazri!

²⁵ Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tée, rniabeen lüj din yariil luxdoo xin guin. Ad bal yayejcril luxdoox zatijb.

²⁶ Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix. ²⁷ Per gunaaz Jesús yaax gulesaman laax, dxel guzulix.

²⁸ Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

²⁹ Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n téeëdi.

Rugojn Jesús zatijb guial guiëtaman

(Mt. 17:22-23; Lc. 9:43-45)

³⁰ Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, ³¹ guial culüü ree xbejnman, rëbaman:

—Yayü reeman Bén guxhaal Dios loj ree bën gugüjt laaman, per ni gac choon dxej yabanman.

³² Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zobjloj?

(Mt. 18:1-5; Lc. 9:46-48)

³³ Dxel badxin Jesús Capernaum con ree xbejnman, abi' badxin reeman yu lod zobj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

³⁴ Per achet rëb reeman guial cadildiidx reeman lunejz chu reeman mazri zobjloj. ³⁵ Dxel gurej Jesús, gurejdxaman guidxiptio'p reeman, rëbaman:

—Bal chu bën rën gac mazri bën zobjloj lojdi, rayal güün laagajcaman zi'c tijb bën ad zobjlojt güün téeëman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, rëbaman:

³⁷ —Bën ridxga' tijb xindoo por naj, najn ridxga'man, guiáad bën ridxga' naj, bën guxhaal najn ridxga'man.

Bën ad za't contr dunuj ree za'man con dunuj ree

(Lc. 9:49-50; Mt. 10:42)

³⁸ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxoondi, din bën rŭjn milagr por da gualrniabeen, ad zile't guinieeguijdxaman naj. ⁴⁰ Bën ad za't contr dunuj ree, za'man con dunuj ree. ⁴¹ Chutëez bën gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëed Dios lojman.

Bën ruzaalguiiw bejn din gŭünman dol

(Mt. 18:6-9; Lc. 17:1-2)

⁴² 'Chutëez bën guzaalguiiw tijb bën qui riladxri naj din gŭünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. ⁴³ Bal laagajc yaal rusajb lŭj loj dol, zagdxeli gutü'n. Mazri zagdxu chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', ⁴⁴ lod ad rëjtt ree bizog lod ad rayü' tëet bajl. ⁴⁵ Abi' bal laagajc guia'l rusajb lŭj loj dol, zagdxeli gutü'n. Mazri zagdxu chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', ⁴⁶ lod ad rëjtt ree bizog lod ad rayü' tëet bajl. ⁴⁷ Bal laagajc guiaalolj rusajb lŭj loj dol, zagdxeli gulëen. Mazri zagdxu chu' con tiblodzi guiaalolj xanyabaa guial che con groplad guiaalolj gabijl lod yu' bajl ni ad yu't dxej yayü', ⁴⁸ lod ad rëjtt ree bizog lod ad rayü' tëet bajl.

⁴⁹ 'Zi'c ru zëd guijc gualraw, ziangajc ree bën riladx naj sagdiaj reeman din gac reeman naya.

⁵⁰ 'Ni zagdxu naj zëd, per bal id zajcran naxij, çxhieza naag yayajcan naxij zatijb? Gol been zi'c rayal chitëe saquidi zi'c zëd ni ad rŭjnt sirv, gol gubajnnë tëe lasa'di zagdxu.

10

Rulüü Jesús xcwent guial rala' lasa'

(Mt. 19:1-12; Lc. 16:18)

¹ Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman.

² Yu' ree bënfarisew gubig lod za'man. Abi' par gŭün reeman laaman prueb, gunabdiidx reeman lojman rëb reeman:

—çZajc yala' xinguaaw lacheelix ya?

³ Badxi'man laan rëbaman:

—çXhie gunabee Moisejs gŭündi?

⁴ Abi' rëb reeman:

—Cwëjb Moisejs yala' xinguaaw lacheelix, per gudëedix gui'ch tia'man guial ma bala' reex.

⁵ Dxel rëb Jesús:

—Rëb Moisejs gac zian guial nadidi. ⁶ Per guia'xchej chi gule'cchaaw Dios guidxliuj, "beenman xinguaaw con béngunaa". ⁷ "Zeel xinguaaw gusa'n xdad xniaax din guibannë lacheelix, ⁸ dxel grop reex ma gac zi'c tijbzi bejn." Zianan zeel ad najtri reex tio'p, ma naj reex tijbzi. ⁹ Zeel, bénguidxliuj ad rayalt yala'man lasa' ni ma bachajc Dios.

¹⁰ Chi bayu reeman lënu, gunabdiidx ree xbejnman lojman zatijb, xcwent ni guneeaman. ¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, ¹² ziangajc bal tijb béngunaa yala' lacheelaman abi' tia' xin ren laaman, dolan cayüjnman.

Rŭjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bën binë ree laa reex. ¹⁴ Chi baguiaa Jesús zian, balenman zeel rëbaman:

—Gol badëed mod gui't reex lon, ad bal rudxoondi. Din lod rniabee Dios naj par ree bën naj zi'c laa reex. ¹⁵ Diidxliczi rnin, bën ad riladxt xgualrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejc Jesús, ruxüün tijb xinguaaw bidxinx abi' bazuxibix lojman, dxel gunabdiidxix rëbix:

—Mextr za'c, çxhie rayal gŭnan din ga'pan gualnaban tiblayaa con Dios?

¹⁸ Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. ¹⁹ Lüy rajc ree mandamient, "Ad gugüjtil bejn, ad sunël béngunaa ren, ad cwanl, ad cwëël xtiidx bejn ad gusquiee tëël, gojpp respejt xdad xniala."

²⁰ Dxel rëbix loj Jesús:

—Mextr, gra ree ni guin cayünan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëéd milia guin loj ree bënprob, zian gapil guialnaza'c xanyabaa dxel guidnalil naj majsi xhietëéz saquul.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxel baguiaa Jesús loj gra reeman, abi' rëbaman loj ree xbejnman:

—¡Dád nawëég naj chu' benrijcw loj xguialrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, ibén yu'gujic bazri ni rajpaman, dád nawëég naj chu'man loj xguialrniabee Dios!

²⁵ Adli nawëégt téd tijb camell xan gagux guial chu' tijb benrijcw loj xguialrniabee Dios.

²⁶ Chi biguiejn reeman diidx guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

²⁷ Baguiaa Jesús loj reeman, abi' rëbaman:

—Par bejn nawëégan, per par Dios ad nawëégtan din par Dios graczan zile' gac.

²⁸ Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüy.

²⁹ Badxi' Jesúsán rëbaman:

—Diidxliczi ganin lëjt, chutëéz bën rusa'n lidx, o bijch, o bizan, o xdad xniala, o lacheel o xi'n, o guidxliuj ree por naj në por xtiidxza'c Dios, ³⁰ loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaanman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblayaa con Dios. ³¹ Per dád zien ree bën naj bën yaloy yan, gac reeman bën bigra, guiáad ree bën naj bën bigra yan, gac reeman bën yaloy.

Rugojn Jesús zatijb guial guiëtaman

(Mt. 20:17-19; Lc. 18:31-34)

³² Chi zë reeman Jerusalén, ned Jesús loj ree xbejnman, abi' dád radxaloy reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

³³ —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtán, yayü tëë reeman naj loj ree bën ad najt bën Israel. ³⁴ Guze' reeman naj, gucojpp xhiejn reeman lon, quin reeman gugüjt tëë reeman naj, per yayon dxej yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi günan?

³⁷ Badxi' reeman laan rëb reeman:

—Rayënan guial chi ma canabee, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtán ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëëdi zi'c naj, ⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bën rayal laan.

⁴¹ Chi biguiejn zachii xbejn Jesús ni rëb reeman, dád balen reeman Jacob con Waj, ⁴² per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zobjloj rüjnë reeman bejn ree zi'ctzi rën reeman por guialrniabee ni rajp reeman. ⁴³ Per con lëjt ad rayalt gac zian. Din bal chu rën gac bën rniabee lojdi,

royal güünman sirv lojdi, ⁴⁴ guíaad bén rën gac bén zobjloj, royal güünman sirv loj gradi zi'c bén nado'. ⁴⁵ Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bénguidxliuj.

Rayajc guíaalaj tijb xin ad ranit loj la Bartimeo

(Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman nè ree benzien. Tijb xin ad ranit loj lax Bartimeo, xi'n bén la Timeo, zobjix cwë' nejj rniabix carda. ⁴⁷ Chi biguiejnx cadëd Jesús bén Nazaret niz yagaj, guzuloj cabidxa'x rëbix:

—jJesús, xdiaa Davi, baya naj!

⁴⁸ Dád zien ree bejn ridilë laax din yacwëez ro'x. Per mazri rejs rbidxa'x rëbix:

—jXdiaa Davi, baya naj!

⁴⁹ Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiasix guzulix bibiguix loj Jesús.

⁵¹ Gunabdiidx Jesús lojx rëbaman:

—¿Xhie rënl günan por lüj?

Badxi'xan rëbix:

—Mexti, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn. 12 :12-19)

¹ Chi ma zë reeman gajxh Jerusalén, niz lod riga' guiedx Betfagé con Betania, gajxh guía' la Olivos, dxel guxhaal Jesús tio'p ree xbejnman, ² rëbaman:

—Gol chej guiedxdo riga'í delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. ³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bén guin zinë reeman laab. ⁷ Bidxinnë reeman laab lojman, badxiib xab reeman xijchib, persi gudxibaman laab. ⁸ Zien ree bejn riguijxh xab niz lod rdëdaman, yu' tëë reeman rutüüg ziji persi rguijxh reeman laan niz lod rdëdaman.

⁹ Abi' zi'c ree bén ned, në ree bén nal rbixdiaj reeman, rëb reeman:

—jGagnëman dunuj ree yan! jNagle' bén zëed por Dios! ¹⁰ jNagle' bén zëed nabee zi'c dux béngulal ree rey Davi! jQuixtëë dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

Bazaal Jesús diidx guijc yag higo

(Mt. 21:18-19)

¹² Chi bareguiaal, barii reeman Betania. Dxel guzuloj calaan Jesús. ¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiampantan. ¹⁴ Dxel rëbaman loj yag higo guin:

—jAd yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

Rabëë Jesús bén ruto' ree ro' yadooro' Jerusalén

(Mt. 21:12-17; Lc. 19:45-48; Jn. 2:13-22)

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bén cuto' ree në ree bén cazii. Barexguiataman xmex ree bén ruchaa milia con xyagxhil ree bén ruto' ree palom, ¹⁶ ad rtiëjbtaman xhie chu'në ree bejn ro' yadoo guin.

¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguiil reeman mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman. ¹⁹ Chi ma caxhin, bazanë ree xbejn Jesús Jerusalén.

Tijb yag higo ni gubidx
(Mt. 21:20-22)

²⁰ Chi bareguiaa rsiladoo, badëd reeman niz lod zojb yag higo guin, abi' baguiaa reeman ma gubidx diidz liujn. ²¹ Dxel basaaladx Bëd ni rëb Jesús, abi' rëbaman lojman:

—Mextr; jbaguiaa yag higo ni bazaalil diidx guijc ma gubidxan!

²² Badxi' Jesús an rëbaman:

—Gol bililadx Dios. ²³ Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooman, bal rliladxaman, gac ni guneeman. Zian gacan. ²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. ²⁵ Guiáad chi ribejdx rniabidi Dios, bal yu' bën rdxe'chidi, gol beenman perdon din ziangajc xDadidi bën yu' xanyabaa güünman perdon xtolidi. ²⁶ Din bal id züjndi perdon, ziangajc xDadidi Bën yu' xanyabaa ad züjntaman perdon xtolidi.

Xguialrniabee Jesús

(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús niz lën yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bën Israel, ²⁸ gunabdiidx reeman loj Jesús, rëb reeman:

—¿Xhie guialrniabee rajpl zeel rüjnl ni guin ree? ¿Chu banee guialrniabee lojl güünl zian?

²⁹ Badxi' Jesús an rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee güünan ni guin ree. ³⁰ ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” ³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rliladx guial gojc Waj tijb bën badëë xtiidx Dios loj ree bejn, bën wali guneë xtiidx Dios. ³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee guialrniabee güünan ni guin ree.

12

Xcwent ree mojs guijdx

(Mt. 21:33-46; Lc. 20:9-19)

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin. 'Zianz badëëman laan garol loj ree bën güün laan dxiin, brittaman zëman zijt. ² Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. ³ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. ⁴ Dxel guxhaal bën naj xguidxliuj laan zatijb xmojsaman, per ziangajc, bacaaguiaj reeman laaman, gula' reeman guijcaman abi' guneeguijdx reeman laaman. ⁵ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁶ 'Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'n an respejt.” ⁷ Per ree bën guin, rëb loj lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.” ⁸ Dxel gunaaz reeman laax, bagüjt reeman laax abi' babëë reeman laax loj guidxliuj guin.

⁹ Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün ree naj xguidxliuj laan? Zi'taman din gugüjtaman bën guin ree, dxel gudëëman guidxliuj guin loj ree ben ren.

¹⁰ '¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bën rüjn yu, laan goc ni mazri been sirv gojcnë yu guin.

¹¹ Zian been dux Dad ree Dios, zeel radxaduloj ree.

¹² Chi biguiejn ree bèn rniabee guin ni guneé Jesús, guyèn reeman niniáaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

Xcwent Impuest

(Mt. 22:15-22; Lc. 20:20-26)

¹³ Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguül reeman mod guiniee Jesús diidx ni gudxiib reeman guijc din gac cwe'c reeman xguialquiaman. ¹⁴ Abi' rëb reeman:

—Mextr, dunujn rayagbee guial lüj rniee diidxli ad ridxga' tēetil chu naj bejn. Din par lüj tiblojzi naj bejn, abi' walil ruluül guial xhienaag rën Dios guiban bejn. Zeel ranabdiidxan loj: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

¹⁵ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

¹⁶ Dxel badëéd reeman cintabl guin lojman, abi' rëbaman:

—¿Chu loj ca lojn, chu tēē laj ca lojn?

Badxi' reeman laan rëb reeman:

—Loj César ca lojn në lajman.

¹⁷ Dxel rëb Jesús loj reeman:

—Gol badëécliza loj César ni naj xieen César, guiáad loj Dios gol badëéd ni naj xieen Dios.

Dád badxa loj reeman ni rëbaman.

Xcwent guial yaban ree bengüt

(Mt. 22:23-33; Lc. 20:27-40)

¹⁸ Tio'p choon ree bénsaducew bignaj Jesús, laa reeman ad rliadxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xin güt guin guxhliañë béngunaa bizëjb guin din chu' xi'n reex zi'c gulüü xi'n xingüt guinan. ²⁰ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. ²¹ Dxel bijch barojpix baxhliañë béngunaa guin, per güjt gajquix, ad guyu gajc xi'n reex. Abi' ziangajc guzajc xin bayon guin, ²² abi' zianz baxhliañëman guigajdx reex, zianz bara reex güjt achut xi'n reex guyu con laaman. Ni bigra tēē në béngunaa guin güjt. ²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhliañë laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tēëtidi xhienaag naj xguialrniabeeman. ²⁵ Din chi yaban ree bengüt, ad zuxhliaatri reeman, ad zudëé tēetri xi'n reeman guxhliaa, ma gac reeman zi'c ree anjl yu' xanyabaa. ²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.”

²⁷ Din Dios ad najtaman xDios ree bengüt, najman xDios ree bèn naban. Zeel ad laat naj xgab rüjndi.

Mandamient mazri zobloj

(Mt. 22:34-40)

²⁸ Chi biguiejn tijb mextr rajc ley badxi' Jesús xtiidx reeman zagdxe guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zobloj loj gra ree mandamient?

²⁹ Badxi'man laan rëbaman:

—Mandamient mazri zobloj rëban: “Gol bacaagdiajg, bèn Israel, dux Dad ree Dios, tijbzi laaman naj Dios. ³⁰ Guyèn xDadil Dios guidiblagaa guidib guijc guidib ladxil.” Laan naj mandamient mazri zobloj. ³¹ Mandamient rarojp, rëban: “Guyèn ree ben ren zi'c rën lüj gajc.” Achet mandamient mazri zobloj guial loj grop ree mandamient guie.

³² Dxel rëb mextr guin loj Jesús:

—Zagdxequi guneel, Mextr. Waliqul tijbzi Dios yu', achutri ben ren yu'. ³³ Abi' guidib guijc guidib ladx bejn guiënman laaman guidiblagaa, guiën tēëman ben ren ree zi'c rën laagajcaman. Laan naj ni mazri zobloj guial loj gra gon ni rudëéd bejn loj Dios.

³⁴ Chi biguien Jesús badxi' mextr guinan zagdxe, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:
—¿Chexc zeel rëb ree mextr rajc ley guial za Cristo loj xdiaa rey Davi? ³⁶ Awa Davi guin gajc gunee por xSprijt Dios, rëbaman:
Dios rëb loj da Dadan:

“Gurej da ladbeen,
xt gabecan xin rdxe'ch ree lüj guia'l.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

Ni rüjn ree mextr rajc ley
(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajg zagdx, ruladx tëë reeman gugajpdioz ree bejn laa reeman con respejt niz lunejz. ³⁹ Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. ⁴⁰ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti naroob yajal reeman.

Gon badëëd tijb béngunaa bizëjb
(Lc. 21:1-4)

⁴¹ Tijb dxej zobj Jesús lën yadooro' Jerusalén niz lod za' alcancia ni ru gon, abi' ruguiaa-man rgu' ree bejn milia lën alcancia guin, në zien ree benrijcw rgu' zro' milia. ⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. ⁴³ Abi' gurejdx Jesús bën naj ree xbejnman, rëbaman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. ⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

13

Rëb Jesús guial yaze'n yadooro' Jerusalén
(Mt. 24:1-2; Lc. 21:5-6)

¹ Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

² Badxi' Jesús an rëbaman:

—Zi'c ruguiaal yu naroob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit
(Mt. 24:3-28; Lc. 21:7-24; 17:22-24)

³ Chi zobj Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëë chu gusquiee lëjt. ⁶ Din zien ree bën gui't guiëb reeman guial por naj zëëd reeman, guiëb tëë reeman: “Naj naj Cristo”, abi' gusquiee reeman zien bejn.

⁷ Per lëjt chi guiguiejndi cayajc wadijl o zëëb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. ⁸ Din til nacion con stijb nacion, til tëë bën rajp gualrniabee con stijb bën rajp gualrniabee, gui't tëë ree xudoxh në gubijn niz ni niz guie. Zian gac chi ma suloj ree gualzi ni naj gac.

⁹ Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gubernador në loj ree rey guial najdi da bejnan, zian gac din chile' güdi da diidxan loj reeman. ¹⁰ Per yalojxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. ¹¹ Chi chinë reeman lëjt loj ree guxtis, ad bal chu'di xgab, ad bal güün tëëdi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtjan guiniee, xSprijt Diosan guiniee. ¹² Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman. ¹³ Gra bénguidxliuj guidxe'ch lëjt guial najdi da bejnan, per bën sudxi'ch loj ni riladxaman naj xt dxej chigra guibanman, laaman yajal xanyabaa.

¹⁴ Chi guguaadi zobj tijb ni dxuudx lën yadooro' Jerusalén, zi'c bacaa Daniel, bën badëë xtiidx Dios loj ree bejn diizd gulal (bën gool ree gui'ch guie, gol bignia'n), guial bën zobj ree niz Judea chigxüün reeman niz dajn. ¹⁵ Guiáad bën ye'p guijc yu lidx dxejzii, ad yayu lënu lidxaman tia' xhie xieenman. ¹⁶ Guiáad bën za' dajn, ad yayejc lidxaman chigxii xabaman. ¹⁷ ¡Proba ree béngunaa nüü xi'n o bën ca' ree xindobëz lën ree dxej zii! ¹⁸ Gol gurejdx gunab Dios chitëë yayal gac zian tiamp nayaag, ¹⁹ din dád guialziro' chu' dxejzii ree, zi'c ad wayajctczi diizd chi beenchaaw Dios guidxliuj, ad yu' tēetri dxej gac zian. ²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rēnman, bën gulejman par laaman.

²¹ Bal chu na lojdi: “Gol baguiaa, laa Cristo za' guie”, o “laaman za' ni”, ad bal chilladxidi. ²² Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree nē ree graloj ni yadxaloj ree bejn, din gusquiee reeman laa reeman, abi' bal zile'n xt zajc nē ree bën gulej Dios gusquiee reeman. ²³ Zeel gol gojpc cudad, ma bagojnxgajñ lējt gra ni gac.

Gui't Bën guxhaal Dios zatijb
(Mt. 24:29-35, 42-44; Lc. 21:25-36)

²⁴ Per lën ree dxej ni ma gudëd gra ree guialzi guin, zacajy loj gubijdx abi' ad zusnitri bëew, ²⁵ zayajb ree bajl yu' xanyabaa guiáad gra ree ni yu' xanyabaa guiniib reen. ²⁶ Dxel guguaa ree bejn Bën guxhaal Dios rdiinman bacha' zëëdaman loj zajc on xguialrniabee narooaman. ²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bën ma naj par Dios.

²⁸ 'Gol badxe'guijc ni ganin lējt: Chi ma naquie'n xidx yag higo abi' ma caydxib ree xbalagan, lējt ragbee guial ma zidyob tiamp nalaa. ²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. ³⁰ Diidxli rnin lējt guial gra ree ni guin gac chi gad ree bën naban lën ree dxej guie guiët. ³¹ Guidxliuj nē xanyabaa zanijt reen, per da diidxan ad zadëdt gacan cumplid.

³² Per achut ragbee xhie dxejn xhie tēë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ Zeel gol gojpc cudad, gol guzujsin tēë, gol gurejdx gunab Dios din ad ragbeetidi goc gac zian. ³⁴ Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tēëman susin bën rajp ro' port. ³⁵ Yan ziangajc lējt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' gujd, o rsildoo. ³⁶ Zeel gol guzusun din bal dxejczzi guialan ad guidxaaglojn lējt ad cayüjntidi zi'c rayal. ³⁷ Abi' ni canin lojdi, loj gradi caninan: Gol guzujsin.

14

Bayan reeman diidx xhienaag guiniaaz Jesús
(Mt. 26:1-5; Lc. 22:1-2; Jn. 11 :45-53)

¹ Zatio'p dxej riaadx gal lanij pascw, lanij raw ree bejn guidxtil ni ad yu't levadar. Abi' ree bixhioz rniabee ree bixhioz con ree mextrajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman. ² Per rēb reeman:

—Ad zaguieent ree zian loj ree dxej lanij guin, chitëë gac naquie'.

Baroob tijb béngunaa perfum guijc Jesús
(Mt. 26:6-13; Jn. 12 :1-8)

³ Dxel chi za' Jesús luguiedx Betania lidx Simón, bën gunee reeman leproso, abi' chi zobjaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaawnën ganax nardo, zianz guxhalaman ro' lumejt guin persi baroobaman perfum guin guijc Jesús. ⁴ Abi' yu' ree bën za' yagaj bidxe'ch, rēb loj lasa' reeman:

—¿Chexc zeel guxhie'man perfum guin? ⁵ Awa zajc nido'n choon gayuu denario din nüjnan yudar bënprob ree.

Abi' caneeguijdx reeman béngunaa guin.

⁶ Per rēb Jesús loj reeman:

—Gol basa'nman. ¿Chexc zeel ruslendi laaman? Zagdxe naj ni beenman con naj. ⁷ Zianczi sunëdi bënprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj. ⁸ Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. ⁹ Diidxliczi rnin lējt, guial guidib loj guidxliuj bantëéz guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

*Baguuil Judas mod xhienaag yayüman Jesús**(Mt. 26:14-16; Lc. 22:3-6)*

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. ¹¹ Chi biguiejn ree bixhioz guin zian, dád babaa reeman. Abi' rëb reeman gudëed reeman milia lojman. Dxel guzuloj raguuilaman mod xhienaag yayüman Jesús.

*Gudawnë ree xbejn Jesús xche**(Mt. 26:17-29; Lc. 22:7-23; Jn.13 :21-30; 1Co.11 :23-26)*

¹² Dxej ni guzuloj lanij raw ree bën Israel guiadxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rën! yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. ¹⁴ Abi' lod yayux, gol güjdx loj bën naj lidxan: “Na mextr: ¿Ban lënu gawnë ree xbejnman yan guxhin pascw?” ¹⁵ Dxel gulüüman lëjt tijb lënu narooob ni rarojpw cwaaw, ma najcchaaw lënu guin. Yagaj gol been ni yadaaw ree xche.

¹⁶ Dxel brie ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman. ¹⁸ Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bën cayawnë naj, laaman yayü naj.

¹⁹ Dád guyunaya reeman, abi' guzuloj canabdiidx tijb gajc reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjtan, bën cugajdx xguiadxtil loj gajc pliajt lod cugajdx da guiadxtilan, laaman. ²¹ Walican guial Bën guxhaal Dios naj sacaman zi'c ca loj xtiidx Dios. Per, jprob bën yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guiadxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

²³ Dxel cwa'man tijb cojpw yu' vin, chi gulox badëëman quixtëë loj Dios, badëëman cojpw guin loj reeman, abi' gra reeman gu' vin yu' lojn. ²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn pardon loj Dios. ²⁵ Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Bëd ad nünbeetaman laaman**(Mt. 26:30-35; Lc. 22:31-34; Jn.13 :36-38)*

²⁶ Chi gulox biil reeman tijb cant par Dios. Dxel zë reeman ruguia' Olivos. ²⁷ Dxel rëb Jesús loj reeman:

—Graczi ti'nladx naj yan guxhin, zi'c ca loj xtiidx Dios lod rëb: “Gugüjtan bën rajpw ree xiil, abi' guire'ch reeb.” ²⁸ Per chi yabanan, yaloj naj ganeed lojdi gan Galilea.

²⁹ Dxel rëb Bëd lojman:

—Majsi gra reeman ti'nladx lüj, per naj ad zaro'nladxntan lüj.

³⁰ Badxi' Jesúsán rëbaman:

—Naj rni lüj Bëd, yan guxhin gajc chi gad gujd cwidxa' tio'p volt, choon volt mal rëbil guial ad nünbeetil naj.

³¹ Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

*Rbejdx rniab Jesús Dios lod la Getsemani**(Mt. 26:36-46; Lc. 22:39-46)*

³² Chi bidxin reeman tijb luar la Getsemani, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooman. ³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerojman, gunabaman loj Dios, bal zile' téd ni naj sagdiajman. ³⁶ Chi cabejdx canabaman Dios, rëbaman:

—Dad, graczi zajc güünl. Babëe naj loj ni gazaagdianj. Per ad gac zi'c rënan, rayal gac zi'c rënl.

³⁷ Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? ³⁸ Gol gurenaa, gol gurejdx gunab Dios chitëe güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree. ⁴⁰ Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. ⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bén guxhaal Dios ma bidxin hor yayü reeman naj loj ree bëndol. ⁴² Gol bixche, yo' ree, laa bën yayü naj ma zëed gajxh.

Gunaaz reeman Jesús

(Mt. 26:47-56; Lc. 22:47-53; Jn.18:2-11)

⁴³ Sta caneenë Jesús laa reeman chi bidxin Judas, bën goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. ⁴⁴ Abi' Judas bën bayü laaman ma bagojngxajman bën guin ree rëbaman:

—Bën gawan xid, laaman naj bën raguilidi, gol gunaazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. ⁴⁶ Zianz gunaaz ree bën guin laaman din chinë reeman laaman. ⁴⁷ Per tijb bën za' yagaj gulëe xiespadaman, gutü'man guidiajg xmojs bixhioz rniabee gra ree bixhioz. ⁴⁸ Dxel rëb Jesús loj ree bën guin:

—¿Chexc zeel zëëdidi con espad con yag din chinëdi naj zi'c tijb xingubaan? ⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiaq binalix Jesús, nadüübix tijbzi lajd. Abi' chi gunaaz ree bën guin laax, ⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn.18:12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. ⁵⁴ Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree bën rajp rullidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguuil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, ⁵⁶ majszi zien reeman rudxiib diidx rusquiee guijcaman, per garent garen rëb tijb gaj reeman. ⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxexji yayünanan sin xyudar ree bejn.”

⁵⁹ Per ni'qui zian ad guneet reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree bën riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesúsán rëbaman:

—Walican, najcan. Abi' lëjt zuguaaadi naj najn Bén guxhaal Dios zooban xladbee Dios Bén ca' gra gualrniabee guguaa tëedi naj guialan loj zaj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. ⁶⁴ Lëjt ma biguiejn canee guijdx Dios. Yan, ¿xhie nadi?

Abi' graczi reeman rëb, guiëtaman.

⁶⁵ Yu' reeman rucojg xhiejn lojman, ruta'cw tëë reeman lojman, dxel riguin reeman laaman, rëb reeman:

—jGuneeya' chu gudïn lüj!

Guiáad ree bën rajp yagaj wëëz reeman lojman.

Rëb Bëd ad nünbeetaman Jesús

(Mt. 26:69-75; Lc. 22:56-62; Jn. 18 :15-18, 25-29)

⁶⁶ Chi za' Bëd rule' guin, dxel bidxin tijb béngunaa rüjn dxiin lidx bixhioz rniabee guin.

⁶⁷ Chi baguiaaman zobj Bëd rudëj guin cucha'man, baguiaaman lojman, dxel rëbaman:

—Në lüj za'në Jesús bën Nazaret.

⁶⁸ Per gurexuu Bëd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' guïd. ⁶⁹ Dxel basaaladx Bëd guial rëb zatiyb, zianz guzuloj rëbaman loj ree bën riga' yagaj:

—Në bën guin naj xbejn Jesús.

⁷⁰ Per gurexuu Bëd zatiyb. Gojc xchejdoos rëb ree bën riga' yagaj loj Bëd:

—Walican në lüj naj xbejnx din xin Galilea lüj, abi' zi'cgajc rniee reeman rnieel.

⁷¹ Per guzudxi'ch Bëd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bën nadi.

⁷² Loj hor zii gajc barojp volt guridxa' guïd. Dxel basaaladx Bëd guial rëb Jesús lojman: “Chi gad guïd cwidxa' tio'p volt, mal gojc choon volt rëbil ad nünbeetil naj.” Chi basaaladxaman zian, dxel guzuloj cayoonman.

15

Binë reeman Jesús loj Pilato

(Mt. 27:1-2, 11-14; Lc. 23:1-5; Jn. 18 :28-38)

¹ Chi bareguiaa rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato. ² Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman, ⁴ zeel gunabdiidx Pilato lojman zatiyb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetctzi badxi' Jesús, zeel dád badxa loj Pilato

Gunabee reeman guiët Jesús

(Mt. 27:15-31; Lc. 23:13-25; Jn. 18 :38-19:16)

⁶ Loj ree dxej lanij pascw, ruslaa Pilato tijb bën yu' ladxguuib, bën rëb ree bën guiedx guin guslaaman. ⁷ Lën ree dxej zii yu' bën la Barrabás ladxguuib con ree ben ren, bën bagüjt ree bejn loj tijb wadijl ni been reeman contr gobiarn. ⁸ Dxel chi bido'p ree bejn, rëb reeman loj Pilato din güünman zi'c naj costumbr, ⁹ Abi' rëb Pilato loj reeman:

—¿Rëndi ya guslaan xreydi?

¹⁰ Rëbaman zian guial ragbeeman bayü ree bixhioz guin laaman por guial rdëdlojzi reeman laaman. ¹¹ Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás. ¹² Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

¹³ Dxel gurixdiaj reeman rëb reeman:

—jBacaax loj crüjz!

¹⁴ Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—jBacaax loj crüjz!

¹⁵ Abi' guial rën Pilato yaya'nman zagdxë loj reeman, zeel baslaaman Barrabás, gunabee-man a Jesús, dxel bayüman laaman loj reeman din tiaman loj crüjz.

¹⁶ Abi' binë ree xin suldad guin Jesús xlule' palas, yagaj badxaag lasa' gra reex. ¹⁷ Abi' basajcw reex laaman tijb lajd murad, dxel been reex tijb coron guiëjch badxe' reex guijcaman. ¹⁸ Dxel guzuloj rbixdiaj reex rëb reex:

—jGuiibanri xrey ree bën Israel!

¹⁹ Zianz rugaz reex var gujccaman, rulaa xhiejn reex lojman, abi' ruzuxib reex lojman.
²⁰ Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reeman Jesús loj crüjz

(Mt. 27:32-44; Lc. 23:26-43; Jn.19 :17-27)

²¹ Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

²² Abi' binë reex Jesús luar la Gólgota, rën guiëban Calaver. ²³ Yagaj badëëd reex vin no'ch ni la mirra lojman din guië'man laan, per ad gu'taman laan. ²⁴ Chi ma bacaa reex laaman loj crüjz, dxel gudxijt reex suert gujcc xabaman din guidoon xhie yayal tijbgaj reex

²⁵ Raca gaa rsil bacaa reex laaman loj crüjz. ²⁶ Gujcc crüjz guin bacaa reex lejr ni rëb chexc zeel bacaa reex laaman loj crüjz, rëban: "Xrey ree bën Israel." ²⁷ Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. ²⁸ Zian gojc cumplid ni ca loj xtiidx Dios, lod rëb: "Nayabaman loj ree benmal."

²⁹ Abi' ree bën ridëd yagaj ruze' reeman laaman runij gujcc reeman, rëb reeman:
 —Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, ³⁰ yan baslaa lüj gajc baguiajt tëë loj crüjz zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:
 —Gognëx ben ren ree, guiáad laax ad rajct ruslaa laagajquix. ³² Yaguiajtix loj crüjz guin, bal laax naj Cristo, xrey ree bën Israel, din yaguaa ree, dxel yaliduladx ree.

Xt në ree xingubaan canëman loj crüjz guneejuidx laaman.

Güjt Jesús

(Mt. 27:45-56; Lc. 23:44-49; Jn.19 :28-30)

³³ Chi gol garol dxej, bicajy guidib guidxliuj xt raca choon wadxe. ³⁴ Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj?
³⁵ Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.
³⁶ Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaa ree don zi't Elías yalet laax loj crüjz guin ya.
³⁷ Per Jesús dád rejs gurixdiajman, dxel güjtaman. ³⁸ Loj hor zii goxya' lajd nal lën yadooro' Jerusalén, gojcman tio'p lala', diizd gujcc guin xt guia' guin goxya'. ³⁹ Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.
⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj benguiag loj Xiëb. ⁴¹ Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

Biguie'ch Jesús

(Mt. 27:57-61; Lc. 23:50-56; Jn.19 :38-42)

⁴² Chi bidxin dxej rüjn ree bën Israel gra, chi guixiezi naj dxej raziiladx reeman, ma cabej guiaal, ⁴³ bidxin Xiëb bën za guiedx Arimatea. Gojcaman tijb xguxtis ree bën Israel, abi' gojp ree bejn laaman respejt, në laaman rbëz xgualrniabee Dios, abi' guyuman valor wejman loj Pilato, persi banabaman xcuerp Jesús. ⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walín. ⁴⁵ Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. ⁴⁶ Guzii Xiëb tijb lajd, abi' chi baletaman xcuerp Jesús loj crüjz guin dxel batüübaman laaman lajd guin, biquie'chaman laaman lën tijb baa ni bidëën lën tijb guiaj, dxel basiaawaman ro' baa guin con tijb guiajro'. ⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

16

Raban Jesús

(Mt. 28:1-10; Lc. 24:1-12; Jn.20 :1-10)

¹ Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëëb reeman laan xcuerp Jesús. ² Bareguiaal chidumingw, rsilddoo brii reeman wej reeman ro' xbaa Jesús, naabzi rliejn gubijdx. ³ Chi zë reeman lunejz, rëb loj lasa' reeman:

—¿Chuzha chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. ⁵ Chi guyu reeman lën baa guin, baguiaa reeman tijb xinguiag zobjix ladbee, najcwix lajd naquich yool, abi' bidxeb reeman. ⁶ Per rëbix loj reeman:

—Ad rdxebidi, raguilidi Jesús bén Nazaret bén cwa loj crúz. Per ma babanman, achutri laaman guie, gol baguiaa lod gudixh reeman laaman. ⁷ Yan, gol chej gol chiguiedx loj Béd në loj los demazri ree xbejnman guial yaloj Jesús ned cheman Galilea dxel chedi, ni guguaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

Baliüloj Jesús loj María Magdalena
(*Jn. 20:11-18*)

⁹ Chi ma baban Jesús, chidumingw rsiloo, yaloj loj María Magdalena balülojman, bén babëeman gajdx xindxab luxdoo. ¹⁰ María Magdalena guin bicojn ree xbejn Jesús, bén yu'naya ree roon tëë reeman por laaman. ¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

Baliüloj Jesús loj tio'p ree xbejnman
(*Lc. 24:13-35*)

¹² Chi gudëd gojc zian, garen balüloj Jesús loj tio'p ree xbejnman lunejz chi zë reeman niz dajn. ¹³ Dxel bén guin ree bicojn lasa' reeman, per ni'qui laa reeman ad bililadxt reeman.

Rucaabee Jesús bén naj ree apóstoles
(*Mt. 28:16-20; Lc. 24:36-49; Jn. 20 :19-23*)

¹⁴ Ni bigratë balüloj Jesús loj za chiptib ree xbejnman, chi zobj reeman xan mex cayaw reeman, gudilëman laa reeman guial nad reeman, ad rililadxt reeman bén baguiaa ree laaman guial ma babanman. ¹⁵ Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. ¹⁶ Bén chililadx tiobnijs tëë zajcaman perdon loj Dios. Per bén ad zaliladxt xtiidxza'c Dios, laaman yayal casti. ¹⁷ Sen guie ree gap ree bén chililadx naj: Por da guialrniabeen zabëë reeman xindxab luxdoo ree bejn, zaneë tëë reeman diidx ren ree, ¹⁸ zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bënragxuu, zayajc reeman.

Bayë'p Jesús xanyabaa
(*Lc. 24:50-53*)

¹⁹ Chi gulox guineenë Dad Jesús laa reeman, dxel bayë'paman xanyabaa, gurejman xladbee Dios. ²⁰ Guiaad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni nrnee reeman. Amën.

Xtiidxza'c Jesucrist ni bacaa San Lujc

Rxhiaal Lujc gui'ch loj Teófilo

¹ Zien ree bèn ma been nagueijn gucaa ni goc con dunuj ree, ² zi'cgajczi balüü ree bejn dunuj ree, bèn baguiaa ree diidz guia'xchej ni been Jesús nè ni guzacaman, gutie'ch tèë reeman xtiidxaman. ³ Naj baguilxnejzchaaw diidz guia'xchejn, dad Teófilo, zeel naladxan zagdxen gucanan xnejz par lüj, ⁴ din chignia'l zagdxé diidxli balüü reeman lüj.

Rugojn tijb anjl gal Waj

⁵ Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. ⁶ Grop reeman gubajn xnejz loj Dios bazoob tèë reeman diidx graczi ni rniabee Dios, abi' achut rile' guiëb guial rajp reeman dol. ⁷ Per achut xi'n reeman guyu guial ad gojct niu xi'n Elisabet, grop reeman ma naj bengol.

⁸ Tijb dxej ni bayal ree bixhioz no'ch Zacarías loj, been reeman sirv loj Dios, ⁹ zi'c naj xcostumbr ree bixhioz guin, gudxijt reeman suert din guidoon chu yayal gudxe' goxyaal lèn yadooro' Jerusalén, abi' bayal Zacarías cu'man goxyaal guin. ¹⁰ La'tgaj cagu'man goxyaal guin, gra ree bejn riga' lule' cabejdx canab reeman Dios. ¹¹ Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. ¹² Chi baguiaa Zacarías anjl guin, ad badxejlt xhie nünman, dád bidxebaman. ¹³ Per rëb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaaw abi' yagu'l lajx Waj. ¹⁴ Yabaa da'til, nè zien ree bejn yabaa chi galix, ¹⁵ guial gaquix xin lasajc loj Dios. Ad zë'tix vin ni'qui ni gusüdx laax. Abi' diidz chi gadix gal mal za'në xSprijt Dios laax. ¹⁶ Por laax zien ree bèn Israel yajej loj xDad reeman Dios. ¹⁷ Laax ned lojman, chu' xSprijt Dios luxdoox gap tèëx gualrniabee zi'c Elías, bèn badëë xtiidx Dios loj ree bejn, yabe'cdxex bèn naj ree dad con xi'n reeman, guluü tèëx bèn ad ruzoobt ree diidx din guzuxnejzix bejn ree guidxga' reeman laaman chi guitaman.

¹⁸ Dxel rëb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

¹⁹ Badxi' anjl guinan rëbaman:

—Naj naj Gabriel, rünan sirv loj Dios, laaman guxhaal naj zidnë'n diidxza'c guie lojl. ²⁰ Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

²¹ Guiáad ree ben riga' lule' guin cabëz reeman Zacarías yu' nawëëg reeman guial cayaglaaman lèn yadoo guin. ²² Chi bariiman ad rajctri rnieeman, gaz sen rünman guial ma baya'nman gop. Dxel gogbee reeman guial yu' xhie baguiaaman lèn yadoo guin.

²³ Zianz baza' ree dxej ni been Zacarías sirv lèn yadoo guin, dxel zia lidxaman. ²⁴ Chi gudëd ree dxej guin, guyu xi'n xbéngunaa Elisabet. Gaay bëëw tib guyuzaman lënü, rëbaman: ²⁵ “Ze naj ni beennë Dios naj lèn ree dxej guie chitëë guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bëëw, guxhaal Dios anjl la Gabriel luguiedx Nazaret ni riga' niz Galilea, ²⁷ din chignajman tijb biinxdüb lam Li. Ma naj tia' tijb xin la Xiëb laam, xin zëed loj xdiaa rey Davi.

²⁸ Guyu anjl guin lod yu' Li abi' rëbaman:

—¡Xchan Li, Dios ma gulej lüj! Dios za'në lüj, ma beenle' tèëman lüj loj gra ree béngunaa.

²⁹ Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin. ³⁰ Dxel rëb anjl guin:

—Li, ad rdxebil din lüj gule Dios beenle' tèëman lüj. ³¹ Chu' xi'nl, abi' chi galaman yagu'l lajman JESÚS. ³² Laaman gac bèn zojbloj, guiniee ree bejn laaman Xi'n Dios bèn yu' xanyabaa. Güün dux Dad ree Dios laaman rey zi'c goc xdiaagulalaman Davi, ³³ din nabeeman bèn Israel ree xt goctëëz, abi' xgualrniabeeman ad yu't dxej loxan.

³⁴ Dxel rëb Li loj anjl guin:

—¿Xhienaag chu' da xi'n nan awa achut bénguaaaw nabannë'n?

³⁵ Badxi' anjl guinan rëbaman:

—Por xSprijt Dios chu' xi'nl, abi' xgualrniabee Dios bèn yu' xanyabaa gusiaawan guijquil con xbalan. Zeel xi'nl bèn gal, gacaman naya nali abi' guiniee ree bejn laaman Xi'n Dios. ³⁶ Ziangajc lasa'l Elisabet ma yu' xi'nman, majsi ma najman bengol, bèn rëb ree bejn ad zajct chu' xi'n, per yan ma gojc xho'p bëëw yu' xi'nman. ³⁷ Din Dios graczi zajc güünman.

³⁸ Dxel rëb Li loj anjl guin:
—Dios naj bën rniabee naj, gacza zi'c rënman.
Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea, ⁴⁰ dxel guyum lënu lidx Zacarias, bagajpdiozim Elisabet. ⁴¹ Chi bigueijn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. ⁴² Abi' gunee Elisabet rejs, rëbaman:

—jDios ma beenle' lüj loj gra ree béngunaa, beenle' tëëman bejndobëz yu' lën! ⁴³ ¿Chuza najn zeel zidganaj xniaa da Diosan naj, bën rniabee? ⁴⁴ Din bigueijnzan cha'l bagajpdiozil naj, laa baniib gajc da bindoon lënan guial babaam. ⁴⁵ Xiquilbaal guial bililadxil, din gac zi'c bagojn Dios lüj.

⁴⁶ Dxel rëb Li:

Ruzatan Dios zagdx,

⁴⁷ rabaanë' tëën laaman, guial ragnëman naj.

⁴⁸ Guial baguiaaman naj, majsi biin rüjnzi sirv lojman naj.

Abi' diizd yan xt goctëëz guza't ree bejn naj, guiëb reeman xiquilbaam.

⁴⁹ Din Dios, bën rniabee, dád zro' naj ni ma beennëman naj.

Naya naliman.

⁵⁰ Ad rbëzt rayaman graczi ree bën ruzoob xtiidxaman.

⁵¹ Zro' naj ni ma beenman con xguialrniabeeman.

Base'nman xixgab ree bën rüjn benro',

⁵² biquiedaman guialrniabee loj ree bën rniabee,

guiáad loj ree bën ad zobjlojt badëëman guialrniabee loj reeman.

⁵³ Badëëman guialnaza'c loj ree bën biaadx guialraw,

guiáad ree benrijcw basa'nman laa reeman zezi.

⁵⁴ Gognëman bën Israel ree, xbejnman,

abi' ad bayanladxtaman nayaman laa reeman,

⁵⁵ zi'c rëbaman loj dux béngulal ree,

Abraham në loj ree xdiaaman.

⁵⁶ Abi' baya'nnë Li Elisabet cost choon bëëw, dxel baguiaj lidxim.

Rajl Waj

⁵⁷ Chi bidxin dxej gojl xi'n Elisabet najx xinguaaw. ⁵⁸ Abi' gogbee ree lasa'man në ree bën zobj gajxh guial baya Dios laaman, dád babaa reeman bignaj reeman laaman. ⁵⁹ Chi ma gojc xindobëz guin toxman, dxel binë reeman laax guyux sen ni ru ree bën Israel. Abi' guyën reeman nagu' reeman lajdoox Zacarias zi'c la xdadix, ⁶⁰ per gunee xniaax, rëbaman:

—Ad zayutan zian. Rayal gaquim Waj.

⁶¹ Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

⁶² Abi' con sen gunabdiidx reeman loj xdad xindobëz guin chu rënman grii lajx. ⁶³ Zianz gunabaman tibia' tabl abi' bacaaman lojn: “Waj grii lajx.” Dád badxaloj gra ree bën guin.

⁶⁴ Loj hor ziiigajc gojc banee Zacarias, abi' guzuloj cuza'taman Dios zagdx. ⁶⁵ Gra ree bën zobjnëman gajxh dád badxa loj reeman, xt gra ree guiedx riga' lad ree guia' niz Judea gogbee reeman graczi ni goc. ⁶⁶ Guiáad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

Ni gunee Zacarias

⁶⁷ Zacarias, bën naj xdad xindo guin guyu xSprijt Dios luxdooman guidiblagaa, zianz guzuloj caneeman, rëbaman:

⁶⁸ Benza'c bendxoon naj Dios, dux Dad ree nayajc ree bën Israel,

guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

⁶⁹ Guxhaalaman tijb bën rajp guialrniabee din yabëëman dunuj ree loj ni cayza'c ree,

zëëdaman loj xdiaa rey Davi, bën naj xbejn Dios.

⁷⁰ Zi'c been Dios promejs diizd gocli, zian gunee ree bën badëë xtiidxaman loj ree bejn, bën guban ree zi'c rënman:

⁷¹ Guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

⁷² yaya tëëman dux béngulal ree,

abi' ad zayanladxtaman promeys ni beenman.

⁷³ Ni ne naj promeys ni beenman loj dux béngulal ree Abraham:

⁷⁴ guial yabëeman dunuj ree loj ree bén ralen dunuj ree,
din chile' yaguieen ree sirv lojman sin guialrdxeb,

⁷⁵ yabajn ree yaguieen tëë ree zi'c rënman, guidib tiamp ni yabajn ree.

⁷⁶ Guiaad luj xi'n, guiniee ree bejn luj bën rudëë xtiidx Dios loj ree bejn, Dios yu' xanyabaa.
Din nedil chiguieenchaawil xnejz bën naj Dad,

⁷⁷ gulüü tëë xbejnman din gagbee reeman xhienaag gac xtol reeman perdon,
laa tëë reeman loj casti.

⁷⁸ Guial raya da't dux Dad ree dunuj ree,

zeel guxhaal xi'nman, bén naj zi'c xbacha' gubijdx din gusniman du loj ree,

⁷⁹ guixhial tëëman xquiarguejn ree bén zë loj nejzmal, bén ad nabant ree xnejz zi'c rën Dios,
gulüü tëëman dunuj ree yadxoo ree loj xnejzaman din yabajn ree zagdx sin wadij.

⁸⁰ Guiaad xindo guin guni'six guyu tëë xquiarguejnx mazri por Dios. Guzujx loj yujbidx,
xt bidxin dxej guneex xtiidx Dios loj ree bén Israel.

2

Rajl Jesús

(Mt. 1:18-25)

¹ Lën ree dxejzii gunabee rey César Augusto guiyab gra ree bejn guidib lod rniabeeman.

² Laan naj ni yaloj biyab ree bejn chi goc Cirenio gobernador Siria. ³ Graczi ree bejn naj yaguiaj ladx ladx din guiyab reeman. ⁴ Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëëd Xiëb.

⁵ Wejman binëman Li, lacheelaman din guiyab reeman. Ma yu' xi'n Li. ⁶ Abi' la'tgaj za' reeman Belén, bidxin dxej gojl bejndobëz guin. ⁷ Yagaj gol xi'n yaloj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejt lënü naya'n reeman.

Bidxin ree xianjl Dios lod za' ree bén rajp xiil

⁸ Gajxh Belén guin za' ree bén rajp xiil, abi' dajn guin gajc rdëd reeman guiaal rajp reeman laa reeb. ⁹ Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman. ¹⁰ Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. ¹¹ Yan, ladx rey Davi ma gojl bén yabëë lëjt loj ni cazajquidi, laaman naj Cristo, laaman naj Dad. ¹² Abi' din yayünbeedi laaman; nadüübaman lajd, naga'man lod ru ni raw ree be.

¹³ Dxejczy balüüloj zien da't ree anjl cwë' anjl yaloj guin, ruza't reeman Dios zagdx, rëb reeman:

¹⁴ jBenza'c bendxoon naj Dios bén yu' xanyabaa,

abi' loj guidxliuj yabe'cdxeman luxdoo bén rüjn ree zi'c rënman!

¹⁵ Chi ma zia ree anjl guin xanyabaa, dxel rëb loj lasa' ree bén rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

¹⁶ Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. ¹⁷ Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, ¹⁸ abi' graczi ree bén biguiejn dád badxa loj reeman ni rëb ree bén rajp ree xiil guin. ¹⁹ Per Li, rgu'chaaw luxdooan gra ni rucaagdiajgaman, rüjn tëëman laan xgab. ²⁰ Dxel zia ree bén rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

Binë reeman Jesús lën yadooro' Jerusalén

²¹ Chi ma gojc toxman gojl bejndobëz guin, badxe' reeman laaman sen ni ru ree bén Israel, bagu' tëë reeman lajman Jesús zi'c rëb anjl guin loj Li chi gad Jesús gacxhiej lënman.

²² Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. ²³ Been reeman zian din loj ley guin ca: "Gra ree xindoniguiaaw rajl yaloj ma naj reex par Dios." ²⁴ Abi' binë reeman gon par Dios zi'c rniabee ley: ryal chinë reeman tio'p gugdoo o tio'p palomdoo.

²⁵ Tiamp zii zojb bën la Simeón Jerusalén. Najman benza'c rën tëëman Dios, rbëzaman bén gagnë Bén Israel ree za'në tëë xSprijt Dios laaman. ²⁶ Abi' por Sprijt guin gogbeeman guial ad zëjtaman xt guguaaman Cristo, bén guixhiaalaman. ²⁷ Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley, ²⁸ zianz gudiidx Simeón bejndobëz guin baza'taman Dios zagdx, rëbaman:

²⁹ Dad, yanri ma babedxe luxdon.

Ma zajc guslaal naj guiëtan
najn xmojsil, ma gojc zi'c nal.

³⁰ Din con quijb guiaalon ma baguian bën gagnë dunujn.

³¹ Guial ma bazujl laaman loj gra ree bénguidxliuj.

³² Laaman naj biani par ree bën ad najt bën Israel,
naj tëëman bacha' par ree xbën Israëliil.

³³ Guiaád Xiëb con xniaa Jesús dád badxa loj reeman ni biguiejn reeman rëb Simeón
xcwënt bejndobëz guin. ³⁴ Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol,
per zien reeman yaya'n loj xtol. Zidgalüüman bejn ree conin naj ni ruladx Dios, per zien
reeman ad zënt laaman. ³⁵ Abi' zian gagbeeman xhienaag naj xixgab tijbgaj bejn, guiaád
luj zi'c tijb espad chëëz luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëëman xtiidx Dios loj ree bejn,
xdadaman brii laj Fanuel, xdiaagulalaman gojc Aser. Benguiagan chi cwa' xinguiaw
laaman, abi' gajdx ijsi gubajnnë lacheelaman. ³⁷ Ma gojc tajpgajlbitap iyz baya'nman
bizëjb. Zianczi yu'man lën yadooro', rba'nman rbejdx rniab tëëman Dios. ³⁸ Loj hor ziigajc
bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tëëman
bejndobëz guin loj gra ree bën cabëz guixhiaal Dios bën gagnë bën Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxel zia ladx reeman Nazaret ni riga'
niz Galilea. ⁴⁰ Cani's bejndobëz guin, cayuman gojl, cayajcaman nasin, cayüjnle' tëë Dios
laaman.

Yu' Jesús lën yadooro' Jerusalén

⁴¹ Gazob iyz rej ree xdad Jesús Jerusalén lanij pascw. ⁴² Chi baza' Jesús chiptio'p iyz, binë
ree xdadaman laaman lanij zii zi'c naj xcostumbr reeman. ⁴³ Chi ma gudëd lanij guin, baza
ree xdad Jesús ma zia ladx reeman. Ad gogbeet reeman baya'n Jesús Jerusalén. ⁴⁴ Gunaladx
reeman ma no'chaman loj ree bën zia. Zian guza reeman tibdxej. Per chi baguüil reeman
laaman loj lasa' reeman në loj ree bën nünbee reeman, ⁴⁵ achut laaman naguiee. Dxel
bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxej badxejl reeman laaman lën yadooro' Jerusalén, zojbaman galay
ree mextr rajc ley, cucaagdiajgaman canabdiidx tëëman laa reeman. ⁴⁷ Gra ree bën caguiejn
ni rnieeman caydxaloy reeman guial rajcaman në ree diidx radxi'man. ⁴⁸ Chi baguiaa ree
xdadaman laaman, dád badxaloy reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan luj.

⁴⁹ Badxi' Jesús laan rëbaman:

—¿Chexc zeel raguüilidi naj? ¿Nid ragbeedi ya rayal günan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman
ruzoobaman, guiaád xniaaman graczan rgu'chaaw luxdooan. ⁵² Zi'cri cani's Jesús cayu
tëë mazri xquiargueijnman. Rabaanë Dios laaman rabaanë tëë ree bejn laaman.

3

Rzuloy Waj rulüüman xtiidx Dios

(Mt. 3:1-12; Mr. 1:1-8; Jn. 1:19-28)

¹ Chi goc chiin iyz rniabee rey Tiberio, abi' Poncio Pilato najman gobernador Judea,
Herodes najman gobernador Galilea, bijchaman Filip najman gobernador Iturea në
Traconite, guiaád Lisania najman gobernador Abilinia. ² Anás në Caifás naj reeman
bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj
yujbidx. ³ Dxel gudëd Waj graczi ree guiedx riga' ro' guiw Jordán, rëbaman loj ree bejn
din yayüjn reeman xgab por xtol reeman tiobnijs tëë reeman, din güün Dios xtol reeman
perdon. ⁴ Zian gojc cumplid ni bacaa Isaias bën badëë xtiidx Dios loj ree bejn, lod rëbaman:
Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios,
gol guxhal tijb nejz nali.

⁵ Gra ree la'ch yadxa reen guiaád ree guia' con
ree lom yayajc reen tibloj,
në ree nejz volt yayaali

yadxa tëë ree lunejz ni ad najt tibloj.

⁶ Gra ree bénguidxliuj guguiaa bën
guixhiaal Dios gagnë dunuj ree.”

⁷ Chi brii zien ree bejn din guroobnijs Waj laa reeman, rëbaman loj reeman:

—ŀi' n xindxab lĕjt! ĆChu bagojn lĕjt guial laadi loj castiro' ni zĕĕd? ⁸ Gol gubajn zagdxĕ din guiguiĕn guial waliqĕi ma bayĭjndi xgab por xtolidi, ad guiĕb tĕĕ loj lasa'di: “Dunuĭn zio'p loj xdiaa Abraham”, din naj rni lĕjt xt guiaĭ guie ree zajc yayĭjn Dios xdiaa Abraham. ⁹ Abi' ree bĕn ad zinalt xnejz Dios zi'c rayal, ma zidyob dxĕj ni gĭĭnnĕ Dios laa reeman zi'c rĭjnnĕ bejn tijb yag chi ad rtiatan, rĭtĭĭgaman laan din che'can.

¹⁰ Dxel gunabdiidx reeman, rĕb reeman:

—ĆXhie rayal yaguieenan?

¹¹ Badxi' Wajn rĕbaman:

—Bĕn yu' tio'p xab, rayal gudĕĕman tijban loj bĕn achet rajp. Guiaad bĕn yu' ni raw, rayal gudĕĕman ta'nan loj bĕn ryaadxan.

¹² Nĕ tio'p choon ree bĕn ruqĭiĭx impuest bidxin din tiobnijs reeman. Abi' gunabdiidx reeman loj Waj, rĕb reeman:

—Mextr, laadx dunuĭn, Ćxhie rayal yaguieenan?

¹³ Badxi' Wajn, rĕbaman:

—Ad guqĭiĭxidi mazri guial loj ni rayal guqĭiĭxidi.

¹⁴ Yu' tĕĕ ree suldad gunabdiidx lojman rĕb reex:

—Laadxza dunuĭn, Ćxhie rayal yaguieenan?

Badxi'man laan rĕbaman:

—Ad cwĕĕxuudi xhie xieen bejn, guial guchejbidi laa reeman o gudxiibidi guĭc reeman ni ad beent reeman, gol guziĭbnejz tĕĕ ni rajxidi.

¹⁵ Guiaad ree bejn gagbeenezdoo reeman bal Wajn naj Cristo, ¹⁶ per rĕbaman loj gra reeman:

—Naj curobnijs lĕjt con nijs. Per zĕĕd tijb bĕn guroobnijs lĕjt con xSprijt Dios nĕ bajl. Laaman rajp mazri guialrniabee guial lon, ni'qui xgurĕchaman ad zajct gaxhiecan. ¹⁷ Abi' zi'c raya trĭgo zian gĭĭnnĕman bejn. Din bĕn zinal ree xnejz Dios yayal reeman lod rniabeeman, guiaad ree bĕn ad zinalt xnejz Dios guixhiaalaman laa reeman loj bajl ni ad yu't dxĕj yayĭ'.

¹⁸ Zian guneenĕ Waj laa reeman, nĕ ree con diidx ren guneenĕman laa reeman rulĭĭman laa reeman xtiidxza'c Dios. ¹⁹ Gudilĕ tĕĕman rey Herodes guial cwa'man Herodĭas xbĕngunaa bijchaman Filip, nĕ por graczi ni mal ni ma beenman. ²⁰ Per luar nidxga' Herodes xtiidx Waj aal beenman zatĭjb ni mal: badxe'man Waj ladxguiĭb.

Rĭrobnijs Jesĭs

(Mt. 3:13-17; Mr. 1:9-11)

²¹ Chi curoobnijs Waj bejn ree nĕgajc Jesĭs guroobnijs. Abi' la'tgaj cabejdx canabaman Dios, bixal xanyabaa ²² zianz biguiaĭt xSprijt Dios zi'c tijb palom xt guĭcaman. Dxel biguiĕn cha' tijb bejn xanyabaa, rĕbaman:

—Lĭj naj da xi'nan, rĕnan lĭj rabaanĕ' tĕĕn lĭj.

Bĕn goc ree xdiaagulal Jesĭs

(Mt. 1:1-17)

²³ Cost gajlbichii ijz yu' Jesĭs chi guzuloj beenman xchiin Dios. Naladx ree bejn xi'n Xiĕb najman, Xiĕb guin gojc xi'n Elĭ. ²⁴ Elĭ gojc xi'n Matat, Matat gojc xi'n Levĭ, Levĭ gojc xi'n Melqui, Melqui gojc xi'n Jana, Jana gojc xi'n Xiĕb, ²⁵ Xiĕb gojc xi'n Matatĭas, Matatĭas gojc xi'n Amos, Amos gojc xi'n Nahum, Nahum gojc xi'n Esli, Esli gojc xi'n Nagai, ²⁶ Nagai gojc xi'n Maat, Maat gojc xi'n Matatĭas, Matatĭas gojc xi'n Semei, Semei gojc xi'n Xiĕb, Xiĕb gojc xi'n Judá, ²⁷ Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, ²⁸ Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, ²⁹ Er gojc xi'n Josuĕ, Josuĕ gojc xi'n Eliezer, Eliezer gojc xi'n Jorim, Jorim gojc xi'n Matat, ³⁰ Matat gojc xi'n Levĭ, Levĭ gojc xi'n Simeon, Simeon gojc xi'n Judá, Judá gojc xi'n Xiĕb, Xiĕb gojc xi'n Jonán, Jonán gojc xi'n Eliaquim, ³¹ Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, ³² Natán gojc xi'n Davi, Davi gojc xi'n Isai, Isai gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naason, ³³ Naason gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, ³⁴ Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Tarĕ, Tarĕ gojc xi'n Nacor, ³⁵ Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, ³⁶ Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noĕ, Noĕ gojc xi'n Lamec, ³⁷ Lamec gojc xi'n Matusalĕn, Matusalĕn gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, ³⁸ Cainán gojc xi'n Enos, Enos gojc xi'n Set, Set gojc xi'n Adán, guiaad Adán gojc xi'n Dios.

4

*Been xinxab Jesús prueb**(Mt. 4:1-11; Mr. 1:12-13)*

¹ Yu' xSprijt Dios luxdoo Jesús guidiblagaa. Chi bazaman guiwro' Jordán dxel biné xSprijt Dios laaman lod naj yujbidx. ² Ni guzuman tiuu dxej tiuu guiaal, abi' been xinxab laaman prueb. Achetczy gudawaman dxej zii ree, zianz gulaanman. ³ Dxel rëb xinxab guin lojman:

—Bal wali najl Xi'n Dios, gunabee yayajc guiaj guie guidaxtil.

⁴ Badxi' Jesús laan rëbaman:

—Loj xtiidx Dios rëb: “Ad ganaxtizi guidaxtil guiban bejn, nëgajc gra diidx rníee Dios.”

⁵ Dxel biné xinxab guin laaman tijb guijc guia' ya da't, lod balüüx laaman gra ree nacion riga' loj guidxliuj. ⁶ Abi' rëb xinxab guin lojman:

—Gunen graczi gualrniabee në gualnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan. ⁷ Bal guzuxibil lon abi' guiën da'til naj, graczan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

⁹ Dxel biné xinxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj, ¹⁰ din loj xtiidx Dios rëb: Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman,

chitëë quiilguijdx guiaj guia'l.

¹² Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xinxab guin Jesús prueb, dxel biquiedix tiblädëd.

*Rzuloj Jesús rulüüman bejn ree niz Galilea**(Mt. 4:12-17; Mr. 1:14-15)*

¹⁴ Badxin Jesús niz Galilea, yu' xSprijt Dios luxdooan guidiblagaa, abi' guidibczy niz yagaj bire'ch xtiidxaman. ¹⁵ Rulüüman bejn ree lën ree yadoo guidib niz yagaj, abi' graczi reeman ruza't laaman zagdxë.

*Radxin Jesús Nazaret**(Mt. 13:53-58; Mr. 6:1-6)*

¹⁶ Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios. ¹⁷ Badëëd reeman gui'ch ni bacaa Isaías bën badëë xtiidx Dios loj ree bejn. Chi bachijlaman loj gui'ch guin, badxejlaman lod rëb:

¹⁸ XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugoynan bejn ree xhienaag laa reeman loj ni rzajc reeman,

yaxhal tëën loj ree bënlutia'p.

Gün tëën yudar bën rusagzi reeman,

¹⁹ din gugoynan guial ma bidxin dxej za'cdxoon ni güünle' Dios bejn ree.

²⁰ Dxel batüüb Jesús gui'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj ruguiaadxijch laaman. ²¹ Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

²² Graczi reeman cuza't laaman zagdxë caydxa tëë loj reeman diidxza'cdxoon ni canee-man. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

²³ Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayün lüj gajc”, na tëëdi: “Ni ma baguiejnan beenl Capernaum nëgajc guie beenan najn ladxil.”

²⁴ Rëb tëë Jesús:

—Diidxliczi rnin, ni'czi tijb bën rudëë xtiidx Dios loj ree bejn, ad rënt reeman laaman ladx gajcaman. ²⁵ Gol basaaladx dád zien ree bëngunaa bizëjb zojb Israel lën ree dxej guban Elías bën badëë xtiidx Dios loj ree bejn, chi ad golt guia choon ijz garol, abi' guyu gubijn guidibczy. ²⁶ Per ad guxhaalt Dios Elías guin loj tijb ree bën bizëjb zojb Israel, guxhaalaman laaman loj tijb bën bizëjb zojb guiedx la Sarepta, gajxh Sidón. ²⁷ Në lën ree dxej guban Eliseo

bén badëë xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bén Siria bayüjnman laman Naamán.

²⁸ Chi bigueijn gra ree bén yu' lën yadoo guin ni rëb Jesús, dád balen reeman. ²⁹ Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. ³⁰ Per gudëd Jesús galay reeman, ziataman.

Rabëë Jesús xindxab luxdoo tijb bejn

(Mr. 1:21-28)

³¹ Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiadx reeman. ³² Abi' dád badxaloj reeman ni rulüüman guial rnieenëman laa reeman con gualrniabee.

³³ Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

³⁴ —Basa'n dunujn, ¿xhie rën con dunujn, Jesús bén Nazaret? ¿Zëëdil ya zidganiitil dunujn? Nünbeen lüj, naya nalil najl xi'n Dios.

³⁵ Dxel gudilë Jesús xindxab guin, rëbaman lojx:

—¡Bacwëëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetdzi goquix. ³⁶ Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con gualrniabee ni rajpaman, rniabeeman rarii ree xindxab luxdoo ree bejn!

³⁷ Abi' guidibczi niz yagaj bire'ch xtiidxaman.

Rayüjn Jesús xnasuegr Bëd

(Mt. 8:14-15; Mr. 1:29-31)

³⁸ Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. ³⁹ Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixchewan guzuloj cudëëman ni gaw reeman.

Rayüjn Jesús zien ree bénragxuu

(Mt. 8:16-17; Mr. 1:32-34)

⁴⁰ Chi ma wëëz gubijdx, graczi ree bén rajp bénragxuu bén rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. ⁴¹ Në zien ree bénragxuu guin rarii xindxab luxdoo, rbidxa' reex rëb reex:

—¡Lüj naj Xi'n Dios!

Per gudilëman xindxab guin ree, ad cwëjbtaman ninie reex, guial ragbee reex laaman naj Cristo.

Rulüü Jesús xtiidx Dios niz Galilea

(Mr. 1:35-39)

⁴² Chi bareguiaal, barii Jesús luguiedx guin zëman lod achut bejn zojb. Per raguiil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman. ⁴³ Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

⁴⁴ Zian basnuu guneeman xtiidx Dios lën ree yadoo niz Galilea.

5

Rniaaz reeman zien bëjl

(Mt. 4:18-22; Mr. 1:16-20)

¹ Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. ² Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguuib xguijxh reeman ni rniaaznë reeman bëjl. ³ Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree. ⁴ Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

⁵ Badxi' Simón laan rëbaman:

—Mextr, gudëd guiaalci baguieenan dxiin, achutczi bëjl wanaazan. Per bal lüj na, yazaalan guijxh guin ree.

⁶ Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. ⁷ Abi' been reeman sen loj ree xcompniar reeman bén yu' ree loj stijb barcw guin, din chiguien reeman laa reeman yudar. Dxel wej reeman, abi' bacha

reeman bëjl guin ree loj grop barcw guin xt ma nizëëb reen xan nijs. ⁸ Chi baguiaa Simón Béd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

⁹ Guial Simón con ree bén za'nëman badxa loj reeman guial dád zien bëjl gunaaz reeman.

¹⁰ Ziangajc badxaloj ree Jacob con Waj, bén naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

¹¹ Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

Rayün Jesús tijb bén rajc guialguijdx la lepra

(Mt. 8:1-4; Mr. 1:40-45)

¹² Chi za' Jesús tijb luguiedx, bidxin tijb bén rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjnl naj.

¹³ Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bén guin. ¹⁴ Dxel rëb Jesús lojman:

—Achuczi loj guiëbil guial ma bayajquil. Lojzi bixhioz wej din guguaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

¹⁵ Per guixie guixie mazri bire'ch xtiidx Jesús por gra ree ni zagdxë rünman. Abi' dád benzien rdo'p din gucaagdiagj reeman ni rnieeman yayüjn tëëman laa reeman guialguijdx ni rajc reeman. ¹⁶ Guiäd laaman rejman niz lod achut bejn zojb, persi rbejdx rniabaman Dios.

Rayün Jesús bén nëjt xcuerp

(Mt. 9:1-8; Mr. 2:1-12)

¹⁷ Tijb dxej culüü Jesús bejn ree, abi' zojb tio'p choon ree bënfarisew në ree mextr rajc ley, zëëd reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayünman bënragxuu ree. ¹⁸ Dxel bidxin tio'p choon ree bejn, bidxinnë reeman tijb xin nëjt xcuerp, naga'x loj da. Abi' guyën reeman niünë reeman laax lëñü guin din niguijxh reeman laax lod za' Jesús. ¹⁹ Per ad badxejlt ban niz niünë reeman laax guial bén guixiuj riga' yagaj. Dxel wë'p reeman guijc yu guin, abi' biquied reeman tex dxiiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree bén guin lod za' Jesús. ²⁰ Chi baguiaa Jesús guial rliadx reeman laaman; rëbaman loj xinragxuu guin:

—Xi'n, ma benan xtolil perdon.

²¹ Per ree mextr rajc ley con ree bënfarisew guzuloj cayüjn reeman xgab: “¿Chu xin guin zeel rünx mazri xin zojbloj guial loj Dios? Achutczí rajc rün perdon dol, tijbzi Dios.”

—Per gogbee gajc Jesús xgab cayüjn reeman, dxel rëbaman:

—¿Chexc zeel rünjdi xgab zian? ²³ ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”? ²⁴ Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—jBixche, baca' ni go'til loj! Baguiaj lidxil.

²⁵ Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdxë. ²⁶ Graczi reeman badxaloj ruza't tëë reeman Dios zagdxë abi' dád bidxeb reeman, rëb reeman:

—jNi'qui tijb ad waguiaat ree zi'ct naj ni cayguiaa ree yan!

Rbejdx Jesús Leví

(Mt. 9:9-13; Mr. 2:13-17)

²⁷ Chi gudëd gojc zian, baguiaa Jesús tijb bén ruquijx impuest, laman Leví, zojbaman lod ruquijxaman. Abi' rëbaman lojman:

—Tanal naj.

²⁸ Dxel bisu Leví, guro'nladxaman gran zinaltaman Jesús.

²⁹ Abi' been Leví lanjro' lidxaman par Jesús, në zien ree bén ruquijx impuest zojb nëtëë ree ben ren zojbnë reeman xan mex. ³⁰ Per ree bënfarisew ree në ree mextr rajc ley, bén nuchajg gajc ree bënfarisew guin, guzuloj caneeguijdx reeman xbejn ree Jesús, rëb reeman:

—¿Chexc zeel rë' rawnëdi bén ruquijx ree impuest në ree bëndol?

³¹ Badxi' Jesús laan rëbaman:

—Bénnadaan ree ad riaadxt reeman doctor, bénnragxu ree laa reeman riaadxt Doctor. ³² Ad zialtan par ree benza'c, zialan par ree béndol din yayüjn reeman xgab por xtol reeman.

Rniabdiidx reeman loj Jesús xcwent gualrba'n
(Mt. 9:14-17; Mr. 2:18-22)

³³ Bénnarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénnarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

³⁴ Badxi' Jesús laan rëbaman:

—¿Wen zajc güündi naguiejn ya guiba'n ree biooz za' loj gualruxhlaa, la'tgaj za'në xin cuxhlaa guin laa reeman? ³⁵ Per guidxin dxej chiquiedix, dxel guiba'n reeman.

³⁶ Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguaatan zagdxé loj lajdyojx guin.

³⁷ Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. ³⁸ Zeel vin cüb rayal chu'n lën anfr cüb din ni'qui tijb reen ad zaxint. ³⁹ Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

6

Rgui'ch ree xbejn Jesús trigo dxej raziiladx ree bén Israel
(Mt. 12:1-8; Mr. 2:23-28)

¹ Tijb dxej raziiladx ree bén Israel, la'tgaj cadéd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman.

² Abi' yu' ree bénnarisew rëb loj reeman:

—¿Chexc zeel rüjndi ni ad rayalt güündi dxej raziiladx ree bejn?

³ Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

⁴ Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bén guxhaal Dios rajpaman gualrniabee dxej raziiladx ree bejn.

Rayajc tijb xin naxü'n tibladya
(Mt. 12:9-14; Mr. 3:1-6)

⁶ Zatiyb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. ⁷ Abi' ree mextr rajc ley në ree bénnarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. ⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. ⁹ Dxel rëb Jesús loj reeman:

—Ganabdiidxan léjt: ¿Xhie rayal güün bejn dxej raziiladx reeman, ni zagdxé ya o ni mal?

¿Guslaaman xguialnaban bejn ya o gugüjtaman laaman?

¹⁰ Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax. ¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles
(Mt. 10:1-4; Mr. 3:13-19)

¹² Lën ree dxej zii wej Jesús tijb ruguia' persi gurejdx gunabaman Dios, abi' gudéd guiaalczi gurejdx gunabaman Dios yagaj. ¹³ Chi bareguiaal, gurejdxaman bén nal ree laaman, dxel gulejman chiptio'p reeman loj reeman, abi' guneeman laa reeman apóstoles.

¹⁴ La reeman: Simón, bén gulëélajman Béd, Andrejs bijch Simón, Jacob, Waj, Felip, Tol,

¹⁵ Matew, Tumajs, Jacob xi'n Alfeo, Simón, bén bi'ch loj ree bén cananistas, ¹⁶ Judas xi'n Jacob, në Judas Iscariote bén bayü Jesús.

Rülüü Jesús zien ree bejn
(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bén zëéd ree niz Judea në Jerusalén në ree bén zëéd Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman gualguijdx ni rajc reeman.

¹⁸ Nē ree bēn yu' xindxab luxdoo bayajc. ¹⁹ Zeel graczi ree bejn rēn guqui' laaman, guial rayünman laa reeman con xguialrniabeeman.

Xiquilbaa ree bejn

(Mt. 5:1-12)

²⁰ Dxel baguiaa Jesús loj ree xbejnman, abi' rēbaman:

—Xiquilbaadi bēnprob, din lējt rayal loj xguialrniabee Dios.

²¹ Xiquilbaadi bēn rliaan ree yan, din Dios guneē ni gawidi xt chigdxinlaxidi.

'Xiquilbaadi bēn roon ree yan, din zadxin dxej guxijdxidi.

²² 'Xiquilbaadi chi rdxe'ch bejn lējt, chi rabēēca reeman lējt, rnieeguijdx tēē reeman lējt, naladx reeman najdi bendxuudx guial rliadxidi Bēn guxhaal Dios. ²³ Gol babaa gol badxe' tēē luxdoodi zagdxē chi güünnē reeman lējt zian, din zro' ni tia'di yu' xanyabaa, din ziangajc beennē xbēngulal reeman bēn badēē ree xtiidx Dios loj ree bejn.

²⁴ 'Per probza lējt benrijcw, din ma guyuxgaj luxdoodi nix.

²⁵ 'Probza lējt bēn raw xt rigdxinlaxd yan, din zadxin dxej guiliaandi.

'Probza lējt bēn ruxijdx yan, din zadxin dxej goondi guial chu'nayadi.

²⁶ 'Probza lējt, bēn ruladx ree guilies bejn xvalor, din zian beennē ree xbēngulal reeman bēn goc ree bēn rusquiee, rēb reeman rudēē reeman xtiidx Dios loj ree bejn.

Guyēn bēn rdxe'ch lūj

(Mt. 5:38-48; 7:12)

²⁷ 'Per ganin lējt bēn rucaagdiajg ree da diidxan: Gol guyēn bēn ralen lējt, gol gojc benza'c con ree bēn yu'xyajn lējt, ²⁸ gol bazaal diidxza'c guiyc ree bēn ruzaal diidxmal guijquidi, gol gurejdx gunab Dios por ree bēn rnieeguijdx lējt. ²⁹ Bal chu chēēz tiblād xhajguil, badēēd zatibladan, bal chu cwēēxuu xchamarril, ad cwexuul chinēman nē xmanguil. ³⁰ Chutēēz bēn rniab xhienin lojl, badēēdan. Bal chu rquied xhie xieenl, ad bal yanabilan. ³¹ Gol beennē ree bejn zi'c rēndi güünnē reeman lējt.

³² 'Bal rēndi ganaxzi bēn rēn lējt, ¿xhieza ni zagdxen cayüjndi? Din xt bēndol ree rüjn zian, rēn reeman bēn rēn laa reeman. ³³ Abi' bal rüjndi wen ganaxzi bēn rüjn lējt wen, ¿xhieza ni zagdxen cayüjndi? Din xt bēndol ree rüjn zian. ³⁴ Ziangajc bal rudēēdidi ni rgui'n ganaxzi bēn naladxidi zajc yaguijx lojdi, ¿xhieza ni zagdxen cayüjndi? Din xt nē ree bēndol rudēēd rgui'n ree bēn naladx reeman zajc yaguijx loj reeman. ³⁵ Per lējt gol guyēn bēn ralen lējt, gol been reeman wen. Gol badēēd qui'n reeman, ad cwēzidi xhie tia'di guijcan. Zian tia'di zro' gualnaza'c ni guneē Dios bēn yu' xanyabaa, gac tēēdi xi'nman, din laaman naj benza'c con ree bēn ad rudēēt quixtēē lojman nē con ree benmal. ³⁶ Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

³⁷ 'Ad gula'chidi, ad gudxiib tēēdi ni mal guiyc ree bejn chitēē saquidi zian, gol been perdon din gaquidi perdon. ³⁸ Gol badēēd ni riaadx ree bejn, Dios mazri zro' naj ni guneeman zi'c tijb bols guidxadi. Din zi'c rudēēdidi loj ree bejn, ziant gajc naj ni guneē Dios lojdi.

³⁹ Rēb Jesús loj reeman zatijb diidx:

—¿Wen zajc chinē bēnlutia'p zatijb bēnlutia'p ya? ¿Nid zayajb grop reeman ro' bala' ya? ⁴⁰ Tijb bēn cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

⁴¹ 'Ad gula'chil ben ren por faltdobēz ni rajpaman, zagdxeli guyu xgab por falt narooob ni rajpil. ⁴² Abi' bal mazri falt narooob rajpil, ¿xzoza guiēbil loj zatijb bejn: "Ad laa naj ni rüjn"? ¡Bēn rusquiee! yaloxgajc been zi'c rayal, chi ma beenl zian dxel ma zile' guiēbil loj zatijb bejn: "Ad laa naj ni rüjn!".

Por ni rtia loj yag rayünbee bejn xhie yagan

(Mt. 7:17-20; 12:33-35)

⁴³ 'Ad yu't yag zagdxē rtia ni guijdx loj, ad yu' tēēt yag guijdx rtia ni zagdxē loj. ⁴⁴ Din tijbgajc yag rayünbee bejn xhie yagan por ni rtia lojn. Ad raru't higo loj yaquiejch, ad raru' tēēt uv loj gui'xh. ⁴⁵ Benza'c rnieeman diidxza'c din laan yu' luxdoooman, guiáad benmal rnieeman diidxmal din laan yu' luxdoooman. Din ni yu' luxdoo bejn laan rnieeman.

Tio'ploj cimiant

(Mt. 7:24-27)

⁴⁶ '¿Chexc zeel rnieedi naj, "Dad, Dad", abi' adza rüjntidi ni rnin? ⁴⁷ Ganin lojdi chu naj zi'c bēn ri't lon, rigueijnman ni rēn, abi' rüjnman laan: ⁴⁸ laaman naj zi'c tijb bēn been yu, yalox gajc gudēēnman naxhit xt chi bila loj guiaj, dxel gulesaman xcimiantan guiyc guiaj guin. Abi' chi bi't nijsro' majsi gulajñ lad yu guin, per ni'quid baniibtan laan guial naj

cimiant guin guijc guiaj. ⁴⁹ Per b n rigueijn da diidxan abi' ad r jntaman laan, najman zi'c tijb b n been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

7

Rayajc xmojs tijb suldad rom xin rniabee ree suldad (Mt. 8:5-13)

¹ Chi gulox guneen  Jes s bejn ree, dxel z man Capernaum. ² Yagaj zojb tijb suldad Rom xin rniabee ree suldad. Yu' tijb xmojsix xin r n da'tix, ragxuu mojs guin ma rul uczi gui tix. ³ Chi bigueijn suldad rniabee guin ruza't ree bejn Jes s, guxhaalix tio'p choon ree b n rniabee Israel lojman din chisajc reeman liaadx yay jnman xmojsix. ⁴ Abi' bidxin reeman loj Jes s guzajc reeman liaadx, r b reeman:

—Gagn siil suldad rniabee guin, ⁵ din r nx b n duladx ree, n  yan por laax gojc dux yadoo ree.

⁶ Dxel bin  Jes s laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jes s biguiedx reex lojman:

—Dad, ad chu'l xgab, din ad rayaltan chu'l l n  lidxan, ⁷ zeel ad bayaxtan nial quijb naj nidgadilan l j. Per con guneen diidz lod za'l din yayajc da mojsan. ⁸ Din zi'c naj yu' ree b n rniabee naj, ziangajc naj yu' ree da suldadan xin rniabeen. Chi r n loj tijb reex: “Wej”, rejx. Chi r n loj zatijbix: “Guda”, ri'tix. Abi' chi r n loj da mojsan: Been ni guin, r jngajquixan.

⁹ Chi bigueijn Jes s zian, d d badxa lojman ni r b suldad guin, abi' badxi' lojman loj gra ree b n zinal laaman, r baman:

—Diidxliczi rnin, ni'qui Israel ad wadxaaglojtan tijb b n rliladx da't Dios zi'c rliladx xin guin Dios.

¹⁰ Chi badxin ree xin guxhaal suldad rniabee guin lidxix, baguiaa reex ma bayajc mojs guin.

Rasban Jes s xi'n tijb b ngunaa biz jb

¹¹ Chi gud d gojc zian, wej Jes s tijb luguiedx la Nain bin  ree xbejnman, n  zien ree ben ren. ¹² Chi bidxinman gajxh ro' guiedx guin, baguiaaman ziquie'ch reeman tijb xing t, tijbzi laax naj xi'n xniaax, najman b n biz jb. Zien da't ree b nluguiedx guin zinal laaman.

¹³ Chi baguiaa Dad Jes s laaman, bayaman laaman, dxel r baman lojman:

—Ad roonl.

¹⁴ Abi' bibig Jes s baqui'man xcaj xing t guin, dxel guzudxe ree b n zin  laax. Zianz r baman lojx:

—Xi'n, naj rni lojl:  Bixche!

¹⁵ Dxel gureli xin guin, guzuloj caneex, zianz bay  Jes s laax loj xniaax. ¹⁶ Chi baguiaa reeman zian, graczi reeman bidxeb guzuloj cuza't reeman Dios zagdxe, r b reeman:

—Du loj ree ma gules Dios tijb b n zojbloj, b n rud   xtiidx Dios loj ree bejn.

R b t   reeman:

—Ma bi't Dios din gagn  ree xbejnman.

¹⁷ Abi' guidib niz Judea n  ree guiedx riga' niz yagaj gogbee ree bejn ni been Jes s.

Bigneen  ree xbejn Waj Jes s

(Mt. 11:2-19)

¹⁸ Gogbee Waj gra ree ni cay jn Jes s, guial bagojn ree xbejnman laaman. Abi' guneeman tio'p reeman, ¹⁹ dxel guxhaalaman laa reeman loj Jes s din chignabdiidx reeman bal laacaman naj Cristo b n naj diidx gui't, b n cab z reeman, o cw z reeman ben ren ya. ²⁰ Abi' bibig reeman, guneen  reeman laaman, r b reeman lojman:

—Waj b n ruroobnijs bejn ree guxhaal dunujn lojl judganabdiidxan bal l jcan naj Cristo b n naj diidx gui't, b n cayl jzan o yal jzan ben ren ya.

²¹ Hor ziigajc bay jn Jes s zien da't ree b nragxuu, n  ree b n rdoob, n t   ree b n yu' xindxab luxdoo, baxhal t  man loj ree b nlutia'p. ²² Dxel badxi' Jes s xtiidx ree b n guxhaal Waj, r baman:

—Gol chej, gol chiguiedx loj Waj ni cuguaadi n  ni caguiejndi. Gol g jdx lojman guial ma ruguiaa ree b nlutia'p, ma rajc rza ree bencoj, ma rayajc t   ree b n goc guialguijdx la lepra, ma rigueijn ree b n nacwa't, gui ad ree beng t ma baban reeman, abi' ree b nprob ma caguiejn reeman xtiidxza'c Dios. ²³  Xiquilbaa ree b n ad zucw  zt chililadx naj!

²⁴ Chi baza ree b n guxhaal Waj, guzuloj Jes s caneeman xcwent Waj loj ree bejn, r baman:

— Chu naladxidi naj b n biquiaadi loj yujbidx?  Naladxidi ya najman zi'c tijb biqui runiib bi? ²⁵  O chu biquiaadi?  Tijb b n najcw lajd zagdxe ya? L jt ragbee guial b n rajcw ree lajd zagdxe, n  ree b n naban zagdxe, l n palas zojb reeman. ²⁶  Chu biquiaadi?  Tijb b n rud  

xtiidx Dios loj ree bejn ya? Per diidxliczi rnin lojdi, biquiaadi tijb b́en mazri zobjloj guial loj tijb b́en rudéé xtiidx Dios loj ree bejn. ²⁷ Wajn naj b́en ruza't xtiidx Dios, lod rēb:

Naj rxhial tijb b́en ned lojl,
b́en güünchaaw xnejzil.

²⁸ Rnin lējt, loj graczi ree bénguidxliuj ad wayut b́en rudéé xtiidx Dios loj ree bejn, b́en mazri zobjloj guial loj Waj. Per majsi zian, b́en ad zobjlojt loj xgualrniabee Dios, laaman mazri zobjloj guial loj Waj.

²⁹ Gra ree bejn, nē ree b́en ruquijx impuest b́en baroobnijs Waj, chi biguiejn reeman ni rēb Jesús bignia' reeman guial rñjn Dios zi'c rayal. ³⁰ Per ree b́enfarisew con ree mextr rajc ley ad cwējbt reeman nuroobnijs Waj laa reeman, zian ad guyēnt reeman ni rēn Dios par laa reeman.

³¹ Rēb tēé Jesús:

—¿Xhienaag ganin lējt naj ree b́en riga' loj guidxliuj guie yan? ¿Chu naj zi'c laa reeman?
³² Laa reeman naj zi'c ree xindoo rguijt niz galay luguiedx, abi' rbixdiaj reex rēb loj lasa' reex: “Bacwejdaxan par nuya'di, per ad baya'tidi, badoolan ni naya ree, per ad biintidi.”
³³ Din bi't Waj b́en baroobnijs bejn ree, ad rawtaman ad rē' tēétaman vin, abi' rēbidi xindxab yu' luxdooan. ³⁴ Yan bi't B́en guxhaal Dios, rawaman rē' tēéman vin, abi' rēbidi guial dád nalaman ruladxaman guié'man, ruchajj tēéman b́endol ree con ree b́en ruquijx impuest.
³⁵ Per xgualrignia' Dios, rguianan por ree xbejnman.

Rej Jesús lidx tijb b́enfarisew la Simón

³⁶ Tijb b́enfarisew rēb loj Jesús din chitaw Jesús guin lidxaman. Abi' bidxinman lidxaman gurejman xan mex. ³⁷ Dxel tijb béngunaa dxuudx zobj gajc luguiedx guin. Chi gogbeeman cayaw Jesús lidx b́enfarisew guin, bidxinnēman tijb lumejt yu' perfum. ³⁸ Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwidxné guidxguijcaman laan, cayawaman xid guia'man curoob tēéman laan perfum guin. ³⁹ Chi baguiaa b́enfarisew guin zian, beenman xgab: “Balgui zian wali b́en guin najman b́en rudéé xtiidx Dios loj ree bejn, zagbeeman chunin cuqui' laaman xhie tēé naag naban béngunaa guin, najman bendxuudx.” ⁴⁰ Dxel rēb Jesús loj b́enfarisew guin:

—Simón, yu' tijb ni ganin lūj.

Badxi' b́enfarisew guinan rēbaman:

—Gunan, mextr.

⁴¹ Abi' rēb Jesús lojman:

—Tijb b́en rudééd milia rgui'n ree bejn, ral tio'p ree bejn lojman. Tijbaman nuzééb gaaygayuu denario, zatijbaman nuzééb tü'pchiin. ⁴² Grop reeman ad beent gan naguijx lojman, per b́en badééd milia guin rēbaman loj reeman guial ad zaguijxt reeman ni nuzééb reeman. Yan guna, ¿chu loj grop reeman mazt guién laaman?

⁴³ Badxi' Simón laan, rēbaman:

—Par naj, b́en bazééb mazri zro' guin.

Dxel rēb Jesús:

—Waliquil.

⁴⁴ Zianz baguiaa Jesús loj béngunaa guin, abi' rēbaman loj Simón:

—¿Ruguaiaal béngunaa guie ya? Chi guyu'n lidxil ad baneetil nijs niéd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman. ⁴⁵ Ad gadawtil naj xid, guiáad laaman diizd chi guyu'n ad rbézt rawaman xid guia'n. ⁴⁶ Achet sejt badxe'l guican, per laaman ma badxe'man perfum guia'n. ⁴⁷ Zeel rnin lūj, gra ree xtolaman ma gojc perdon guial rēn da'taman naj. Per b́en yu' ta'nz xtol abi' rajcaman perdon, ta'nz rēnman naj.

⁴⁸ Dxel rēb Jesús loj béngunaa guin:

—Ma naj gra xtolil perdon.

⁴⁹ Guiáad ree b́en zobjnēman yagaj guzuloj canabdiidx loj lasa' reeman, rēb reeman:

—¿Chu b́en guin zeel xt nē ree dol rñjnman perdon?

⁵⁰ Per rēb Jesús loj béngunaa guin:

—Ma najl perdon guial rililadxil naj, baguiaj zagdx ad ruril xgab.

8

Béngunaa been ree Jesús yudar

¹ Chi gudéd gojc zian, wej Jesús gra ree guiedx narooob nē ree guiedx dobēz bicojnman biglūü tēéman xhienaag naj xgualrniabee Dios. Nē guidxiptio'p ree apóstoles binēman, ² nētēé tio'p choon ree béngunaa, b́en babééman xindxab luxdoo, nē ree b́en bayünman gualguijdx ni rajc reeman. Loj reeman no'ch María Magdalena, b́en babéé Jesús gajdx

xindxab luxdoo. ³ Nē Xuan, lacheel Cuza, Cuza guin goc bēn nulen xchiin Herodes. Nē Susan nētēē zien ree béngunaa ren, been reeman yudar Jesús con ni rajp reeman.

Xcwent bēn rtie'ch bin

(Mt. 13:1-9; Mr. 4:1-9)

⁴ Zien ree bejn brii loj ree guiedx ziquiaa reeman Jesús. Chi bido'p ree benzien, beman tjb cwent loj reeman rēbaman:

⁵ —Tjib bejn zēman zigtie'chaman bin. Chi catie'chaman laan, ta'nān biajb lunejz abi' balēē ree bejn gujcan gudaw tēē ree biguijn laan. ⁶ Zata'nān biajb loj ree guiaj, chi gulejn reen gubidx reen guial ad yu' xcojpt loj ree guiaj guin. ⁷ Zata'nān biajb loj ree yaquiejch. Abi' chi guni's reen tjbzi, banidloj yaquiejch guin laa reen. ⁸ Zata'nān biajb loj yujza'c abi' dād gojcan, cwa xt tibgayuu bin loj tjbgbajn.

Chi gulox guneē Jesús zian, dxel guneeman rejs rēbaman:

—Bēn rēn gucaagdiajg, gol bacaagdiajg.

Chexc zeel ruliü Jesús con cwent ree

(Mt. 13:10-17; Mr. 4:10-12)

⁹ Dxel gunabdiidx ree xbejn Jesús lojman, rēb reeman:

—¿Xhie rēn guiēb cwent guin?

¹⁰ Badxi' Jesús laan rēbaman:

—Lējt, Dios ma basa'n lējt din chignia'di xhienaag naj xguialrniabeeman. Per loj gra reeman rūnan zi'c cwent din majsi rani loj reeman, per ad zuguaat reeman, majsi riguejn reeman, per ad zignia't reeman.

Rusignia' Jesús xcwent bēn rtie'ch bin

(Mt. 13:18-23; Mr. 4:13-20)

¹¹ Ni ne rēn guiēb xcwent bēn rtie'ch bin: Bin guin naj zi'c xtiidx Dios, ¹² guiaad bin biajb runejz naj zi'c ree bēn riguejn xtiidx Dios; per rdxin gajc xindxab rquiedix laan luxdoo reeman chitēē chililadx reeman laan abi' gac reeman perdon. ¹³ Guiaad bin biajb loj ree guiaj, naj zi'c ree bēn riguejn xtiidx Dios, abi' dād nix ru luxdoo reeman riguejn reeman laan, per guial naj reeman zi'c cwaan ni ad yu't liuj, rililadx reeman laan tiblādēd abi' chi rzagdiaj reeman laa rusa'n gajc reeman ni rililadx reeman. ¹⁴ Guiaadza bin biajb loj ree yaquiejch, naj zi'c ree bēn riguejn xtiidx Dios; per ru reeman xgab por gra ree guialnaza'c riga' loj guidxliuj guie rūjn tēē reeman ni rēntzi reeman, abi' zianz rucwēēz rucaagdiajg reeman xtiidx Dios ad rūjn tēēt reeman ni rēnman. ¹⁵ Guiaad bin biajb loj yujza'c, laan naj zi'c ree bēn rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tēē reeman loj xnezaman, zianczi rūjn reeman ni rēnman.

Achet ni naguei'ch yu'

(Mr. 4:21-25)

¹⁶ Achut bēn ruze'c tjb guj dxel ruta'cwaman laan, ad rudxe' tētēaman laan xan lon, ruzujman laan ya din gusnin loj ree bēn chu' lēnū. ¹⁷ Achet ni naguei'ch yu' ni ad zaguiant ad yu' tēēt ni ralan ni ad zagbeet bejn, zadxin dxej gagbeē bejn laan.

¹⁸ Zeel gol bacaagdiajg zagdxē, bēn ma rignia' gusnuu chignia'man mazri, per bēn ad rignia't, xt ta'n ni naladxaman rignia'man ad zignia'traman.

Xniaa Jesús con ree bijchaman

(Mt. 12:46-50; Mr. 3:31-35)

¹⁹ Xniaa Jesús con ree bijchaman bidxin reeman lod za'man, per ad gojct nibig reeman lojman guial dād zien bejn riga'. ²⁰ Abi' yu' bēn bagojn Jesús rēbaman:

—Laa xniaal con ree bijchil za' lule' guin rēn reeman guinieenē reeman lūj.

²¹ Badxi' Jesús laan rēbaman:

—Bēn rucaagdiajg ree xtiidx Dios rūjn tēē reeman zi'c rēnman, laa reeman naj da nan laa tēē reeman naj da bichan.

Racwēēz Jesús bidoxh

(Mt. 8:23-27; Mr. 4:35-41)

²² Tjib dxej guyu Jesús loj barcw con ree xbejnman, abi' rēbaman loj reeman:

—Yo' ree zatiblad ro' nijs guin.

Zianz zē reeman. ²³ La'tgaj cadēd reeman loj nijs guin, goodyēs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazēēbczi barcw guin xan nijs. ²⁴ Dxel bacwēēn reeman Jesús, rēb reeman:

—¡Mextr! ¡Mextr! ¡Ma cayzēēb ree xan nijs!

Abi' bixche Jesús gunabeeman bacwēēz bidoxh guin nē xtūjp nijs guin, zianz gulējz reen dxel bayajcdxe. ²⁵ Abi' rēbaman loj reeman:

—¿Conza xguialrliladxidi?

Per laa reeman dád bidxeb reeman badxa tēē loj reeman, abi' canabdiidx loj lasa' reeman rēb reeman:

—¿Chu bēn guin zeel rniabeeman bi nē nijs, abi' ruzoob reen xtiidxaman?

Rayūjn Jesús tijb xin yu' xindxab luxdoo

(Mt. 8:28-34; Mr. 5:1-20)

²⁶ Dxel badxin Jesús con ree xbejnman xdajn ree bēn Gadara, ni riga' zatiblad ro' nijs Galilea. ²⁷ Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoo. Ad rajcwt xabix, ad nabantix lēnū, ganaxzi ro' ree baa nabanx.

²⁸ Chi baguiaax Jesús bazuxibix lojman, guneex rejs rēbix:

—¿Xhie rēnl con naj, Jesús, Xi'n Dios yu' xanyabaa? Rniaaban lojl ad gusagzil naj.

²⁹ Rēbix zian guial ma canabee Jesús din yarii xindxab guin luxdoo. Ma gojc xchej naaz xindxab guin laax. Abi' ma guxhii ree bejn yaax nē guia'x con caden chitēē ban chex, per rutūguia'gajquix caden guin abi' rulaagdxa xindxab guin laax niz lod achut bejn zojb.

³⁰ Gunabdiidx Jesús lojx rēbaman:

—¿Chu lal?

Badxi'xan rēbix:

—Legión lan.

Rēbix zian guial zien da't ree xindxab yu' luxdoo. ³¹ Rēb ree xindxab guin loj Jesús chitēē guixhiaalaman laa reex gabijl. ³² Dajn guin riga' zien ree cūch cayaw reeb. Zeel rēb ree xindxab guin lojman din gudēēman mod chu' reex lēn ree cūch guin, dxel cwējbaman. ³³ Zianz barii reex luxdoo bayu reex lēn ree cūch guin, abi' guzuloj cuxūn reeb zianz bitidia' reeb ro' bala' xt loj nijs, lod gu' reeb nijs abi' gūjt reeb.

³⁴ Chi baguiaa ree bēn cayajp ree cūch guin ni goc, baxūn reeman bicojn reeman bejn ree luguiedx nē ree dajn. ³⁵ Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badēdguienx abi' bidxeb reeman. ³⁶ Guiáad ree bēn baguiaa ni goc, be reeman diidx loj reeman xhienaag bayajquix. ³⁷ Graczi ree bēn zojb Gadara gunab loj Jesús din yazaman yagaj guial dád rdxeb reeman. Dxel bayē'paman loj tijb barcw, ziataman. ³⁸ Guiáad xin barii xindxab guin ree luxdoo rēbix lojman din chinalix laaman, per ad cwējbtaman, rēbaman lojx:

³⁹ —Baguiaj lidxil, biguiedx graczi ni been Dios por lūj.

Dxel ziax luguiedx guin abi' bex diidx loj gra ree bejn ni been Jesús por laax.

Rayajc xi'n Jairo nē béngunaa bagaal xab Jesús

(Mt. 9:18-26; Mr. 5:21-43)

⁴⁰ Chi badxin Jesús zatiblad ro' nijs guin, dád rabaa gra ree bēn za' yagaj guial badxinman din mal cabēz reeman laaman. ⁴¹ Dxel bidxin bēn la Jairo, laaman rniabee lēn tijb xyadoo ree bēn Israel. Bazuxibaman loj Jesús, rēbaman lojman din cheman lidxaman, ⁴² guial yu' tijb xi'nman biin chiptio'p ijz, ma guiētczim. Chi zē Jesús dád zien ree bejn zinal laaman xt rixa't reeman laaman.

⁴³ Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayūjn laaman. ⁴⁴ Bibigaman niz wijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxel gunabdiidx Jesús rēbaman:

—¿Chu baqui' naj?

Abi' graczi reeman rēb guial ad laat reeman baqui' laaman. Zianz rēb Bēd loj Jesús:

—Mextr, graczi ree bejn xt rixa't reeman lūj cucadxaa tēē reeman lūj, abi' rniabdiidxil chu baqui' lūj.

⁴⁶ Per rēb Jesús zatijb:

—Yu' chu baqui' naj din gogbeen yu' tijb bēn ma bayajc con da gualrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rēbaman lojman guidibloj ree bēn guin chexc zeel baqui'man xabaman abi' loj hor guin gajc bayajcaman. ⁴⁸ Dxel rēb Jesús lojman:

—Xi'n, ma bayajquil guial biiladxil naj, baguiaj zagdx.

⁴⁹ Sta caneenē Jesús béngunaa guin, chi bidxin tijb bēn guza lidx Jairo, bēn rniabee lēn xyadoo ree bēn Israel, rēbaman loj Jairo:

—Mal gūjt xi'nl, ad ruslenril Mextr guin.

⁵⁰ Per chi biguiejn Jesús zian, rēbaman loj Jairo:

—Ad rdxebil, bililadxi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdзи con Waj, con Jacob, con ree xdad xníaa bindo guin. ⁵² Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

⁵³ Graczi reeman baze' laaman guial ma ragbee reeman güjtim. ⁵⁴ Dxel gunaaз Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babanm, bixchem. Dxel gunabee Jesús badëéd reeman ni gudawim.

⁵⁶ Dád badxa loj ree xdadim, per rëb Jesús loj reeman achu loj guiëb reeman ni goc.

9

Rxhiaal Jesús guidxiptio'p ree xbejnman chigliüü reeman xtiidx Dios

(Mt. 10:5-15; Mr. 6:7-13)

¹ Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bënragxuu ree.

² Guxhaalaman laa reeman chigliüü reeman xhienaag naj xguialrniabee Dios, yayüjn tëë reeman bënragxuu ree. ³ Rëbaman:

—Ad chinëdi xhienin par runejz: ni'qui yagriiadxidi, ni'qui guijxh, ni'qui guialraw, ni'qui milla, ni'qui stibnejz xabidi. ⁴ Chutëëz lidx guidxindi, tib gol baya'nzi xt chi yazadi luguiedx guin. ⁵ Bal yu' guiedx lod ad rënt reeman lëjt, gol baza yagaj, gol gudxijp guxyuj guida'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxa'c Dios, rayüjn tëë reeman bënragxuu ree.

Riguiejn Herodes ni cayüjn Jesús

(Mt. 14:1-12; Mr. 6:14-29)

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, ⁸ yu' tëë reeman rëb Elíasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban. ⁹ Per rëb Herodes:

—Naj gajc gunabee biru' yëjn Waj. ¿Chuza bënan rigujejnman ruza't ree bejn xcwent ni cayüjnman?

Zianan zeel rüjn Herodes nagueijn guguiaaman Jesús.

Ruyaan Jesús gaay mil bejn

(Mt. 14:13-21; Mr. 6:30-44; Jn. 6:1-14)

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczí bejn zojb, gajxh guiedx Betsaida. ¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bënragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguiaj reeman chitiil lod yaya'n reeman luguiedx doo ree në ree ranch, chitiil tëë ni gaw reeman din lod nadxu' ree achetczí yu'.

¹³ Dxel rëbaman loj reeman:

—Lëjt gajc gol badëéd ni gaw reeman.

Abi' rëb reeman:

—Per gaayzi guidahtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian. ¹⁶ Dxel cwa'man guigaay guidahtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin. ¹⁷ Graczi reeman gudaw xt bigdxinlaxd reeman. Abi' bato'p reeman chiptio'p dxüm nilaay baya'n.

Rëb Bëd guial Jesús naj Cristo

(Mt. 16:13-19; Mr. 8:27-29)

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías bën badëë xtiidx Dios loj ree bejn, yu' tëë reeman rëb lüj naj tijb ree bën badëë xtiidx Dios loj ree bejn gocli, bën ma baban.

²⁰ Dxel gunabdiidx Jesús zatijb, rëbaman:

—Laadx lëjt, çxhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

Rugojn Jesús guiëtaman

(Mt. 16:20-28; Mr. 8:30-9:1)

²¹ Rëb Jesús loj reeman achuczi loj guiëb reeman zian, ²² rëb tëëman:

—Rayal sagdiaj Bën guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

²³ Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman gualzi ni tédzaman guixie guixie abi' guidnalaman naj. ²⁴ Din bën mazri rën gualnaban ni rajpaman loj guidxliuj guie, zadxin dxej gusëëbaman laan, per bën guiët por naj, zajpaman gualnaban tiblayaa con Dios. ²⁵ Çxhie gan güün bejn gapaman gra ni yu' loj guidxliuj abi' nitaman loj Dios? ²⁶ Bal chu ratu guza't naj në da diidxan, ziangajc naj najn Bën guxhaal Dios, yatunë'n laaman chi gualan con da gualrniabeen loj xbiani da Dadan nëtëë loj xbiani ree xianjlanan. ²⁷ Per diidxliczi rnin lojdi, yu' ree bën za' guie ad zëjtt xt guguaia reeman xgualrniabee Dios.

Bidxaa Jesús loj choon ree xbejnman

(Mt. 17:1-8; Mr. 9:2-8)

²⁸ Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binëman Bëd con Waj con Jacob. ²⁹ La'tgaj cabejdx canabaman Dios, bidxaa lojman guiäad xabaman gojcan naquichbëj bidiin tëën bacha'. ³⁰ Dxejcz gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. ³¹ Yu' reeman galay biani cayü reeman diidx gual guiët Jesús Jerusalén. ³² Majsu yu' bacaaal loj Bëd në loj ree xcompniaraman, batie'ch xbaacaal reeman persi baguaia reeman xbiani Jesús con zatio'p ree bën za'nëman. ³³ Chi ma baza ree bën caneenë Jesús, rëb Bëd lojman:

—Mextr, jzagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman. ³⁴ La'tgaj caneeman zian, biguiajt tijb zaj xt guijc reeman, chi ma yu' reeman lën zaj guin dád bidxeb reeman. ³⁵ Dxel loj zaj guin biguien cha' bejn, rëbaman:

—Bën guie naj da Xi'nan bën rën da'tan. Gol bacaagdiajx xtiidxaman.

³⁶ Chi gulox biguien cha'man loj zaj guin, baguaia reeman xtijbzi Jesús za'man. Abi' ad gutie'cht reeman diidx. Lën ree dxej zii achutczi loj rëb reeman ni baguaia reeman.

Rayüjn Jesús tijb xin yu' xinxab luxdoo

(Mt. 17:14-21; Mr. 9:14-29)

³⁷ Bareguiaal, chi baguiaajt reeman guijc guia' guin, dád benzien brii bigchaagloj Jesús. ³⁸ Abi' tijb bën no'ch loj reeman guridxa', rëbaman lojman:

—jMextr!, been wen baguaia da xi'nan din tijbzi laax ra'pan. ³⁹ Tijb xinxab ru luxdoox abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. ⁴⁰ Ma gunaanab loj ree xbejn din nabëë reeman xinxab guin, per ad gojct reeman.

⁴¹ Badxi' Jesús laan rëbaman:

—jBenguidx, bën ad rililadxt! Çxt goc gazunë'n lëjt gadaan tëën lëjt? Tanë xi'nl guie.

⁴² Chi cabig xin guin basajb xinxab guin laax luyuj, bagüjtya'x laax zatijb. Per gunabee Jesús barii xinxab guin, bayüjnman laax dxel bayüman laax loj xdadix. ⁴³ Graczi reeman badxaloj gualrniabee ni rajp Dios.

Rugojn Jesús zatijb gual guiëtaman

(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

⁴⁴ —Gol bacaagdiajgchaaw ni ganin lëjt: yayü reeman Bën guxhaal Dios loj ree bejn.

⁴⁵ Per laa reeman ad bignia't reeman ni rnieeman gual ad badëëtaman mod nignia' reeman, abi' bidxeb reeman niniabdiidx reeman lojman xhie rën guiëb ni rëbaman.

¿Chu mazri zobjloj?
(Mt. 18:1-5; Mr. 9:33-37)

⁴⁶ Dxel guzuloj ree xbejnman rëb loj lasa' reeman chu loj gra reeman mazri zobjloj. ⁴⁷ Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, ⁴⁸ dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zobjloj lojdi.

Bén ad za't contr dunuj ree za'man con dunuj ree
(Mr. 9:38-40)

⁴⁹ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

⁵⁰ Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

Gudilë Jesús Jacob con Waj

⁵¹ Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. ⁵² Guxhaalaman bén guned ree, wej reeman tijb guiedxdo nulen Samaria bituil reeman lod yaya'n reeman. ⁵³ Per ad cwëjbt ree bén Samaria guin nudëéd reeman lod naya'nman guial gogbee reeman cheman Jerusalén. ⁵⁴ Chi baguiaa Waj con Jacob zian, rëb reeman lojman:

—Dad, ¿rën! ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

⁵⁵ Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëéd ni rnieedi? ⁵⁶ Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

Bén rën chinal Jesús
(Mt. 8:19-22)

⁵⁷ Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëéz guinchel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, baneer mod gabené' da Dadan xt chi guiëtaman.

⁶⁰ Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bén guin:

—Dad, rënan guidnaalan lüj, per yalojxgaj baneer mod chigzadiidxnë' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdxë. Ziangajc bén rën guidnal naj, bal id zusa'nman graczi tibladd ad zile't chu'man loj xguialrniabee Dios.

10

Rxhial Jesús gayojnchii bejn

¹ Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman.

² Rëbaman loj reeman:

—Diidxliczi, zien bejn rën gucaagdiag xtiidx Dios, per ad zient bén gulüü laa reeman yu'. Zeel gol gurejdx gunab Dios din guixhiaalaman mazri zien bén gulüü laa reeman.

³ Gol chej, naj rxhial lëjt zi'c rej ree xiil galay ree cuyojt. ⁴ Ad chinëdi guijxh, ni'qui milia, ni'qui zatib nejz xgurëchidi, ad sudxedi guinieenëdi bejn ree runejz. ⁵ Bantëéz lënü chu'di, yalojxgaj gol güjdx: “Dios yabe'cdxe luxdoodi.” ⁶ Abi' bal lënüzii yu' ree bén rayal guialnaza'c guin, zaya'nman yagaj. Guiáad bal id rayal reeman laan zayejcan con lëjt. ⁷ Yagaj gol baya'n, gol gudaw, gol gu' ni gunee reeman. Din bén rüjn dxiin rayal gaxaman. Yagajzi gol baya'n ad bal yaya'ndi lood ren. ⁸ Chi guidxindi tijb guiedx lod yaca' reeman lëjt, gol

gudaw ni guneë reeman. ⁹ Gol bayüjn ree bénragxuu yu' ree luguedx guin, gol güjdx tëë loj reeman: "Ma zëëd xgualrniabee Dios gajxh par lëjt." ¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman: ¹¹ "Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëëd xgualrniabee Dios gajxh par lëjt." ¹² Naj rni lëjt guial dxej yadëëd ree bejn cwent loj Dios, mazri casti narooob yayal reeman guial loj ree bén gure guiedx Sodoma.

Bén ad bazoobt ree xtiidx Dios

(Mt. 11:20-24)

¹³ Rëb tëë Jesús:

—jProbza lëjt bén Corazín! jProbza lëjt bén Betsaida! Din bal guiedx Tiro në guiedx Sidón niaj gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijz reeman zi'c tijb sen guial ma bayüjn reeman xgab por xtol reeman. ¹⁴ Per rnin lojdi guial dxej yadëëd ree bejn cwent loj Dios, mazri casti narooob yayalidi guial loj ree bén Tiro në ree bén Sidón. ¹⁵ Guiáad lëjt, bén Capernaum, ad naladxidi yayalidi xanyabaa, lëjt yayal gabijl.

¹⁶ Dxel rëb Jesús loj ree xbejnman:

—Bén ridxga' lëjt, najn ridxga'man, per bén ad ridxga't lëjt, najn ad ridxga'taman. Guiáad bén ad ridxga't naj, bén guxhaal najn ad ridxga'taman.

Badxin ree bén gayojnchii guxhaal Jesús

¹⁷ Chi badxin ree bén gayojnchii guxhaal Jesús, dád rabaa reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

¹⁸ Abi' rëb Jesús loj reeman:

—Waliquidi, naj baguia, zi'czi rë'p nijs basëëb xgualrniabee xindxab. ¹⁹ Naj banee lëjt gualrniabee din gulëëdi guijc ree bëël në guijc ree nixüë, në par güündi gan loj xgualrniabee xindxab sin guial güünx lëjt xhienin. ²⁰ Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

Rabaa Jesús

(Mt. 11:25-27; 13:16-17)

²¹ Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree bén rajc në loj ree bén rignia', laan ma balüül loj ree bén ad rajca'ct. Zian gojcan Dad, din zian guyën.

²² 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëët nünbee Dios, tijbzi Jesucrist xi'nman con ree bén rënman güünbee Dios.

²³ Dxel baguiaaman loj ree xbejnman, abi' rëbaman lojzi reeman:

—Xiquilbaa ree bén guguaia ni cuguaiaadi. ²⁴ Din naj rni lojdi, zien ree bén badëë xtiidx Dios loj ree bejn në ree rey guyën nuguiaa ni cuguaiaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

Xcwent tijb bén Samaria

²⁵ Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿Xhie rayal günan din ga'pan gualnaban tiblyaaa con Dios?

²⁶ Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

²⁷ Abi' rëb mextr guin:

—“Guyën xDadil Dios guidib guijc guidib ladxil guyën tëë ben ren zi'c rën lüj gajc.”

²⁸ Badxi' Jesús laan, rëbaman:

—Zagdxequi badxi'lan. Bal güünl zian zajpil gualnaban tiblyaaa con Dios.

²⁹ Per guyën mextr guin naya'nman zagdxe, gunabdiidxaman loj Jesús, rëbaman:

—¿Chu bénan guiënan zi'c rën naj gajc?

³⁰ Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjczaman. ³¹ Dxel gudëd tijb bixhioz niz yagaj, per chi baguiaaman bén guin, zijt bicaaman volt, zëtaman. ³² Në tijb bén Levita bén rüjn yudar bixhioz ree, gudëd niz yagaj, chi baguiaaman bén guin, zijt bicaaman volt, zëtaman. ³³ Per tijb bén Samaria gudëd niz yagaj, chi baguiaaman bén guin, bayaman laaman, ³⁴ dxel gubigaman lod naga'man, badxe'man sejt con vin lod nadxeelgujdxaman dxel guxhiiman laan con lajd. Zianz badxiibaman laaman xburaman binëman laaman lënú lod raya'n ree bejn. Yagaj gunajman laaman. ³⁵ Chi bareguiaal, chi ma yaguiaj bén Samaria guin, gulëëman milia xieen tio'p dxej

dxiin badëëman laan loj bën naj lidxan, rëbaman lojman: “Gunaj bën guie, bal gunijtil mazri, naj yaguix laan chi yaye'can.”

³⁶ Dxel rëb Jesús loj mextr guin:

—Yan, loj guiyon ree bën guin, ¿chu bënan guyën bën gudin ree xingubaan guin?

³⁷ Badxi' mextr guinan rëbaman:

—Bën baya laaman.

Dxel rëb Jesús lojman:

—Baguij, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedxdo, yagaj wejman lidx tijb biin la Mart. ³⁹ Yu' tijb xbëlim lam Li. Gurej Li guin guia' Jesús cucaagdiajguim ni caneeman. ⁴⁰ Per Mart guin mazri ruqueijnë gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil. ⁴² Per tijbzi ni mazri zobjloy yu'. Li gulejm ni mazri zobjloy, abi' achut zajc chiquiedan lojm.

11

Rulüü Jesús xhienaag cwedx guiniab bejn Dios

(Mt. 6:9-15; 7:7-11)

¹ Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bën baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respejt.

Gac zi'c rniabeel.

Gac zi'c rënl loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon bën rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

⁵ Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidxix, guiëbidi: “Miw, baneesii choon guiadxtil gagui'nan, ⁶ din bi't tijb da miwan abi' achet ra'pan gudëdan lojx.” ⁷ Dxel nax diizd lënu guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.” ⁸ Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex din guneex ni ryaadxidi chitëë guslenridi laax. ⁹ Zeel rnin lëjt: Gol gunab loj Dios, laaman guneex ni rniabidi. Gol baguiilaman, zadxejlidi laaman. Gol gurejdx gunabaman, zidxga'man lëjt. ¹⁰ Din bën rniab, zaca'man. Abi' bën rguuil, zadxejlaman guiaád bën rbejdx rniab laaman zidxga'man laaman.

¹¹ ¿Lëjt najdi dad, wen zudëëdi tijb guiaj loj xi'ndi ya chi guiniabix guiadxtil?, ¿o zudëëdi tijb bël ya chi guiniabix bëjl? ¹² ¿O zudëëdi nixüb ya chi guiniabix dxijt? ¹³ Nachi lëjt najdi bëndol rajc rudëëdi ni zagdx loj xi'ndi. ¡Diidxgui xDadidi bën yu' xanyabaa, nid zudëë xSprijtaman loj ree bën rniab laaman ya!

Rëb ree bejn ca' Jesús xguialrniabee Beelzebú

(Mt. 12:22-30; Mr. 3:19-27)

¹⁴ Caybëë Jesús tijb xindxab basa'n tijb bejn gop. Abi' chi barii xindxab guin guzuloj canee bën guin. Dxel dád badxaloy ree bejn. ¹⁵ Per yu' reeman rëb:

—Bën guin rabëë xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par güün reeman laaman prueb, rëb reeman lojman din güünman milagr zëëd xanyabaa. ¹⁷ Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. ¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabee. Canin zian guial rëbidi por xguialrniabee Beelzebú rabën xindxab luxdoo ree bejn. ¹⁹ Per bal rabën

xindxab luxdoo ree bejn por xgualrniabee Beelzebú, ¿chuza rudëed gualrniabee loj ree xbejndi din yabëë reeman xindxab? Zeel laagajc reeman rulüü guial ad laat rniiedi. ²⁰ Per por xgualrniabee Dios rabën xindxab luxdoo ree bejn, laan rën guiëb guial ma za'në xgualrniabee Dios lëjt.

²¹ 'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman. ²² Per bal guidxin bën mazri gojl guial lojman güünman laaman gan abi' chisüdaman guiiib ni ca'man tia' tëëman gra ni rajpaman.

²³ 'Bén ad za't con naj, za'man contr naj, guiáad bën ad ruto'pt bejn par naj rtie'chaman laa reeman.

Xindxab rayejc

(Mt. 12:43-45)

²⁴ 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuiliix lod yaziiladix. Chi ad rdxejlt lod yaziiladix, dxel rüjnx xgab naladix: "Zagdxeli yaye'can lod bariin." ²⁵ Abi' chi rayejquix ruguiaax luxdoo bën guin, najn zi'c tijb lënü lod bilioob lod najcchaaw tëë. ²⁶ Dxel rica'x zagajdx ree xindxab naj mazri xinxmal guial lojx. Abi' ru gra reex luxdoo bën guin. Dxel piorli raya'nman guial zi'c gocaman yaløj.

Xiquilbaa ree bën ruzoob xtiidx Dios

²⁷ La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—jXiquilbaa béngunaa bazuj lüj loj guidxliuj, bën baslaa tëë lüj!

²⁸ Per badxi' Jesús laan rëbaman:

—jMazri xiquilbaa ree bën rucaagdiajg xtiidx Dios ruzoob tëë reeman xtiidxaman!

Rniab ree bejn güün Jesús tijb milagr

(Mt. 12:38-42; Mr. 8:12)

²⁹ Zi'cri cado'p ree bejn lod za' Jesús, abi' guzuløj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzac Jonás bën badëë xtiidx Dios loj ree bejn. ³⁰ Zi'c goc Jonás tijb sen par ree bën gure guiedx Nínive, ziangajc Bén guxhaal Dios najman tijb sen par ree bën naban yan. ³¹ Abi' bën goc reina guiedx Sabá, zabanman chi yadëed ree bejn cwent loj Dios dxel guiëbaman guial ree bën riga' yan, yalay reeman xcasti Dios. Din laaman dád zijt guzaman bicaagdiajgaman xgualrajc rey Salomón. Abi' yan, naj za'në'n lëjt, mazri lasajcan guial loj rey Salomón. ³² Ziangajc ree bën guban guiedx Nínive, zaban reeman chi yadëed ree bejn cwent loj Dios abi' guiëb reeman guial ree bën riga' yan, yalay reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

Guiaaloj bejn naj zi'c biani

(Mt. 5:15; 6:22-23)

³³ 'Acht rucaaguij tijb guij par sun lod naguie'ch, achu tëët ruta'cw laan lën tijb yagalm. Rayal sun lod guiguianan din gusnin loj bën chu' lënü. ³⁴ Guiaaloj bejn naj zi'c tijb biani par xcuerpaman. Bal por ni ruguiaal rüjnl ni zagdxe, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. ³⁵ Gojp cudad chitëë chinë guiaaloj lüj loj nejz mal luar loj nejz zagdxe. ³⁶ Abi' bal ni'qui tilda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

Ni rüjn ree mextr rajc ley në ree bënfarisew

(Mt. 23:1-36; Mr. 12:38-40; Lc. 20:45-47)

³⁷ Chi gulox guneenë Jesús laa reeman, tijb bënfarisew rëb loj Jesús din chitaw Jesús lidxaman. Chi guyuman, zianz gurejman xan mex. ³⁸ Abi' bënfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. ³⁹ Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't gualgubanaan në ni mal. ⁴⁰ jBennad! ¿Nid bën been gajc xcuerpidi been luxdoodi ya? ⁴¹ Zeel gol been yudar bën achet rajp din guiguian guial najquidi benza'c.

⁴² 'jProbza lëjt bënfarisew! Rbëëcadi ni naj par Dios, rüjndi chi lala' ni rajpidi zi'c bidxtil në rud në graloj ni rxübindi abi' rudëëdi tijban loj Dios. Per ad rüjntidi zi'c rayal ad rën tëëtidi Dios. Gol bidxga' Dios ad gucwëëz tëë gudëëdi ni rudëëdi lojman.

⁴³ 'jProbza lëjt, bënfarisew! guial ruladxidi cwedi lod rbej ree bën zøjbloj lën ree yadoo, ruladx tëëdi gugajpdioz ree bejn lëjt zagdxe niz lunejz.

⁴⁴ 'jProbza lëjt, mextr rajc ley në lëjt bënfarisew, bën rusquiee!, din najdi zi'c baa ni ad guigent, abi' ad ragbeet ree bejn rë'p reeman guijcan.

⁴⁵ Dxel gunee tijb mextr rajc ley, rëbaman loj Jesús:

—Mextr, në dunujn caneeguijdxil guial rëbil zian.

⁴⁶ Badxi' Jesús laan rëbaman:

—iZiangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiaád lëjt ni'qui ta'n ad rüjntidi laa reeman yudar din güün reeman zi'c rëndi.

⁴⁷ i'Probza lëjt!, guial rünchaawidi xbaa ree bën badëë xtiidx Dios loj ree bejn, bën bagüjt gajc ree xbëngulalidi. ⁴⁸ Zian ragbee ree bejn guial ruladxidi ni been ree xbëngulalidi. Laa reeman bagüjt ree bën badëë ree xtiidx Dios loj ree bejn, guiaád lëjt rayüjnchaawidi xbaa reeman.

⁴⁹ Zeel Dios guial ragbeeman gra ni gac, rëbaman: “Gaxhalan bën rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güündi laa reeman xhienin.” ⁵⁰ Abi' bën naban ree yan, laa reeman yadëëd cwent loj Dios por rejn ni guxie' ree bën badëë xtiidx Dios loj ree bejn, bën güt ree diidx chi go'tchaaw guidxliuj, ⁵¹ diidx xrejñ Abel xt xrejñ Zacarías bën bagüjt reeman ro' yadooro' Jerusalén. Zeel rnin lëjt guial ree bën naban yan, laa reeman quix por gra reeman.

⁵² i'Probza lëjt, mextr rajc ley!, guial ad rtjëbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesús zian, dád bidxe' ch ree bënfarisew guin në ree mextr rajc ley. Abi' guzuloj zien ree ni rniabdixd reeman lojman, ⁵⁴ din guidoon xhie guiëbaman din chile' gutedia' reeman laaman.

12

Xlevadur ree bënfarisew

¹ La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaløj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman. ² Din achet ni naguie'ch yu' ni ad zaguiant, ad yu' tëët ni ralan ni ad zagbeet bejn. ³ Zeel gra diidx ni ma guneedi lod nacay, zaguien ree bejn laan lod nayni. Guiaád ree diidx ni ma guneedi ralan lëñü, yu' chi cwdixa' reeman guiniee reeman diidx guin ree diidx guijc ree yu.

Chu rayal guidxeb bejn

(Mt. 10:28-31)

⁴ Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan. ⁵ Ganin lëjt chu rayal guidxebidi: gol bidxeb Dios bën rajp guialrniabebe guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

⁶ Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. ⁷ Guiaád lëjt xt guidxgüjquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

Bën rëb loj ree bejn guial najman xbejn Jesucrist

(Mt. 10:32-33; 12:32; 10:19-20)

⁸ Rnin lëjt, chutëëz bën guiëb loj ree bejn guial najman da bejnman, ziangajc naj najñ Bën guxhaal Dios guiën loj ree xianjl Dios guial da bejnman najman. ⁹ Per bën guiëb loj ree bejn guial ad najtaman da bejnman, ziangajc guiën loj ree xianjl Dios guial ad najtaman da bejnman.

¹⁰ Chutëëz bën guinieegüjdx Bën guxhaal Dios zajcaman perdon, sa'n bën guinieegüjdx xSprijt Dios, ad zajctaman perdon.

¹¹ Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman. ¹² Din chí guidxin hor ni guinieedi, xSprijt Dios gunee diidx guinieedi.

Xcwent tijb xinrijcw

¹³ Tijb bën no'ch loj ree benzien guin rëb loj Jesús:

—Mextr, güjdx loj da bichan din gunee ni rayalan.

¹⁴ Per rëb Jesús lojx:

—iChu bazuj naj günan guialguxtis o gagui'san ni tia'di?

¹⁵ Rëb tëëman loj reeman:

—Gol gojp cudad; ad sëëbladixidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. ¹⁷ Dxel beenx xgab naladxix: “iXhienaag günan? Ad ra'ptan lod gagu'chaawan guialnaza'c guin ree.” ¹⁸ Abi' gunaladxix: “Ma

ragbeen xhienaag gūnan. Guse'nan yu lod rgu'chaawan da guialnaza'can din gūnan mazri yu narooB ree lod gagu'chaawan laa reen, nē graczi ni ra'pan. ¹⁹ Dxel guiēn, dād zien guialnaza'c ra'pan par zien iijz, yaziiladxan, gawan, guiē'n yabaa tēēn." ²⁰ Per rēb Dios lojx: "Xin tont, yanguxhin gajc guiētīl, laadx ni nagu'chaawil, ζchu yaya'nnē laan?"

²¹ Zian rzajc bēn rgu'chaaw ni za'c par laagajcaman, per loj Dios achet rajpaman.

Achetzi rayal chu' bejn xgab

(Mt. 6:25-34)

²² Dxel rēb Jesús loj ree xbejnman:

—Naj rni lējt: Ad chu'di xgab por ni gawidi par guibandi ni'qui por lajd ni gacwidi. ²³ Guialnaban mazri lasajcan guial loj guialraw, guiāad xcuerp bejn mazri lasajcan guial loj xabaman. ²⁴ jGol baguiaa balo ree! Ad rxūbint reeb ad rato'p tēēt reeb guialnaza'c, ad rajp tēēt reeb lod yagu'chaaw reeb guialnaza'c guin, per Dios rudēēd ni rual reeb. jAbi' mazri lasajquidi guial loj reeb! ²⁵ ζWen guial ru da'tidi xgab ma gūūn lējt gajc mazri ziool ya? ²⁶ Abi' bal ni'qui zian ad zile't gūūndi, ζxhieczy gan rudi xgab por ni ren ree?

²⁷ jGol baguiaa xhienaag rini's ree guiaa dajn! Ad rūjnt reen dxiin ad rguib tēēt reen. Per ni'qui rey Salomōn ad guzujchaawt zi'c za'chaaw ree guiaa guin, majsi mast guzujchaawaman. ²⁸ Abi' bal gui'xh dajn ruzujchaaw Dios yan, majsi guixiezi che'can. jDiidxgui lējt, bēn ad rliadxa'ct ree laaman nid zuneeman ni gacwidi ya! ²⁹ Zeel ad rudi xgab xhie gawidi o xhie guiē'di, ad bal tib yu'zidi laan xgab. ³⁰ Din bēn ad nūnbeet ree Dios rūjn zian. Laa reeman ru xgab por gra ree ni guin. Per lējt yu' xDadidi, laaman ragbeechaaw xhienin riaadxidi. ³¹ Per yalojxgaj gol baguiil gūūndi zi'c rniabee Dios, laaman guneē gra ni ryaadxidi.

Guialnaza'c yu' xanyabaa

(Mt. 6:19-21)

³² Lējt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman. ³³ Gol bato' ni rajpidi din gudēēdan loj ree bēnprob. Gol been naguiejn gūūndi gan guialnaza'c ni ad rarar ni yu' xanyabaa, lod ad zut xingubaaan cwan laa reen lod ad zacabe tēēt reen. ³⁴ Din lod rajpidi guialnaza'c guin, yagaj za' xquiarguejndi.

Gol guzujsin

³⁵ jGol guzujsin zi'c bēn ma najcw xab ca' tēē xguijman par griiman. ³⁶ Gol been zi'c ree mojs cabēz yadxin xpatron reex, bēn zē loj guialruxhliaa, dīn diob guixhial reex ro' port yayuman χi gucaaman. ³⁷ jXiquilbaa ree mojs naga'naa cabēz xpatron reex! Naj rni lējt, laagajc patron guin cwe'c laa reex xan mex, dxel chicchaa xabaman din gudēēman ni gaw reex. ³⁸ Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o χi ma cayreguiaal ya. ³⁹ Gol been xgab, bal tijb bejn ragbeeman xhie hor chu' xingubaaan lidxaman cwanx, ad zatiējtaman chu'x lidxaman. ⁴⁰ Zianan zeel gol guzujsin din ad ragbeetidi dxejczy gui't Bēn guxhaal Dios.

Mojs za'c nē mojs gujdx

(Mt. 24:45-51)

⁴¹ Dxel gunabdiidx Bēd loj Jesús, rēbaman:

—Dad, ζpar dunujzan bel cwent guin ya o par gra ree bejn?

⁴² Badxi' Jesús laan, rēbaman:

—ζChu lējt naj zi'c tijb mojs za'c, nazobdiidx, rusa'n xpatronx laax lidxaman persi rulēnx gra ree mojs rudēē tēēx ni raw reex χi rajl hor? ⁴³ Xiquilbaa mojs cayūjn dxiin zagdxe χi yadxin xpatronx. ⁴⁴ Din diidxliczi rnin lējt, zusa'n gra xieen patron guin loj mojs guin. ⁴⁵ Per bal naladx mojs guin: "Zaglaari yaguaad da patronan", zianx sulojx gusagzix gra ree bēn rūjn dxiin yagaj, zi'c bēngunaa zi'c xinguaaaw, dxel suloj gawix, guiē'x sūdx tēēx, ⁴⁶ abi' yadxin xpatronx tijb dxej ni ad rbēztix nē tijb hor ni ad ragbeetix. Dxel dād casti narooB gudēēd patron guin laax, guixhiaalaman laax lod rayal ree bēn ad ruzoobt diidx.

⁴⁷ Din tijb mojs ragbee ni rēn xpatronx gūūnx, abi' ad za'tix porvinid ad ruzoob tēētix diidx, dād casti narooB tēdix. ⁴⁸ Per mojs ad ragbeet ni rēn xpatronx gūūnx abi' gūūnx ni rayal casti, ta'nz tēdix casti. Din bēn badēēd Dios quiarguejn, mazri zien ni rayal gūūnman por quiarguejn ni badēēd Dios lojman. Ziagajc bēn badēēd Dios guialrniabee, mazri zien ni rayal gūūnman por guialrniabee ni badēēd Dios lojman.

Por Jesús rlia' lasa' ree bejn

(Mt. 10:34-36)

⁴⁹ jZialan loj guidxliuj zi'c tijb bēn zidgacaaguij xhienin, abi' jma rēn nejzdoon tiaguinj! ⁵⁰ Gazaagdiajn guiēt tēēn, abi' jdād yu'nayan diidz yan xt χi gacan cumplid! ⁵¹ Ad naladxidi zialan loj guidxliuj par yabecdxen luxdoo bejn, zialan din guial guililadx reeman naj chu' wadijl. ⁵² Din diidz yan, lod naj reeman gaay loj tijb famil, til choonman contr tio'paman,

tio'paman contr choonaman. ⁵³ Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

Sen rguien xanyabaa
(Mt. 16:1-4; Mr. 8:11-13)

⁵⁴ Rêb tëë Jesús loj ree benzien guin:

—Chi ruguiaadi ririi zaj niz lod rëez gubijdx, rëbidi: zal guia, abi' rajc gajc zian. ⁵⁵ Abi' chi ririi bi niz sur, rëbidi: gac nalaa, abi' rajc gajc zian. ⁵⁶ jBén rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

Babey zagdxe con bén rdxe'ch lüj
(Mt. 5:25-26)

⁵⁷ ¿Chexc ad rüjnt lëjt gajc xgab conin naj ni zagdxe? ⁵⁸ Bal chu bén rudëed lüj loj guxtis, been naguiejn baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree bén cu' lüj ladxguuib. ⁵⁹ Naj rni lüj, ad zariitil ladxguuib guin xtczi quixil gra ni na guxtis guin.

13

Gol bayüjn xgab por xtolidi

¹ Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea, abi' bago'chaman xrejn reeman con xrejn ree be bagüjt reeman par gudëed reeman loj Dios zi'c gon. ² Dxel rëb Jesús:

—Ad bal naladxidi guzajc ree bén Galilea guin zian guial naj reeman mazri bëndol guial loj gra ree bén Galilea. ³ Din naj rni lëjt guial ad ziantan. Abi' bal id zayüjndi xgab por xtolidi ziangajc saquidi. ⁴ Ad bal naladxidi bén chiinbichoon güt ree chi guxa't torre ni la Siloé laa reeman, naj reeman mazri bëndol guial loj gra ree bén zojb Jerusalén. ⁵ Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni adrtiat

⁶ Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetctzi bidxaaglojman. ⁷ Dxel rëbaman loj bén rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetctzi rdxaaglojn. Batüügan din nawëëgzi rüjnan loj guidxliuj guie.” ⁸ Per rëb bén rajp guidxliuj guin: “Dad, basa'nsiin zatib ijz, yabeclaan yuj xanan gagu' tëënan abon. ⁹ Rupent zian tian, per bal id zacan dxel tügan.”

Bayüjn Jesús tijb béngunaa ca bëw xijch

¹⁰ Tijb dxej raziiladx ree bejn, culüü Jesús bejn ree lën tijb yadoo, ¹¹ yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rile'tctzi yaliman. ¹² Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

¹³ Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdxe. ¹⁴ Per bén rniabee lën yadoo guin dad bidxe'chaman guial bayüjn Jesús bén guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

¹⁵ Badxi' Dad Jesús laan rëbaman:

—Bén rusquiee, ¿nid rxhieç xgo'ndi o xburidi dxej raziiladx ree bejn ya par chiquië'di laa reeb nijs? ¹⁶ Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

¹⁷ Chi rëb Jesús zian, gra ree bén rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnan.

Xcwent xhaj moxtajs
(Mt. 13:31-32; Mr. 4:30-32)

¹⁸ Rêb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? ¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

Xcwent levadur
(Mt. 13:33)

²⁰ Rêb Jesús zatijb:

—¿Xhienaag ganin naj xgualrniabee Dios? ²¹ Laan naj zi'c levadur ni rugo'ch tijb béngunaa choon midid harin persi rusaaguinj gra cob guin.

Port nadëë

(Mt. 7:13-14, 21-23)

²² Chi zë Jesús Jerusalén, rulüüman bejn ree luguedx narooob ree në ree luguedx dobëz niz lod rdédaman. ²³ Abi' tijb bejn gunabdiidx lojman rëbaman:

—Dad, ¿ta'nz ree bën gac perdon ya?

Badxi' Jesús laan rëbaman:

²⁴ —Gol been naguiejn din chu'di niz ro' port nadëë, din naj rni lëjt, zien ree bën rën chu', per ad zile't chu' reeman. ²⁵ Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” ²⁶ Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” ²⁷ Per naman lojdi: “Ma rnin, ad ragbeetan ban guzadi. Gol biquied lon bëndol.” ²⁸ Ni goondi gaw tëë layidi chi guguiaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi. ²⁹ Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios. ³⁰ Abi' zien ree bën bigra yan, laa reeman gac bën yaloy nadxel. Guiáad ree bën naj bën yaloy yan, laa reeman gac bën bigra.

Roon Jesús por Jerusalén

(Mt. 23:37-39)

³¹ Hor guin gajc bidxin tio'p choon ree bënfarisew, abi' rëb reeman loj Jesús:

—Baguij, baza niz guie, din rën rey Herodes gugüjtaman lüj.

³² Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bënragxuu ree, abi' widx gulooxan.” ³³ Per naj rayal gusunuu da nejzan yan në guixie në widx, din ad najt guial guiët tijb bën rudëë xtiidx Dios loj ree bejn luguedx ren bal id najn Jerusalén.

³⁴ ¡Bén Jerusalén, bën Jerusalén, rugüjtidi bën rudëë ree xtiidx Dios loj ree bejn rucaaguiaj tëëdi gra ree bën rxhiaal Dios lojdi! ¡Bëlcsi volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! ³⁵ Zianan zeel yaya'n ladxidi zi'c tijb guiedx lod achut zojb. Abi' rnin lëjt, diidx yan ad zuguiaatridi naj xt chi guidxin dxej guiëbidi: “¡Nüjnle! Dios bën zëëd por laaman!”

14

Rayüjn Jesús tijb bën rzaaguij

¹ Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman, ² guial za' tijb xinragxuu lojman rzaaguiaj.

³ Dxel gunabdiidx Jesús loj ree mextr rajc ley në loj ree bënfarisew guin, rëbaman:

—¿Zajc yayüjn bejn bënragxuu dxej raziiladx ree bejn ya o ad zajctan?

⁴ Per laa reeman achetctzi rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguiajx. ⁵ Dxel rëbaman loj ree bënfarisew guin:

—¿Bal tijb xburidi o tijb xgo'ndi yab lën tijb bizë, nid zabëëdi laab ya, majsi naj dxej raziiladx bejn?

⁶ Abi' achet gojc nadxi' reeman.

Bën rej ree loj guialruxhliaa

⁷ Chi baguiaa Jesús rbe ree biooz luar lod rbej ree bën mazri zojbloj, rëbaman loj reeman:

⁸ —Bal chu guiniee lüj chel loj tijb guialruxhliaa, ad cwel luar rbej ree bën mazri zojbloj. Din zajc guidxin zatijb biooz mazri zojbloj guial lojl, ⁹ abi' gui't bën guneë gropidi naman lojl: “Badëëd lod zojbil cwe bën guie.” Dxel rayal chel guidib ratul chisobil loj yagxhil bigra.

¹⁰ Zeel chi guiniee reeman lüj, zagdxeli bisob loj yagxhil bigra, din chi gui't bën guneë lüj naman lojl: “Miw, badëd loj tijb luar mazri zojbloj.” Zian, gra ree bën zojbnël xan mex guza't lüj zagdx. ¹¹ Din bën rlies xvalor gajc, yaya'nxtuman. Guiáad bën rüjn naya zajc xvaloraman.

¹² Dxel rëb Jesús loj bën guneë laaman:

—Bal goc cu'l guialraw, ad guiniee xmiwil, ni'qui lasa'l, ni'qui bijchil, ni'qui benrijcw zojbnël gajxh. Din laa reeman yu' dxej guiniee reeman lüj, abi' zian yanee reeman ni gudaw reeman lidxil. ¹³ Zagdxeli naj, chi güünl tijb lanij, guneë bënprob ree, në ree bën ad nadaant yaa, në ree bencoj con ree bénlutia'p. ¹⁴ Xiquilbaal bal güünl zian, din laa reeman ad zajct yanee ni badëëdil. Per chi guidxin dxej yaban ree bën bazoob xtiidx Dios, Dios yaguiajx laan lojl.

Xcwent bèn been tijb lanij

¹⁵ Chi biguiejn tijb bèn zojbnè Jesús xan mex ni rëbaman, rëbaman loj Jesús:

— ¡Xiquilbaa ree bèn yayal gaw lod rniabee Dios!

¹⁶ Dxel rëb Jesús lojman:

— Tijb bejn badxe' guialraw par xche, abi' guneeman zien da't ree bejn. ¹⁷ Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.” ¹⁸ Per graczi reeman guzuloj caynab perdon. Bèn yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” ¹⁹ Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” ²⁰ Zatijbaman rëb: “Yan gajczi baxhlian zeel ad zile't guialan.” ²¹ Chi badxin mojs guin bagojn xpatronx gra ni rëb ree bèn guin, dá d balenman, dxel rëbaman lojx: “Baquiejn wej niz galay ni, nè niz lad ree nejz, tanè gra ree bënprob nè ree bèn ad nadaant yaa, nè ree bencoj con ree bënlutia'p.” ²² Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” ²³ Dxel rëbaman lojx: “Wej niz loj carreter nè niz loj ree nejz la's, been naguiejn ben ren ree din gui't reeman din cha lëñü lidxan. ²⁴ Din naj rni lojdi, ni'czi tijb ree bèn gunen yaloj ad zajwt guialraw benchaawan par xche.”

Ni rayal güün ree bèn rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ — Bal chudi rën guidnal naj, rayal guiëndi naj mazri guial loj xdadidi, guial loj xnuaadi, guial loj lacheelidi, nè guial loj xi'ndi, o bijchidi o bizandi, rayal tēè guiëndi naj mazri guial loj xguialnabandi, din bal id züjndi zian ad zajct gaquidi da bejnan. ²⁷ Bèn ad rënt sagdiaj loj guidnal tēeman naj, ad zajct gacaman da bejnan.

²⁸ “Bal chu rën güün tijb yu narooob, ¿nid yalojxgaj cweman ya din cwēeman cwent zadaan xmiliaman ya din gulooxaman laan?” ²⁹ Din bal sulojman xcimiantan abi' ad zulooxtaman laan, graczi ree bèn guguaa laan guze' laaman, ³⁰ guiëb reeman: “Guzuloj cayüjn bèn guin yu abi' ad gojct nulooxaman laan.”

³¹ “O bal tijb rey güün wadijl contr zatijb rey, ¿nid yalojxgaj cweman ya güünman xgab züjn chii mil xsuldadaman gan loj stijb rey zidnè gajl mil suldad ya? ³² Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bèn chinè ree xrusonman din yaya'n reeman diidx ad zut wadijl. ³³ Yan, ziangajc rnin lojdi, chutēéz lëjt bal id zusa'n gra ni rajpadi din guidnalidi naj, ad zajct gaquidi da bejnan.

Bal id zajcric zëd naxij

(Mt. 5:13; Mr. 9:50)

³⁴ Dxel rëb Jesús:

— Ni zagdxe naj zëd. Per bal id zajcran naxij, ¿xhieza naag yayajcan naxij zatijb?

³⁵ Ad rüjntan sirv par luyuj ni'qui par loj abon, rzëëbzán. ¡Bèn rën ree gucaagdiajg, gol bacaagdiajg!

15*Xcwent xiil gunit*

(Mt. 18:10-14)

¹ Gra ree bèn ruquijx impuest nè gra ree bëndol, bibig reeman lod za' Jesús din gucaagdiajg reeman ni rnieeman. ² Guiaad ree bënfarisew con ree mextr rajc ley rnieeguijdx reeman laaman, rëb reeman:

— Ruchajg bèn guin bëndol ree rawnè tēeman laa reeman.

³ Dxel rëb Jesús loj reeman:

⁴ — Bal tijb bejn rajp tibgayuu xiil abi' rniyt tijbib, ¿nid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab? ⁵ Abi' chi radxejlaman laab rabaaman, rudxiibaman laab dxidyëjnman. ⁶ Dxel chi radxin lidxaman, ruto'p ree xmiwaman nè ree bèn zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.” ⁷ Yan, rnin lëjt, ziangajc rabaanè Dios tijb bèn rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

Xcwent milia ni bizëëb

⁸ “O bal tijb bëngunaa rajpaman chii milia plajt abi' rusëëbaman tijban, ¿nid ruze'caman guij ya ruloob tēeman lëñü abi' raguuilaman laan zagdxe da't xt lodzi radxejlan? ⁹ Abi' chi radxejlaman laan, ruto'p ree xmiwaman nè ree bèn zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.” ¹⁰ Yan, naj rni lojdi, ziangajc rabaan ree xianjl Dios por tijb bëndol rayüjn xgab por xtol.

Xcwent bèn rüjn perdon xi'n

¹¹ Rëb tëë Jesús loj reeman:

—Tijb bejn yu' tio'p xi'nman. ¹² Abi' xin naj mazri xinguiag, rëb loj xdadix: “Dad, baneë ni rayal gaca'n.” Dxel badëëman ni rayal tijbgaj reex. ¹³ Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. ¹⁴ Per chi ma banijtx gran, dxel guyu gubijn niz lod za'x abi' guzuloj biaadx ni gawix. ¹⁵ Dxel wejx bignabix dxiin loj tijb bën zobj yagaj, abi' guxhaalaman laax chigajpix cüch ree dajn. ¹⁶ Guial tant rliaanx xt guyënx niajwix ni raw ree cüch guin, per achut rudëë laan. ¹⁷ Dxel beenx xgab naladix: “iZien ree xin rüjn dxiin lidx da Dadan xt sobr rüjn ni raw reex, guiáad naj guie ma guiétan bëjz! ¹⁸ Yan, yazaan yaya' lidx da dadan din guiën lojman: Dad, ma benan dol loj Dios në lojl. ¹⁹ Ad rayaltri guinieel naj xi'n; been naj cwent zi'c tijb ree xmojsil.” ²⁰ Dxel bayunejzix zia lidx xdadix.

²¹ Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid. ²¹ Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.” ²² Per rëb xdadix loj ree xmojsaman: “Gol baquiejn gol tanë lajd zagdx, gol bascajcwixan, gol badxe' tijb guibnül yaax gol baslëë tëëx gurëch, ²³ gol chica' go'n mazri nadaan, gol bagüjtib din yadaaw ree yagüeen ree lanij. ²⁴ Din par naj ma güjt da xi'nan abi' yan ma babanx, gunijtx abi' ma badxejlix.” Dxel guzuloj cayüjn reeman lanij.

²⁵ 'La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman. ²⁶ Dxel gurejdxix tijb xmojs xdadix, gunabdiidix xhienin cayajc lidxix. ²⁷ Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.” ²⁸ Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux. ²⁹ Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneeltij tijb dxibdobëz din günnë' ree da miwan lanij. ³⁰ Guiáad yan baguiaad xi'n, xin ma bignijt xlia' xmiliäl con ree béngunaa dxuudx, abi' gunabeel güjt go'n mazri nadaan par laax.”

³¹ 'Dxel badxi' xdadix laan rëbaman: “Xi'n, zianczi za'l con naj, graczi ni ra'pan naj xieenl. ³² Per yan rayal yagüeen ree lanij yabaa tëë ree, din bijchil xin ma güjt par naj, ma babanx, gunijtx abi' ma badxejlix.”

16

Xcwent tijb mojs rniabee ree mojs

¹ Rëb tëë Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. ² Dxel gurejdxaman laax rëbaman lojx: “iXhie rëni güië ni rigüiejnan cayüjnl? Baneë cwent lon xcwent xchiinl, din achetri dxiin gunen lojl.” ³ Dxel guzuloj beenx xgab gunaladix: “iXhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëën ganaaban carda. ⁴ Ma ragbeen xhienaag günan din guiën ree bejn naj chi ad züntran dxiin.” ⁵ Dxel gurejdxix tijb gaj ree bën ral loj xpatronx, rëbix loj bën bidxin yaloj: “iPlac ralil loj da patronan?” ⁶ Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.” ⁷ Dxel gunabdiidix loj zatijbaman rëbix: “Laadx lüj, iplac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlan.” ⁸ Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

⁹ 'Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

¹⁰ 'Bal chu rüjn zi'c rayal con ta'n ni rudëëd bejn lojman, züjman zi'c rayal con zro'n. Ziangajc bën ad rüjnt zi'c rayal con ta'n ni rudëëd bejn lojman, ad züjn gajctaman zi'c rayal con zro'n. ¹¹ Yan, ziangajc bal id züjndi zi'c rayal con ni za'c yu' loj guidxliuj guie, iChu gap lëjt confianz con guialnaza'c yu' xanyabaa? ¹² Bal id züjndi zi'c rayal con ni ad najt xieendi, iChu gunee lëjt ni rayalidi?

¹³ 'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zënx zatijbaman; o zajquix xinza'c con tijbaman abi' züjnx tiblad zatijbaman. Zeel ad zajct güündi sirv loj Dios, në loj milia.

¹⁴ Abi' ree bénfariisew guial mazri rën reeman milia, chi biguiejn reeman ni rëb Jesús guzuloj cuze' reeman laaman. ¹⁵ Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ 'Xley Moisejs në ni bacaa ree bën badëë xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

¹⁷ 'Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

Rülüü Jesús xcwent guial rala' lasa'

(Mt. 19:1-12; Mr. 10:1-12)

¹⁸ 'Bal tijb xinguaaw rala' lacheelix abi' rtia'x ben ren, dolan cayüjnx. Ziangajc xin rtia' tijb bëngunaa bala' lacheel, dolan cayüjnx.

Xinriwc con Lazr

¹⁹ Basnuu Jesús, rëbaman:

—Guyu tijb xinriwc, guzujchaawix con ganaxczi lajd zagdx, abi' guixie guixieczy rüjnx lanijro'. ²⁰ Guyu tëe tijb xinprob brii lajx Lazr, rbejx ro' xport xinriwc guin abi' guidibлагаax ca guiadx. ²¹ Rën nejzdoos Lazr guin gawix ni riabj xan xmex xinriwc guin. Abi' xt ree bë'cw rbig rlie' reeb loj ree guiadx ni cax.

²² 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix. ²³ Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham. ²⁴ Dxel gurixdiajx rëbix: "Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lüdxan, din dád cazaagdiajn loj bajl guie." ²⁵ Per badxi' Abraham xtiidx rëbaman: "Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiaj. ²⁶ Nëtëë yan bën za' ree guie ad zajct téd reeman yagaj, ni'qui ree bën za' yagaj ad zajct téd reeman guie, din za' bala'ro' du galay ree."

²⁷ 'Dxel rëb xinriwc guin lojman: "Rniaaban lojl dad, been wen guxhaal Lazr lidx da dadan, ²⁸ lod zobj gaay ree da bichan din chicojnx laa reex chitëë në laa reex gui't luar guie, lod yu' zro' casti." ²⁹ Per rëb Abraham lojx: "Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex." ³⁰ Abi' rëb xinriwc guin: "Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex." ³¹ Per rëb Abraham lojx: "Bal id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt."

17

Bén ruzaalguiiw bejn din güünman dol

(Mt. 18:6-7, 21-22; Mr. 9:42)

¹ Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per jprobza naj bën ruzaalguiiw zatijb bejn guial güünman dol! ² Par laaman zagdxeli naj guixhii reeman tijb guiaj mulin yejnman din guzaal reeman laaman loj nijsdoo, luar guzaalguiiwaman tijb bën qui rlliladxi naj din güünman dol. ³ ¡Gol gojp cudad!

'Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon. ⁴ Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: "Been naj perdon ad züntran zian", rayal güünl laaman perdon.

Guialrniabee në guialrliladx

⁵ Dxel rëb ree xi apóstoles Jesús lojman:

—Baneë dunujn mazri guialrliladx.

⁶ Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: "Bia'xh guie, bisob loj nijsdoo", zuzooban xtiidxidi.

Ni rayal güün tijb mojs

⁷ 'Bal tijb lëjt rajp tijb mojs, abi' chi yaguaad mojs guin bigla'x yuj o bigajpix begui'xh ree ya, çwen zëjbidi lojx ya: "Guyu, gurej din gawil"? ⁸ Ad zëjbtidi zian, guiëblidi: "Bachaa xabil, been ni gawan, guda'n. Chi lox gawan guië' tëen dxel ma zajc gawil guië' tëel." ⁹ Abi' wed

ni'qui quixtëe ad zudëetidi lojx din cayünzix ni rayal güünx. ¹⁰ Ziangajc lëjt chi loox güündi gra ni gunabee Dios dxel guiëbidi: "Nayajcan mojs ni ad rüjnt sirv, din baguieenzan ni rayal yaguieenan."

Rayün Jesús chii ree bën rajc guialguijdx la lepra

¹¹ Chi ma cadxin Jesús Jerusalén, gudëdaman guiedx riga' ree niz Samaria në niz Galilea. ¹² Abi' chi cayuman tijb luguiedx dobëz, bigchaagloj chii ree bën rajc guialguijdx la lepra laaman. Per zijt guzuj reeman, ¹³ rbixdiaj reeman, rëb reeman:

—Jesús, Mext; baya dunujn!

¹⁴ Chi baguiaa Jesús laa reeman, rëbaman loj reeman:

—Gol chej loj ree bixhioz din guguaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. ¹⁵ Dxel tijbaman chi gogbeeman ma bayajcaman, bayejcaman, rbixdiajman rudëeman quixtëe loj Dios.

¹⁶ Abi' bazuxibaman loj Jesús, basajb lojman xt luyuj persi badëeman quixtëe lojman. Abi' najman bën Samaria. ¹⁷ Dxel rëb Jesús:

—¿Nid chii naj ree bën bayajc ya? ¿Con zagaa reeman? ¹⁸ ¿Tijbzi benzit guie bayejc ya rudëeman quixtëe loj Dios?

¹⁹ Dxel rëbaman loj bën guin:

—Bisu. Baguiaj, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²⁰ Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn. ²¹ Abi' achut guiëb: "Laan za' guie", o "Laan za' ni" ya, din xguialrniabee Dios mal za'n galaydi.

²² Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxexji, per ad zuguaatidi laaman. ²³ Abi' yu' reeman na lëjt: "Laaman za' guie", o "Laaman za' ni" ya, ad bal chinalidi laa reeman. ²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. ²⁵ Per yalojxgaj sagdiajman abi' ad zënt ree bën riga' yan laaman.

²⁶ Zi'c goc gual chi guban Noé, zian gac chi gui't Bén guxhaal Dios. ²⁷ Din nadxel gudaw ree bejn, gu' reeman, baxhliaa reeman badëe tée xi'n reeman baxhliaa xt chi bidxin dxej guyu Noé lén barcwro' ni beenman, abi' guzuloj guiadoxh ni bagüjt gra reeman. ²⁸ Ziangajc gojc chi guban bën brii laj Lot, gudaw ree bejn, gu' reeman, bato' reeman, guzii reeman, guxübin reeman been tée reeman yu ree. ²⁹ Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. ³⁰ Ziangajc gac dxej ni gui't Bén guxhaal Dios.

³¹ 'Dxej ni gac zian, bën yë'p guijc yu ad zaguaajttaman chiglëe ni nagu'man lënu. Abi' bën za' dajn, ad zayejct lidxaman. ³² Gol basaaladx ni guzac lachele bën brii laj Lot. ³³ Bén mazri rën guialnaban rajpaman loj guidxliuj guie, zadxin dxej gunijttaman laan, per bën guiët por naj, zajpaman guialnaban tiblayaa con Dios.

³⁴ 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. ³⁵ Guiáad lod cayojt tio'p ree bëgunaa, tijbaman sa zatijbaman yaya'n. ³⁶ Abi' lod za' tio'p ree xinguaaw dajn, tijbix sa zatijbix yaya'n.

³⁷ Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

18

Xcwent tijb bëgunaa bizëjb në tijb juejs

¹ Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. ² Abi' rëbaman loj reeman:

—Guyu tijb guiedx lod guyu tijb juejs, ad rdxehtaman Dios ad ridxga' téeetaman bejn ree. ³ Luguiedx ziigajc zojb tijb bëgunaa bizëjb, rniabaman loj juejs guin din güünman guialguxtis gagnëman laaman loj bën rdxe'ch laaman. ⁴ Xchej ad bidxga't juejs guin bëgunaa bizëjb guin, per zianz laagajcaman been xgab naladxaman: "Majsi ad rdxehtan Dios ad ridxga' téeetan bejn ree, ⁵ per bëgunaa guie ad rucwëzt ruslenman naj. Zagdxeli naj günan laaman yudar chitëe ri'traman naga gad da pacensan chigra."

⁶ Dxel rëb Jesús loj reeman:

—Zian gunee juejs mal guin. ⁷ Diidxgui Dios, ¿nid zagnëman bën guleman ya bën rbejdx rniab ree laaman dxej guiaal? ¿Wen zaglaa gagnëman laa reeman ya? ⁸ Naj rni lëjt guial ad

zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén riladx Dios loj guidxliuj ya?

Xcwent bénfarisew con bén ruquijx impuest

⁹ Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

¹⁰ —Tio'p ree xinguaaw wej lën yadooro! Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. ¹¹ Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, bén za'në béngunaa ren, ni'qui zi'c naj bén ruquijx impuest guin. ¹² Rba'n'an tio'p volt lën xuman, abi' gra ni rünan gan rünanan chii lala' persi runen tijban lojl.” ¹³ Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¡Dios, baya naj najn tijb xindol!” ¹⁴ Naj rni lëjt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din bén rlies xvalor gajc achet lasajcaman loj Dios, guiaad bén rüjn naya laaman mazri lasajc loj Dios.

Rüjnle' Jesús xindoo ree

(Mt. 19:13-15; Mr. 10:13-16)

¹⁵ Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bén zinë ree laa reex. ¹⁶ Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree bén naj zi'c laa reex. ¹⁷ Din naj rni lëjt, bén ad riladxt xguialrniabee Dios zi'c tijb xindoo, ad zile't chu'man loj xguialrniabee Dios.

Xcwent tijb xin rijcw

(Mt. 19:16-30; Mr. 10:17-31)

¹⁸ Tijb xin rniabee, gunabdiidx loj Jesús rëbix:

—Mextrza'c, ¿xhie rayal gūnan din ga'pan guialnaban tiblayaa con Dios?

¹⁹ Badxi' Jesús laan, rëbaman:

—¿Chexc zeel nal lon benza'c? Achut naj benza'c, tijbzi Dios. ²⁰ Lūj rajc ree mandamient: “Ad sunëi béngunaa ren, ad gugüjtil bejn, ad cwanl, ad cwëel xtiidx bejn, gojp respejt xdad xniaal.”

²¹ Dxel rëbix loj Jesús:

—Gra ree ni guin cayūnan diidx xindoon.

²² Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëel milia guin loj ree bénprob. Zian gapil guialnaza'c xanyabaa, dxel gui'til guidnalil naj.

²³ Chi biguiejn xin guin zian, dád guyunayax guial dád xinrijcwan. ²⁴ Chi baguiaa Jesús guial dád yu'nayax, rëbaman:

—¡Dád nawëëg naj chu' benrijcw loj xguialrniabee Dios! ²⁵ Adli nawëëgt téd tijb camell xan gagux, guial chu' tijb bén rijcw loj xguialrniabee Dios.

²⁶ Abi' ree bén biguiejn ni rëb Jesús, rëb reeman:

—¿Chu za zajc laa loj xcasti Dios?

²⁷ Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

²⁸ Dxel rëb Bëd lojman:

—Dad, ma basa'n'an graczi ni raya'pan persi zudnaalan lūj.

²⁹ Zianz rëb Jesús:

—Diidxliczi rnin lojdi, chutëëz bén rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios, ³⁰ mazri zien ni tia'man loj guidxliuj guie. Abi' zajpaman guialnaban tiblayaa con Dios.

Rugojn Jesús zatijb guial guiëtaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tiblad, abi' rëbaman loj reeman:

—Yan, ziyu' ree Jerusalén lod gac zi'c bacaa ree bén badëë xtiidx Dios loj ree bejn xcwent Bén guxhaal Dios. ³² Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojpx xhiejn reeman lojman. ³³ Quin reeman laaman dxel gugüjt reeman laaman, per ni yayon dxej yabanman.

³⁴ Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

Rayajc guiaaloj tijb bénlutia'p

(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bénlutia'p, zojbaman cwë' nejj rniabaman carda. ³⁶ Chi gogbeeman cadéd zien ree bejn, gunabdiidxaman xhie cayajc. ³⁷ Abi' rëb reeman lojman guial Jesús bén Nazaret cadéd niz yagaj. ³⁸ Dxel gurixdiajman rëbaman:

—jésús, xdiaa Davi, baya naj!

³⁹ Bén ned ree rdilë reeman laaman din gucwëez ro'man, per mazri rbixdiajman, rëbaman:

—jXdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

⁴¹ —¿Xhie rënl gūnan por lūj?

Badxi'man laan rëbaman:

—Dad, rënan yani lon.

⁴² Dxel rëb Jesús lojman:

—jMa zile' guguaa! Ma bayajquil guial bililadxil naj.

⁴³ Hor guin gajc bani loj bén guin, abi' binalaman Jesús rudëeman quixtëë loj Dios. Në gra ree bén baguiaa ni goc rudëë quixtëë loj Dios.

19

Wej Jesús lidx Zaqueo

¹ Guyu Jesús luguiedx Jericó abi' guzuloj cadëdaman luguiedx guin. ² Yagaj zojb tijb benrijcw laman Zaqueo. Laaman rniabee ree bén ruquijx impuest. ³ Rën Zaqueo guin gūnbeeman Jesús, per ad rilet' guguaaman laaman guial dád zien ree bejn abi' laaman najman bendop. ⁴ Zeel ruxūnman gunedaman, abi' din chile' guguaaman Jesús, wë'paman loj tijb yagro' zojb gajxh lod téd Jesús. ⁵ Chi gudéd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús. ⁷ Chi baguiaa ree bejn zian, gra reeman guzuloj caneguijdx Jesús rëb reeman zigya'nman lidx tijb bëndol. ⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bénprob. Abi' bal yu' bén baquijxan mazri guial loj ni naj quixaman, yayūnan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bén zojb lidx Zaqueo guial rliladxaman Dios zi'cgajc Abraham. ¹⁰ Din Bén guxhaal Dios zëëdaman zidgadiilaman bén ad zët ree loj xnejz Dios din laa reeman loj xcasti Dios.

Xcwent milia

¹¹ Bén caaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xgualrniabee Dios.

¹² Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man gualrniabee din gacaman rey dxel yajejcaman nabee ladxaman. ¹³ Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yaguialan.” ¹⁴ Per ree bén ladxaman guial rdxe'ch reeman laaman, guxhaal reeman tibcwaa ree bén zinal laaman persi biguiedx reeman guial ad rënt reeman gac bén guin xrey reeman. ¹⁵ Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. ¹⁶ Mojs bidxin yaloj rëbix: “Dad, milia ni baneel ma beenan gan chii volt mazri.” ¹⁷ Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lūj nabeel chii guiedx.” ¹⁸ Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” ¹⁹ Ziangajc rëb rey guin loj mojs guin: “Lūj nabee gaay guiedx.” ²⁰ Dxel bidxin zatijb mojs guin abi' rëbix: “Dad, laa xmilia guie, badxe'chaawanan lën tijb baydoo, ²¹ din bidxeban lūj guial ad rayatil bejn. Raca'l ni ad najt xieenl abi' rato'pil gualnaza'c lod ad guxübintil.” ²² Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen gualnaza'c lod ad guxübintan. ²³ ¿Chexc ad badëëtil da milian nigui'n bejn din chi naguialan naca'nan con guidib xi'nan?” ²⁴ Dxel rëb rey guin loj ree bén za' yagaj: “Gol bacal milia zii lojx, gol badëëdan loj xin ca' mazran.” ²⁵ Abi' rëb reeman loj rey guin: “Dad, per ma ca'x zro'n.” ²⁶ Badxi'man laan rëbaman: “Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman. ²⁷ Abi' ree bén rdxe'ch naj bén ad guyënt ree niajcan rey, gol tanë reeman guie, gol bagūjt reeman lon.”

*Ru Jesús Jerusalén**(Mt. 21:1-11; Mr. 11:1-11; Jn.12 :12-19)*

²⁸ Chi gulox rëb Jesús zian, dxel basnuu zëman Jerusalén. ²⁹ Chi bidxinman gajxh guiedx Beftagé con Betania, në gajxh guia' la Olivos, dxel guxhaal tio'p ree xbejnman, ³⁰ rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. ³¹ Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

³² Wej ree bën guxhaalaman bidxaagloj gajc reeman zi'cgajczi rëb Jesús loj reeman. ³³ Abi' chi caxhie reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

³⁴ Badxi' reeman laan, rëb reeman:

—Din Dad Jesús cayaadx laab.

³⁵ Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. ³⁶ Abi' ree bejn rguixh xab reeman lunejz lod zë Jesús. ³⁷ Chi ma zë reeman gajxh laguiajt ni naj guia' la Olivos, gra ree bën zinal Jesús guzuloj rbixdiaj reeman guial dád raba reeman abi' ruza't reeman Dios zagdx por gra ree milagr ni ma baguiaa reeman. ³⁸ Rëb reeman:

—¡Nüjnle' Dios bën zëed por laaman! ¡Yu' guialrabaa xanyabaa! ¡Benza'c bendxoon naj Dios bën yu' xanyabaa!

³⁹ Dxel ree bénfarišew no'ch loj ree bën zinal laaman, rëb reeman lojman:

—Mextr, gudilë ree bën guin chitëë nıee reeman zian.

⁴⁰ Per badxi'man laan rëbaman:

—Naj rni lëjt, bal yacwëëz ro' reeman, guiaj ree cwixdiaj zian.

⁴¹ Chi bidxinman gajxh Jerusalén, dxel baguiaaman guiedx guin, zianz biinman por laan.

⁴² Rëbaman:

—¡Bën Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. ⁴³ Din guidxin dxej ni güün ree bën rdxe'ch lëjt tijb ze' gadëd ladxidi, abi' gra lad gusiaaw reeman lëjt, ⁴⁴ gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

*Rabëe Jesús bën ruto' ree ro' yadooro' Jerusalén**(Mt. 21:12-17; Mr. 11:15-19; Jn.2 :13-22)*

⁴⁵ Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii, ⁴⁶ rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nüjndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguuil reeman mod din gugüjt reeman laaman. ⁴⁸ Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

20*Xguialrniabee Jesús**(Mt. 21:23-27; Mr. 11:27-33)*

¹ Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, ² abi' rëb reeman lojman:

—Guna, ¿chu na güünl ni guin ree? ¿Chu banee guialrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: ⁴ ¿chu guxhaal Waj bidgaroob-nijsaman bejn ree, Dios ya o bënguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” ⁶ Abi'za bal yaguie'ch ree bënguidxliuj guxhaal laaman, zugüjt ree bejn dunuj ree con guiaj din gra reeman rliladx guial Waj gojc bën badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree. ⁸ Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

*Xcwent ree mojs guijdx**(Mt. 21:33-44; Mr. 12:1-11)*

⁹ Dxel guzuloj cayü Jesüs tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bën güün dxiin lojn, zëtaman zijt. ¹⁰ Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bën rüjn dxiin loj guiniaa guin gudijn reeman mojs guin abi' badxi' reeman laax zezi. ¹¹ Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. ¹² Zianz guxhaalaman zatijbix, per gudiilgüjdx reeman laax abi' babëë reeman laax loj guiniaa guin.

¹³ 'Dxel rëb bën naj xguidxliuj laan: "¿Xhienaag günan yan? Gaxhal da xi'nän xin rën da'tan, wed zajp reeman laax respejt." ¹⁴ Per chi baguiaa ree bën guin laax, rëb loj lasa' reeman: "Xin guinan naj xin yaya'nnë guidxliuj guin. Yagüjt reex din gacan du xieen ree."

¹⁵ Dxel babëë reeman laax loj guidxliuj guin, bagüjt reeman laax.

Zianz gunabdiidx Jesüs loj ree bën caneenëman, rëbaman:

—Yan, ¿xhie naladxidi güünnë bën naj xguidxliuj laan bën guin ree? ¹⁶ Naj rni lojdi guial zi'taman din gugüjtaman bën guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¡Gagnë Dios ad zajct zian!

¹⁷ Per Jesüs baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bën rüjn yu,

laan naj ni mazri been sirv gojcnë yu guin.

¹⁸ Chutëëz bën yab guijc guiaj guin, gacaman zi'c tijb ni riroox, guiaád bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

¹⁹ Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesüs guial gogbee reeman cuza'taman laa reeman, per bidxeb reeman bejn ree.

²⁰ Abi' guxhaal reeman bën zigla'ch ree laaman din güünzi reeman guial gulüü naj reeman benza'c, din yaguüil reeman mod guinee Jesüs diidx ni gudxiib reeman guijc, din chile' yayü reeman laaman loj gobernador Rom. ²¹ Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn. ²² ¿Zagdxen ya radijxan impuest loj rey César, o ad zagdxetan?

²³ Per gogbee gajc Jesüs xgab mal ni cayüjn reeman abi' rëbaman loj reeman:

²⁴ —Gol balüü tijb cintabl lon. ¿Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

²⁵ Dxel rëbaman loj reeman:

—Gol badëëcliza loj rey César ni naj xieen César, guiaád loj Dios gol badëë ni naj xieen Dios.

²⁶ Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

Xcwent guial yaban ree bengüt

(Mt. 22:23-33; Mr. 12:18-27)

²⁷ Tio'p choon ree bénsaducew bignaj Jesüs, bénsadusew guin ree ad rliladxt reeman guial yaban ree bengüt, zeel rëb reeman loj Jesüs:

²⁸ —Mextr, loj xley Moisejs rëb guial bal guiët tijb xinguaaaw abi' achut xi'nix guyu con lacheelix, bijch xingüt guin guxhlianë bëngunaa bizëbj guin din chu' xi'n reex zi'c gulüü xi'n xin güt guinan. ²⁹ Guyu tijb famil lod goc reex gajdx bijch. Baxhliaa xin yaløj guin, per güjtix abi' ad guyut xi'n reex con lacheelix. ³⁰ Dxel bijch barojpax baxhlianë bëngunaa guin, per güjtigajquix ad guyu gajct xi'n reex. ³¹ Zianz baxhlianë xin bayon guin bëngunaa bizëbj guin, zianz baxhlianëman guigajdx reex abi' gra reex güjt achut xi'n reex guyu con laaman. ³² Ni bigratë në bëngunaa guin güjt. ³³ Yan, chi yaban ree bengüt, ¿chu loj guigajdx reex gac xbëngunaa laaman guial gra reex baxhlianë laaman?

³⁴ Dxel rëb Jesüs loj reeman:

—Loj guidxliuj guie ruxhliaa ree bejn abi' rudëëd xi'n reeman ruxhliaa. ³⁵ Per ree bën yaban zatijb, bën rayal ree gap guialnaban tiblayaa con Dios, ad zuxhliaatri reeman ad zudëë tëëtri xi'n reeman guxhliaa, ³⁶ din ad zëjttri reeman, gac reeman zi'c ree xianjl Dios. Gac tëë reeman xi'n Dios guial ma baban reeman. ³⁷ Abi' xcwent ni yaban ree bengüt, xt Moisejs rëb zian tibljat loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. ³⁸ Din Dios

ad najtaman xDios ree bengüt, najman xDios ree bén naban, din par laaman gra ree bejn naban.

³⁹ Dxel yu' ree mextr rajc ley, rëb lojman:

—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëéd Cristo

(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn guial zëéd Cristo loj xdiaa rey Davi? ⁴² Awa Davi guin gajc guneel loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guia'l.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley

(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiag gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tëë reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree bén zojbloj, ziangajc rüjn reeman lod ritaw reeman. ⁴⁷ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti naroob yayal reeman.

21

Gon badëéd tijb béngunaa bizëjb

(Mr. 12:41-44)

¹ Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia. ² Baguiaa tëëman tijb béngunaa bizëjb prob, cagu'man tio'p cintablodoo lën alcancia guin. ³ Dxel rëb Jesús loj ree xbejnman:

—Diidxli rnin lojdi guial bén bizëjb prob guin mazri lasajc gon badxe'man guial loj gon badxe' gra ree bén guin. ⁴ Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannëman.

Rëb Jesús guial yaze'n yadooro' Jerusalén

(Mt. 24:1-2; Mr. 13:1-2)

⁵ Tio'p choon ree xbejn Jesús cayü reeman diidx xcwënt ree guiaj zagdxe najcchaawnë yadooro' Jerusalén, në ree ni lasajc ni rudëéd ree bejn par suchaaw yadoo guin. Dxel rëb Jesús loj reeman:

⁶ —Gra ni cuguiaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Mr. 13:3-23)

⁷ Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rëb Jesús loj reeman:

—Gol gojp cudad achu gusquiee lëjt. Din zien ree bén guit' guiëb reeman guial por naj zëéd reeman guiëb tëë reeman: “Naj naj Cristo”; o “Ma zidyob dxej guit'taman.” Per ad chililadixidi laa reeman. ⁹ Abi' chi guiguiejni cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

¹⁰ Rëb tëë Jesús loj reeman:

—Til nacion con stijb nacion, til tëë bén rajp guialrniabee con stijb bén rajp guialrniabee, ¹¹ gui't tëë xudoxh, në gubijn, në guialgujdxdoxh niz ni niz guie abi' xanyabaa guiguuien ree ni nadxeb.

¹² Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëéd reeman lëjt casti, cu' reeman lëjt ladxguuib chinë tëë reeman lëjt loj ree rey në loj ree gobernador guial najdi da bejnan. ¹³ Zian gac din chile' güdi da diidxan loj reeman. ¹⁴ Ad aal chu'di xgab xhie guiëbidi loj reeman. ¹⁵ Din naj gune diidx ni guinieedi gune tëën quiarguejn. Abi' ni'qui tijb bén rdxe'ch lëjt ad züjnt gan loj xtiidxidi ad zanee tëët reeman contr lëjt. ¹⁶ Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. ¹⁷ Gra bénguidxliuj guidxe'ch lëjt guial

najdi da bejnan. ¹⁸ Per ni'qui tijb guidxguijquidi ad zanijt por zian. ¹⁹ Abi' bal sudxi'chidi loj xnejz Dios, zajpidi guialnaban tiblayaa con Dios.

²⁰ Chi guguaaadi nayaw ree suldad Jerusalén, ma qui nit guiedx guin. ²¹ Dxejzii ree, bén za' ree niz Judea, gol bigxüün niz dajn ree, abi' ree bén za' guiedx Jerusalén gol brii luguiedx guin, guiáad ree bén za' dajn ad bal yayudi luguiedx guin. ²² Din dxej guin ree gudëéd Dios bejn ree casti din gac cumplid zi'c ca loj xtiidxaman. ²³ ¡Proba ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin. ²⁴ Yu' ree bén guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb
(Mt. 24:29-35, 42-44; Mr. 13:24-37)

²⁵ Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman guial gac naquie' loj nijsdoo gac tëë naquie' por xtüjp nijs. ²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. ²⁷ Abi' guguaa reeman Bén guxhaal Dios, rdiinman bacha' zëédaman loj zaj con xguialrniabeeman. ²⁸ Chi suloj gac ree ni guin, gol bagu' luxdoodi zagdxe gol gules tëë lojdi din ma zidyob dxej ni laadi loj casti.

²⁹ Rëb tëë Jesús loj reeman:
—Gol baguaa yag higo o xhietëez zatijb yagan. ³⁰ Chi ma caydixib ree xbalagan, lëjt ragbee guial ma zëéd tiamp nalaa. ³¹ Ziangajc chi guguaaadi ma cayajc ree ni guin, zagbeedi guial ma zëéd xguialrniabee Dios gajxh.

³² Diidxli rniin lojdi guial gra ree ni guin gac chi gad gra ree bén naban yan guiët. ³³ Guidxliuj në xanyabaa zanijt reen, per da diidxan ad zadëdt gacan cumplid.

³⁴ Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt ³⁵ zi'c tijb tramp. Din zian gac dxej guin par gra ree bénguidxliuj. ³⁶ Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëë sudi loj Bén guxhaal Dios.

³⁷ Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. ³⁸ Abi' rsildoo rej gra ree bejn lën yadoo guin ricaagdiajg reeman ni rnieeman.

22

Bayan reeman diidx xhienaag guiniaaz reeman Jesús
(Mt. 26:1-5, 14-16; Mr. 14:1-2, 10-11; Jn. 11 :45-53)

¹ Chi ma zidyob lanij pascw, chi raw reeman guidxtil ni ad yu't levadur. ² Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

³ Dxel guyu xindxab luxdoo tijb ree xi apóstoles Jesús, bén la Judas Iscariote. ⁴ Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. ⁵ Dád babaa reeman abi' rëb reeman guial gudëéd reeman milia lojman. ⁶ Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche
(Mt. 26:17-29; Mr. 14:12-25; Jn. 13 :21-30; 1Co. 11 :23-26)

⁷ Chi bidxin lanij pascw, tijbgaj yu raw ree bejn guidxtil ni ad yu't levadur rugüjt tëë reeman tijb xiil, ⁸ dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

⁹ Abi' gunabdiidx reeman lojman rëb reeman:

—¿Ban guin rën! yuguieenan laan?

¹⁰ Zianz rëb Jesús loj reeman:

—Chi chu'di luguiedx guin, guguaaadi tijb xinguaaw ca'x tijb re yu' nijs. Gol chinalix xt lod yayux, ¹¹ gol güjdx loj bén naj lidxan: “Na mextr: ¿Con lënü gawnë ree xbejnman guxhin pascw?” ¹² Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

¹³ Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

¹⁴ Chi bidxin hor, Jesús con ree bén naj apóstoles gurej reeman xan mex. ¹⁵ Dxel rëbaman loj reeman:

—¡Diizd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan!

¹⁶ Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

¹⁷ Dxel cwa'man tijb cojp yu' vin, chi gulox badëëman quixtëë loj Dios, rëbaman loj reeman:

—Gol cwa' vin guie, gol gudi'san loj gradi. ¹⁸ Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

¹⁹ Dxel cwa'man guidaxtil badëëman quixtëë loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güündi zian, gol been zian guial rusaaladxidi naj.

²⁰ Abi' ziangajc beenman con cojp ni yu' vin guin, chi gulox gudawaman xche, rëbaman: —Vin guie naj da rejan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

²¹ 'Per yan bën yayü naj, laa yaaman xoob loj mex lod xoob gajc yan. ²² Per Bén guxhaal Dios, naj sagdiajman abi' guiëtaman. Per i'probza bën yayü laaman!

²³ Dxel guzuloj rniabdiidx loj lasa' reeman chu reeman yayü laaman.

Chu mazri zobjloj

²⁴ Dxel guzuloj reeman cadildiidx reeman chu loj gra reeman naj mazri bën zobjloj. ²⁵ Per rëb Jesús loj reeman:

—Bën naj ree rey loj guidxliuj guie rniabee reeman bën ladx reeman zi'ctzi rën reeman, abi' ree bën rniabee, rëb reeman guial rüjn reeman ni zagdx. ²⁶ Per lëjt ad rayalt güündi zian, bën mazri zobjloj lojdi rayal güün laagajcaman zi'c tijb bën ad zobjlojt. Guiáad bën rniabee lojdi rayal güün laagajcaman zi'c tijb mojs. ²⁷ ¿Chu naj mazri bën zobjloj loj guidxliuj guie? ¿Bën rbej xan mex par gaw ya o bën rbe'c guialraw? ¿Nid bën rbej xan mex guin naj mazri bën zobjloj ya? Guiáad naj za'n lojdi zi'c tijb bën rbe'c guialraw.

²⁸ 'Lëjtzi za'në naj loj ree dxej cazaagdiajn. ²⁹ Zeel gunen guialrniabee lojdi zi'c banee da Dadanan lon, ³⁰ abi' gawidi loj da mexan lod ganabene cwe tëëdi loj ree yaxhil lod güündi guialguxtis loj gra ree bën za loj guidxiptio'p xdiaa Israel.

Rëb Jesús guial guiëb Bëd ad nünbeetaman laaman

(Mt. 26:31-35; Mr. 14:27-31; Jn. 13 :36-38)

³¹ Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbiyb bejn trigo. ³² Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rililadxil naj zatijb, gogné ree lasa'l din sudxi'ch reeman loj ni rililadx reeman naj. ³³ Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguuib o xt guië'në'n lüj.

³⁴ Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

³⁶ Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban. ³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

³⁸ Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

Rbejdx rniab Jesús Dios lod la Getsemani

(Mt. 26:36-46; Mr. 14:32-42)

³⁹ Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman. ⁴⁰ Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, ⁴² rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

⁴³ Dxel balüüloj tijb anjl guza xanyabaa lojman persi badëëman laaman gojl. ⁴⁴ Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman. ⁴⁶ Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús

(Mt. 26:47-56; Mr. 14:43-50; Jn. 18 :2-11)

⁴⁷ Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid. ⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

⁵⁰ Abi' tijb xbejnman gudilgüjdxaman xmojs bixhioz rniabee gra ree bixhioz, gutü'man guidiajg ladbeeman. ⁵¹ Per rëb Jesús loj reeman:

—Guzujr ree bënan. Ma gojczy.

Dxel baqui' Jesús guidiajg mojs guin abi' bayünman laan. ⁵² Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con xguxtis ree bën Israel, bën bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaa? ⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús

(Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. ⁵⁵ Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman. ⁵⁶ Per tijb bëngunaa rünj dxiin yagaj, chi baguiaaman Bëd zobjaman rudëj guin, baguiaaman lojman, abi' rëbaman:

—Në bën guin za'në Jesús.

⁵⁷ Per gurexuu Bëd, abi' rëbaman loj bën guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

⁵⁹ Gudëd cost tib hor, dxel rëb zatijb bejn:

—Nëczy bën guie za'në laaman din nëman naj bën Galilea.

⁶⁰ Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb güid. ⁶¹ Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad güid cwidxa', choon volt mal rëbil ad nünbeetil naj.” ⁶² Dxel barri Bëd yagaj, abi' dád naya biinman.

Baze' reeman Jesús gudijn tëë reeman laaman

(Mt. 26:67-68; Mr. 14:65)

⁶³ Bën cayajp ree Jesús, baze' reeman laaman gudijn tëë reeman laaman. ⁶⁴ Guxhii reeman lojman abi' gudijn reeman laaman, dxel rëb reeman lojman:

—¿Guneeya' chu gudín lüj!

⁶⁵ Abi' zien ree diidxgüjdx rëb reeman lojman.

Za' Jesús loj ree guxtis Israel

(Mt. 26:59-66; Mr. 14:55-64; Jn. 18 :19-24)

⁶⁶ Chi bareguiaa, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lüt naj Cristo ya?

Badxi'man laan rëbaman:

—Bal ganinan ad zaliladxtidi. ⁶⁸ Abi' bal xhie ganabdiidxan lojdi, ad zadxi'tidan. ⁶⁹ Per diizd yan, Bén guxhaal Dios cweman xladbee Dios, bën ca' gra guialrniabee.

⁷⁰ Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

⁷¹ Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidix.

23

Binë reeman Jesús loj Pilato

(Mt. 27:1-2, 11-14; Mr. 15:1-5; Jn.18 :28-38)

¹ Dxel wajs gra reeman binë reeman Jesús loj Pilato. ² Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex bën du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

³ Dxel gunabdiidx Pilato lojman rëbaman:

—¿Lüjn naj xrey ree bën Israel ya?

Badxi' Jesús laan, rëbaman:

—Waliquid, najcan.

⁴ Dxel rëb Pilato loj ree bixhioz rniabee ree bixhioz në loj gra ree bën riga' yagaj:

—Achet xfalt xin guie radxejlan.

⁵ Per laa reeman naguiejn nizi rüjn reeman, rëb reeman:

—Cusquieex bejn ree guidib niz Judea con ree ni rulüüx laa reeman. Guzulojx niz Galilea abi' yan cayüjnx zian niz guie.

Binë reeman Jesús loj Herodes

⁶ Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. ⁷ Abi' chi rëb reeman guial najman bën Galilea, guxhaalaman laaman loj Herodes bën rniabee Galilea, guial lën ree dxej guin në Herodes za' Jerusalén. ⁸ Chi baguiaa Herodes Jesús dád babaaman guial diidz gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr. ⁹ Zien ree ni gunabdiidxaman lojman, per Jesús achetzi badxi'man. ¹⁰ Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman. ¹¹ Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. ¹² Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

Gunabee reeman guiët Jesús

(Mt. 27:15-26; Mr. 15:6-15; Jn.18 :39-19 :16)

¹³ Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin, ¹⁴ abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. ¹⁵ Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix. ¹⁶ Yan, gudëdan laax casti dxel guslaan laax.

¹⁷ Lën ree dxej lanij guin ruslaa Pilato tijb bën yu' ladxguuib zi'c goc xcostumbr reeman. ¹⁸ Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

¹⁹ Badxe' reeman Barrabás guin ladxguuib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. ²⁰ Guneeën Pilato laa reeman zatijb guial guyënman nuslaaman Jesús, ²¹ per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

²² Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

²³ Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. ²⁴ Dxel cwëjb Pilato beenman zi'c rën reeman. ²⁵ Abi' baslaaman Barrabás bën guyu ladxguuib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

*Bacaa reeman Jesús loj crüzj**(Mt. 27:32-44; Mr. 15:21-32; Jn.19 :17-27)*

²⁶ Chi zinë reeman Jesús din gucaa reeman laaman loj crüzj, gunaaz reeman tijb bén za Cirene laaman Simón. Ziaadaman bazaman dajn, gunabee reeman laaman güüman xcrüzj Jesús din chinalaman laaman.

²⁷ Zien da't bejn zinal laaman, abi' zien ree béngunaa roon rbixdiaj guial raya reeman laaman. ²⁸ Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. ²⁹ Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.” ³⁰ Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” ³¹ Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

³² Abi' në tio'p ree xingubaan zinë reeman din tia reex loj crüzj con Jesús. ³³ Chi bidxin reeman lod la Calaver, bacaa reeman Jesús loj crüzj, con grop ree xingubaan guin: tijbix cwa ladbee zatijbix cwa ladruvejs. ³⁴ Abi' chi cucaa reeman Jesús loj crüzj, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. ³⁵ Zien ree bejn riga' yagaj cuguiaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

³⁶ Në ree xin suldad ruze' laaman, rbig reex rudëed reex vinagr guië'man, ³⁷ rëb reex lojman:

—Bal lüj naj xrey ree bén Israel, baslaa lüj gajc.

³⁸ Abi' guijc crüzj guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree bén Israel.”

³⁹ Tijb xingubaan ni ca loj crüzj guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

⁴⁰ Per zatijbix gudilë xcompniarix, rëbix lojx:

—¿Staczi ad rdxehtil Dios ya majsi lasa'gajc casti guin cadëdi? ⁴¹ Dunuj rayalczi cayzaag-diaj din zian caydijx ni baguieen. Per bén guie achetctzi ni mal wayüjman.

⁴² Dxel rëbix loj Jesús:

—Basaaladx naj chi ma canabeel.

⁴³ Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

*Güjt Jesús**(Mt. 27:45-56; Mr. 15:33-41; Jn.19 :28-30)*

⁴⁴ Chi gol garol dxej, bicajy guidibczi guidxliuj xt raca choon wadxe. ⁴⁵ Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. ⁴⁶ Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷ Chi baguiaa suldad rniabee ree suldad ni goc, baza'tix Dios zagdx, rëbix:

—Walican achet xtol bén guin yu'.

⁴⁸ Chi baguiaa gra ree bén za' yagaj ni goc, dád guyunaya reeman zia reeman riga'pgaj luxdoo reeman. ⁴⁹ Per gra ree bén nünbee Jesús, con ree béngunaa nal laaman diidz Galilea, zijt guzuj reeman baguiaa reeman gra ree ni goc.

*Biguie'ch Jesús**(Mt. 27:57-61; Mr. 15:42-47; Jn.19 :38-42)*

⁵⁰ Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bén Israel. ⁵¹ Nëman rbëz nabee Dios, abi' ad nëtaman bachajg xixgab ree bén bagüjt Jesús. ⁵² Wejman loj Pilato bignabaman xcuerp Jesús. ⁵³ Chi gulox baletaman xcuerp Jesús loj crüzj guin, cwa'man laaman batüübaman tijb lajd, dxel biquie'chaman laaman lën tijb baa ni bidëen lën guiaj lod achutctzi waguie'ch. ⁵⁴ Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵ Abi' ree béngunaa zidnë Jesús diidz Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman. ⁵⁶ Chi bayejc reeman, zianz beenchaaw reeman perfum në zaj ni rliaa nejxh ni guidëëbaman. Dxel baziiladx reeman dxej raziiladx ree bejn zi'c rniabee ley.

24

*Raban Jesús**(Mt. 28:1-10; Mr. 16:1-8; Jn. 20:1-10)*

¹ Chi dumingw rsildoo, wej ree béngunaa guin ro' xbaa Jesús binē reeman perfum ni beenchaaw reeman. ² Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. ³ Abi' guyu reeman, per ad bidxaaglojtri reeman xcuerp Dad Jesús. ⁴ La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'. ⁵ Abi' guial tant bidxeb reeman, basajb loj reeman xt luyuj, dxel rēb ree bēn guin loj reeman;

—¿Chexc zeel raguüliidi tijb bēn naban loj ree bengüt? ⁶ Achutri laaman guie din ma babanman. Gol basaaladx ni naman lojdi chi guzuman niz Galilea. ⁷ Naman lojdi guial yayü reeman Bēn guxhaal Dios loj ree bēndol din gucaa reeman laaman loj crüjz, abi' ni yayon dxej yabanman.

⁸ Dxel basaaladx reeman diidx ni rēb Jesús loj reeman, ⁹ abi' chi baza reeman ro' baa guin, bicojn reeman guidxiptib ree xi apóstoles Jesús nē los demazri ree xcompniar reeman gra ni baguiaa reeman. ¹⁰ María Magdalena, con Xuan, con Li xniaa Jacob con ree béngunaa ren, laa reeman bignē ruson guin loj ree xi apóstoles Jesús. ¹¹ Per laa reeman ad bililadxt reeman ni rēb ree béngunaa guin, gunaladx reeman wed rēbzi reeman.

¹² Per Bēd baxüünman biquiaaman lēn baa guin, abi' chi baguiaaman lēn baa guin, lajd ni bidüübzi Jesús baguiaaman, zianz ziaman dād radxalojman por ni goc.

*Baliüloj Jesús loj tio'p ree xbejnman**(Mr. 16:12-13)*

¹³ Dxej guin gajc, tio'p ree xbejn Jesús zē tijb guiedx la Emaús, raya'nan zi'ct chiptib kilometro par Jerusalén. ¹⁴ Chi zē reeman lunejz cayü reeman diidx xcwent gra ree ni goc. ¹⁵ La'tgaj cayü reeman diidx, gubig Jesús cwē' reeman abi' guzuloj cazanēman laa reeman. ¹⁶ Per majsí cuguaa reeman laaman, yu' ni badxoon nayünbee reeman laaman. ¹⁷ Dxel gunabdiidx Jesús loj reeman, rēbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

¹⁸ Badxi' tijb bēn la Cleofas laan, rēbaman:

—Gra ree bejn ragbee ni goc Jerusalén lēn ree dxej guie. ¿Wen tijbzi lüj naj bēn guzu Jerusalén ad gogbeetil ni goc ya?

¹⁹ Dxel rēbaman loj reeman:

—¿Xhie goc?

Abi' rēb reeman:

—Ni beennē reeman Jesús bēn Nazaret, laaman goc tijb bēn badēē xtiidx Dios loj ree bejn, bēn gop gualrniabee zi'c ni beenman nē ree diidx ni guineeman niz loj Dios nē niz loj ree bejn. ²⁰ Nē guial bayü ree bixhioz rniabee ree bixhioz laaman nē ree dux xuxtis ree din güietaman, abi' bacaa reeman laaman loj crüjz. ²¹ Par dunujn laaman naj bēn yabēē ree bēn Israel loj ree bēn rom, per yan gojc choon dxej ni goc ree ni guin. ²² Majsí tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin. ²³ Abi' guial ad baguiaa reeman xcuerpaman, bayejc reeman rü reeman diidx guial baliüloj ree anjl loj reeman, rēb ree anjl guin loj reeman guial naban Jesús. ²⁴ Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczy rēb ree béngunaa guin, per ad baguiaa reeman Jesús.

²⁵ Dxel rēb Jesús loj reeman:

—¿Xi nawēēg naj chignia'di abi' xi raglaa par chililadxidi gra ni guneē ree bēn badēē xtiidx Dios loj ree bejn! ²⁶ ¿Wen id naj ya guial sagdiaj Cristo, dxelri yayē'paman xanyabaa?

²⁷ Dxel guzuloj cusignia'man laa reeman ni rēn güiēb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bēn badēē xtiidx Dios loj ree bejn.

²⁸ Chi bidxin reeman guiedx lod zē reeman, been Jesús zi'c bēn che mazri zijt. ²⁹ Per laa reeman been reeman naguiejn din yaya'nnēman laa reeman, rēb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnēman laa reeman. ³⁰ Abi' chi zojbnēman laa reeman xan mex, cwa'man guidaxtil abi' chi gulox badēēman quixtēē loj Dios, gula'man laan persi badēēman laan loj reeman. ³¹ Hor guin gajc guzajc reeman zi'c bēn baxal guiaal, abi' bayünbee reeman laaman. Per laa gunidloj gajcaman, ³² zianz rēb loj lasa' reeman:

—¿Ze'cliza dād nix yu' du luxdoo chi zudnē'man lunejz, chi cusignia'man dunuj ni rēb loj xtiidx Dios!

³³ Abi' ni'quid gulējzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. ³⁴ Rëb reeman loj grop ree bën guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guidahtil.

*Baliüloj Jesús loj ree xbejnman
(Mt. 28:16-20; Mr. 16:14-18; Jn.20 :19-23)*

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxaloj reeman abi' bidxeb reeman guial gunaladx reeman anman cuguiaa reeman. ³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? ³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëél zi'c ruguiaadi naj.

⁴⁰ Chi rëbaman zian, balüü yaaman në guia'man. ⁴¹ Per laa reeman staczi ad riladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

⁴² Dxel badëë reeman tibia' bëjl biguie', ⁴³ abi' cwa'man laab gudawaman niz loj reeman. ⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

⁴⁵ Dxel guxhalaman xquiarguiejn reeman persi bignia' reeman ni ca loj xtiidx Dios, ⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. ⁴⁷ Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj. ⁴⁸ Lëjt naj testiw xcwent gra ree ni guin. ⁴⁹ Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

*Bayë'p Jesús xanyabaa
(Mr. 16:19-20)*

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. ⁵¹ Abi' la'tgaj cayüjnle'man laa reeman, wajsaman ziaman xanyabaa. ⁵² Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. ⁵³ Abi' guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diizd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios. ² Laaman mal za'ně Dios diizd guia'xchej. ³ Laaman been graczi ni yu'. Achetczi ni yu' ni ajc bal id laaman. ⁴ Laaman rajp gualnaban, guiáad gualnaban guin naj bajl par gra b́enguidxliuj. ⁵ Bajl guin rusni b́en nacay xquiargueijn, abi' ad rajct rutěe gualnacay guin loj bajl guin.

⁶ Guyu tijb b́en brii laj Waj, Dios guxhaal laaman, ⁷ bidgaguieman diidx xcwent b́en naj xbajl Dios, din gac chililadx gra ree bejn laaman. ⁸ Per ad Wajt goc bajl guin, bi'tzaman bidgaguieman diidx xcwent bajl guin. ⁹ Din b́en naj quijb bajl guin, laaman rusni xquiargueijn gra b́enguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree b́enguidxliuj ad bayagbeet reeman laaman. ¹¹ Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. ¹² Per, gra ree b́en bidxga' laaman bililadx t́e reeman laaman, beenman laa reeman xi'n Dios. ¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o gual ŕen bejn chu' xi'nman, por gual rililadx reeman ma naj reeman xi'n Dios.

¹⁴ Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyenman bejn ree gunee t́eeman ganax diidxli. Dunujn baguiaa xgualrniabee-man, gualrniabee ni ca'man gual tijbzi laaman naj Xi'n Dios. ¹⁵ Chi be Waj xtiidxaman loj ree bejn, gunee-man rejs, ŕebaman:

—Jesús guie naj b́en ruzatan, chi rnin gual b́en źeéd xichan mazri lasajcaman gual lon, din diizd gocli mal yu'man gual lon.

¹⁶ Dád ŕenman dunuj ree, gra dxejci raca' dugra ree xgualnaza'caman. ¹⁷ Por Moisejs banee Dios xleyaman duloj ree, per por Jesucrist bayagbee ree xhienaag ŕen Dios dunuj ree xhie t́eē naag naj xtiidxlman. ¹⁸ Ad yu't dxej waguiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

Waj b́en baroobnijs ŕebaman chu naj Jesús

(Mt. 3:11-12; Mr. 1:7-8; Lc. 3:15-17)

¹⁹ Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, ŕebaman:

—Ad najtan naj Cristo.

²¹ Abi' gunabdiidx reeman lojman stijb ŕeb reeman:

—¿Chuzá najl? ¿Lüjn naj Elías ya, b́en baděe xtiidx Dios loj ree bejn?

Badxi' Wajn ŕebaman:

—Ad najtan.

Dxel gunabdiidx reeman stijb ŕeb reeman:

—O, ¿lüjn naj b́en naj diidx gui't ya, b́en guděe xtiidx Dios loj ree bejn?

Badxi'man laan ŕebaman:

—Ad najtan.

²² Abi' ŕeb reeman:

—¿Chuzá najl? Din rayal yugně'n rusion loj ree b́en guxhaal dunujn. Guna chu najl.

²³ Dxel ŕeb Waj loj reeman:

—Naj naj tijb b́en rbidxa' loj yujbidx: “Gol guxhal tijb nejz nali par b́en ca' gualrniabee”

—zi'c ŕeb Isaías b́en baděe xtiidx Dios loj ree bejn.

²⁴ Abi' ree b́en guxhaal ree b́enfarisew din guineeně reeman Waj, ²⁵ gunabdiidx reeman lojman, ŕeb reeman:

—Bal id lüjn naj Cristo, ni'qui Elías, ni'qui b́en naj diidx gui't, b́en guděe xtiidx Dios loj ree bejn, ¿chexquiza zeel ruobnijsil bejn?

²⁶ Badxi' Waj laan ŕebaman:

—Naj ruobnijs con nijs, per lojdi no'ch tijb b́en ad wayünbeetidi. ²⁷ Laaman naj b́en źeéd xichan, ni'qui xgurěchaman ad rayal gaxhiecan gual najman b́en mazri lasajc gual lon.

²⁸ Gra niguie gojc lod la Betábara, ni naj stiblad ro' guiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaal, baguiaa Waj zibig Jesús lod za'man, dxel ŕebaman:

—Gol baguiaa, b́en guin naj b́en bacaabee Dios din guiétaman zi'c xiildoo por xtol ree bénguidxliuj. ³⁰Laaman bazatan lojdi chi rnin: “Xichan zidnal b́en mazri lasajc guiallon, din laaman mal yu' diizd gocli guiallon.” ³¹Ni'qui naj ad gogbeetan guial laaman naj b́en gui't, per naj zialan din gurobnijsan bejn ree con nijs din chile' güünbee ree b́en Israel laaman.

³²Réb t́eé Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman. ³³Majsi ad nünbeetan laaman, per b́en guxhaal naj barobnijsan con nijs, laaman na lon: “Chi guguaial guiat xSprijt Dios xt guijc tijb bejn, laaman naj b́en runee xSprijt Dios.” ³⁴Naj ma baguia laaman, abi' ragbeechaawan guial laaman naj Xi'n Dios.

B́en binal ree Jesús yalój

³⁵Chi bareguiaal, za' Waj yagaj stijb, za'né tio'p ree xbejnman. ³⁶Abi' chi baguiaaman cadéd Jesús, dxel rébaman loj reeman:

—Gol baguiaa, b́en guinan naj zi'c xi xiildoo Dios din guiétaman por xtol bénguidxliuj.

³⁷Chi biguiejn reeman réb Waj zian, dxel binal reeman Jesús. ³⁸Chi badxi' lojman, baguiaaman zinal reeman laaman, abi' rébaman loj reeman:

—¿Xhie rguilidi?

Badxi' reeman laan réb reeman:

—Mextr, ¿ban zojbil?

³⁹Dxel réb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nné reeman laaman dxej guin, guial ma gojl cost raca tajp wadxe.

⁴⁰Tijb ree xbejn Waj b́en binal Jesús, b́en bacaagdiajg ni réb Waj, laaman brii laj Andrejs, bijch Simón Béd. ⁴¹Andrejs guin, yalójxgaj bijchaman Simón bigdüilaman, abi' rébaman lojman:

—Ma badxaaglojn b́en naj Mesías —rén guiéban Cristo.

⁴²Dxel biné Andrejs Simón lod za' Jesús, chi baguiaa Jesús laaman, rébaman:

—Lúj naj Simón, xi'n Jonás, per yan grii lajl Cefas —rén guiéban Béd.

Gurejdx Jesús Felip né Natanael

⁴³Chi bareguiaal been Jesús xgab cheman niz Galilea, abi' badxaagaman Felip, zianz rébaman:

—Tanal naj.

⁴⁴Ladx Felip guin naj guiedx Betsaida, ni gajc naj ladx Andrejs con Béd. ⁴⁵Dxel bigdüil Felip Natanael, abi' rébaman lojman:

—Ma badxaaglojn b́en ruza't Moisejs loj xlibr xleyaman, b́en ruza't ree b́en badéé xtiidx Dios loj ree bejn loj ni bacaa reeman. Laaman naj Jesús, xi'n Xiéb, b́en Nazaret.

⁴⁶Dxel réb Natanael lojman:

—¿Wen yu' benza'c Nazaret ya?

Badxi' Felipan rébaman:

—Yo' din guguaal.

⁴⁷Chi baguiaa Jesús zééd Natanael, rébaman:

—Guie zééd tijb b́en naj quijb b́en Israel, abi' ad rusquieetaman.

⁴⁸Dxel gunabdiidx Natanael lojman, rébaman:

—¿Xoza nünbeel naj?

Badxi' Jesúsán rébaman:

—Chi gad Felip cwedx lúj, chi za'l xan yag higo, dxel baguian lúj.

⁴⁹Zianz réb Natanael lojman:

—Mextr, lúj naj Xi'n Dios, lúj naj rey Israel.

⁵⁰Badxi' Jesús laan rébaman:

—¿Rililadxil naj ya guialzi rnin baguian lúj xan yag higo? Per mazri naj ree ni guguaal guial loj ni ma baguaal.

⁵¹Réb t́eéman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayé'p reeman xanyabaa yaguiajt t́eé reeman xt guijc B́en guxhaal Dios loj guidxliuj.

2

Wej Jesús loj tijb guialruxhliaa

¹Ni goc choon dxej guyu tijb guialruxhliaa luguiedx Caná, ni riga' niz Galilea. Dxel né xníaa Jesús za' yagaj, ²abi' né Jesús con ree xbejnman gunee reeman persi wej reeman loj lanij guin. ³Chi babidx vin, dxel réb xníaa Jesús lojman:

—Achetri vin rajp reeman.

⁴ Badxi! Jesús an rëbaman:

—Na, ¿chexquiza zeel nal lon zian? Ad wadixint da horan günan ni rayal günan.

⁵ Per xniaaman rëb gajcaman loj ree bën cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi! lën tijbgaj reen ru cost tibgayuu lijtr. ⁷ Abi! rëb Jesús loj ree bën rüjn mandad guin:

—Gol bacha ree guiajs guie nijs.

Dxel bachadi reeman laa reen, ⁸ abi! rëbaman loj reeman:

—Yan gol gulëë ta'nan, gol bigdëën loj bën canabee loj lanij guie.

Dxel bigdëë reeman laan lojman, ⁹ abi! bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, ¹⁰ rëbaman lojx:

—Graczi bejn rgui's yaloj vin zagdxe, abi! chi ma gu! reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü gualrniabee ni rajpaman abi! bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëë Jesús bën ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree bën Israel, wej Jesús Jerusalén. ¹⁴ Abi! ro' yadooro' bidx-aaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren. ¹⁵ Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexguiat tëëman xmex reeman. ¹⁶ Dxel rëbaman loj ree bën cuto' palom:

—¡Gol babëë reeb guie! ¡Ad rüjnnëdi lidx da Dadan zi'c luguaia!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bën Israel lojman:

—¿Xhie milagr gulüül du lojn din yayagbeen guial rajpil gualrniabee güünl zian?

¹⁹ Badxi! Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿güiaad lüj ya yayüjnlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin. ²² Zeel chi babanman loj ree bengüt, basaaladx ree xbejnman ni rëbaman, abi! bililadx reeman xtiidxaman bililadx tëë reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴ Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. ²⁵ Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

3

Bigneenë Nicodemo Jesús

¹ Guyu tijb bënfarisew brii lajman Nicodemo, gojcaman tijb guxtis loj ree bën Israel. ² Abi! wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczzi zajc güün lasa' ree milagr ni rüjnl bal id za'në Dios laaman.

³ Dxel rëb Jesús:

—Diidxliczi rnin lüj, bën ad zajlt stijb, ad zajct guguaaaman xgualrniabee Dios.

⁴ Abi! rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi! galaman stijb?

⁵ Badxi! Jesús laan rëbaman:

—Diidxliczi rnin, bën ad rirobnijst ad nabannë tëëtaman xSprijt Dios ad zile't yayuman loj xgualrniabee Dios. ⁶ Bën naban zi'c naj xixgabaman, lojzi guidxliuj guie rajpaman gualnaban, per bën nabannë xSprijt Dios, por Sprijt guin rajpaman stijb gualnaban. ⁷ Ad

bal radxa lojl guial rnin: "Rüjn naguiejn gal bejn stijb." ⁸ Din zi'c rbi' bi gralad abi' majsi rigueijnl chi rbi'n, per ni'quid ragbeetil ban zëëdan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

— ÷Xhienaag rajc zian?

¹⁰ Badxi' Jesúsan rëbaman:

— ÷Lüj, naj mextr loj ree bën Israel, ad rignia'til gra ree ni guin ya? ¹¹ Diidxliczi rnin lojl, raneen ni rayagbeen ni baguiaa tëen, per lëjt ad rliladxtidi ni ranan. ¹² Bal id rliladxidi chi rnin xcwent ree ni loj guidxliuj guie, ÷xhienaag chililadxidi bal ganin xcwent ree ni xanyabaa?

¹³ 'Achut wayej xanyabaa, tijbzi bën biguiat diidz xanyabaa, Bën guxhaal Dios loj guidxliuj. ¹⁴ Abi' zi'c bacaa Moisejs bëël guuib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüzj, ¹⁵ din gra bën chililadx laaman ad zaniijt reeman loj Dios, gap reeman guialnaban tiblyaa con laaman.

Rën Dios bejn

¹⁶ 'Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chililadx laaman ad zaniijt reeman loj Dios, gap reeman guialnaban tiblyaa con laaman. ¹⁷ Din Dios ad guxhaalt xi'nman loj guidxliuj din gudëëdaman bejn casti, guxhaalaman laaman din gap ree bejn perdon loj Dios.

¹⁸ 'Bën rliladx Xi'n Dios ad rayaltaman xcasti Dios. Per bën ad rliladxt, laaman ma rayal casti guial ad rliladxtaman Xi'n Dios, bën naj tijbzi xi'nman. ¹⁹ Bën ad rliladxt ree rayal reeman casti, din yan ni bi't bën naj xbajl Dios, mazri bayuladx reeman nejz mal, guial rüjn reeman ganax ni mal. ²⁰ Graczi ree bën rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. ²¹ Per ree bën naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

Waj bën baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. ²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi riroobnijs reeman. ²⁴ Laan goc chi gad Waj chu' ladxguuib.

²⁵ Per bëlzi ree xbejn Waj, con za tio'p choon gajc ree bën Israel guzuloj cadildiidx reeman por xcostumbr reeman guial xhienaag gac reeman naya. ²⁶ Dxel biguiedx reeman loj Waj: —Mextr, bën guzunë! stiblad ro' guiw Jordán, bën bel xtiidx du lojn, në laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Achut zajc gap guialrniabee bal id Dios gudëë laan. ²⁸ Lëjt ragbee guial bigueijndi rën guial ad najtan naj Cristo, naj guneed lojman zidgagojnan por laaman. ²⁹ Dunuj ree rayagbee guial loj guialruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi rigueijnx rnieex. Ziangajc naj dád rabaanë'n laaman. ³⁰ Abi' laaman gusunuu gacaman mazri bën zojbloj, guiáad naj gusunuu gacan bën ad lasajct guial lojman.

Bën zëëd xanyabaa

³¹ 'Din bën zëëd diidz xanyabaa, laaman naj bën rniabee loj gra. Per bénguidxliuj, bénguidxliuji najman abi' ganax ni yu' loj guidxliuj ruza'taman. Per Bën zëëd diidz xanyabaa laaman rniabee gra, ³² abi' rüman ni ma baguiaaman ni ma bigueijn tëëman, per achut rliladx ni rnieeman. ³³ Bal yu' bën rliladx xtiidxaman, zian rguien guial ni diidxli naj xtiidx Dios. ³⁴ Abi' bën zëëd por Dios, laaman rü xtiidx Dios guial guidiblagaa badëëd Dios xSprijtaman lojman. ³⁵ Dios rën Xi'nman abi' basa'nman gra lojman. ³⁶ Abi' chutëëz bën rliladx Xi'nman, laaman rajp guialnaban tiblyaa loj Dios. Per bën ad rtiëjbt chililadx, ad rajptaman guialnaban guin, laaman rayal xcasti Dios.

4

Jesús con béngunaa Samaria

¹ Gogbee ree bënfarisew guial mazri zien bejn ma zinal Dad Jesús mazri zien tëë bejn ruroobnijsaman guial loj Waj, ² majsi diidxliczi ad Jesústan ruroobnijs bejn ree, bën naj ree xbejnman ruroobnijs. ³ Chi gogbeeman zian dxel briiman niz Judea zëman niz Galilea stijb.

⁴ Per chi zëman niz Galilea been naguiejn gudëëdaman niz Samaria. ⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb.

⁶Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. ⁷⁻⁸Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹Per guial ad rnieenët lasa' ree bën Israel zagdxe con ree bën Samaria, badxi' béngunaa guinan rëbaman:

—¿Chexquiza zeel rniabil nijs lon najl bën Israel awa bën Samaria naj?

(Din bën Israel ree ad rnieenët reeman bën Samaria ree zagdxe.) ¹⁰Badxi' Jesús laan rëbaman:

—Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

¹¹Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban? ¹²Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³Badxi' Jesús laan rëbaman:

—Graczi ree bën rë' nijs guie re'c reeman nijs stijb. ¹⁴Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblayaa.

¹⁵Dxel rëb béngunaa guin lojman:

—Dad, baneë nijs guin lon, chitëë che'cran nijs ad zial tëëtran guidca'n nijs guie.

¹⁶Rëb Jesús lojman:

—Bignee lacheelil, dxel yaguaaadil guie.

¹⁷Badxi' béngunaa guinan rëbaman:

—Achut da bénguaawan yu'.

Dxel rëb Jesús:

—Waliqul achut lacheelil yu', ¹⁸din ma gojc gaay xinguaaw rtia' lüj, abi' yan xin zojbnël ad lacheeltilan. Zeel waliqui ni nal.

¹⁹Chi biguejnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. ²⁰Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guiniajchi' bejn laaman.

²¹Badxi' Jesúsán rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëtëtridi Jerusalén. ²²Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bën Israel grii bën güün bejn ree perdon. ²³Abi' ma bidxin dxej ni gra ree bën diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bën rniajchi' laaman. ²⁴Dios naj Sprijt, abi' bën rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵Dxel rëb béngunaa guin lojman:

—Naj ragbee gui't bën naj Mesías, bën la gajc, Cristo. Abi' chi gui'taman, laaman gusignia' dunuj ree gran.

²⁶Abi' rëb Jesús:

—Najn naj bën zi, laaman caneenë lüj.

²⁷Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. ²⁸Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹—Gol taquiaa tijb bën ma na graczi ni ma benan. ¿Nid laaman naj Cristo ya?

³⁰Dxel brii reeman luguiedx guin zë reeman lod za' Jesús. ³¹Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³²Per rëbaman loj reeman:

—Laa da guialrawan yu', ni ad nünbeetidi.

³³Dxel guzuloj canabdiidx loj lasa' reeman rëb reeman:

—¿Ni yu' chu bidné ni gudawaman ya'n?

³⁴Dxel rëb Jesús loj reeman:

—Da guialrawan naj günan zi'c rën Dios, bën guxhaal naj abi' guloox günan ni naman.

³⁵Lëjt rëb: “Ryaadx zatajp bëëw din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen. ³⁶Abi' bën rato'p loj

guinaa guin, rtia'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblayaa. Dxel zi'c bën rxübin zi'c bën rato'p, rabaá reeman tiblojzi. ³⁷ Waliqui ni rëb ree bejn: "Ben ren rxübin, ben ren rato'p guialnaza'c." ³⁸ Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

³⁹ Zien ree bën Samaria bililadx Jesús guial be béngunaa guin diidx loj reeman rëbaman: "Ma gunaman graczi ni benan." ⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. ⁴¹ Abi' mazri zien reeman bililadx laaman chi biguiejn reeman ni rnieeman, ⁴² dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, bën yabëë bénguidxliuj loj dol.

Bayüjn Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zëman niz Galilea, ⁴⁴ majsi laagajcaman rëb guial ni'qui tijb bën rudëë xtiidx Dios loj ree bejn ad rajpt reeman laaman respejt ladx gajcaman. ⁴⁵ Per chi badxinman niz Galilea, bën niz ni ree baca' reeman laaman zagdx. Din në laa reeman wej lanij pascw Jerusalén, abi' baguiaa reeman gra ni beenman ni. ⁴⁶ Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. ⁴⁷ Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix. ⁴⁸ Abi' rëb Jesús lojman:

—Lëjt, bal id zuguiaadi xhie ree sen o milagr ree, ad zaliladxtidi.

⁴⁹ Per rëb bën guin:

—Dad, yo' yan gajc, naga gad da xi'nan guiët.

⁵⁰ Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman. ⁵¹ La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

⁵² Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxé bariix xliaa.

⁵³ Dxel basaaladx bën guin guial hor ziin rëb Jesús lojman: "Ma bayajc xi'nl." Abi' laaman në gra bën zobj lidxaman bililadx reeman Jesús. ⁵⁴ Ni ne naj milagr barojp ni been Jesús niz Galilea chi bazaman niz Judea.

5

Bayüjn Jesús tijb bën ad rajct rza

¹ Chi gudëd gojc zian, guyu tijb xlanij ree bën Israel, abi' wej Jesús Jerusalén. ² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³ Yagaj riga' zien ree bënragxuu, zi'c ree bën lutia'p, në ree bencoj con ree bën ad rajctczi rza, cabëz reeman guiniib nijs yu' lën tanc guin. ⁴ Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiiban, rayajcaman xhietëz guialguijdxan rajcaman. ⁵ Dxel loj ree bën guin no'ch tijb bejn, ma gojc zi'ctiubichoon ijz ragxuuman. ⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rënl ya yayajquil?

⁷ Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸ Dxel rëb Jesús lojman:

—Bixche, baca' ni naal loj, baguiaj.

⁹ Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, ¹⁰ zianz bën Israel zinal ree ley rëb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹ Badxi' bën guinan rëbaman:

—Bën bayüjn naj naman: "Baca' ni naal loj, baguiaj."

¹² Dxel gunabdiidx reeman lojman rëb reeman:

—¿Chu na lojl: "Baca' ni naal loj, baguiaj"?

¹³ Per bën guin ad ragbeetaman chunin bayüjn laaman guial bi'ch Jesús loj ree benzin riga' yagaj. ¹⁴ Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

¹⁵ Dxel zia bën guin abi' biguiedxaman loj ree bën Israel guial Jesús naj bën bayüjn laaman. ¹⁶ Zeel guzunal reeman Jesús din gugüjt reeman laaman, guial rünman milagr guin ree dxej raziiladx bejn. ¹⁷ Per rëb Jesús loj reeman:

—Da Dadan Dios ad rbëzt rünman ni rayal güünman, zeel nëgajc naj rün zi'c rünman.

¹⁸ Zianan zeel mazri rejs guzuj reeman din gugüjt reeman laaman, ad guialzi rünntaman ni ad najt gac dxej raziiladx bejn, në guial rün laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rünman ni ruguiaaman rün xDadaman. Din graczi ni rünman rün gajc xi'nman. ²⁰ Din Dios rën xi'nman abi' rulüüman laaman gra ree ni rünman. Abi' mazri naj ni gulüü loj xi'nman ni yadxa da't lojdi. ²¹ Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bën rünman xgab. ²² Abi' ad Diost rün guialguxtis, bazuj xi'nman din güünman guialguxtis, ²³ din gap gra ree bejn xi'nman respejt zi'cgajc rajp reeman laaman respejt. Bën ad rajpt Xi'n Dios respejt, ad rajp gajctaman respejt xDadaman Dios, bën guxhaal laaman.

²⁴ 'Diidxliczi rnin: Bën ruzoob da diidxan rliladx tëëman Dios, bën guxhaal naj, laaman ma rajp guialnaban tiblyaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. ²⁵ Diidxliczi rnin ma bidxin hor, abi' yandxej gajcan, bën naj ree zi'c bengüt loj Dios gucaagdjaj reeman cha' xi'nman. Abi' ree bën guzoob xtiidxaman zajp reeman guialnaban tiblyaa con Dios. ²⁶ Din zi'c rajp Dios guialnaban, lasa'gajc guialnaban guin ma badëë loj xi'nman, ²⁷ abi' badëëman guialrniabee lojman din güünman guialguxtis, din laaman naj Bën guxhaal Dios loj guidxliuj. ²⁸ Ad bal radxa lojdi ni rnin, din zadxin dxej guien gra ree bengüt cha' Xi'n Dios, ²⁹ abi' yarii reeman lën baa. Dxel bën been ree ni ruladx Dios, yaban reeman, din gap reeman guialnaban tiblyaa con laaman. Guiaad ree bën been ni mal, yaban reeman din yayal reeman casti ni rayal reeman.

Ni rulüü guialrniabee rajp Jesús

³⁰ 'Achet zajc güün por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rën da Dadan bën guxhaal naj. ³¹ Bal gü da diidx gajcan, achet lasajcan. ³² Per yu' ben ren rü da diidxan, abi' ragbeechaawan guial diidxlin. ³³ Lëjt guxhaal bën bignabdiidx ree loj Waj, abi' laaman ganax ni diidxli gunaman. ³⁴ Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tëëdi perdon. ³⁵ Waj goc zi'cgajczi tijb bajl ni re'c abi' rusnin, guiaad lëjt dád babaadi bidxga'di tijb tiamp ni balüüman lëjt. ³⁶ Per naj mazri naj ni gulün lëjt guial loj ni balüü Waj lëjt por naj. Din ni na da Dadan Dios güün, laanan cayünan yan din guiguien guial diidxli laaman guxhaal naj. ³⁷ Në da Dadan bën guxhaal naj, laagajcaman be da diidxan, majsi ad waguiejntidi cha'man ad waguiaa tëëtidi laaman. ³⁸ Ad yu'guijc tëëtidi xtiidxaman zeel ad rliladxtidi bën guxhaalaman. ³⁹ Lëjt con cudad da't roolidi loj xtiidx Dios, guial ragbeedi con laan gapidi guialnaban tiblyaa con Dios. Abi' majsi loj xtiidx gajcaman ruza't naj, ⁴⁰ per ad rëntidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran. ⁴² Abi' ragbeechaawan guial ad walit rëndi Dios. ⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. ⁴⁴ ¿Xoza chililadxidi naj? Awa mazri naguiejn rünjdi guilies ree bejn xvaloridi luar yaya'ndi zagdxe loj bën naj tijbzi Dios. ⁴⁵ Ad bal naladxidi naj gabec xguialquiadi loj Dios, din bën cwe'c xguialquiadi naj Moisejs, bën rbëzidi güün lëjt yudar. ⁴⁶ Bal bililadxidi ni rëb Moisejs, në naj zaliladxidi, din Moisejs bacaa loj xtiidx Dios lod ruza't naj. ⁴⁷ Per bal id rliladxidi ni bacaaman, ¿xoza chililadxidi ni rnin lëjt?

6

Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

¹ Chi gudëd gojc zian, dxel zë Jesús stiblad ro'nijsdoo riga' niz Galilea, nijsdoo la gajc Tiberias. ² Bënguixuij binal laaman, guial ruguiaa reeman milagr ree ni rünman rayünman bënragxuu ree. ³ Dxel wë'paman tijb ruguia' abi' gurenë ree xbejnman. ⁴ Dxejzii ree ma

zidyob pascw, xlanij ree b́en Israel. ⁵ Chi gules loj Jesús, abi' baguiaaman zéed ree bénguixiuj lod za'man, dxel rébaman loj Felip:

—¿Ban yusii ree ni gaw gra ree b́en guin?

⁶ Per rébzaman zian din guidoon xhie guiéb Felip, din Jesús mal ragbeeman xhie güünman.

⁷ Dxel badxi' Felipan rébaman:

—Ni'qui ni rüjn bejn gan loj xhujn bëew ad zadaant yo' guidxtil din gaw tijbgaj reeman majsi t́blia'dogajzan.

⁸ Dxel gunee stijb xbejn Jesús, b́en la Andrejs bijch Simón Béd, rébaman:

⁹ —Laa tijb xindo ca' gaay guidxtil con zatio'p bëjl za' guie. Per, ¿tè'czi taan ni guin par gra b́en guin?

¹⁰ Dxel réb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw.

¹¹ Dxel cwa' Jesús guidxtil guin ree. Chi gulox badéeman quixtéé loj Dios, badéeman laa reen loj ree xbejnman persi gudi's reeman laa reen loj gra ree b́en zobj yagaj. Ziangajc beenman con ree bëjl guin, badéeman laa reen zi'ctzi guyèn reeman. ¹² Chi ma bixienladx reeman, dxel rébaman loj ree xbejnman:

—Gol bato'p gra ree ni laay baya'n, chitèé xhie guizéeb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guidxtil guin. ¹⁴ Chi baguiaa ree bejn milagr narooob ni been Jesús, réb reeman:

—Walican b́en guin naj b́en rudéé xtiidx Dios loj ree bejn, b́en naj gui't loj guidxliuj.

¹⁵ Per gogbee Jesús guial ŕen reeman chiné naguiejn reeman laaman din güün reeman laaman rey, dxel bazaman yagaj, wé'paman mazri ladya guijc guia' guin, lod su xtijbaman.

Rza Jesús lonijsdo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdo, ¹⁷ guyu reeman loj tijb barcw, abi' cadéd reeman loj nijs guin din guidxin reeman Capernaum. Ma bicajy, guiaad Jesús gadaman yadxin. ¹⁸ Dxel guzuloj cabi' bidoxh abi' wajs xtüj nijs guin. ¹⁹ Chi ma gojc zi'c gaay o xho'p kilometro zé reeman, baguiaa reeman caza Jesús lojnijs guin cabigaman lod zé barcw guin, dád bidxeb reeman. ²⁰ Per rébaman loj reeman:

—¡Najn, ad rdxebidi!

²¹ Dxel guyèn reeman niuman loj barcw guin, per hor guin gajc bidxin reeman lod zé reeman.

Bigdüil ree b́en bayaan Jesús laaman

²² Chi bareguiaal, b́en riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zé ree xbejn Jesús per ad nèt laaman. ²³ Loj hor zii bidxin ree barcw ren za guiedx Tiberias, gajxh lod gudaw reeman guidxtil chi gulox badéed Jesús quixtéé loj Dios. ²⁴ Chi baguiaa reeman achutri Jesús za' yagaj ni'qui ree xbejnman, dxel wé'p reeman loj ree barcw guin, zé reeman Capernaum zigdüil reeman laaman.

Jesús naj b́en rudéed guialnaban

²⁵ Chi bidxin reeman Capernaum, badxeyl reeman Jesús, abi' gunabdiidx reeman lojman, réb reeman:

—Mextr, ¿goc bi'til guie?

²⁶ Badxi' Jesúsán rébaman:

—Ragbeechaawan, raguilidi naj guial gudawidi xt bigdxinladxidi, ad guial baguiaatidi milagr ree ni ŕunan. ²⁷ Ad chu'di xgab guialraw rara, gol guyu xgab guialraw runee guialnaban t́blayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman réb reeman:

—¿Xhie rayal yaguieenan din chile' yaguieenan ni ŕen Dios?

²⁹ Badxi' Jesús laan rébaman:

—Ni ŕen Dios güündi naj guial chililadxidi b́en guxhaalaman loj guidxliuj.

³⁰ Dxel réb reeman lojman:

—¿Xhie gulüül dunujn din yaliduladxan lüj? ¿Xhietéé ree milagr ŕujnl? ³¹ Dux béngulal ree gudaw reeman mana chi guzu reeman niz loj yujbidx, zi'c réb loj xtiidx Dios: “Badéeman guidxtil biajb xanyabaa loj reeman gudaw reeman.”

³² Badxi' Jesús laan rébaman:

—Naj rni lojdi: Ad Moisejst badéed guidxtil guin, da Dadan naj b́en runee quijb guidxtil za xanyabaa. ³³ Guidxtil runee Dios, laan bi't diidx xanyabaa abi' runeen guialnaban loj bénguidxliuj.

³⁴ Abi' rëb reeman lojman:

—Dad, baneë guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runeë gualnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs. ³⁶ Per zi'c rnin lojdi, majsi ma baguiaadi naj, ad rliadxtidi naj. ³⁷ Gra ree bén ma baneë da Dadan lon, gui't reeman lon, abi' bén gui't lon, ad zasiejctan laaman. ³⁸ Din naj zial diidz xanyabaa, zidgaguienan zi'c rën da Dadan bén guxhaal naj, ad par güntan zi'c rënan. ³⁹ Da Dadan bén guxhaal naj, ni rënman naj guial gra ree bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj. ⁴⁰ Din rënman guial gra ree bén yayagbee Xi'nman chililadx tëë reeman laaman, gap reeman gualnaban tiblyaaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree bén Israel caneeguidx reeman Jesús, guial rëbaman: “Naj naj guiadxtil ni biguiajt diidz xanyabaa.” ⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

⁴³ Dxel rëb Jesús:

—Gol bacwëëz rnieeguidxidi naj loj lasa'di. ⁴⁴ Dios naj bén guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj. ⁴⁵ Loj ree libr ni bacaa ree bén badëë xtiidx Dios loj ree bejn, rëb: “Dios guluü gra ree bejn.” Zeel gra ree bén rucaagdiajg xtiidxaman, rusiid tëë reeman ni ruluüman laa reeman, laa reeman zëëd lon.

⁴⁶ 'Achutczí waguiaa da Dadan Dios, tijbzi bén guxhaalaman loj guidxliuj ma baguiaa laaman. ⁴⁷ Diidxliczi rnin, bén rliadx naj rajpaman gualnaban tiblyaaa con Dios. ⁴⁸ Naj naj guiadxtil ni runeë gualnaban. ⁴⁹ Xbéngulalidi gudaw mana loj yujbidx, per ni'czi zian güjt gajc reeman. ⁵⁰ Per naj canin lojdi xcwent guiadxtil za xanyabaa, bén gaw laan gapaman gualnaban tiblyaaa con Dios. ⁵¹ Naj naj guiadxtil naban ni biyajb diidz xanyabaa. Bén gaw guiadxtil guie zajpaman gualnaban tiblyaaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj gualnaban.

⁵² Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejnman, ad zajptidi gualnaban. ⁵⁴ Per bén gaw da cuerpan guië' tëëman da rejnman, zajpaman gualnaban tiblyaaa con Dios, abi' naj yasban laaman chi nit guidxliuj. ⁵⁵ Din da cuerpan naj quijb gualraw, guiáad da rejnman naj quijb ni guië' bejn. ⁵⁶ Abi' bén raw da cuerpan rë' tëëman da rejnman, laaman nabannë naj, guiáad naj nabannë' laaman. ⁵⁷ Da Dadan bén guxhaal naj, rajpaman gualnaban, abi' naj nabanman por laaman. Ziangajc bén gaw da cuerpan, zajpaman gualnaban tiblyaaa con Dios por naj. ⁵⁸ Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guiadxtil guie zajpaman gualnaban tiblyaaa con Dios.

⁵⁹ Zian balüü Jesús bejn ree lën yadoo Capernaum.

Diidx runeë gualnaban tiblyaaa

⁶⁰ Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? ⁶² ¿Xhieza güündi bal guguaadi Bén guxhaal Dios yayë'paman lod guzuman gocli? ⁶³ Tijbzi por xSprijt Dios rajp bejn gualnaban tiblyaaa, bejn ad zile't güün laazaman xhienin. Abi' naj por xSprijt Dios zëëd ree diidx ni gunen lojdi, por ree diidx guin rajp bejn gualnaban. ⁶⁴ Per lëjt yu'di ad waliladxt.

Rëb Jesús zian guial ragbeechaawaman diidz yaloj chu ree ad rliadxt laaman chu tëë yayü laaman. ⁶⁵ Rëb tëëman loj reeman:

—Zeel ma rnin lojdi guial achut zile' gui't lon bal id zëëdaman por da Dadan Dios.

⁶⁶ Diidz nadxel, zien ree bén zinal Jesús guro'nladx laaman, abi' ad guzanëtri reeman laaman. ⁶⁷ Dxel rëb Jesús loj guidxiptio'p ree xbejnman:

—¿Në lëjt rën yaguiaj ya?

⁶⁸ Per badxi' Simón Béd laan, rëbaman:

—Dad, ¿chu loj yo'n? Awa xtiidxil zidnë gualnaban tiblyaaa con Dios. ⁶⁹ Dunujn ma baliduladx rayagbee tëën guial lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj bën bayü laaman, majsi tijb gajc xbejnman najman.

7

Ad riladxt ree bijch Jesús laaman

¹ Chi gudëd gojc zian, wej Jesús loj ree guiedx riga' niz Galilea. Ad güyëntaman niejman niz Judea, guial cayguuil ree bën Judea guin laaman din gugüjt reeman laaman. ² Per guial ma zidyob lanij ni rüjn ree bën Israel, chi rbej reeman lën ranch, ³ rëb ree bijch Jesús lojman:

—Brii, wej niz Judea, din në ree xbejn bën riga' ree niz ni guguaa milagr rüjn. ⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjn milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad riladxt laaman. ⁶ Dxel rëb Jesús loj reeman:

—Ad wadxint da horan, per par lëjt xhietëez horan naj zagdx. ⁷ Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman.

⁸ Gol wej lanij guin, sa'n naj ad zazaagajtan, din ad wadxint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bën Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee.

¹¹ Per yu' ree bën Israel raguuil laaman loj lanij guin, rëb reeman:

—¿Con bën guin ya'n?

¹² Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutzci ruza't laaman loj gra bejn, guial rdxebe reeman guxtis Israel ree.

¹⁴ Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. ¹⁵ Guiáad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiiditx?

¹⁶⁻¹⁷ Dxel rëb Jesús loj reeman:

—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya. ¹⁸ Bën rulüü ganaxzi ni rbëëgujicaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

¹⁹ Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰ Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

²¹ Abi' rëb Jesús loj reeman:

—Por tijbzi milagr ni benan radxalojdi. ²² Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gual ree zian), abi' lëjt rgu'di bejn ree sen, majsi dxej raziiladx bejn. ²³ Yan, bal chitëe gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn? ²⁴ Ad rüjndi xgabmal por ni ruguaazidi rüjn bejn, yaloj xgaj gol gogbee zagdx xhie caytünman.

Rëb Jesús ban zaman

²⁵ Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguuil reeman ya din gugüjt reeman laaman? ²⁶ Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? ²⁷ Per dunuj ree rayagbeecheaaw ban zaman, guiáad chi gui't Cristo, achut gagbee ban saman.

²⁸ Chi bigueijn Jesús zian, la'tgaj culüüman bejn ree lën yadooro' Jerusalén, dxel gunee-man rejs rëbaman:

—¿Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. ²⁹ Per naj nünbee laaman guial zialan diidz lod za'man, laa téëman guxhaal naj.

³⁰ Chi bigueijn reeman zian, guyën reeman niniaaz reeman laaman, per achut gunaaaz laaman, guial gad hor gal guiniaazaman. ³¹ Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³² Biguiejn ree bñfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bñ rajp ree ro' yadooro' Jerusalén din guiniaaz reeman Jesús. ³³ Dxel rëb Jesús:

— Ad xchejtri gazunë'n lëjt, dxel yaya'n lod za' bñ guxhaal naj. ³⁴ Yaguilidi naj, per ad zadxejltdi naj, din ad zile't gui'tidi lod gazun.

³⁵ Abi' ree bñ Israel guin guzuloj rniabdiidx loj lasa' reeman, rëb reeman:

— ¿Banczi zajc che bñ guin din ad zadxejltaman? ¿Ni zejman lod zojb ree bñ Israel loj ree benzit ya, chiglüüman laa reeman nê ree bñ ad najt bñ Israel? ³⁶ ¿Xhie rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷ Dxejrliox lanij guin naj mazri dxej zojbloj, dxejzii guzuli Jesús guneeman rejs, rëbaman: — Bal chu lëjt re'c nijs, gol guda lon din guië'dan. ³⁸ Din bñ rliadx naj zi'c ca loj xtiidx Dios, lën luxdooman gach nijs runee guialnaban.

³⁹ Chi guneë Jesús zian, rën guiëb xtiidxaman guial gra ree bñ chilladx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰ Yu' ree bñ no'ch loj ree benzien guin, chi bacaagdiajg reeman ni guneë Jesús, rëb reeman:

— Walican, bñ guin naj gui't guidgadëë xtiidx Dios loj ree bejn.

⁴¹ Yu'za reeman rëb:

— Bñ guin naj bñ bacaabee Dios.

Per yu' reeman rëb:

— Ad laataman naj Cristo, din ad niz Galileat naj griiman. ⁴² Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³ Zian gojc dxel gula' lasa' reeman por Jesús. ⁴⁴ Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

⁴⁵ Chi bayejc ree bñ rajp ro' yadoo guin lod za' ree bñfarisew guin con ree bixhioz rniabee guin. Rëb reeman loj reeman:

— ¿Chexc zeel ad bidnëtdi laax?

⁴⁶ Dxel rëb ree bñ rajp ro' yadoo guin:

— ¡Ad goct wayu bñ guinieë zi'c rnieex!

⁴⁷ Abi' rëb ree bñfarisew guin:

— ¿Në lëjt ma cwëjb basquieex lëjt ya? ⁴⁸ ¿Wen yu' ree dux guxtis ree, o bñfarisew ree ma bililadx laax ya? ⁴⁹ ¿Nid ragbeedi ya guial zien ree bñ guin banijt loj Dios guial ad nünbeet reeman ley?

⁵⁰ Per bñfarisew la Nicodemo bñ bignaj Jesús tijb guxhin, rëbaman loj reeman:

⁵¹ — Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' ley yayagbee ree xhie beenman.

⁵² Badxi' reeman laan rëb reeman:

— ¿Wen në lüj za'në ree bñ Galilea ya? Basiid zagdxe loj xtiidx Dios din gagbeel ad goct warii bñ rudëë xtiidx Dios loj ree bejn niz Galilea.

⁵³ Dxel bare'ch reeman zia lidx lidx reeman.

8*Béngunaa banaaznë xinguaaw ren*

¹ Per Jesús zëman ruguia' Olivos. ² Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman. ³ Abi' mextr rulüü ree ley con ree bñfarisew bidxinnë tijb béngunaa banaaznë tijb xinguaaw, dxel bazuj reeman laaman galay ree bñ guin, ⁴ zianz rëb reeman loj Jesús:

— Mextr, banaaz béngunaa guie loj mer hor ni yu'nëman xinguaaw ren. ⁵ Abi' loj ley basa'nnë Moisejs dunuj ree ca guial lasa' béngunaa guie rayal guië'taman con guiaj. ¿Laadx lüj xhie nal?

⁶ Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman. ⁷ Per guial laa reeman canabdiidxzi canabdiidx reeman lojman, abi' babejlman, rëbaman loj reeman:

— Chutéëz bñ ad wayüjnt dol, yaloj laaman gucaaguaajg béngunaa guie.

⁸ Dxel basajb lojman stijb, basnuu bacaaman luyuj guin. ⁹ Chi biguiejn reeman ni guneeman, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree bén riga' yagaj. ¹⁰ Dxel babejlman, rébaman loj béngunaa guin:

—¿Con ree bén bidné lüj? ¿Ni'qui tijb reeman achut xhie been lüj ya?

¹¹ Dxel réb béngunaa guin:

—Dad, ni'qui tijbaman.

Abi' réb Jesús:

—Ni'qui naj achet günan lüj. Baguiyaj yan, ad güünril dol.

Jesús naj bajl par bénguidxliuj

¹² Dxel guneé Jesús stijb, rébaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiarguiejnman xhienaag gapaman guialnaban tiblyaa con Dios, ad yu' tées dxej guicajy xquiarguiejnman.

¹³ Abi' ree bénfarisew réb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel réb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tées gan, sa'n léjt ad ragbeetidi ban zialan ban tées gan. ¹⁵ Léjt rnieedi bejn zi'tctizi naj xixgabidi, sa'n naj achut ruzatan. ¹⁶ Abi' bal guzatan bejn, ganen diidxli, din ad zanetan zi'c naj da xgaban, né da Dadan bén guxhaal naj ragbee guial diidxli naj ni ganen. ¹⁷ Abi' loj xleydi ca guial chi yu' tio'p bén rniee tiblojzi, diidxliqui naj ni rniee reeman. ¹⁸ Yan, naj gajc naj tijb bén rniee por naj, abi' da Dadan bén guxhaal naj, naj stijb bén rniee por naj.

¹⁹ Gunabdiidx reeman lojman réb reeman:

—¿Con xdadil?

Badxi'man laan rébaman:

—Léjt ad nünbeetidi naj, ad nünbee téesidi da Dadan, din bal nünbeedi naj, ziangajc nünbeedi da Dadan.

²⁰ Zian guneé Jesús la'tgaj ruluüman bejn ree lén yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

²¹ Guneé Jesús stijb, rébaman:

—Chi ma gan, zaguiilidi naj, per zéjtné xtolidi, din lod gan ad zile't gui'tidi.

²² Dxel réb ree bén Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³ Abi' réb Jesús loj reeman:

—Léjt naj bén ladguiajt guie, sa'n naj ladya ni zialan. Léjt naj bénguidxliuj, sa'n naj ad bénguidxliujt naj. ²⁴ Zeel rnin, zéjtné xtolidi. Din bal id zaliladxidi guial naj naj bén najn, zéjtné xtolidi.

²⁵ Dxel gunabdiidx reeman lojman, réb reeman:

—¿Chuja lüj?

Badxi'man laan rébaman:

—Ma rnin lojdi diizd yaloj. ²⁶ Zien ni ra'pan gulün léjt ni ganenè' tées léjt. Per naj, ni canen loj bénguidxliuj naj ni rucagdiagan rniee bén guxhaal naj, abi' ni rnieeman naj diidxli.

²⁷ Per laa reeman ad gogbeet guial Diosan ruza'taman. ²⁸ Zeel rébaman loj reeman:

—Chi ma beendi zi'tctizi réndi con Bén guxhaal Dios, dxej gagbeedi najcan, gagbee téesdi guial achetctzi rünan por da xgabzan, naj rniee ni ma balüü da Dadan naj. ²⁹ Din laaman guxhaal naj, laaman za' con naj, abi' ad yu't dxej cwééladxaman naj, guial zianctzi rünan ni rayuladxaman.

³⁰ Chi réb Jesús zian, zien ree bejn bililadx laaman.

Bén wali naj xbejn Dios

³¹ Réb Jesús loj ree bén Israel bililadx laaman:

—Bal gusnuu guzoobidi da diidxan, waliqui najdi da bejnan, ³² abi' zünbeedi conin naj diidxli, abi' por diidxli guin zalaadi.

³³ Badxi' reeman laan réb reeman:

—Dunujn zio'p loj xdiaa Abraham, abi' ad yu't dxej wayajcan zi'c bén nado'. ¿Chexquiza zeel nal du lojn, guial por diidxli zalaan?

³⁴ Dxel rébaman loj reeman:

—Diidxli rnin lojdi, guial graczi bén rüjn ganaxzi dol, laa reeman naj zi'c bén nado' loj dol. ³⁵ Abi' tijb bén nado' loj bejn, ad zile't guiébaman xfamilaman naj xpatronman, sa'n

xi'n patron guin zile' guiëbix xfamilixan. ³⁶ Zeel bal Xi'nman guslaa lëjt, ad najtridi zi'c bën nado'. ³⁷ Ma qui ragbeen guial loj xdiaa Abraham zëëdidi, per lëjt rën gugÿjt naj guial ad rayuladxtidi da diidxan. ³⁸ Naj rni ni ma balüü da Dadan naj, sa'n lëjt rÿjndi zi'c na xDadidi güündi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal najquidi xi'n Abraham, zÿjndi zi'c beenman. ⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugÿjtidi naj. ¡Abi' Abraham ad yu't dxej nÿjnman zian! ⁴¹ Sa'n lëjt rÿjndi zi'cgajc rÿjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. ⁴³ Abi' ad rignia'tidi ni rnin, guial ad rëntidi gucaagdiajguidi da diidxan. ⁴⁴ XDadidi naj xinxxab, abi' rÿjndi zi'c rënx güündi, din diizd yaloj ruladx xinxxab guin gugÿjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad guialrusquiee. ⁴⁵ Per guial naj rni lëjt ganax diidxli, ad riladxtidi naj. ⁴⁶ ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad riladxtidi naj? ⁴⁷ Bën naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rëb ree bën Israel guin loj Jesús:

—Waliqui ni ranan guial xinxxab yu' luxdool naj tëël bën Samaria.

⁴⁹ Badxi'man laan rëbaman:

—Achut xinxxab yu' luxdon, naj cuzob xtiidx da Dadan, per lëjt ganax diidxguijdx rnieedi naj. ⁵⁰ Naj ad raguiltan guilies ree bejn da valoran, majsi yu' bën rën güün bejn zian, abi' laaman rÿjn xguialguxtis. ⁵¹ Diidxli rnin lëjt, bën guzoob da diidxan, ad yu't dxej guiëtaman.

⁵² Dxel rëb ree bën Israel guin lojman:

—Yanri ma rayagbeechaawan guial xinxxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lÿj nal: “Bën guzoob da diidxan, ad yu't dxej guiëtaman.” ⁵³ ¿Wen mazri lasajquil ya guial loj dux bëngulal ree Abraham? Güjtaman, güjt tëë ree bën badëë xtiidx Dios loj ree bejn. ¿Laadx lÿj chu naladxil naj?

⁵⁴ Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi. ⁵⁵ Lëjt ad nÿnbeetidi laaman, sa'n naj nÿnbeen laaman. Abi' bal ganin ad nÿnbeetan laaman, nëgajc naj ma naj bën rusquiee zi'cgajc lëjt. Per nÿnbeen laaman abi' ruzoban xtiidxaman. ⁵⁶ Xbëngulalidi Abraham, babaaman guial guguiaaman dxej ni guialan. Abi' chi baguiaaman dxej guin, mazri babaaman.

⁵⁷ Dxel rëb ree bën Israel guin lojman:

—Ni'qui gadil chu' tü'pchiü ijal, ¿guiáad lÿj ya nal baguiaal Abraham?

⁵⁸ Abi' gunee Jesús rëbaman:

—Diidxli rnin lojdi, mal nabanani chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

9

Rayÿjn Jesús tijb xin ad ranit loj

¹ Chi cadëd Jesús tiblajt, baguiaaman tijb xin ad ranit loj diizd chi golix. ² Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman? ¿Por xtol ree xDadaman ya, o por xtol gajcaman?

³ Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguiaa ree bejn xguialrniabee naroob Dios. ⁴ Yan, la'tgaj yu' tiamp, rÿjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. ⁵ Abi' la'tgaj za'n loj guidxliuj guie, naj naj bajl rusni bënguidxliuj.

⁶ Chi gulox guneeaman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. ⁷ Abi' rëbaman lojcx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. ⁸Dxel bén zobj ree gajxh lod zobjix con ree bén ragbee guial laax rniab carda, rëb reeman:

—¿Nid xin guinan rbej rniab carda ya?

⁹Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹Badxi'xan, rëbix:

—Bén la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.”
Dxel wan, chi gulox gudiib lon, max bani lon.

¹²Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bénfarisew loj xin guin xhienaag guzuloj rani lojx

¹³Loj hor zii binë reeman xin bayajc guiaaloy guin loj ree bénfarisew, ¹⁴din dxej been Jesús bajn persi bayüjnman guiaaloy xin guin, dxej guin raziiladx ree bejn. ¹⁵Dxel gunabdiidx ree bénfarisew guin lojx xhienaag guzuloy rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶Yu' ree bénfarisew guin rëb:

—Bén bayüjn guiaaloy ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman béndol?

Garent garen rëb reeman. ¹⁷Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bén bayüjn guiaaloyl?

Badxi'xan rëbix:

—Naj rni guial laaman naj bén rudëë xtiidx Dios loj ree bejn.

¹⁸Per bén Israel guin ree ad rliladxt reeman, din ad banit lojx abi' yan ma ranin, dxel gurejdx reeman xdadix con xniaax, ¹⁹abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlix? Yan, ¿xhienaag gojc zeel ma ruguiaax?

²⁰Badxi' reeman laan rëb reeman:

—Dunuyn rayagbee guial du xi'nanan, rayagbee tëen guial diizd chi golix ad ranit lojx.

²¹Per ad rayagbeetan xhienaag gojc zeel rani lojx, ad rayagbee tëetan chu bayüjn guiaaloy. Gol gunabdiidx lojx, ma najx xingol, ma zajc na laagajquix lojdi xhienaag gojc.

²²Rëb ree xdadix zian guial rdxeb reeman xguxtis ree bén Israel, din ma baya'n reeman diidx, chutëëz bén guiëb guial Jesús naj Cristo, ad zatiëjbtri reeman chu'man lën yadoo.

²³Zianan zeel rëb reeman: “Gol gunabdiidx lojx, ma najx xingol.”

²⁴Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunuyn rayagbee guial béndol naj bén bayüjn lüj.

²⁵Badxi'xan rëbix:

—Ad ragbeetan bal béndolan o ad béndoltan ya. Tijbzi ni ragbeen naj guial ad banit lon, abi' yan ma ruguian.

²⁶Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷Badxi'xan rëbix:

—Ma rnin lojdi, abi' lëjt ad rliladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸Dxel gudilé reeman laax rëb reeman:

—Lüj bal najl xbejnman, sa'n dunuyn xbejn Moisejs nayajcan. ²⁹Din dunuyn rayagbee Dios guneë Moisejs, per bén guin ni'quid rayagbeetan ban zaman.

³⁰Badxi'xan rëbix:

—¿Xhiechalnin zeel ad ragbeetidi ban zaman! Guíaad naj por laaman ma rani lon. ³¹Dunuyn ree rayagbeechaaw guial ad ridxga't Dios xtiidx ree béndol, ridxga'man xtiidx ree bén ruzoob xtiidxaman rüjn tëë reeman zi'c rënman. ³²Ad goct wacaagdiagj ree guial chu' bén

yayüjn loj bén ad ranit loj diizd gojlaman. ³³ Yan, bal id por Dios zëed bén guin, achetctzi nile' nünman.

³⁴ Dxel rëb reeman lojx:

—Lùj gojl con dol, ¿wed lùj gulüü dunujn?

Abi' babëë reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bén guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj bén caneenël.

³⁸ Abi' bazuxib xin guin lojman, rëbix:

—Rliladxan lùj, Dad.

³⁹ Zianz rëb Jesús:

—Bialan loj guidxliuj guie din gūnan guialguxtis, din por naj yani loj ree bén ad ranit loj, guiaád ree bén rani loj, ad zanit loj reeman.

⁴⁰ Yu' ree bénfarisew za'nè laaman. Chi bigujejn reeman rëbaman zian, rëb reeman:

—¿Wen nè dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tëë Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj bégubaaan. ² Per bén ru niz ro' xgurajl reeb, laaman naj bén rniaj laa reeb. ³ Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. ⁴ Abi' chi ma bñi gra reeb, dxel rniedaman loj reeb, guiaád laa reeb rnal laaman, guial nünbee reeb cha'man. ⁵ Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

⁶ Chí gulox gunee Jesús zian, ad bignia't ree bén riga' yagaj xhie rën guiëb ni guneeaman.

Jesús naj zi'c bén rniaj xiil ree zagdxe

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸ Gra ree bén bi't chi gad naj guial naj reeman zi'c bégubaaan, rban reeman rusagzi tëë reeman. Per ree bén naj da bejnan ad bidxga't reeman laa reeman. ⁹ Naj naj ro' port, abi' bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

¹⁰ 'Béngubaaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan. ¹¹ Naj naj zi'c tijb bén rniaj xiil ree zagdxe. Abi' bén rniaj xiil ree zagdxe xt xguialnabanman rudëëman por laa reeb. ¹² Per bén rniaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman nè guial ad najtaman bén rniaj ree xiil, dxel rniaaz cuyojt guin laa reeb abi' rtie'chib laa reeb. ¹³ Laaman rbëëladx laa reeb, din por miliazi rniajman laa reeb abi' achet naladxaman por laa reeb.

¹⁴⁻¹⁵ 'Naj naj zi'c bén rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiaád laa reeb nünbee naj. Abi' xt da guialnabanman gudëdan por laa reeb. ¹⁶ Ra'p tëën stibcwaa ree xiil ad yu't lën gurajl guie. Nè laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb. ¹⁸ Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan nè par yabanan stijb, din laan naj guialrniabee ni baneë da Dadan lon.

¹⁹ Chi bigujejn ree bén Israel guin ni rëbaman, gojc reeman tio'p lala' stijb. ²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tëë guijcaman.

²¹ Per yu' reeman rëb:

—Ni'qui tijb bén yu' xindxab luxdoo ad rnieet zian. ¿Wen zajc yaxhal xindxab guiaaloj ree bén ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayŷjn ree b n Israel lanij ni r jn reeman gazobijz par yadooro' Jerusal n. ²³ Wej Jes s l n yadoo guin. Chi cazaman niz ro' curdur ni rn ee reeman xcurdur Salom n. ²⁴ Dxel biyaw ree b n Israel laaman, r b reeman lojman:

—  Xt goc naga' loj cu' naw eguil dunujn? Guna du lojn bal l j naj Cristo.

²⁵ Badxi' Jesuan r baman:

—Ma rnin lojdi, per l jt ad rliadxtidi naj. Abi' ree ni r nan con xguialrniabee da Dadan Dios, laa reen rult u chu najn. ²⁶ Per ad rliadxtidi, guial ad najtidi da bejnan. ²⁷ B n naj ree da bejnan, n nbee reeman cha'n, gui ad naj n nbeen laa reeman, abi' laa reeman rzanal naj. ²⁸ Naj rud  guialnaban tiblayaa loj reeman, ad yu't dxej nit reeman. Abi' achut zajc chiquied laa reeman lon. ²⁹ Din da Dadan, b n banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. ³⁰ Da Dadan con naj, nayajcan tijbzi.

³¹ Dxel cwa' ree b n Israel guin guiaj din gucaaguaiaj reeman Jes s. ³² Per r baman loj reeman:

—Por xguialrniabee da Dadan, zien ni zagdxe ma benan niz lojdi.  Con pornin gucaaguaiajdi naj?

³³ Badxi' reeman laan r b reeman:

—Ad por ree ni zagdxe ni beentilan yacaaguaiajn l j, yacaaguaiajn l j guial ad rajptil Dios respejt, din b nguidxliujzi l j, abi' r jn l j gajc zi'c Dios.

³⁴ Dxel r b Jes s:

—Loj xleydi r b: “Naj rni guial l jt naj dios.” ³⁵ Dunuj ree rayagbee guial ad ni rusquieet naj ni ca loj xtiidx Dios. Abi' laaman gul elaj dios b n basa'nn  ree xtiidxaman, b n gojp ree guialrniabee loj ree b n Israel. ³⁶ Yan, bal da Dadan Dios gul eca naj persi guxhaalaman naj loj guidxliuj,  chexquiza zeel nadi ad ra'ptan laaman respejt guial rnin, xi'nman naj? ³⁷ Bal id cay nan zi'c na da Dadan, ad chililadxidi naj. ³⁸ Per bal cay nan zi'c naman, majsi ad zaliladxtidi naj, per gol bililadx guial por laaman z ed ni r nan din gagbeedi guial da Dadan za'n  naj, gui ad naj za'n 'n laaman.

³⁹ Dxel guy n reeman niniaaz reeman Jes s, per gulaaman loj reeman.

⁴⁰ Abi' z man zatiblad ro' guiiw Jord n, lod baroobnijs Waj bejn ree yalaj, yagaj baya'nman. ⁴¹ Abi' zien ree b n bidxin yagaj r b:

—Walin, majsi achet milagr been Waj, per gra ni guneeman xcwent b n guie naj diidxli.

⁴² D d zien reeman bililadx Jes s yagaj.

11

G jt Lazr

¹ Guyu tijb b nragxuu, brii lajman Lazr. Laaman con re bizanman Li con Mart, naj ladx reeman Betania. ² Abi' Li bizan Lazr, laam baroob perfum guia' Jes s abi' bacwiidximin con guidxguijquim. ³ Dxel grop b l reem guxhaal ruson loj Jes s, r b reem:

—Dad, ragxuu xmiwil Lazr.

⁴ Chi biguiejn Jes s zian, r baman:

—Guialguijdx guin ad z edtan par gug jtan, z edan din gac guguaia bejn xguialrniabee Dios n  par guguaia reeman xguialrniabee Xi'n Dios.

⁵ Majsi r n da't Jes s Mart con Li n  Lazr, ⁶ per chi cwa'man ruson ragxuu Lazr, sta goglaaman zatio'p dxej lod za'man. ⁷ Dxel r baman loj ree xbejnman:

—Yo' ree niz Judea zatijb.

⁸ Abi' r b reeman lojman:

—Mextr, ad wayajct xchej guy n ree b n zojb niz ni nucaaguaiaj reeman l j.  Abi' chel ni zatijb ya?

⁹ Dxel r b Jes s:

—L jt ragbee guial chiptio'p hor yu' tibdxej. Abi' b n rza radxe, achet rirejl guia'man, din yu' bajl rusni loj guidxliuj guie. ¹⁰ Per b n rza guxhin, yu' ni rirejl guia'man, din achet bajl guin rajpaman.

¹¹ R b t e Jes s loj reeman:

—Ma naga'y js dux miw ree Lazr, per chicw enan laax.

¹² Dxel r b ree xbejnman:

—Dad, bal naay jsix, r n gui ban yayajquix.

¹³ Per ni r b Jes s r n gui ban guial ma g jt Lazr, gui ad ree xbejnman gunaladx reeman r baman naga'y jsizix. ¹⁴ Dxel bagojn Jes s laa reeman, r baman:

—Ma g jt Lazr. ¹⁵ Rabaan por l jt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, b n rn ee reeman cwajch, r baman loj los demazri xbejn Jes s:

—Yo' ree yunè' reeman, din lod guiètaman, yayëjtnè' reeman.

Jesús naj Bén rusban bejn runee tëëman guialnaban

¹⁷ Chi bidxin Jesús Betania, ma gojc tajp dxej biguie'ch Lazr. ¹⁸ Betania guin raya'nan gajxh Jerusalén, zi'ct choon kilometro. ¹⁹ Abi' zien ree Bén Israel bignaj Mart con Li din yagu' reeman luxdoo reem guial güjt bizan reem. ²⁰ Chi gogbee Mart ma zëéd Jesús gajxh, briim bigchaaglojm laaman, guiáad Li baya'nm lëü. ²¹ Dxel rëb Mart loj Jesús:

—Dad, bal nizujl guie, ad ziant niëjt da zanan. ²² Per naj ragbee guial ni'qui yan zunee Dios ni guiniabil lojman.

²³ Dxel rëb Jesús:

—Naj rni yaban bizanl.

²⁴ Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialgux-tis Dios.

²⁵ Abi' rëb Jesús:

—Naj naj Bén rusban ree bengüt rudë tëën guialnaban loj ree bejn. Bén chililadx naj, majsi guiètaman, per zajpaman guialnaban loj Dios. ²⁶ Guiáad gra Bén naban rililadx tëë naj, zajpaman guialnaban loj Dios. ¿Rililadxil ni canin lüj ya?

²⁷ Dxel rëbim lojman:

—Rililadxanan Dad. Rililadxan lüj naj Cristo, Xi'n Dios, Bén naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm Jesús. ³⁰ Abi' Jesús gadzaman chu' luguiedx guin, sta za'man lod bigchaagloj Mart laaman. ³¹ Guiáad ree Bén Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaann.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguiaaman roon Li con ree Bén Israel nal laam, dád gognaa luxdoo man guyu naya tëëman. ³⁴ Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

³⁵ Dxel biinman. ³⁶ Abi' rëb ree Bén Israel guin:

—Gol baguiaa nial dád guyënman laax.

³⁷ Per yu' reeman rëb:

—Bén guinan baxhal guiaaloj tijb Bén ad ranit loj. Yan, ¿niche niajc nüjnman ya'n chitëë niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. ³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesúsán rëbaman:

—¿Nid rnin ya, bal rililadxil, guguaal xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin. ⁴² Naj ragbeechaaw guial zianczi rucaagdiajguil ni rnin. Per rnin zian por ree Bén riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—¡Lazr, barii yagaj!

⁴⁴ Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree Bén binal Li bililadx Jesús, guial baguiaa reeman milagr beenman. ⁴⁶ Per yu' reeman bicojn Bénfarisew ree ni been Jesús. ⁴⁷ Dxel Bénfarisew ree nè ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaaq yaguieen ree ya'n, din dád zien milagr cayüjn xin guin? ⁴⁸ Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

⁴⁹ Per loj reeman yu' bën la Caifás, bixhioz zobjloj rniabee loj ijszii, rëbaman loj reeman: —¿Nid ragbeedi ya, ⁵⁰ nid rignia' tëedi ya, zagdxë naj guiët tijbzi bejn por gra bën Israel, luar nit dux nacion ree?

⁵¹ Per Caifás guin ad ni naladxtzaman rëbaman. Guial najman bixhioz zobjloj rniabee loj ijszii, zeel badëed Dios ni guneeman, guial guiët Jesús por gra ree bën Israel. ⁵² Abi' ad por laatzii reeman, par gac reeman tijbzi con gra ree xbejn Dios, bën riga' ree guidib guidxliuj. ⁵³ Zeel diidz dxejzii baya'n reeman diidx gugüjt reeman Jesús.

⁵⁴ Zianan zeel ad contzi rulüülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

⁵⁵ Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. ⁵⁶ Dxel raguiil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

⁵⁷ Bénfarisew ree con ree bixhioz rniabee, gunabee reeman bal chutëez bën ragbee ban za' Jesús, gugojnman din chile' guiniaaz reeman laaman.

12

Baroob Li perfum guia' Jesús

(Mt. 26:6-13; Mr. 14:3-9)

¹ Za xho'p dxej riaadx gal pascw, chi we Jesús Betania, lod zobj Lazr, xin basbanman. ² Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. ³ Dxel cwa' Li cost garol lijtr perfum ni lasaj wayëjx, najcchaawnën ganax nardo, baroobimin guia' Jesús abi' bacwiidxnë guidxgüijquimin. Guidibzi lënu guin baree nejxh. ⁴ Dxel Judas Iscariote, xin naj tijb ree xbejn Jesús, xin bayü laaman, rëbix:

⁵ —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnman yudar bënprob ree.

⁶ Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milla, rbanx ni rudëe reeman rgu'chaawix. ⁷ Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan.

⁸ Din bënprob guin ree zianczi za'në reeman lëjt, per naj ad ziantczi gazunë'n lëjt.

Baya'n reeman diidx gugüjt reeman Lazr

⁹ Bën guixiuj bën Israel gogbee za' Jesús Betania, abi' wej reeman yagaj, ad par guguiaatzi reeman Jesús, në par guguiaa reeman Lazr, xin basbanman. ¹⁰ Zeel baya'n ree bixhioz rniabee diidx guial në Lazr gugüjt reeman. ¹¹ Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaal, zien da't ree bën zë lanij pascw Jerusalén gogbee guidxin Jesús yagaj, ¹³ dxel cwa' reeman zijn, bii reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bën naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵ Bén Sión, ad rdxebidi.

Gol baguiaa, laa xreydi zëed, dxiibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bën guzu ree con zian chi guredxaman Lazr din yariix lën baa, basban tëeman laax loj ree bengüt, rusnuu rü reeman diidx loj ree bejn ni baguiaa reeman. ¹⁸ Zeel zien ree bejn bii bigchaagloj laaman, guial gogbee reeman milagr beenman. ¹⁹ Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bën grieg raguuil Jesús

²⁰ Loj gra ree bën we lanij bignajchi' reeman Dios Jerusalén, no'ch bëlzi ree bën grieg,
²¹ gubig reeman loj Felip, bën za guiedx Betsaida, ni riga' niz Galilea, guzajc reeman liaadx
 rëb reeman:

—Dad, rayënan yaneenë'n Jesús.

²² Abi' wej Felip biguiedxaman loj Andrejs, dxel wej grop reeman bicojn reeman Jesús.

²³ Badxi' Jesúsán rëbaman:

—Ma bidxin hor par Bën guxhaal Dios, guiëtaman abi' yabanman. ²⁴ Diidxliczi rnin, zi'c
 tijb xob bal idan chu' luyuj najz najz tijbzi, per bal chu'n luyuj zajcxhiejn. ²⁵ Bën ru mazri
 xgab naabzi por gualnaban yu' loj guidxliuj guie, yu' dxej gunijtaman laan, per bën ru
 mazri xgab güünman zi'c rën Dios, xhietëez sacaman, zajpaman gualnaban tiblayaa con
 laaman. ²⁶ Bal chu rën güün ni rënan guidnalaman naj, lod gazun, nëgajcaman su. Bën güün
 ni rënan, guiën da Dadan laaman.

Rugojn Jesús guial guiëtaman

²⁷ Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan
 zian, din par zian zialan. ²⁸ Dad, balüü xgualrniabeel.

Dxel biguien cha' bejn xanyabaa rëbaman:

—Ma balü da gualrniabeen, per gulünan stijb!

²⁹ Riguiejn ree bën riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

³⁰ Dxel rëb Jesús:

—Ad por najtan biguien cha' bejn, por lëjtan. ³¹ Ma bidxin dxej gac gualguxtis loj
 guidxliuj, yan yarii bën rniabee lojn. ³² Per chi guilies reeman naj ya loj guidxliuj guie,
 dxel gui't graloj bejn lon.

³³ Zian basignia'man xhienaag guiëtaman. ³⁴ Badxi' ree bën guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies
 reeman Bën zëëd xanyabaa? ¿Chunin naj Bën zëëd xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz
 guiaal lëjt. Din bën rza loj xcay, ad ragbeetaman ban cheman. ³⁶ Gol bililadx bajl guie,
 la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

Ad bililadxt ree bejn Jesús

³⁷ Majsi been Jesús zien da't milagr baguiaa reeman, ad bililadxt reeman. ³⁸ Zian gojc
 cumplid ni bacaa Isaías bën badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xgualrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaaloj reeman,

bascajy tëëman xquiarguiejn reeman,

chitëë guguiaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree bën zojbloj bililadx Jesús. Per ad rëbt reeman loj ree bejn
 zian, guial rdxeb reeman yabëë ree bënfarisew laa reeman lod ricaagdiajg reeman xtiidx
 Dios, ⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bën rliladx naj, ad najtzan rliladxaman, në da Dadan bën guxhaal naj. ⁴⁵ Bën ruguiaa
 naj, në bën guxhaal naj ruguiaaman. ⁴⁶ Naj naj bajl, bialan loj guidxliuj guie, chitëë yaya'n
 ree bën rliladx naj loj xcay. ⁴⁷ Bal chu guien da diidxan abi' ad zuzoobtaman laan, ad najt
 gudëd laaman casti, din ad bialtan din gudëdan casti, bialan din yabën laa reeman loj dol.
⁴⁸ Bën ad rënt naj ad rucaagdiajg tëëtaman da diidxan, mal yu' ni gudëëd laaman casti: diidx
 ni rën, laan gudëëd laaman casti chi guidxin dxej. ⁴⁹ Din ad ni rbëguictan rnien. Da Dadan,
 Bën guxhaal naj rniabee ni ganen ni gulü tëën, ⁵⁰ zeel ragbeen, ni rniabee da Dadan runee
 guialnaban tiblayaa. Zianan zeel ni rnin rulünan zi'c rniabeeman.

13

Gudiib Jesús gua' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj gue din yaguiaj loj xDadaman. Zianczi guyèn ree xbejnman, bèn riga' ree loj guidxliuj, rënman laa reeman goctëez. ²⁻⁴ Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bèn gugüjt laaman. Ragbee Jesús guial badëed xDadaman gra guialrniabee lojman, laa tëëman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel cwa'man tijb tuay guxhii xizaman. ⁵ Abi' badxe'man nijs loj tijb xijg, guzulojman caguiibaman gua' ree xbejnman, cucwiidx tëëman laan con tuay naxii xizaman. ⁶ Chi bayal quibaman gua' Simón, bèn rniee reeman Bëd, rëbaman loj Jesús:

—Dad, ¿luj quib gua'n ya?

⁷ Badxi'man laan rëbaman:

—Ad rignia'til ni cayünan yan, per qui chignia'rilan.

⁸ Zeel rëb Bëd lojman:

—Ad zatiëëbtan quibil gua'n.

Abi' rëb Jesús:

—Bal id zaguiiban gua'l, ad zile'tri gaquil da bejnman.

⁹ Zeel rëb Bëd lojman:

—Dad, ad bal gua'zan quibil, gudiib në yan con guican.

¹⁰ Badxi'man laan rëbaman:

Bèn goznejz gua'zaman riaadx chëd, din guidibaman naya. Abi' lëjt ma nayadi, majsi ad gratidi.

¹¹ Ma ragbeeman chu yayü laaman, zeel rëbaman: “Ad gratidi naya.”

¹² Chi gulox gudiibaman gua' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? ¹³ Rnieedi naj Mextr në Dad, waliquidi najn. ¹⁴ Bal najn Mextr në Dad, gudiiban gua'di, ziangajc quib gua' lasa'di. ¹⁵ Ma balün lëjt, din güündi zi'c benan. ¹⁶ Diidxliczi ganin, achut mojs naj mazri guial loj bèn rniabee laaman, achut bèn ri't naj mazri guial loj bèn rxhiaal laaman. ¹⁷ Bal rignia'di nine güün tëëdan, yabaanë Dios lëjt.

¹⁸ Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bèn rawnë'n tijbzi, bayejcaman contr naj.” ¹⁹ Ma rugojnan lëjt din gagbeedi chi gac zian, din chililadxidi chu najn. ²⁰ Diidxliczi ganin, bèn rucaagdiajg ni rëb bèn rxhialan, najn rucaagdiajgaman, guiaad bèn rucaagdiajg da diidxan, xtiidx bèn guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹ Chi gulox gunee Jesús zian, dád guyunayaman, dxel rëbaman loj reeman zagdxe:

—Diidxliczi ganin, tijb lëjt yayü naj loj ree bèn gugüjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³ Tijb bèn guyèn da'taman zojb cwë'man, hor zii chi cayaw reeman xche, ²⁴ dxel been Bëd sen lojman din guiniabdiidxaman chunin ruza't Jesús. ²⁵ Zeel mazri gubigaman cwë' Jesús gunabdiidxaman, rëbaman:

—Dad, ¿chunin?

²⁶ Badxi' Jesúsán rëbaman:

—Gugajdxan ta'n guiadxtil, din loj xin gudëëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. ²⁷ Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸ Per achutdzi ree bèn zojb xan mex guin bignia' chexc zeel rëbaman zian. ²⁹ Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree bèn rzagdiaj ya. ³⁰ Chi ma gudawix guiadxtil guin, dxel briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xguialrniabee Bën guxhaal Dios din gagbee ree bejn xhienaag naj guialrniabee gudëë Dios lojman. ³² Din bal gülüü Bën guxhaal Dios xguialrniabee Dios, ziangajc gülüü Dios xguialrniabeeman, zeel ma gudëëëdanan laan. ³³ Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod

gan. ³⁴ Ganin tijb nicüb ganabeen: Gol guyën lasa'di zi'c rënan lëjt. ³⁵ Bal guiën lasa'di, zian gagbee gra bejn guial najdi da bejnan.

Guiëb Bëd ad nünbeetaman Jesús
(Mt. 26:31-35; Mr. 14:27-31; Lc. 22:31-34)

³⁶ Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Bëd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

³⁸ Badxi' Jesúsán rëbaman:

—¿Walil ya rën'l guiëtíl por naj? Diidxliczi ganin, chi gad gujð cwidxa', mal rëbil choon volt, ad nünbeetil naj.

14

Jesús naj nejj guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj. ² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³ Chi ma benchaawan luar guin, dxel yaguialan guidgaxin lëjt ðin sudi lod gazun. ⁴ Ma nünbeedi nejj zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejj guin?

⁶ Badxi'man laan rëbaman:

—Naj naj nejj, najn diidxli, naj tëën guialnaban. Tijbzi naj zajc chinë' bejn ree loj da Dadan. ⁷ Bal nünbeedi naj, në da Dadan güünbeedi. Per ma nünbeedi laaman diizd yan, ðin ma baguiaadi laaman.

⁸ Dxel rëb Felip:

—Dad, baneë mod majsi yaguiaazan bën naj xDadil.

⁹ Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? ðin bën ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? ¹⁰ ¿Nid rliladxil ya, naj za'në' da Dadan, guiáad laaman za'në naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin. ¹¹ Gol bililadx naj za'në' da Dadan, guiáad laaman za'në naj. Balgui majsi ni rünzan gol bililadx. ¹² Diidxliczi ganin: Bën rliladx naj, nëgajcaman güün ni rünan, güünman ni mazri narooob, ðin naj yaya' lod za' da Dadan. ¹³ Graczi ni guiniabidi lojman por naj, günnan ðin gulün xguialrniabeeman. ¹⁴ Günan xhietëez ni guiniabidi.

Guixhial Jesús xSprijtaman

¹⁵ 'Bal rëndi naj, gucaagdiajguidi ni balün. ¹⁶ ðin guië loj da Dadan guixhialaman Sprijt sunë lëjt, ¹⁷ Sprijt gulüü diidxli, ðin zianczi sunëman lëjt. Bën ad rliladxt ree Dios ad zajct tia' reeman Sprijt guin, ðin ad ruguiaat reeman ad nünbee tëët reeman laaman. Per lëjt nünbee laaman, ðin sunëman lëjt yaya'n tëëman luxdoodi tiblayaa. ¹⁸ Ad zusa'ntan xtjibidi, yaguialan stijb guidganen lëjt. ¹⁹ Sta'nz riaadx ad zuguiaatri ree bénguidxliuj naj, per lëjt guguiaadi naj, guibandi ðin nabanen. ²⁰ Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi. ²¹ Bën rucaagdiajg ni rniabeen rüjn tëëman laan, walicaman rënman naj. Guiën da Dadan bën rën naj, në naj guiën laaman ðin güünbeeman naj.

²² Gunabdiidx Judas (ad bën bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

²³ Badxi' Jesúsán rëbaman:

—Bën guiën naj guzoobaman da diidxan, guiën da Dadan laaman, guiáad naj guidnë' da Dadan ðin yabajnnë'n laaman. ²⁴ Bën ad zënt naj ad zuzoobtaman da diidxan, ðin diidx cucaagdiajguidi yan ad da diidxtanan, xtiidx da Dadanan bën guxhaal naj.

²⁵ 'Canin lojdi gra nine, la'tgaj za'në'n lëjt. ²⁶ Per xSprijt Dios, bën sunë lëjt zianczi, bën guixhial da Dadan por naj, graczi gulüüman lëjt ðin gusaaladxidi ni canin.

²⁷ 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliuj, ad bal ru nayadi ad rdxebe tëëdi. ²⁸ Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxë, guial gagbeedi yaya' loj da Dadan, ðin mazri zojblojman guial lon. ²⁹ Ma rugojnan lëjt, ðin chi gac zian, chililadxidi.

³⁰ Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabee.
³¹ Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

15

Rën Jesús yadxu'në' reeman zianczi

¹ Basnuu rëb Jesús:

—Naj naj zi'c yag rtia ni nejxh zagdxë, guiáad da Dadan naj zi'c bën rxübin laan. ² Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. ³ Lëjt ma nayadi, guial basia diidx rnin lëjt. ⁴ Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüendi ni rën Dios bal id za'nëdi naj.

⁵ 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüendi. ⁶ Bén ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

⁷ —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan. ⁸ Bal güüendi ni rën da Dadan, gaquidi quijb da bejnan, din guza't ree bejn laaman zagdxë. ⁹ Rënan lëjt zi'c rën da Dadan naj, gol basaalex rënan lëjt. ¹⁰ Bal guzoobidi da diidxan, gusaalexidi rënan lëjt, zi'cgajc ruzoban xtiidx da Dadan, ragbeen rënman naj.

¹¹ 'Rnin lojdi zian din chu' luxdoodi zagdxë zi'c yu' luxdon zagdxë, zagdxë da't chu' luxdoodi. ¹² Gol guyën lasa'di zi'c rënan lëjt, laan rniabeen güüendi. ¹³ Achut rën xmiw mazri guial loj bën rëjt por laa reeman. ¹⁴ Lëjt naj da miwan bal güüendi ni rënan. ¹⁵ Ad zanetran lëjt mojs, din mojs ad ragbeetaman xhie rüjn bën rniabee laaman. Ganen lëjt miw, din balün lëjt graczi ni na da Dadan lon. ¹⁶ Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. ¹⁷ Rniabeen: Guiën lasa'di.

Ralen ree bejn Jesús con ree xbejnman

¹⁸ Rëb tëë Jesús:

—Bal ralen ree bénguidxliuj lëjt, gol basaalex, yaloj naj balen reeman. ¹⁹ Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. ²⁰ Gol basaalex ni rnin: “Achut mojs naj mazri guial loj bën rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. ²¹ Graczi nine güünnë reeman lëjt por naj, din ad nünbeet reeman bën guxhaal naj.

²² 'Achet xtol reeman niu, bal idan nial ninienë'n laa reeman, per yan yu' xtol reeman. ²³ Bén ralen naj, nëgajc da Dadan ralenman. ²⁴ Achet xtol reeman niu, bal idan nün ree ni benan loj reeman ni achutzci wayüjn, per ma baguiaa reeman laa reen, majsi zian ralen gajc reeman naj në da Dadan. ²⁵ Per rajc zian din gac cumplid ni ca loj xley reeman, rëban: “Achet rünan ralen reeman naj.”

²⁶ 'Per chi gui't Sprijt gaxhalan din sunëman lëjt gulüü tëëman diidxli, Sprijt zëed loj da Dadan, laaman gü da diidxan. ²⁷ Nëgajc lëjt gü laan, din diidx yaloj za'nëdi naj.

16

¹ 'Rnin zian, din ad zabëjt chililadxidi naj. ² Yabëë reeman lëjt lod ricaagdiajg reeman xtiidx Dios, zaxdin dxej, chutëë bën gugüjt lëjt naladx reeman Dios cayüjn reeman wen. ³ Güün reeman zian din ad nünbeet reeman naj ni'qui da Dadan. ⁴ Per ma rnin lëjt, din chi guidxin dxej guin gusaalexidi guial ma bagojnan lëjt.

Ni rüjn xSprijt Dios

'Ad rnitán lojdi zian diidx yaloj, din naj guzunë' lëjt. ⁵ Per yan yaya'n loj bën guxhaal naj. Achutzidi rniabdiidx ban gan, ⁶ aal yu'nayadi guial canin zian. ⁷ Per diidxliczi rnin: zagdxë najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. ⁸ Chi gui'taman, laaman gulüü ree bénguidxliuj ni naj dol, ni naj ni zagdxë, në xguialguxtis Dios. ⁹ Gagbee reeman yu' xtol reeman, guial ad rililadxt reeman naj. ¹⁰ Ni zagdxë guin naj guial yaya' loj da Dadan din ad zuguiaatridi naj. ¹¹ Guiáad Dios ma been xguialguxtisaman con xindxab rniabee guidxliuj.

¹² 'Yu'ri ni rënan ganin, per dád zien gacan par lëjt. ¹³ Chi gui't Sprijt gulüü lëjt diidxli, din ad züt xtiidx gajcaman, guinieeman graczi ni guienman, laaman gulüü lëjt ni gac. ¹⁴ Guza'taman naj zagdxë, din naj gudëd ni gulüüman lëjt. ¹⁵ Graczi ni rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

Guguaa ree xbejn Jesús laaman zatijb

¹⁶ Ma guidxin dxej ad zuguaatrudi naj, per ad zajct xchej, guguaadi naj stijb.

¹⁷ Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman: —¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaaj loj xDadaman? ¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrudi naj, per ad zajct xchej, guguaadi naj stijb. ¿Ni nen canabdiidxidi ya? ²⁰ Diidxli ganin, goondi chu' tée luxdoodi naya, guiaad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²¹ Chi gal xi'n béngunaa, rdédaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoooman zagdxex, guial ma gojl xi'nman. ²² Ziangajc lét cadédidi tarbajw yan, per chi guguaian lét zatijb, chu' luxdoodi zagdxex, achutczí zajc yabée laan luxdoodi.

²³ Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. ²⁴ Guiaad yan achet wanabidi por naj, gol gunaban din tia'dan, din chu' luxdoodi zagdxex tiblayaa.

Yaguaaj Jesús lod guzaman

²⁵ Rëb tée Jesús:

—Rnin nine ree zi'c cwent, per zadxin dxej ad zulütran zian, gusignia'n lét zagdxex xcwent da Dadan. ²⁶ Dxej zii ree guiniabidi loj da Dadan por naj, ad rüjnt naguiejn ganaaban por lét lojman, ²⁷ din rënman lét, rënman lét guial rëndi naj riladcx tée di guial laaman guxhaal naj. ²⁸ Briin lod za' da Dadan persi bialan loj guidxliuj guie, yan gusa'nan laan din yaya'n lojman.

²⁹ Dxel rëb ree xbejnman:

—Yanri ma cusignia'l zagdxex. ³⁰ Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

³¹ Badxi' Jesús laan rëbaman:

—¿Ma riladcxidi yan ya? ³² Gol gogbee, ma bidxin hor yare'chidi, tijb gajdi yaguaaj lidx, gusa'ndi da xtijban. Per ad za't da xtijban, da Dadan za'në naj. ³³ Rnin gra nine din cwedi zagdxex guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17*Gurejdx gunab Jesús xDadaman por ree xbejnman*

¹ Chi gulox rëb Jesús zian loj ree xbejnman, dxel baguaaaman xanyabaa rëbaman:

—Dad, ma bidxin hor; balüü da guialrniabeen din gulün xguialrniabeel. ² Baneel guialrniabee lon din ganabeen gra bejn gudëd tée guialnaban tiblayaa loj gra bën baneel. ³ Guiban reeman tiblayaa bal güünbee reeman lüj, tijbzi lüj naj quijb Dios, güünbee tée reeman najn guxhaalil.

⁴ Naj bazat lüj zagdxex loj guidxliuj; yan ma gulox benan ni nal. ⁵ Yan, Dad, yagualan lojl, din yaneel guialrniabee ca'n gocli, diidx chi gad guidxliuj gacchaaw.

⁶ Rëb tée Jesús:

—Bën guel loj guidxliuj baneel lon, ma balün laa reeman chu lüj. Gojc reeman xbejn, per baneel laa reeman lon, ma bazoob reeman xtiidxil. ⁷ Yan ma gogbee reeman guial gra ni benan gra tée ni balün naj xieenl. ⁸ Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadcx tée reeman lüj guxhaal naj.

⁹ Rbedx rniaaban lüj por laa reeman, guial naj reeman xbejn baneel tée laa reeman lon, ad rbedx rniaabtan por ree bénguidxliuj. ¹⁰ Gra ni ca'n naj xieenl, guiaad gra ni ca'l naj da xieenan, ma rguen da guialrniabeen por ree bën baneel.

¹¹ Ad zazutran loj guidxliuj, per laa reeman suri reeman guie, guiaad naj yazaan din yagualan lod za'l. Dad, lüj naj bën naya nali, gunaj reeman con gra guialrniabee ca'l ni baneel tée lon, din gac reeman tijbzi zi'c nayajc. ¹² Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëeb, tijbzi xin ma naj diidx bizëeb, din gac cumplid ni ca loj xtiidxil.

¹³ Yan yagualan lod za'l, per canen zian la'tgaj za'n loj guidxliuj guie, din chu' luxdoo reeman zagdxex, zi'c yu' luxdon zagdxex. ¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. ¹⁵ Ad rniaabtan yabëel laa reeman loj guidxliuj, rënan guinial laa reeman, chitëe güün reeman ni mal. ¹⁶ Ad najt reeman bénguidxliuj, zi'cgajc naj. ¹⁷ Basia reeman con xtiidxil, din

laan naj ni diidxli. ¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹ Por laa reeman rudéd da guialnabanan din gac reeman xbejn diidxliczi.

²⁰ Basnuu Jesús, rëbaman:

—Ad por laatzí reeman rbedx rniaaban lüj, nè por ree bén chililadx chí gucaagdiajg reeman ni guinee reeman. ²¹ Rniaaban lojl din guchajg lasa' reeman din yayajc'nè' reeman tijbzi, Dad, zi'c za'nèl naj ziangajc za'nè'n lüj, ziangajc sunè lasa' reeman. Din chililadx ree bejn lüj guxhaal naj. ²² Badëdan guialrniabee baneel loj reeman, din gac reeman tijbzi zi'c nayajc, ²³ naj za'nè' laa reeman, guiáad lüj za'nèl naj. Zeel gac reeman tijbzi din gagbee ree bejn, lüj guxhaal naj rën tëël laa reeman zi'c rën'l naj.

²⁴ 'Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyën'l naj diidz chí gad guidxliuj gacchaaw. ²⁵ Dad, lüj rüjn guialguxtis zagdxé. Ad nünbeet ree bénguidxliuj lüj, sa'n naj nünbeen lüj, nè ree da bejnan ragbee lüj guxhaal naj. ²⁶ Balün laa reeman chu najl, gulüran laa reeman mazri, din gagbee reeman rën'l laa reeman zi'c rën'l naj, gazunè' tëën laa reeman.

18

Bayü Judas Jesús

(Mt. 26:47-56; Mr. 14:43-50; Lc. 22:47-53)

¹ Chi gulox guneel Jesús zian, dxel briinè ree xbejnman, zë reeman stiblad ro' guiiw la Cedrón, bidxin reeman lod yu' ree yag. ² Nè Judas, xin yayü laaman, nünbee yagaj, guial zien volt binëman laa reeman ni. ³ Zeel bidxinnëx tibcwaa ree suldad nè ree bén rajp ro' yadoo, guxhaal quijb ree bixhioz laa reeman nè ree bénfarišew, ca' reeman bajl rusni ree, nè ree espad con ree lans. ⁴ Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguuilidi?

⁵ Badxi' reeman laan rëb reeman:

—Jesús bén Nazaret.

Abi' rëbaman loj reeman:

—Najn.

Judas xin bayü laaman bidxinnè laa reeman. ⁶ Chi rëbaman loj reeman: “Najn”, dxel baguiadruxan reeman biajb reeman luyuj. ⁷ Gunabdiidxaman zatijb rëbaman:

—¿Chu raguuilidi?

Rëb reeman:

—Jesús bén Nazaret.

⁸ Zeel rëbaman:

—Ma rnin, najn. Bal naj raguuilidi, gol baslaa ree bén guie yaguaaj reeman.

⁹ Zian gojc cumplid ni rëb loj xDadaman: “Achut ree bén baneel lon bizëëb.” ¹⁰ Dxel gulëë Bëd espad, gutü'man guidaaj ladbee xin la Malco, najx xmojs quijb bixhioz zojbloj. ¹¹ Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹² Suldad guin ree con xin rniabee laa reex con ree bén rajp ro' yadoo gunaaz reeman Jesús, guxhii reeman laaman. ¹³ Dxel binè reeman laaman yaløj lidx bén la Anás, din laaman naj xdaadsuegr Caifás quijb bixhioz zojbloj loj ijj zii. ¹⁴ Laagajcaman rëb loj gabilt, mazri zagdxé guiët tijbzi bejn por gra ree bén Israel.

Rëb Bëd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bén rniee reeman Bëd, stijbaman naj bén nünbee quijb bixhioz zojbloj, zeel gyunëman Jesús lënu guin, ¹⁶ guiáad Bëd baya'nman lule'. Zeel barii bén nünbee bén rniabee ree bixhioz, guneenëman biin rajp ro' port guin, persi guyu Bëd lënu. ¹⁷ Gunabdiidxim lojman rëbim:

—¿Nid lüjn naj tijb xbejn bén guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bén naj ree mojs con ree bén rajp ro' yadoo nabe'c reeman guij rucha' reeman. Nëgajc Bëd cucha'nè reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bén la Anás canabdiidxaman loj Jesús xcwent ree xbejnman në xcwent ni rullüüman. ²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan. ²¹ ¿Chexc zeel rniabdiidxil lon? Gunabdiidx loj ree bén bacaagdiajg ni rën, laa reeman na xhie gunen, laa reeman ragbee.

²² Chi rëbaman zian, tijb Bén rajp ro' yadoo guin wëéz ro'man, rëbaman:

—¿Zian yadxi'l xtiidx Bén rniabee guin ya?

²³ Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxe, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, Bén naj quijb bixhioz zojbloj.

Rëb Béd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Béd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn Bén guin ya?

Badxi' Béd laan rëbaman:

—A'n, ad xbejntaman naj.

²⁶ Dxel tijb xmojs bixhioz zojbloj guin, Bén naj lasa' Bén gutü' Béd guidaiajg, rëbaman loj Béd:

—¿Nid lüjn baguian ya za'nël laaman guia' ree yag olivos?

²⁷ Rëb Béd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree Bén Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nilë't niajw reeman xche gualraw ni raw reeman pascw. ²⁹ Zeel brieri Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰ Badxi' reeman laan rëb reeman:

—Bal najman benza'c, ad ziant nudnë'n laaman lojl.

³¹ Dxel rëb Pilato:

—Gol bignëx, gol been gualguxtis zi'c naj xleydi.

Abi' rëb reeman:

—Per ad naca'tan gualrniabee yanabeen guiët bejn.

³² Zian gojc cumplid xtiidx Jesús chi bagojnman xhienaag guiëtaman. ³³ Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree Bén Israel ya?

³⁴ Badxi' Jesúsán rëbaman:

—¿Lüjczy rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen Bén Israel naj ya? Bén ladx gajc reel con ree bixhioz rniabee bidnë lüj lon. ¿Xhie beenl?

³⁶ Badxi' Jesúsán rëbaman:

—Gualrniabee ni ra'pan ad lojt guidxliuj zan, din bal loj guidxliuj zan, nia'pan Bén nidijl ree chitëë niniaaz ree ben Israel naj. Per yan ad lojt guidxliuj guie za da gualrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graciai ree Bén zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezanan naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman Bén Israel ree stijb, rëbaman:

—Achet xgualquia xin guin radxejlan. ³⁹ Per lëjt, xcostumbridi naj guial loj lanij pascw laa tijb Bén yu' ladxguuib. Yan, ¿rëndi ya guslaan xreydi?

⁴⁰ Dxel gurixdiajg ree Bén Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin bëngubaanan.

19

¹ Dxel gunabee Pilato gudijn ree suldad Jesús. ² Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. ³ Dxel gubig reeman lojman, rëbgaj reeman:

—¡Guibanri xrey ree bén Israel!

Dxel rëëzgaj reeman lojman.

⁴ Brii Pilato stijb, abi' rëbaman loj ree bén Israel guin:

—Gol baguiaa, gabën laax din gagbeedi, achet xguialquiach radxejlan.

⁵ Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bén rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtlox radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman. ⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. ¹⁰ Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtól bën bidnë naj guie yu' guial lojl.

¹² Diizd hor zii gajc raguil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. ¹⁴ Chi guixiez gal lanij pascw, cost garol dxej rëb Pilato loj ree bén Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. ¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man.

¹⁹ Gunabee Pilato cwa lejtr guijc crüjz guin, rëban: “Jesús bën Nazaret, xrey ree bén Israel.”

²⁰ Dád zien ree bén Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. ²¹ Rëb ree bixhioz rniabee ree bixhioz loj Pilato:

—Ad rucaal: “Xrey ree bén Israel”, bacaa: “Bén rëb naj xrey ree bén Israel.”

²² Badxi' Pilato laan rëbaman:

—Ni ma bacan yaya'nan zian.

²³ Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diidx yëjnan xt guia'n, najn tijbzi lajd. ²⁴ Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

²⁵ Gajxh cwè' crujz ca Jesús za' xniaaman con xbèl xniaaman con Li xbéngunaa Cleofas con Li bèn gunee reeman Magdalena. ²⁶ Chi baguiaa Jesús xniaaman, za' tijb ree xbejnman cwè'man, bèn rèn da'taman, rëb loj xniaaman:

—Na, laa xi'nl yagaj.

²⁷ Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

Gijjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. ³⁰ Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guuib cwè'lën Jesús

³¹ Ma cayün ree bèn Israel porvinid din guixiez gal lanij pascw. Zeel ad guyënt reeman naya'n ree cuerp guin loj crujz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bèn ca loj crujz din guiët reeman yalet tée reex laa reeman. ³² Zeel wej reex. Yaløj gudi'ch reex xdxijt bèn ca cwè' Jesús, dxel gudi'ch reex xdxijt bèn ca stiblad cwè'man. ³³ Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guuib ca'x, dxel briin rejn con nijs. ³⁵ Bén rü diidx guie baguiaaman, zeel ragbeeman najn diidxli, rüman laan din nè lëjt chililadx. ³⁶ Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” ³⁷ Stibljajt rëb: “Guguaiaa reeman bèn guxhálnë reeman guuib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bèn zëëd guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëëd Pilato diidxbee, zeel wej Xiëb bigxiiman xcuerp Jesús. ³⁹ Në Nicodemo wej, bèn bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. ⁴⁰ Bagajdxnë reeman laan lajd batüüb reeman laaman, zi'c rüjn ree bèn Israel chi ruquie'ch reeman bengüt. ⁴¹ Lod cwa Jesús loj crujz naga' tijb guidxliuj lod yu' ree yag. Yagaj naj tijb baa cüb lod achutctzi waguie'ch. ⁴² Yagaj gudixh reeman xcuerpaman, guial najn gajxh, guial ma suløj tée dxej raziiladx reeman.

20

Achetri xcuerp Jesús badxelj

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüð guiaj nayaaw ro' baa guin. ² Dxel ruxüünman wejman lod za' Simón Bëd con zatijb xbejn Jesús, bèn rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brii Bëd con bèn guin, zë reeman ro' baa guin. ⁴ Grop reeman ruxüün zë reeman. Per bèn guin mazri ruxüünman guial loj Bëd, abi' yaløj laaman bidxin ro' baa guin. ⁵ Dxel gudixlojman baguiaaman vend bidüüb Jesús, per ad guyutaman. ⁶ Dxelri bidxin Simón Bëd, abi' guyuman lën baa guin. Nëgajcaman baguiaa vend guin ⁷ Baguiaa téeëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸ Dxel guyu bèn bidxin ro' baa guin yaløj, baguiaaman ni goc, zianz bililadxaman, ⁹ guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰ Dxel zia ree xbejn Jesús lidx reeman.

Balüüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin, ¹² abi' baguiaaman tio'p ree anjl, najcw reeman lajd naquich, zojb reeman lod

go't xcuerp Jesús, tijbaman lod go't guijcaman, zatijbaman lod go't guia'man. ¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguüüilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguij biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

Baliüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel baliüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, baliüü yaaman loj reeman në cwë'lënman, abi' laa reeman dáa babaa reeman baguiaa reeman Dad Jesús. ²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijc reeman, rëbaman:

—Gol gubajnnë xSprijt Dios. ²³ Bën güüнди perdon xtol, chiquied xtol reeman, guiáad bën ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bën rníee reeman Cwajch, achut laaman za' chi baliüüloj Jesús loj ree xbejnman. ²⁵ Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguian yaaman lod wëëz clav, abi' bal id zagu' da bacwënan lod wëëz clav guin, bal id zagu' tëë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per baliüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë' lënan. Ad runawëëgril, bililadx.

²⁸ Dxel rëb Tumajs lojman:

—¡Da Dadan, da Diosan!

²⁹ Abi' rëb Jesús lojman:

—Rliladxil guial ma baguiaa naj. Xiquilbaa ree bën rliladx, majs ad waguiaa reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie. ³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblyaa con Dios.

21

Baliüüloj Jesús loj ree xbejnman ro' nijs

¹ Chi gudëd gojc zian, baliüüloj Jesús loj ree xbejnman zatijb, ro' nijs naj gajxh guiedx Tiberias. Ze baliüülojman: ² Chi nadxag lasa' ree Simón Bëd con Tumajs bën rníee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, ³ dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxo.

Abi' wë'p reeman loj barcw zë reeman, per guxhin zii achutzci bëjl gunaaz reeman.
⁴ Chi ma cayreguiaal, bidxin Jesús ro' nijs guin, per ad bayünbeet reeman laaman. ⁵ Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutzci.

⁶ Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn.

⁷ Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Bigueijnzi Simón Bëd zian, laa got gajc xabaman ni gulëëman, abi' gutiajsaman lojnijs guin. ⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr yaaadx yadxin reeman ro' nijs guin. ⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. ¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan.

¹² Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bënan, guial ragbee reeman Dad Jesúsán. ¹³ Dxel gubigaman cwa'man guiadxtil badëëman loj reeman, ziangajc beenman con bëjl guin. ¹⁴ Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

¹⁵ Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rën! naj mazri guial loj ree bën guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiiloon.

¹⁶ Abi' rëb Jesús zatijb:

—Simón, xi'n Waj, ¿walil ya rën! naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rën! naj ya?

Dád guyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸ Diidxliczi ganin, chi goquil xinguiag, rajcw xabil persi rej! lod rën. Per chi ma naj! bengol, gusli xu'quil din guscajcw ben ren xabil din chinë reeman lüj lod ad rëntil chel.

¹⁹ Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacca xbejn Jesús bën guyën da'taman

²⁰ Chi badxi' loj Bëd, baguiaaman laa bën rën da't Jesús zinal laa reeman. Laaman gure cwë! Jesús chi gudaw reeman xche, gunabdiidx tëëman loj Jesús rëbaman: “Dad, ¿chu yayü lüj?” ²¹ Chi baguiaa Bëd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesúsán rëbaman:

—Bal rënan guibanx xt yaguialan, ¿xhie güün! Lüj tanal naj.

²³ Zianan zeel bire'ch diidx loj ree xbejnman guial ad гэjt bën guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güün!”

²⁴ Bén guin gajcan rü diidx xcwent ree nine, laa tääman bacaa laan, rayagbee tää ree rüman diidxli. ²⁵ Dád zien ree ni been Jesús, bal nitia tijb gajn, wed ad zadaan loj guidxliuj niu ree libr ni niajc.

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü téeëman chi guzuloj xchiinman ² xt chi ziaman xanyabaa. Chi gadaman yaguiaj, gunabee-man bën naj ree apóstoles, bën guleman, ni rayal güün reeman, zi'c rëb xSprijt Dios lojman. ³ Chi mal guzagdiaj da'taman loj xguialgüjtaman, babanman loj ree bengüt. Loj tiuu dxej balüülojman zien volt loj bën naj ree apóstoles, persi gogbee reeman nabancaman. Dxej zii ree guneenëman laa reeman xcwent xguialrniabee Dios.

⁴ Chi ziz za'nëman laa reeman, guneenëman laa reeman ad yaza reeman Jerusalén, rëbaman:

—Gol gulëjz gac cumplid ni na da Dadan zi'c ma rnin lojdi. ⁵ Walican baroobnijs Waj con nijs, per ma zidyob dxej gui't xSprijt Dios guibannë lëjt, laan gac zi'c guialrirobnis par lëjt.

Zia Jesús xanyabaa

⁶ Lën ree dxej zii chi badxaag lasa' reeman con Jesús, gunabdiidx reeman lojman rëb reeman:

—Dad, çyanan yayül guialrniabee loj ree bën Israel ya?

⁷ Badxi' Jesúsán rëbaman:

—Ad lëjtit rayal gagbee xhie dxejn o xhie horan gac zian. Tijbzi da Dadan ragbee laan din laaman ca' guialrniabee. ⁸ Per chi ma nabannëdi xSprijt Dios, tia'di guialrniabee. Dxel griidi chiguiedi diidx loj ree bën Jerusalén chu najn, në gra ree guiedx riga' niz Judea në niz Samaria, xt ree guiedx ren ni riga' ree zijt da't.

⁹ Gulox guneeman, ruguiaa reeman laaman dxejlçzi wajsaman ziaman xanyabaa, abi' biguiajt tijb bëj bata'cwan laaman, dxel ad baguiaatri reeman laaman. ¹⁰ La'tgaj ruguiaa reeman ziaman xanyabaa, gulentie tio'p ree bën najcw lajd naquich lod za' reeman, ¹¹ abi' rëb reeman loj ree apóstoles guin:

—Bën Galilea, çhexc zeel sta ruguiaadi xanyabaa? Jesús, bën baguiaadi zia xanyabaa, laagajcaman yaguiaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. ¹³ Chi badxin reeman, wë'p reeman lënü ladya lod zobj reeman. Brii laj reeman Bëd, Waj, Jacob, Andrejs, Filip, Tumajs, Tol, Matew, Jacob xi'n Alfeo, Simón (bën guzunë ree bën cananistas), në Judas xi'n Jacob. ¹⁴ Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bëgunaa ren.

Gulej reeman bën baya'n xluar Judas

¹⁵ Lën ree dxej zii bado'p ree bën rililadx Jesús, naj reeman cost tibgayuu gajl bejn, dxel guzuli Bëd galay reeman, rëbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bën gunaa laaman, ¹⁷ gojquix tijb dux compniaran, në laax been lasa' dxiin raguieenan. ¹⁸ Per con milia ni gudix reeman laax por ni mal beenx, bio' guidxliuj lod guddiya'x, bazuj guijquix, goxya'x abi' brii gra xziix. ¹⁹ Chi gogbee gra ree bën Jerusalén ni goc, guneë reeman guidxliuj zii Acéldama, rën guiëban guidxliuj rejn. ²⁰ Din rëb loj libr la Salmos:

Yaya'n dëjch lidix,

achutziri cwe lënan.

Rëb tée lojn:

Yayu ben ren guia'x.

²¹ 'Zeel loj gra ree bën za'në dunuj ree guidib tiamp ni guzunë Jesús dunuj ree, ²² diidx chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

²³ Dxel gulej reeman tio'p reeman: tijb bën la Xiëb (rniece reeman laaman Barsabás, rniece téeë reeman laaman Justo), gulej téeë reeman bën la Matías. ²⁴ Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl ²⁵ din gacaman apóstol luar Judas, din banijtix delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayaman loj zachibtib ree apóstoles.

2

Biguiajt xSprijt Dios diizd xanyabaa

¹ Chi bidxin dxej gojl lanij la Pentecostés, gra ree bén riladx Jesucrist bado'p tijbz luar.

² Dxejlci gojc naquie' xanyabaa zi'c bidoxh xt bayu bi lénü lod riga' reeman, ³ abi' gulientie zi'c bajl dobéz ree, biguiajt reen guijc tijb gaj reeman. ⁴ Zianz guyu xSprijt Dios luxdoo graczi reeman, dxel guzulolo canee reeman diidx ren ree zi'c cusnee Sprijt guin laa reeman.

⁵ Lén ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. ⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rníee gra ree bén riladx Jesús xtiidx tijb gaj reeman, ad badxejlt xgab nünj reeman. ⁷ Dád badxa loj reeman xt ni'quid badxejlt xhie nünj reeman, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya? ⁸ ¿Chexc zeel raguiejn ree rníee reeman dux tiidx ree? ⁹ Du loj ree no'ch ree bén zëed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰ bén zëed tée ree guiedx riga' ree niz Frigia, Panfilia, Egipto, nè ree guiedx nulen Libia ni riga' ree gajxh Cirene, nè ree bén zëed Rom, yu' reeman gojl Israel per naban reeman Rom, yu' tée reeman naj quijb ben Rom per riladx reeman ni riladx ree bén Israel. ¹¹ Nè ree bén zëed niz Creta nètëë ree bén zëed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rünj Dios!

¹² Graczi reeman badxa da't loj xt ni'quid badxejlt xgab nünj reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

¹³ Per garol reeman baze' laa reeman, rëb reeman:

—Rë' reeman.

Ni rëb Bëd loj ree bejn

¹⁴ Dxel guzulö Bëd con zachibtib ree apóstoles guin, guneeman rejs rëbaman:

—Lëjt bén Judea nè graczi ree bén zojb Jerusalén, gol bacaagdiajg gol bignia' tée ni ganin. ¹⁵ Ad rë't ree bén guin zi'c naladxidi, din qui gojlri raca gaa rsil. ¹⁶ Guie cayajc cumplid ni gunece bén brii laj Joel, bén badëë xtiidx Dios loj ree bejn, chi rëbaman:

¹⁷ Na Dios,

guidxin dxej gaxhal da Sprijtan luxdoo gra ree bejn,

abi' xi'ndi xinguiaw con biingunaa gudëed reex da diidxan,

zien ree ni gulüuloj loj ree xinguiag,

guiáad ree bengol zien ree ni guinie'xchaal reeman.

¹⁸ Dxej zii ree gaxhal da Sprijtan luxdoo ree bén rünj da dxiinan,

xinguiaw ree nè ree béngunaa,

abi' gudëed reeman da diidxan.

¹⁹ Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn nè bajl nètëë go'xh.

²⁰ Guicajy loj gubijdx, guiáad bëëw yayajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios bén rniabee,

dxej guiguien guidib xbianiman.

²¹ Abi' graczi ree bén cwedx guiniab laaman

güünman laa reeman perdon.

²² Rëb tée Bëd loj reeman:

—Yan, gol bacaagdiajg ni ganin lëjt bén Israel: Lëjt ragbee guial Jesús bén Nazaret najman bén guxhaal Dios, been tëëman milagr ree nè ree ni radxa loj ree bejn zi'c sen din gagbeedi guial Dios guxhaal laaman. ²³ Diizd gocli mal nünj Dios xgab guial zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. ²⁴ Per basban Dios laaman stijb, babëëman laaman loj guialgüjt, din ad gojct nutëë guialgüjt guin laaman. ²⁵ Chi gunee rey Davi xcwënt Jesús, rëbaman:

Zianczi baguian dux Dad ree Dios za'nëman naj.

Za'man da ladbeen, achetczi zajc guchejb naj.

²⁶ Zeel yu' luxdon nix, ruzat tëën Dios zagdx.

majsi guiëtan ad rdxebtan,

²⁷ din ad zusa'ntil naj lën baa,

ad zatiëjbtal xhin xcuerp xi'nl bén naya nali.

²⁸ Balüül naj nejz runee guialnaban,

chu' tée luxdon zagdx guial guibannël naj.

²⁹ Basnuu gunee Béd, rëbaman:

—Ganin loj gradi compniar, diidxiczi dux béngulal ree Davi güjtaman biguie'ch tëëman, abi' laa xbaaman sta raguiaa ree yan. ³⁰ Per gojcaman bén badëë xtiidx Dios loj ree bejn, abi' gogbeeman been Dios promejs guial loj xdiaaman grii Cristo bén nabee. ³¹ Ruluü ma cuguiaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman. ³² Yan ma basban Dios Jesús, dugran nayajc testiw guial walian babanman. ³³ Zia tëëman xanyabaa zisobaman xladbee Dios, persi badëë xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tëëdi. ³⁴ Ad Davitan zia xanyabaa, din laagajcaman rëb: Rëb dux Dad ree Dios loj bén rniabee naj:

“Gurej da ladbeen,

³⁵ xt gabecan xin rdxe'ch ree lüj guia'l.”

³⁶ Gradi bén Israel gol gogbee guial Jesús bén bacaadi loj crüzj, Dios bacaabee laaman din gacaman Dad, bén nabee dunuj ree.

Bachajg zien ree bejn bén rililadx ree Jesús

³⁷ Chi biguiejn ree bén riga' yagaj ni rëb Béd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, göl guna, çxhie rayal yaguieenan?

³⁸ Dxel rëb Béd loj reeman:

—Gol bayagbee xtolidi, gol badxi' tëë lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. ³⁹ Din promejs guin naj par lëjt në par ree xi'ndi në par gra ree bén riga' zijt, par gra ree bén cwe Dios par laaman.

⁴⁰ Con ree diidx guie në mazri ree diidx ren guneeñ Béd laa reeman, rëbaman:

—jGol bariica loj ree bén rüjn ni mal!

⁴¹ Zian gojc, graczi bén bazoob diidx ni rëbaman gurobnijs. Dxej zii gajc bachajg cost choon mil bejn bén rililadx ree Jesús. ⁴² Graczi reeman binal ni balüü ree xi' apóstoles Jesús laa reeman, gubajnnë lasa' reeman zagdxe, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

Ze gubajn ree bén bililadx Jesús yaloj

⁴³ Graczi ree bejn radxa da't loj milagr në los demazri ree ni been ree apóstoles guin. ⁴⁴ Graczi ree bén bililadx Jesucrist gubajnnë lasa' zagdxe, rgui's tëë ni rajp reeman loj lasa' reeman. ⁴⁵ Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. ⁴⁶ Guixie guixie rado'p reeman lën yadooro' Jerusalén, dxel raguiaaj reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, ⁴⁷ ruza't reeman Dios zagdxe, guiaad gra bejn guyën laa reeman. Guixie guixie ragnë Dios din gacxhiey mazri bén rililadx Jesucrist, persi gojc xtol reeman perdon.

3

Bayajc tijb bén ad rajct rza

¹ Tijb dxej zë ree Béd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. ² Ro' xport yadoo guin zojb tijb bén ad rajct rza diidz gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bén ru lën yadoo guin. ³ Chi baguiaaman Béd con Waj ma chu' reeman lën yadoo guin, gunabaman carda loj reeman. ⁴ Baguiaa reeman lojman, dxel rëb Béd lojman:

—Baguiaa du lojn.

⁵ Chi biguiejnman rëb Béd zian, dxel baguiaaman loj reeman, naladxaman milia nudëëd reeman lojman. ⁶ Per rëb Béd:

—Ad ra'ptan plajt ni'qui or par gunen lojl, per ni zajc günan por lüj günanan: Por xguialrniabee Jesucrist bén Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸ abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tëëman Dios zagdxe. ⁹ Graczi ree bén cuguiaa laaman cazaman cuza't tëëman Dios zagdxe, ¹⁰ dád badxa loj reeman bidxeb tëë reeman guial gojc zian guial nünbee reeman bén guin, ragbee tëë reeman laaman rbej ro' xport yadoo guin ni la Port Za'cdxoon, rniabaman carda.

Gunee Béd loj ree bejn lod la xcurdur Salomón

¹¹ Ad riro'nladxt Bén bayajc guin Béd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Béd con Waj. ¹² Chi baguiaa Béd zian, rëbaman loj reeman:

—Bén Israel, ¿chexc zeel radxa lojdi ni goc? Ad naladxidi por dunujn rza bèn guie guial naca'n guialrniabee o guial nayajcan naya delant loj Dios ya. ¹³ XDios dux béngulal ree Abraham, Isaac nê Jacob, laaman badëë guialrniabee loj Jesús, bèn bayüdi loj guxtis. Abi' chi guyën Pilato nuslaaman laaman, ad cwëjbtidi. ¹⁴ Luar niniabidi nuslaa Pilato bèn naya nali, bèn rüjn zi'c rayal, gunabidi baslaaman tijb xin bagüjt bejn. ¹⁵ Zian bagüjtidi bèn runee guialnaban. Per basban Dios laaman stijb, abi' dunujn nayajc testiiv guial babanman. ¹⁶ Bèn guie, bèn ruguaaadi nünbee tëëdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguaa graczidi.

¹⁷ Ganin lëjt compniar, ragbeen guial lëjt con ree bèn rniabee lëjt ni'quid gogbeetidi xhienin beendi chi bagüjtidi Jesús. ¹⁸ Per zian been Dios persi gojc cumplid ni rëbaman loj ree bèn badëë xtiidxaman loj ree bejn diizd gocli guial sagdiaj Cristo. ¹⁹ Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj luxdoodi, ²⁰ guixhiaal tëëman Jesús stijb, bèn naj Cristo diizd gocli par lëjt, ²¹ majsi yan rayalri suman xanyabaa, xt ma bazuxnejz Dios gra, zi'c rëbaman loj ree bèn badëë xtiidxaman loj ree bejn diizd gocli, bèn gubajjn ree naya delant lojman. ²² Abi' rëb Moisejs loj ree dux béngulal ree: “Loj xdiaadi cwëë Dios tijb bèn gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, ²³ din graczi ree bèn ad zuzoob xtiidxaman nit reeman, ad zajc tëëtri reeman wemant zi'c xbejn Dios.”

²⁴ Gra ree bèn badëëd xtiidx Dios loj ree bejn, diizd Samuel con los demazri ree bèn badëë xtiidx Dios diizd gulal, mal bagojn reeman ni cayajc ree lën ree dxej guie. ²⁵ Lëjt naj xdiaa reeman, lojdi gac cumplid ni cwëb Dios loj ree dux béngulal ree chi rëbaman loj Abraham: “Por xdiaal güñle'n gra ree bénguidxliuj.” ²⁶ Abi' chi basban Dios xi'nman Jesucrist, yaloj lojdi guxhaalam laaman din güñle'man lëjt din yabëëcaman gradi loj ni mal rüjndi.

4

Bazuj reeman Bëd con Waj loj ree guxtis

¹ Sta canee ree Bëd con Waj loj ree bejn, chi bidxin ree xbixhioz ree bèn Israel nê suldad rniabee suldad rniay ree ro' yadooro' Jerusalén, nètëë ree bënsaducew. ² Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguaa reeman chi baban Jesucrist. ³ Zeel gunaaz reeman laa reeman, per guial ma gudxe, zeel badxe' reeman laa reeman ladxgüiib la'tgaj rareguaal. ⁴ Per dád zien ree bèn bacaagdiaj ni rëb ree Bëd con Waj bililadx xtiidx Dios, gojc reeman cost gaay mil xinguaaw xcwentqui ree béngunaa.

⁵ Chi bareguaal, guxtis Jerusalén nê ree bengol nê ree mextr rülüü ley, bado'p reeman loj ciuda guin. ⁶ Nê Anás bidxin yagaj, bèn naj bixhioz mazri zobjbloj rniabee graczi ree bixhioz, bidxin tëë bixhioz la Caifás nê Waj nê Lejandr; nètëë gra ree bèn naj lasa' ree bixhioz rniabee guin. ⁷ Gunabee reeman bica' reeman Bëd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman:

—¿Chu banee diidxbee o chu por rüjndi ni guin?

⁸ Per guial yu' xSprijt Dios luxdoo Bëd dád gognëman laaman, zeel rëbaman:

—Gol bacaagdiaj ni ganin lëjt bengol nê lëjt guxtis, ⁹ rniabdiidxidi dunujn xhienaag baguieenan béngogxuu guin yudar, xhie tëë naag gojc zeel bayajcaman. ¹⁰ Yanan lojdi din gagbeedi gagbee tëë gra bèn Israel xhienaag bayajc bèn za' lojdi. Bayajcaman por xguialrniabee Jesucrist bèn Nazaret, bèn bacaadi loj crüzj abi' basban Dios laaman stijb. ¹¹ Beennëdi laaman zi'c rüjn ree bèn rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin. ¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³ Chi baguaa ree guxtis guin ad rdxebt ree Bëd con Waj guial rniee reeman, abi' gogbee reeman ad bèn basiidt ree mazran achu tëët naj reeman, badxa loj reeman bayünbee tëë reeman laa reeman guial bèn binal ree Jesús. ¹⁴ Abi' yagaj gajc za' bèn bayajc guin, zeel ad bile'tri xhie niëjb reeman contr laa reeman. ¹⁵ Dxel gunabee ree guxtis guin barii ree Bëd con Waj din yaya'n laaz reeman din gü reeman diidx. ¹⁶ Rëb reeman:

—¿Xhienaag yaguieennë' ree xin guin ree? Graczi ree bèn Jerusalén ma ragbee milagr been reex. Abi' ad zajct yaxexuu ree. ¹⁷ Per chitëë guire'ch xtiidx Jesús, yachejb reex din diizd yan achutziri loj guza't reex laax.

¹⁸ Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. ¹⁹ Per badxi' Bëd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidxidi luar yazooban xtiidx Dios ya? ²⁰ Per ad zajct yacwëëz yaguie'chan gra ni baguaan baguiejn tëën.

²¹ Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëëd reeman laa reeman casti, din graczi ree bejn ruza't Dios zagdxe por ni goc. ²² Nadëd tiuu ijz yu' bën bayajc guin.

Rbejdx ree bën rliiladx Jesús Dios

²³ Chi baslaa ree guxtis guin Bëd con Waj, baguiaj reeman lod riga' xcompniar reeman bën rliiladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. ²⁴ Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëë nijsdoo con gra ni yu' loj reen. ²⁵ Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree bën Israel nëtëë ree bën ad najt bën Israel, badxajg lasa' reeman luguiedx guie persi guzuj reeman contr xi'n'l Jesús, bën naya nali, bën bacaabeel. ²⁸ Zian gojc, been reeman zi'c ma been xgab diidx gocli. ²⁹ Abi' yan Dad, baguiaa yan ruhejb reeman dunujn. Gognë dunujn nayajcan xbejn din gag yatie'chan xtiidxil sin gualrdxeb, ³⁰ në con xgualrniabee bënragxuu ree, yaguieen tëën milagr ree por xgualrniabee xi'n'l Jesús, bën naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin gualrdxeb.

Ragnë lasa' ree bën rliiladx Jesús

³² Graczi ree bën rliiladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenji reeman naj ni rajp reeman, din najn par gra reeman.

³³ Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴ Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin ³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶ Loj reeman no'ch tijb bën brii laj Xiëb, najman xdiaa bën brii laj Leví, zëëdaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bën ragu' luxdoo ree bejn zagdxe. ³⁷ Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb bën brii laj Ananías, xbëngunaaman brii laj Safira. Bato' tijb xguidxliuj reeman, ² per baya'nnë xbëngunaaman diidx persi baya'nnëman ta'n milia guin. Sta'nan badëëman loj ree apóstoles guin, rëbaman laan naj gran. ³ Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnë ta'n milia ni bato' xguidxliuj? ⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenle zian? Loj Diosan nuyënl nusquieel, ad lojt bejnan.

⁵ Chi biguiejn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman. ⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbëngunaa Ananías, ad ragheetaman ni goc. ⁸ Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. ¹¹ Graczi ree bën rliiladx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr narooob been ree apóstoles guin loj ree bejn. Graczi ree bën rliiladx Jesucrist radxajg lasa' ro' curdur lod rniëe reeman xcurdur Salomón. ¹³ Zagdxe ruza't ree

bén luguiedx guin laa reeman, per ad rayaxt reeman guchajg reeman laa reeman. ¹⁴ Abi' guixie guixie cayajcxhiey ree bén rliadx Dad Jesús, zi'c xinguaaaw zi'c béngunaa. ¹⁵ Xt rbëë reeman bénragxuu ree lunejz, rguijxh reeman laa reeman loj ree loon nè loj ree da, din chi téd Béd, majsi xbalazaman téd guijc reeman. ¹⁶ Nè ree bén zobj guiedx riga' ree gajxh Jerusalén, zien reeman bidxin Jerusalén, bidxinnè reeman bénragxuu ree nè ree bén yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷ Bixhioz mazri zobjloj rniabee graczi ree bixhioz nè ree bénsaducew za'nè laaman, guyu guialnadédloj luxdoo reeman, ¹⁸ abi' gunabee reeman biniaaz ree apóstoles guin persi badxe' reeman laa reeman ladxguib. ¹⁹ Per guxhin zii tijb xi anjl Dios guxhal ro' ree xport ladxguib guin, abi' babëëman laa reeman, rëbaman:

²⁰ —Gol chej lèn yadooro', gol biguiedx loj ree bejn xhie naag gap reeman guialnaban tiblayaa con Dios.

²¹ Chi biguejn reeman ni rëb anjl guin, bareguiaal rsildoo wej reeman lèn yadoo guin, guzuloj culüü reeman bejn ree xtiidx Dios.

Guiáad bixhioz zobjloj guin con ree bén za'nè laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lèn ladxguib guin. ²² Per chi bidxin reex ro' ladxguib guin, achutri ree apóstoles guin ree yu'. Dxel bicojn reex guxtis guin ree, ²³ rëb reex:

—Chi badxinan, baguiaan nayaaw ro' ladxguib guin zagdx, laa ree suldad rajp ro' ladxguib guin za', per chi baxhalan, achutzi yu' lënan.

²⁴ Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguejn reeman zian, guzuloj rëb loj lasa' reeman, zban xt guin chigdiblagaa ree ni guie?

²⁵ Loj hor zii gajc bidxin tijb xin rëb loj reeman:

—Laa ree bën badxe'di ladxguib yu' lèn yadoo culüü reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex. ²⁷ Chi badxinnè reex laa reeman, bayü reex laa reeman loj guxtis. Dxel rëb bixhioz zobjloj guin loj reeman:

²⁸ —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bén Jerusalén ma gutie'chidi xtiidxix, nètëë yan rëndi gudxiibidi du guijcan guial dunujn bagüjt laax.

²⁹ Abi' badxi' Bédan nè gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. ³⁰ XDios dux béngulal ree basban Jesús, bén bacaadi loj crüzj. ³¹ Abi' nüjn Dios laaman bén zobjloj, nabe'caman laaman xladbeeman, laaman naj bén rniabee rabëë tëëman bejn ree loj xtol reeman, abi' zian guxhalaman nejz par ree bén Israel din cwëëladx xtol reeman yadxi' tëë loj reeman loj Dios din güünman laa reeman perdon. ³² Dunujn nè xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

³³ Chi biguejn ree guxtis guin ni rëb reeman, dád balen reeman abi' güyën reeman nugüjt reeman laa reeman. ³⁴ Per loj ree guxtis guin no'ch tijb bënfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. ³⁵ Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. ³⁶ Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. ³⁷ Abi' tëë lèn ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. ³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. ³⁹ Per bal por Dios cayüjn reeman ni guin ree, ad zajct gutëëdi loj ni cayüjn reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. ⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. ⁴² Abi' ad rucwëëzt rulüü reeman rníee tëë reeman xtiidx Jesús, gra dxejczy rulüü reeman lèn yadooro' Jerusalén nètëë lidx lidx ree bejn.

6

¹ Lën ree dxej zii chi canuu cayajcxhiey ree bën rliadx Jesús, guzuloy cabe'c ree bën rniee diidx grieg xguialquia ree bën rniee diidx hebreo, rëb reeman guial gra dxejczy chi rië's ni raw ree bëngunaa bizëjb, ta'ndoon rtia' ree bën rniee diidx grieg guial loy ree bën rniee diidx hebreo.

² Dxel guidxibtio'p ree apóstoles guin bato'p reeman graczi ree bën rliadx Jesucrist, abi' rëb reeman:

—Ad zagdxet naj guial yacwëez yalüün xtiidx Dios par yadi'san ni gaw ree bejn. ³ Zeel yanan lëjt compniar raliduladx ree Jesucrist, gol gudiil entr lojdi gajdx ree bën ragbeedi naban zi'c rayal, bën yu' xSprijt Dios luxdoo, bën yu' tëe ree xquiarguejn, din yazuj reeman güün reeman dxiin guin. ⁴ Guiáad dunujn yasnuu yarejdx yanaaban Dios, yalüü tëen xtiidxaman.

⁵ Graczi reeman cwëjb ni rëb reeman, abi' gulej reeman bën la Esteban, laaman rliadx Jesucrist guidib luxdooan, rniabee tëe xSprijt Dios luxdooan guidiblagaa. Gulej tëe reeman Felip, Prócoro, Nicanor, Timón, Parmenas në Nicolás bën zëed Antioquia, nëman bililadx ni rliadx ree bën Israel chi gadaman chililadx Jesucrist. ⁶ Dxel binë reeman laa reeman loy ree apóstoles guin, persi gurejdx gunab reeman Dios por laa reeman badxiib tëe yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhiey ree bën rliadx Jesucrist, në zien ree bixhioz Israel bililadx laaman.

Biniaaz Esteban

⁸ Dád gognë Dios Esteban badëe tëeman guialrniabee persi rünman zien loy milagr delant loy ree bejn. ⁹ Abi' bëlzi ree bën yadoo ni la Libertados në ree bën Cirene con ree bën Alejandria con ree bën niz Cilicia nëtëe ree bën zëed niz Asia, guzuloy cadildiidxnë reeman Esteban, ¹⁰ per ad gojct nadxi' reeman xtiidxaman guial cayagnë xSprijt Dios laaman. ¹¹ Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios në contr Moisejs. ¹² Zian been reeman persi bidxe'ch ree bën luguiedx guin, në ree bengol në ree mextr rülüü ley. Dxel gunaaz reeman Esteban, binë reeman laaman loy guxtis. ¹³ Gudiil tëe reeman bën basquiee ree persi rëb reeman loy ree guxtis guin:

—Ad rucwëëzt rnieeguidx xin guie xley Moisejs në yadoo Dios. ¹⁴ Dunujn ma bacaagdiajg rëbix guial Jesús xin Nazaret guse'nx dux yadooro' ree, guchara tëex costumbr basa'n Moisejs du loy ree.

¹⁵ Abi' guxtis guin ree në gra ree bën riga' yagaj, chi baguiaa reeman loy Esteban, baguiaa reeman najn zi'c tijb loy anjl.

7

Ni rëb Esteban loy ree guxtis

¹ Dxel bixhioz mazri zojbloj rniabee graczi ree bixhioz, gunabdiidxaman loy Esteban, rëbaman:

—¿Walin ya rëbil zian?

² Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bën yu' xanyabaa balüüloy loy dux bëngulal ree Abraham, chi gureman niz Mesopotamia chi gadaman chisob guiedx Harán. ³ Abi' rëb Dios lojman: “Basa'n ladxil në gra ree lasa'l, wej loy yuj ni gulün lüj.” ⁴ Dxel brii Abraham ladx ree bën Caldea bisobaman Harán. Chi güt xDadaman, dxel bidnë Dios Abraham loy guidxliuy guie lod nadxu' ree yan. ⁵ Per chi bi't Abraham guie, achetczy guidxliuy badëed Dios lojman, ni'czi tibda'n'an ad badëetaman. Per beenman promeys loy Abraham guial gudëeman guidxliuy guie lojman, dxel chi guiëtaman tia' ree xdiaaman laan, majsí chi rëb Dios zian, ad wayut xi'n Abraham. ⁶ Rëb tëe Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëe reeman laa reeman loy tajp gayuu ijz. ⁷ Per rëb tëe Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” ⁸ Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bën goc ree dux bëngulal ree.

⁹ Bën goc ree dux bëngulal ree gudëdloy reeman Xiëb bën naj bijch reeman, abi' bato' reeman laaman loy ree bën zë Egipto, per ad guro'nladxt Dios laaman, ¹⁰ gognëman laaman loy ni guzagdiajman badëe tëeman xquiarguejnman, gognë tëeman laaman persi biajb rey guin laaman zagdx, abi' beenman laaman gobernador Egipto, bazuj tëeman laaman din nabeeman gra ni rajp rey guin.

¹¹ Chi guyu gubijn guidibczí Egipto në niz Canaán, dxel guzagdiaj da't ree dux béngulal ree guial achet ni gaw reeman. ¹² Per chi gogbee Jacob guial yu' trigo Egipto, guxhaal ree xi'nman Bén naj dux béngulal ree, dxel wej reeman Egipto. ¹³ Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëédaman. ¹⁴ Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. ¹⁵ Zianan zeel hisob Jacob Egipto, ni gütaman ni gajc güt ree xi'nman, dux béngulal ree. ¹⁶ Gojc xchej dxel bigné reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

¹⁷ Chi ma zidyob tiamp gac ni rëb Dios loj Abraham, zien ree Bén Israel ma gojcxhie Egipto. ¹⁸ Abi' guzuloj gunabee rey ren Egipto, Bén ad beenbeet Xiëb. ¹⁹ Rey zii basagzi Bén du ladx ree, gunabeeman chigsëëb reeman xindo niguiaaw golnej ree din guiët reex. ²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. ²¹ Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. ²² Basiid Moisejs gra ni rajc ree Bén Egipto, abi' lasajc ni guneex ni been tëëx.

²³ Chi guyu Moisejs tiuu ijz, bidyajb gujcaman bignaj lasa' Bén Israelaman. ²⁴ Abi' chi baguiaaman caguin tijb Bén Egipto tijb Bén Israel, balajman laaman, bagüjtaman Bén Egipto guin. ²⁵ Naladx Moisejs niagbee ree Bén Israel guial por laaman yabëë Dios laa reeman loj ree Bén Egipto, per ad gogbeet reeman. ²⁶ Chi bareguiaal, bidxaagloj Moisejs tio'p ree Bén Israel caga'p reeman, abi' guyënnan nabe'cdxeman laa reeman, rëbaman: “¿Chexc zeel rdilidi? Awa Bén Israel naj gropidi.” ²⁷ Abi' Bén caguin Bén zatijb guin bacadxaman Moisejs, rëbaman: “¿Chu bazuj lüj din nabeel dunujn, din na tëël ni rayal yaguieenan? ²⁸ ¿Wen rënl ya gugüjtíl naj zi'c bagüjtíl Bén Egipto ni nieey?” ²⁹ Chi biguiejn Moisejs ni rëb Bén guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

³⁰ Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. ³¹ Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman: ³² “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxebaman, ad bayaxtaman nuguaaaman bajl guin. ³³ Dxel rëb Dios lojman: “Gulëë xgurëchil, din nagle' lod za'l. ³⁴ Naj cuguia xhienaag cazagdiaj ree da bejnan Egipto, rigujejnan roon reeman zeel biguia'tan din yabén laa reeman. Yan, guda din gaxhalan lüj Egipto.”

³⁵ Abi' majsi ad guyënt ree Bén Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloj loj bajl guin, badëëd Dios guialrniabee lojman, abi' guxhaalaman laaman din güünman laa reeman yudar yari reeman Egipto, zi'c rëb anjl balüüloj lojman loj yag caye'c. ³⁶ Moisejs guin naj Bén babëë dux béngulal ree Egipto, been tëëman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. ³⁷ Laagajc tëëman rëb loj ree Bén Israel: “Loj gajquidi cwe Dios tijb Bén gudëëd xtiidxaman loj ree bejn zi'c guleman naj. Gol baszoob xtiidxaman.” ³⁸ Dxel chi guzunë Moisejs dux béngulal ree niz loj yujbidx, laaman naj Bén guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ Per dux béngulal ree ad bazoob reeman xtiidx Moisejs. Ad guyënt reeman niniabee-man laa reeman, tib guyuguijzi reeman nayejc reeman Egipto. ⁴⁰ Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczi Moisejs Bén babëë dunuj ree Egipto.” ⁴¹ Dxel been reeman tijb go'ndobëz din gaquib xdiós reeman. Bagüjt reeman be ree persi badëëd reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴² Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree Bén badëëd xtiidxaman loj ree bejn, lod rëb:

Bén Israel, loj tiuu ijz ni guzudi loj yujbidx,

¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biala tëëdi lidxan, në xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

⁴⁴ Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. ⁴⁵ Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidné reeman yadoo guin chi gudil reeman guijc guidxliuj con ree Bén ren, abi' gognë

Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi. ⁴⁶ Guyën Dios rey Davi, abi' laaman guyënman rüjnman tijb yadoo par Dios, bën naj dux Dios ree nayajc ree bën Israel. ⁴⁷ Per rey Salomón naj bën been laan, ⁴⁸ majsi Dios bën yu' xanyabaa ad rbejtaman lën yadoo ni rüjn ree bejn, zi'c rëb bën badëed xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabee, guiaad loj guidxliuj naj lod ruzu guia'n.

¿Xhienaag gac yu güüdi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ 'Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëetidi chignia'di, zianczi za'di contr xSprijt Dios, zi'cgajc been ree xbëngulalidi. ⁵² ¿Chu bën badëed xtiidx Dios loj ree bejn ad beennaat ree xbëngulalidi? Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëedi güjtaman. ⁵³ Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman. ⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëeman Jesús za'man xladbee Dios. ⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tëen Bën guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman signaaz reeman Esteban, ⁵⁸ babëë reeman laaman loj ciuda guin, bicüjt reeman laaman con guiaj, guiaad xab reeman basa'nsii reeman loj xinguiag la Saulo persi canajxan. ⁵⁹ La'tgaj cucaaguiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwentiil dol cayüjn ree bën guin yan.

Naabczi gulox rëbaman zian, laa güt gajcaman.

8

Guzunal Saulo bën rliiladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bën Jerusalén ree bën rliiladx ree Jesucrist, dxel bire'ch reeman guidib niz Judea në niz Samaria, bën najzi ree apóstoles baya'n. ² Guyu bëlzi ree xinza'c, laa reex biquie'ch Esteban, abi' dád biin reex guijcaman. ³ Guiaad Saulo rzunalaman bën rliiladx ree Jesucrist, ruman yu yu din cwëë nagueijnman laa reeman, zi'c xinguiaw zi'c bëngunaa, persi rgu'man laa reeman ladxguuib.

Bacaagdiajg ree bën Samaria xtiidx Dios

⁴ Per bën bñii ree Jerusalén, lod zëtzti reeman rtie'ch reeman xtiidx Dios. ⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶ Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tëë reeman milagr ree ni rüjnman. ⁷ Zien ree bën nëjt tib lajt xcuerp bayüjn Felip, në ree bën ad rzat zagdxe, bayüjn tëëman bën yu' ree xindxab luxdoo abi' rbixdiaj reex rarii reex. ⁸ Zianan zeel babaa da't ree bën luguiedx zii.

⁹ Per luguiedx zii guyu tijb bën bñii laj Simón, diizd gocli rüjnman guialbidxaa persi rusquieeman bën Samaria ree, rüjnman bën lasajc. ¹⁰ Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp bën guie.

¹¹ Bidxga' reeman laaman guial ma gojc xchej cusquieeman laa reeman con guialbidxaa ni rüjnman. ¹² Per chi billiladx reeman ni rëb Felip xcwent xguialrniabee Dios në xcwent Jesucrist, zi'c ree xinguiaw zi'c ree bëngunaa gurobnijs reeman. ¹³ Xt në Simón bililadx gurobnijs tëëman, abi' ad riro'nladxtaman Felip radxa tëë lojman graløj ree milagr ruguiaaman rüjn Felip.

¹⁴ Chi gogbee ree apóstoles riga' Jerusalén guial ma bililadx ree bën Samaria xtiidx Dios, dxel guxhaal reeman Bëd con Waj ni. ¹⁵ Chi bidxin reeman, gurejdx gunab reeman Dios por ree bën Samaria bën ma rliiladx ree xtiidx Dios din chu' xSprijt Dios luxdoo reeman, ¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷ Dxel guxhoob yaa ree Bëd con Waj güjç reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree bèn guin guial caxhoob yaa ree apóstoles guin guijc reeman, dxel guyènman nudëëman milia loj reeman, ¹⁹ rëbaman:

—Në lon gol baneë guialrniabee guin din chi gaxhob yan chutëëz guijc bënan, në luxdooan chu' xSprijt Dios.

²⁰ Dxel badxi' Bëd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razaladx Dios. ²¹ Ad rayalt ad zajc tëët güünl zi'c raguieenan, din ni'quid zinaltl xnejz Dios. ²² Bayüjn xgab por ni mal beenl, gurejdx gunab tëë Dios, rupent güünman lüj perdon por ree xixgabmalil, ²³ din ragbeen ganax guialralen yu' luxdool, abi' dol guin naj ni rniabee lüj.

²⁴ Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree bèn guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxa'c Jesucrist.

Felip con bèn Etiopía

²⁶ Chi ma gudëd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

²⁷ Dxel brii Felip zëman. Runejz guin banaazaman tijb bèn Etiopía, najman bèn zojbloj guial laaman rgu'chaaw xmilia Candace, bèn naj reina Etiopía. Wejman Jerusalén big-najchi'man Dios, ²⁸ abi' ma bayunejzaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bèn badëëd xtiidx Dios loj ree bejn. ²⁹ Dxel rëb xSprijt Dios loj Felip:

—Bibig gajxh cwë' carrejt guin.

³⁰ Chi bibigaman, biguiejnman cayool bèn guin loj gui'ch bacaa Isaías. Dxel gunabdiidxa-man lojman rëbaman:

—Dad, çrignia'l ni cayoolil ya?

³¹ Badxi' bèn guinan rëbaman:

—çXoza chignia'n'an? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

³² Loj xtiidx Dios lod cayool bèn guin rëban:

Zi'c rinë reeman tijb xiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bèn gugaj guidxladib.

³³ Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

³⁴ Rëb bèn guin loj Felip:

—Guna sii, çchu xcwent rniee bèn bacaa diidx guie ree? çXcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxa'c Jesucrist lojman. ³⁶ Abi' chi gudëd reeman lod yu' nijs, dxel rëb bèn guin loj Felip:

—Guie yu' nijs. çNid zajc garobnijsan guie ya?

³⁷ Zeel rëb Felip lojman:

—Bal rliadxil guidib luxdool, zajcan.

Badxi' bèn guinan rëbaman:

—Rliadxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. ³⁹ Chi barii reeman lojnijs guin, loj hor zii gajc guidloj Felip binë xSprijt Dios laaman, abi' ad baguiaatri bèn guin laaman, per dád rabaaman zinal xnejzaman. ⁴⁰ Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxa'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guiáad Saulo ad rucwëëzt rdxe'chaman bèn rliadx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz, ² din gac tijb gui'ch din gac cheman lën ree yadoo Damasco chigdiilaman bèn rliadx ree Jesucrist, zi'c ree xinguaaw zi'c ree bëgunaa, din chignëman laa reeman ladxguiib

Jerusalén. ³ Per chi ma cadxinman gajxh guiedx Damasco, dxejlczi brii tijb guij xanyabaa balaan bacha' lod zéman. ⁴ Abi' bireeyujman, chi naga'man luyuj guin biguiejnman cha' bén rëb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶ Rnij Saulo guial tant bidxebaman, abi' rëbaman:

—Dad, ¿xhie rënl gûnan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

⁷ Abi' ree bën né Saulo dád bidxeb reeman guial biguiejn reeman cha' bejn, per achutczí baguaiaa reeman. ⁸ Chi bixchewan luyuj guin, baxhal lojman, ad rajctri ruguaiaaman. Dxel gunaaz reeman yaaman bignë reeman laaman Damasco. ⁹ Ni guzuman choon dxej, ad rajct ruguaiaaman, achetczí rawaman ache tëtëtzi rë'man.

¹⁰ Damasco gure tijb bën rliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, ¹² abi' zi'c rulüü cane'xhchaalix, baguaiaax guyu tijb bën la Ananías guxhoob yaaman guijquix persi baguaiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliladx ree lüj Jerusalén.

¹⁴ Yan zëëdix guie con xguialrniabee ree bixhioz rniabee ree bixhioz, din guiniaazix gra ree bën rliladx lüj.

¹⁵ Dxel rëb Jesucrist lojman:

—Wej, din naj gule laax din chiguie x da diidxan loj ree bën ad najt bën Israel, në loj ree rey, con nëgajc loj ree bën Israel. ¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lënu lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bën balüüloj lojl runejz lod zëëdil, laaman guxhaal naj din yaguaiaal, chu' tëë xSprijt Dios luxdool.

¹⁸ Loj hor gajc zi'c rulüü yu' xhie biquied guiaalojman abi' baguaiaaman stijb. Dxel guzuliman gurobnijssaman, ¹⁹ gudaw tëëman persi bayuman gojl. Dxel guzujman Damasco tio'p choon dxej con ree bën rliladx Jesucrist.

Gunee Saulo xtiidx Dios Damasco

²⁰ Dxel guzulioj gunee Saulo xtiidx Dios lën ree yadoo, rëbaman guial Jesucrist naj Xi'n Dios. ²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëëd guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo, ²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. ²⁵ Per ree bën rliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist. ²⁷ Dxel binë Bernabé laaman loj ree apóstoles guin, bagojnman guial baguaiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee

Saulo xtiidx Jesucrist sin guialrdxeb. ²⁸ Zian baya'n Saulo Jerusalén abi' nayuman laa reeman. ²⁹ Ad rdxebtaman ruza'taman Dad Jesús, abi' xt gudijldiidxnëman bën Israel rníee ree diidx grieg, per guyën reeman nugüjt reeman laaman. ³⁰ Chi gogbee ree bën rliidx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bën rliidx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaaq naj xnejz Dios, bazoob tēë reeman xtiidxaman, abi' cayagnë xSprijt Dios cayajcxhiey reeman.

Bayajc Eneas

³² Chi biza Béd bitixlojman bën rliidx ree Jesucrist, dxel wej gajcaman bitixlojman bën rliidx ree Jesucrist guiedx Lida. ³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajt rzax. ³⁴ Abi' rëb Béd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. ³⁵ Chi baguiaa gra ree bën zojb guiedx Lida në ree bën zojb niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶ Loj tiamp zii guyu tijb béngunaa rliidx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēëman yudar bënprob ree. ³⁷ Lën ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënú ladya. ³⁸ Abi' gajxh guiedx Jope raya'n guiedx Lida lod za' Béd. Chi gogbee ree bën rliidx Jesucrist guial za'man ni, guxhaal reeman tio'p ree xinguaaw bisajc reex Béd liaadx, rëb reex:

—Been wen yo' ree Jope yan gajczi.

³⁹ Laa zinë gajcaman laa reex. Chi bidxinman, binë reeman laaman lënú lod naga' xcuerp Dorcas. Ni riga' zien ree béngunaa bizëyb roon reeman, abi' bibig reeman loj Béd culüü reeman gra lajd ni been Dorcas chi sta nabanman. ⁴⁰ Dxel gunabee Béd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—jTabita, bixche!

Laa guxhal gajc lojman. Chi baguiaaman Béd, gureliman, ⁴¹ dxel gunaaz Béd yaaman persi guzuliman. Abi' gurejdxaman bën rliidx ree Jesucrist con ree bën bizëyb guin, persi baguiaa reeman guial ma baban Dorcas. ⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian. ⁴³ Guiáad Béd baya'nman mazri dxej luguiedx guin, lidx Simón bën rüjnchaaw guid.

10

Wej Béd lidx Cornel

¹ Luguiedx Cesarea gurej tijb bën brieri laj Cornel. Laaman goc suldad gunabee tibcwaaw ree suldad brieri laj Italiano. ² Gojcaman benza'c, laaman në gra ree bën zojb lidxaman guyën reeman Dios, abi' dád beenman yudar bën Israel ree, bën naj ree bënprob, në zianczi rbejdx rniabaman Dios. ³ Tijb dxej cost raca choon wadxe, guzajcaman zi'c ruluü cane'xhchaalaman. Zagdxeczi baguiaaman guyu tijb xi anjl Dios lënú lod za'man, abi' rëb anjl guin lojman:

—jCornel!

⁴ Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tēëman xhienaaq rüjnl yudar bënprob ree. ⁵ Guxhaal ree bën che luguiedx Jope din chica' reeman Simón, bën la gajc Béd. ⁶ Zojbaman lidx tijb bën la gajc Simón, bën rüjnchaaw guid, bën zojb gajxh ro' nijsdoo. Béd guin na ni rayal güünl.

⁷ Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rliidx tēëman Dios. ⁸ Gulox beman diidx loj reeman ni guzacaman, dxel guxhaalaman laa reeman Jope.

⁹ Chi bareguiaa, la'tgaj cadxin reeman gajxh Jope, cost garol dxej wë'p Béd guijc yu lod zojbaman din cwedx guiniabaman Dios. ¹⁰ Dád gulaanman, guyënman nijawman, per la'tgaj cayüjn reeman ni gawaman guzajcaman zi'c ruluü cane'xhchaalaman. ¹¹ Baguiaaman bixal xanyabaa abi' caguiajt zi'c tijb lajd narooxt lod za'man, naxii guidap xquinan. ¹² Loj lajd guin yu' gra loj ree be yu' tajp guia', në ree bëël, nëtëë ree be rzuj. ¹³ Dxel biguiejnman cha' bën rëb:

—Béd, bisu, bagüjt be gawil.

¹⁴ Per badxi' Béd laan rëbaman:

—Yajgui, Dad. Ad wayawtczan nidxuudx ni ad rayalt gaw bejn.

¹⁵ Abi' rëb cha' bën guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayè'p lajd guin xanyabaa stijb. ¹⁷ La'tgaj cayüjn Béd xgab xhie rën guièb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. ¹⁸ Chi bidxin reeman, gunabdiidx reeman bal ni zojb Simón bën la gajc Béd.

¹⁹ Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaaw raguiil lüj. ²⁰ Bisu, biguiajt binë reex, ad chu' luxdool tio'p, din naj guxhal laa reex.

²¹ Dxel baguiajt Béd lod za' ree bën guxhaal Cornel, abi' rëbaman loj reeman:

—Naj naj bën raguiilidi, çchexquiza zeel raguiilidi naj?

²² Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guièbil.

²³ Dxel badxe' Béd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën riladx ree Jesucrist binë laaman.

²⁴ Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. ²⁵ Chi bidxin Béd lidx Cornel, laa brii gajc Cornel bigchaaglojman laaman, dxel bazuxibaman loj Béd persi gojpaman laaman respejt. ²⁶ Per bazuli Béd laaman, rëbaman:

—Guzuli, din lasa' bejn gajcan lüj.

²⁷ La'tgaj cadxin reeman ruyu cayü reeman diidx. Abi' chi guyu reeman, baguiaa Béd zien da't ree bejn riga' ni. ²⁸ Dxel rëb Béd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutczzi rayal ganen bendxuudx, bën nabixhladx. ²⁹ Zeel chi bidca' reeman naj, laa bial gajcan achet guijc badxiban. Yan rënan gagbeen, çchexquiza zeel gurejdxidi naj?

³⁰ Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaaban Dios, loj hor zii balüüloj tijb bejn lon najcwaman lajd nayni. ³¹ Abi' naman lon: “Cornel, ma bigueijn Dios xtiidxil, yu'guijc tēëman xhienaag rüjn yudar bënprob ree. ³² Zeel guxhaal ree xin che luguiedx la Jope din chica' reex Simón, bën la gajc Béd. Zojbaman lidx tijb bën la gajc Simón, bën rüjnchaaw guid, bën zojb gajxh ro'nijdsdo. Béd guin na ni rayal güünl.” ³³ Zianan zeel laa guxhal gajcan xin bidgadiil ree lüj. Zagdxee beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Béd lidx Cornel

³⁴ Dxel guzuloj canee Béd, rëbaman:

—Ma ragbeen yan guial tiblojzi ruguiaa Dios bejn. ³⁵ Din Dios, chutëz bēnguidxliuj ridxga' laaman rüjn tēëman zi'c rayal, nēgajc Dios ridxga' laaman. ³⁶ Dios ma gunee bën Israel ree, ma bagojnman guial por Jesucrist rabadxe luxdoo bejn, bën naj Dad par gra ree bēnguidxliuj. ³⁷ Lējt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobirojni. ³⁸ Ragbee tēëdi guial ma badëë Dios xSprijtaman con xguialrniabeeman loj Jesús bën Nazaret, abi' bizaman bigueienman ni zagdxee, bayüjnman gra ree bën cazagdiaj por xindxab. Gojc beenman zian guial za'në Dios laaman. ³⁹ Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. ⁴⁰ Per Dios basban laaman ni bayon dxej, abi' cwëjb Dios bidgalüülojman du lojn. ⁴¹ Ad balüülojtaman loj gra ree bejn, tijbzi du lojn nayajcan bën gule Dios diizd yaloj din yaguaan graczi ni beenman. Abi' dunujn badaawnë' laaman badü'në' tēën laaman chi babanman stijb. ⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadëëd gra ree bejn cwent loj Dios, zi'c ree bën naban zin ree bën ma güjt. ⁴³ Nētëë diizd gocli graczi ree bën badëëd xtiidx Dios loj ree bejn, gunee reeman xcwent Jesús, rëb reeman guial graczi ree bën chililadx laaman, gac xtol reeman perdon.

Guyu xSprijt Dios luxdoo ree bën ad najt bën Israel

⁴⁴ Sta canee Béd, chi guyu xSprijt Dios luxdoo gra ree bën cucaagdiajg ni cayëbaman.

⁴⁵ Dxel bën Israel riladx ree Jesucrist, bën binë ree Béd, dad badxa loj reeman guial në ree

bén ad najt ree bèn Israel guyu xSprijt Dios luxdoo, ⁴⁶ guial rigueijn reeman ma rniee ree bèn guin graløj ree diidx, abi' ruza't reeman Dios zagdxe. ⁴⁷ Dxel rëb Béd loj reeman:

—¿Chu zajc gudxoon tiobnijs ree bèn guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Béd din sunëman laa reeman za tio'p choon dxej mazri.

11

Guyu xSprijt Dios luxdoo ree bèn ad najt bèn Israel

¹ Bèn naj ree xi apóstoles Jesús con ree bèn Judea, bèn rililad ree laaman, gogbee reeman guial nê ree bèn ad najt bèn Israel bililad xtiidx Dios. ² Abi' chi badxin Béd Jerusalén, bèn Israel ma rililad ree Jesucrist, bèn sta zinal ree ley, gudilë reeman Béd. ³ Rëb reeman lojman:

—¿Chexc zeel bichu'l lidx ree bèn ad najt bèn Israel abi' gudawnël laa reeman?

⁴ Dxel guzuløj cayü Béd diidx guia'xchej xhienaag gojc zeel wejman lidx ree bèn guin abi' rëbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diidx xanyabaa xt lod za'n. ⁶ Chi baguian zagdxe xhie yu' loj lajd guin, baguian bedoxh ree nê ree be yu' tajp guia' nê ree bëël con ree be rzuj. ⁷ Dxel bigueijn cha' bejn, naman: “Béd, guzuli, bagüjt be gawil.” ⁸ Per badxi'nän rën: “Yajqui, Dad, din ad goctzi wayawan nidxuudx, ni ad rayalt gaw bejn.” ⁹ Abi' guneeman diidx xanyabaa stijb, naman: “Ni ma basia Dios, ad rnieelan nidxuudx.” ¹⁰ Choon volt gojc zian, dxel bayë'p gra ni guin xanyabaa. ¹¹ Loj hor zii gajc bi't choon ree xinguaaaw lod guren, zëäd reex diidx Cesarea, cayguuil reex naj. ¹² Abi' na xSprijt Dios lon guial chinë'n laa reex, ad chu' luxdon tio'p. Nê guixo'p ree bèn guie bèn naj dux compniar ree binë'n. Abi' dugraczan badxu' lidx bèn guin. ¹³ Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bèn che luguiedx Jope din chica' reeman Simón, bèn la gajc Béd, ¹⁴ laaman na xhienaag gac ree xtolil perdon, con gra ree bèn zojb lidxil.” ¹⁵ Chi guzuløj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶ Dxel basaładxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” ¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸ Chi bigueijn ree bèn guin ni rëb Béd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial nê ree bèn ad najt bèn Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblayaa delant lojman!

Bililadx ree bèn Antioquía Jesucrist

¹⁹ Chi mal bagüjt ree bejn Esteban, dxel guzuløj rzunal reeman bèn rililadx ree Jesucrist persi bire'ch gra ree bèn rililadx guin niz Fenicia, niz Chipre nê Antioquía. Abi' gutie'ch reeman xtiidxza'c Jesucrist, per ganaxzi loj ree bèn Israel. ²⁰ Per loj reeman no'ch bëlzi ree bèn Chipre nê ree bèn Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bèn ad najt bèn Israel. ²¹ Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

²² Chi gogbee ree bèn Jerusalén rililadx Jesucrist ni goc, guxhaal reeman Bernabé xt guiedx Antioquía. ²³ Chi bidxinan ni, dád babaaman chi baguiaaman xhienaag cayagnë Dios bèn guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. ²⁴ Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdooaman. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo. ²⁶ Chi badxejlamen laaman, dxel binëman laaman xt Antioquía. Ni guzunë reeman bèn rililadx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëlaj reeman bèn rililadx ree Jesucrist, cristian.

²⁷ Lën ree dxej zii bëlzi ree bèn badëë xtiidx Dios loj ree bejn, guza Jerusalén wej reeman Antioquía. ²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. ²⁹ Abi' ree bèn rililadx Jesucrist luguiedx Antioquia, baya'n reeman diidx din guido'p reeman zi'ctzi ni galguzuj gudëäd tijb gaj reeman, din gagnë lasa' reeman, bèn rililadx ree Jesucrist, bèn zojb ree niz Judea. ³⁰ Abi' zian been reeman. Dxel guxhaalnë

reeman laan Saulo con Bernabé din gudëed reeman laan loj ree bén rniabee ree bén rliadx Jesucrist niz Judea.

12

Guyu Béd ladxguuib

¹ Lèn ree dxej zii guzuloj rey Herodes cusagziman bëlzi ree bén rliadx Jesucrist. ² Abi' gunabeeman bagüjt reeman Jacob bijch Waj, con espad. ³ Chi baguiaaman bayuladx ree bén Israel ni beenman, dxel gunabeeman gunaaz reeman Béd. Ni ne goc lèn ree dxej lanij pascw chi raw reeman guiadxtil ad yu't levadur. ⁴ Chi gunaaz reeman Béd, badxe' reeman laaman ladxguuib abi' gunabee rey Herodes tajp cwaa ree suldad din guinia reeman ro' ladxguuib guin, tib cwaa gaj reeman naj tajp suldad. Din beenman xgab nuzujman Béd loj ree bén guiedx guin chi nidéd pascw. ⁵ Zian guyu Béd ladxguuib, gojp da't reeman laaman. Per gra ree bén rliadx Jesucrist ad rucwëzt rbejdx rniab reeman Dios por laaman.

Babëe Dios Béd ladxguuib

⁶ Guxhin zii gajc chi yareguiaal cwëe Herodes Béd loj ree bén guiedx guin, naga'yëjs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguuib guin. ⁷ Dxejzci bidxin tijb xi anjl Dios abi' basni tijb guij lèn ladxguuib guin, dxel baqui' anjl guin cwë'lèn Béd persi bacwëenman laaman, rëbaman lojman:

—¡Cari bixche!

Loj hor zii gajc biajb ree caden naxii yaa Béd, ⁸ abi' rëb anjl guin lojman:

—Guxhiidxi'ch lënl balëe tëë xgurëchil.

Chi ma been Béd zian dxel rëb anjl guin:

—¡Gojt xcajpil, tanal naj!

⁹ Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman. ¹⁰ Abi' gudéd reeman loj tibcwaa ree suldad guin, dxel gudéd reeman loj stibcwaa reeman. Chi bidxin reeman ro' portguuib ni rarii runejz guin, dxel xtijbzana bixal abi' barii reeman. Abi' chi bidxin reeman tijb xquin, yagaj basa'n anjl guin Béd. ¹¹ Dxel gogbee Béd guial ni diidxliqui naj ni cazajcaman, abi' rëbaman: —Yanri ma ragbeen guial guxhaal xi anjl Dios persi babëeman naj loj Herodes, con loj gra ni nujnë ree bén Israel naj.

¹² Chi bayagbee Béd ni guzacaman, dxel baguiajman lidx Li, xníaa Waj, bén la gajc Marcw, lod riga' zien ree bejn cabejdx canab reeman Dios. ¹³ Chi gulajw Béd ro' port, dxel brii tijb biin la Rode ziquiaam chunin. ¹⁴ Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin. ¹⁵ Abi' rëb reeman lojman:

—¡Rajc guijquil!

Per za'dxi'chczim guial waliqui ni rëbim. Dxel rëb reeman lojman:

—Ad laataman, wed xi anjlaman.

¹⁶ Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷ Abi' been Béd sen loj reeman din yawwëz ro' reeman, dxel beman diidx xhienaag babëe Dios laaman ladxguuib. Abi' rëbaman loj reeman:

—Gol be ni guie loj Jacob në loj gra ree bén rliadx Jesucrist.

Dxelri briiman yagaj zëman lood ren.

¹⁸ Chi bareguiaa, ad radxejlt xhie güün ree suldad guin guial ad ragbeet reeman xhienaag barii Béd ladxguuib guin. ¹⁹ Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bén Tiro në ree bén Sidón, per baya'n ree bén guin diidx din chigneenë reeman laaman. Chi been reeman gan guneenë reeman bén brii laj Blasto zagdxe, tijb bén naj xbejn rey Herodes, dxel gunee Blasto por laa reeman loj rey guin din lox til reeman, din guidibzci lod rniabee rey guin zëed ni raw reeman. ²¹ Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj xyagxhilaan lod rniabeeman, zianz guzuloj guneenëman laa reeman. ²² Dxel guzuloj gurixdiaj ree bén guin, rëb reeman:

—¡Ad bejntan canee, tijb diosan!

²³ Loj hor zii gajc badëe tijb xi anjl Dios tijb guialgujdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

²⁴ Per xtiidx Dios care'chzi care'chan gra ladczi abi' gra ladczi cayajcxhiey ree b́en rliadx laaman.

²⁵ Chi ma badëed ree Bernabé con Saulo ni guxhaal ree b́en Antioquía, dxel baza reeman Jerusalén, biné reeman Waj, b́en la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree b́en rliadx Jesucrist, b́en zobj ree Antioquía, no'ch ree b́en rudëed xtiidx Dios loj ree bejn né ree b́en rülüü xtiidxaman. La reeman Bernabé, Simón b́en rníee reeman Benya's, Lucio b́en Cirene, Saulo con Manaén b́en guni'snë Herodes tijbzi, b́en gunabee Galilea. ² Tijb dxej chi naba'n reeman, la'tgaj cabejdx canab reeman cuza't tëe reeman Dios zagdxe, rëb xSprijt Dios loj reeman:

—Gol bacaabee Bernabé né Saulo din güün reeman dxiin rënan güün reeman.

³ Chi gulox guba'n reeman gurejdx tëe reeman Dios, dxel guxhoob yaa reeman guijc Bernabé con Saulo din gagnë Dios laa reeman abi' bazaadiidxnë reeman laa reeman.

Bernabé con Saulo wej reeman Chipre

⁴ XSprijt Dios naj b́en guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo. ⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree b́en Israel. Nè Waj biné reeman din güünman laa reeman yudar. ⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb b́en Israel laman Barjesús, rajcaman guialbidxaa, rusquieeman bejn ree, rëbaman guial laaman naj b́en rudëed xtiidx Dios loj ree bejn. ⁷ Barjesús guin rníeenëman Sergio Paulo zagdxe, b́en naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiagaman xtiidx Dios. ⁸ Per b́enbidxaa guin (con diidx grieg laman Elímas) guyënman nudxoonman guial nililadx Sergio Paulo xtiidx Dios. ⁹ Abi' Saulo, b́en la gajc Pab, rniabee xSprijt Dios luxdooan guidiblagaa, baguiaadxijchaman loj b́enbidxaa guin, ¹⁰ rëbaman:

—¡xi'n xindxab lüj, ganax rusquieel, ganax niguijdx rüjn!, ad rëntczil ni zagdxe! ¿xt goc gudëel mod chinal ree bejn xnejx nali Dios? ¹¹ Yan gudëed Dios lüj casti: ad zanit lojl abi' xchej ad zuguiaatil xbacha' gubjidx.

Loj hor zii gajc gurexajc Elímas abi' ad gojctri nuguaaaman, dxel raguiilaman chu guiniaaz yaaman guial ad rajctri ruguaaaman. ¹² Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. ¹⁴ Dxel barii reeman guiedx Perge, zë reeman luguiedx Antioquía ni riga' niz Pisidia. Abi' dxej razililadx ree b́en Israel, guyu reeman lën xyadoo ree b́en Israel zianz gurej reeman. ¹⁵ Dxel chi gulox biil b́en biil tib lajt loj libr bacaa Moisejs né loj libr bacaa ree b́en badëe xtiidx Dios loj ree bejn, gunee ree b́en rniabee lën yadoo guin, rëb reeman loj Pab con Bernabé:

—Bal xhie guiëbidi loj ree b́en riga' guie din gudëedi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëez ro' reeman, dxel rëbaman:

—Bén Israel, né gra ree b́en rdxeb Dios, gol bacaagdiagj: ¹⁷ Dux Dios ree, nayajc ree b́en Israel, gulejman dux b́engulal ree abi' laaman been persi gojcxhiey reeman, chi sta zobj reeman zi'c benzit niz Egipto. Dxel con xguialrniabeeman babëeman laa reeman Egipto. ¹⁸ Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, ¹⁹ banijt tëeman gajdx ree nacion ni gure Canaán persi badëeman guidxliuj guin ree loj dux b́engulal ree. ²⁰ Zian gojc loj tajp gayuu garol ijz, dxelri bacaaabee Dios juejs ree persi gunabee reeman laa reeman. Abi' Samuel b́en badëed xtiidx Dios loj ree bejn gojc xjuejs bigra reeman. ²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, b́en zëed loj xdiaa Benjamín persi gunabeeman laa reeman tiuu ijz. ²² Chi bisüd Dios rey Saúl, dxel bazujman rey Davi. Abi' rëbaman: “Ma baguiian guial Davi xi'n Isai, nanax zi'c rënan, güün tëex cumplid da diidxan guial güünx gra zi'c rënan.” ²³ Abi' yan zi'c gajczi rëb Dios, loj gajc xdiaa rey Davi, b́rii Jesús b́en guxhaalaman din yabëeman b́en Israel ree loj dol. ²⁴ Chi gad Jesús gui't, Waj b́en baroobnijs bejn ree, bagojnman gra ree b́en Israel guial rayal yayüjn reeman xgab por xtol reeman tiobnijs tëe reeman. ²⁵ Chi ma zidyob yadiblagaa xguialnaban Waj, dxel rëbaman: “Ad najtan b́en naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

²⁶ Yan, dugra ree nayajc ree xdiaa Abraham në gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. ²⁷ Per ree bën Jerusalén con ree xguxtis reeman ad bayagbeet reeman Jesús. Ad gogbee tēët reeman xhie rēn guiēb xtiidx Dios ni bacaa ree bën badëëd ree xtiidxaman loj ree bejn, ni rool reeman lēn yadoo dxej razilladx ree bejn, dxel laagajc reeman bagūjt Jesús, zian gojc cumplid ni ca loj xtiidx Dios. ²⁸ Abi' majsi achetctzi xtol Jesús guyu, per ni'czi zian rēb gajc reeman loj Pilato guial nabeeman guiētaman. ²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crūjz abi' baquie'ch reeman laaman. ³⁰ Per Dios basban laaman, ³¹ dxel loj zien dxej balūūlojman loj ree bën binē laaman chi briiman niz Galilea zēman Jerusalén, abi' yan laa reeman naj bēn rniee por laaman loj ree bejn.

³² Zeel caygojnan lējt diidxza'c guin ree, guial promejs been Dios loj ree dux bēngulal ree, ³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rēb: "Lūj naj da xi'nān abi' diidx yan ma rajpil guialrniabee zi'cgajc naj." ³⁴ Dios rēb guial yasbanman Jesús abi' ad xaxint xcuerpaman zi'c gajczi ca loj xtiidx Dios lod rēb: "Naj gūnle' lējt zi'c benan promejs loj Davi." ³⁵ Abi' rēb tēē stib lajt loj xtiidxaman: "Ad zatiējbtih xhin xcuerp xi'nl, bēn naya nali." ³⁶ Yan diidxliczi diidx guin ree ad rnieet ree xcwent Davi, din chi gulox gunabeeman bejn ree xtiampaman zi'c rēb Dios nabeeman, dxel gūjtaman, biguie'chaman abi' guxin xcuerpaman. ³⁷ Per xcuerp Jesús bēn basban Dios, ad guxintan. ³⁸ Zeel caygojnan lējt compniar din gagbeedi guial por laaman ma yu' perdon par dux tol ree. ³⁹ Graczi bēn rliiladx Jesucrist ma gojc perdon gra xtol reeman ni ad gojct niqj perdon por ley badëë Dios loj Moisejs. ⁴⁰ Zeel gol gojpc cudad chitēē saquidi zi'c bacaa ree bēn badëë xtiidx Dios loj ree bejn, lod rēb:

⁴¹ Gol bacaagdiajg, lējt bēn ruze' ree da diidxan,

gol badxalojdi gol guinidloj tēē.

Din loj ree dxej nabandi gūn reen ni xt ni'quid zaliladxtidi,

majsi chu na laa reen lojdi.

⁴² Chi barii Pab con Bernabé lēn xyadoo ree bēn Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. ⁴³ Chi barii ree bēn guin lēn yado guin, zien da't reeman binal Pab con Bernabé, zi'c ree bēn Israel zi'c ree bēn ad najt bēn Israel, bēn rēn ree Dios zi'cgajc ree bēn Israel. Abi' rēb Pab con Bernabé loj reeman din sudxi'ch reeman loj nejz zagdx guredx Dios laa reeman guial rēnman laa reeman.

⁴⁴ Chi bidxin dxej ni raziiladx ree bejn, gra bēn luguiedx guin bado'p din gucaagdiajg reeman xtiidx Dios. ⁴⁵ Per chi baguiaa ree bēn Israel zien da't ree bejn riga' yagaj, dxel guyu guialnadēdloj luxdoo reeman abi' guzuloj canee guijdx reeman canee tēē reeman diidxguijdx loj Pab. ⁴⁶ Dxel sin guialrdxeb badxi' Paban con Bernabé loj reeman, rēb reeman:

—Yaloj lējt rayal yagojnan xtiidxza'c Dios, lējt najdi bēn Israel, per yan ad rēntidi gucaagdiajgudi laan, dxel lējt gajc culūū guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree bēn ad najt bēn Israel. ⁴⁷ Din zian gunabee dux Dad ree Dios dunujn, chi rēbaman tib lajt loj xtiidxaman:

Nuzun lūj zi'c guij par gra ree nacion,

din chel guidibchicniaa loj guidxliuj chicojnl

xhienaag gac ree bejn perdon.

⁴⁸ Chi biguiejn ree bēn ad najt bēn Israel zian, dxel babaa reeman, guzuloj rēb reeman guial zagdx naj xtiidx Dios, abi' graczi bēn ma naj yayal guialnaban tiblayaa con Dios, bililadx reeman xtiidxaman. ⁴⁹ Zianan zeel bire'ch xtiidxza'c Dios guidib niz ni. ⁵⁰ Per ree bēn Israel batiaalguuiw reeman bēngunaa rej ree laydoo zianczi naj tēē reeman bēn zojbloy luguiedx zii, nē ree xinguaaw naj gajc xin zojbloy, din sunal reeman Pab con Bernabé xt yabëë reeman laa reeman ni. ⁵¹ Dxel Pab con Bernabé gudxijp guxyuj guia' reeman zi'c tijb sen guial ad bazooft ree bēn guin diidx, dxel zē reeman Iconio. ⁵² Per ree bēn bililadx Jesús niz ni, ma rniabee xSprijt Dios luxdoo reeman guidiblagaa abi' dād rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman lēn xyadoo ree bēn Israel. Abi' zi'c balūū reeman xtiidxza'c Jesucrist, zien da't reeman bililadx, zi'c ree bēn Israel zi'c ree bēn ad najt bēn Israel. ² Per ree bēn Israel ad bililadxt batiaalguuiw reeman bēn ad najt ree bēn Israel persi guzuloj been reeman xgab mal por ree bēn rliiladx Jesucrist. ³ Per ni'czi

zian, xchej da't guzuj ree apóstoles guin ni, abi' sin gualrdxeb gunee reeman xtiidx Dios guial rliiladx reeman Jesucrist, laaman badëéd gualrniabee loj reeman persi been reeman zien da't ree milagr né mazri ree ni ren, persi balüü Jesucrist guial diidxli naj ni rëb reeman xcwent Dios. ⁴Per ree bën luguiedx zii gojc reeman tio'p lala', garol reeman guzunë ree bën Israel zagarol reeman guzunë apóstoles guin ree. ⁵Dxel zi'c ree bën Israel zi'c ree bën ad najt bën Israel, baya'n reeman diidx con ree guxtis din tilë reeman Pab con Bernabé gucaaguiaj tëë reeman laa reeman. ⁶Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni, ⁷gunee reeman xtiidxza'c Jesucrist.

Bacaaguiaj reeman Pab Listra

⁸Luguiedx Listra guyu tijb xinguaaw ad rajct rza, ad guzatzcix guial naxin guia'x diidx chi golix abi' zojbix ⁹cucaagdiagujx ni rëb Pab. Chi baguiaa Pab laax, gogbeeman guial rliiladxix par yayajquix. ¹⁰Abi' guneeman rejs, rëbaman:

—jBisu, guzuli zagdx!

Loj hor zii gajc gutiajs xin guin, guzulix abi' guzuloj cazax. ¹¹Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹²Abi' rëb reeman guial Bernabé naj dios Júpiter, guiaad Pab naj dios Mercurio guial laaman naj bën rniee loj reeman. ¹³Abi' ro' guiedx guin niz lod ru bejn naj xyadoo Júpiter, dxel bixhioz yu'lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. ¹⁴Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

¹⁵—Gol bacaagdiag, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanán lojdi din yasa'ndi ni rüjndi, din achetctzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. ¹⁶Tiamp gulal Dios baslaa been ree bejn ni guyëntzi reeman. ¹⁷Per ni'czi zian, zianctzi balüüman chu najman por ree ni zagdx ni rüjman. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdx. ¹⁸Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹Per bëlzi ree bën Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bën luguiedx guin ree. Dxel bacaaguiaj reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. ²⁰Per chi bido'p ree bën rliiladx Jesucrist gadëd lod naga'man, dxel bixcheman, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. ²²Luguiedx zii ree badxe' reeman luxdoo ree bën rliiladx Jesucrist. Rëb reeman loj reeman din sudxi'ch reeman loj ni rliiladx reeman laaman, din dad sagdiaj reeman din yayu reeman lod rniabee Dios. ²³Abi' tëë loj tijb gaj ree guiedx guin bacaabee reeman bengol nabee ree loj ree bën rliiladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴Chi baza ree Pab con Bernabé niz Pisidia, bidxin reeman niz Panfilia. ²⁵Abi' gunee reeman xtiidx Dios luguiedx Perge, dxel zë reeman guiedx Atalia. ²⁶Ni guyu reeman loj barcw zë reeman Antioquía, luguiedx lod basa'n ree los demazri ree bën rliiladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxin guin naj ni ma baloox reeman. ²⁷Dxel chi bidxin reeman Antioquía, bato'p reeman bën rliiladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bën ad najt bën Israel Jesucrist. ²⁸Ni guzu Pab con Bernabé xchej, guzunë reeman bën Antioquía rliiladx ree Jesucrist.

15

Guyu gabilt Jerusalén

¹Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliiladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. ²Dxel Pab con Bernabé dad zro' gudijldiidx reeman con ree bën guin. Dxel bacaabee ree bën rliiladx Jesús Pab në Bernabé, në ree ben ren din che reeman

Jerusalén chigeneenē reeman apóstoles guin ree, con ree bengol rniabee loj ree bēn rliadx Jesucrist din guguiaa reeman xhienaag güün reeman xcwent sen guin.

³ Abi' badxe'nejz ree bēn Antioquía rliadx ree Jesucrist laa reeman persi zē reeman. Chi zē reeman gudēd reeman niz Fenicia nē niz Samaria abi' bagojn reeman bēn rliadx ree Jesucrist, bēn zobj ree niz ni guial ma rliadx ree bēn ad najt ree bēn Israel xtiidx Dios. Abi' grazci bēn ma rliadx Jesucrist niz ni, dád babaa reeman chi bigueijn reeman zian.

⁴ Chi bidxin Pab con Bernabé Jerusalén, dxel baca' ree bēn rliadx Jesucrist laa reeman, con ree apóstoles, con ree bengol rniabee loj ree bēn rliadx Jesucrist. Abi' be ree Pab diidx con Bernabé gra ni been Dios con laa reeman. ⁵ Per yu' ree bēnfarisew ma rliadx Jesucrist, guzuli reeman abi' rēb reeman:

—Bēn ad najt ree bēn Israel abi' ma rliadx reeman Jesucrist, rüjn naguiejn chu' reeman sen ru ree bēn Israel, gagbee tēē reeman guial rayal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree bēn rliadx Jesucrist din guidoon xhienaag güün reeman. ⁷ Guial tant canee reeman por zian, dxel guzuli Bēd, rēbaman loj reeman:

—Gradi compniar raliduladx ree Jesucrist, lējt ragbee guial diidx gocli gulej Dios naj lojdi din chignen xtiidxza'c Jesucrist loj ree bēn ad najt bēn Israel din chililadx reeman laaman.

⁸ Abi' Dios bēn nūbēe luxdoo graczi ree bejn, balüüman guial naj reeman xbejnman guial ma badēēd xSprijtaman loj reeman zi'cgajc baneeman du loj ree. ⁹ Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliadx reeman Jesucrist. ¹⁰ Yan, çhexec zeel ad ridxga'tidi ni ma been Dios abi'za rniabeedi chinal ree bēn rliadx Jesucrist ley ni ni'qui dunuj ree ni'qui dux bēngulal ree ad gojct naguieen ree zi'c rniabee ley guin? ¹¹ Dunuj ree rayagbee guial por ni zagdxē ni been Dad Jesucrist, been Dios dux tol ree perdon zi'cgajc laa reeman.

¹² Dxel bacwēz ro' gra reeman abi' bacaagdiagj reeman ni cayü ree Bernabé con Pab, xcwent gra ree xmilagr Dios ni been reeman loj ree bēn ad najt bēn Israel. ¹³ Chi gulox guneē reeman, dxel nēgajc Jacob rēb:

—Gradi compniar raliduladx ree Jesucrist, gol bacaagdiagj: ¹⁴ Simón Bēd be diidx duloj ree xhienaag guzulogj gulej Dios bēn ad najt ree bēn Israel din gac reeman xbejnman. ¹⁵ Gra ni ma gojc naj zi'c ni bacaa ree bēn badēē xtiidx Dios loj ree bejn loj xtiidxaman lod rēb:

¹⁶ Chi ma gojc zian,

yayünxhiey ree da bejnman mazri zi'c goc chi naban Davi,

gacxhiey reeman por ree bēn sta naban,

zi'c guban ree bejn xtiamp Davi

abi' por laa reeman yayajcxhiey ree da bejnman.

¹⁷ Din yaguiil ree los demazri ree bejn guial guiēn reeman naj,

gra ree bēn nacion ren, yaguiil guial guiēn reeman naj,

bēn ma gule reen din gac reeman da bejnman,

bēn guiguiejn ree guza't ree bejn naj.

¹⁸ Zian na Dios, bēn cugojn bejn ree gra ree nine diidx tiamp gulal.

¹⁹ Zeel naladxan ad rayalt chu güün naguiejn bēn ad najt ree bēn Israel par chinal reeman ley, laa reeman guial ma basa'n xcostumbr reeman par chinal reeman xnejz Dios.

²⁰ Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayalt tēēt sunē reeman ben ren bēn ad najt lacheel reeman, ad rayalt gaw reeman bēēl rberejn ni'qui rejn. ²¹ Zian yaguie'ch ree loj reeman, din diidx tiamp gulal tijb gaj guiedx yu' bēn ruliü laa reeman xhie rēn guiēb xley Moisejs ni rool reeman lēn ree yadoo dxēj raziiladx ree bejn.

²² Dxel apóstoles guin ree con ree bengol rniabee loj ree bēn rliadx Jesucrist, con los demazri ree bēn rliadx Jesucrist, rēb reeman gucaabee reeman bēn guixhiaalnē reeman Pab con Bernabé din che reeman Antioquía. Abi' bacaabee reeman Judas, bēn la gajc Barsabás, nē Silas, laa reeman rajp guialrniabee loj ree bēn rliadx Jesucrist. ²³ Abi' guxhaalnē reeman laa reeman tijb gui'ch ni rēb:

“Dunujn nayajcan xi apóstoles Jesús, con ree bengol rniabee loj ree bēn rliadx laaman, nē los demazri ree bēn rliadx laaman. Ragajpdiözan lējt bēn ad najt ree bēn Israel, per nayajc ree compniar raliduladx ree Jesucrist, lējt zobjidi Antioquía, nē los demazri ree bēn zobj ree niz Siria nētēē niz Cilicia. ²⁴ Ma bayagbeen guial yu' ree bēn duladxan brii sin dux tiidxbeen, abi' cagu'nawēēg reeman lējt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bēn Israel güün tēēdi zi'c rniabee xley Moisejs, per ad dunujtan baxhaal laa reeman. ²⁵ Zeel bado'pan abi' raguie'chan guial zagdxē naj yacaabee bēlzi dux compniaran din guidganaj reeman lējt, guidnē tēē reeman tio'p dux compniaran, Bernabé con Pab, bēn rayēn da'tan. ²⁶ Zien ree ni guijdx cuchaagloj reeman guial cayüjn reeman sirv loj Dad Jesucrist. ²⁷ Dxel cayxhaalnē'n laa

reeman Judas con Silas, laa reeman na lojdi gra con quijb xtiidx reeman. ²⁸ Abi' zi'c naj xgab bazaladx xSprijt Dios du lojn, dxel achetri naguiejn rijn yanabeen lëjt ni güüdi, ni rayalzi cu'guijquidi naj guial, ²⁹ ad gawidi xbëel ree be ni rbe'c ree bejn loj ni naj xdios reeman, ad gaw tëëdi bëël rberejn, ni'qui rejn, ad sunëdi ben ren bën ad naj lacheelidi. Bal gapidi cudad ad zjüntidi gra ree nine, zagdxequi güüdi. Gagnë Dios lëjt."

³⁰ Zian gojcan, gu'ch guin naj ni guxhaalnë reeman guidap ree bën guin par luguiedx Antioquia. Ni bato'p reeman bën rliidx ree Jesucrist abi' bayü reeman gui'ch guin loj reeman. ³¹ Chi biil reeman laan, dád nix guyu luxdoo reeman por ree diidx zagdxe ni zëëd lojn. ³² Abi' Judas con Silas guial nëgajc reeman rajp quiarגיעjn par gudëëd reeman xtiidx Dios, dxel zien naj ni guneenë reeman bën rliidx ree Jesucrist, bagu' reeman luxdoo reeman con xtiidx reeman. ³³ Chi ma gudëd zien dxej za' ree Judas con Silas ni, bazaadiidxnë ree bën rliidx Jesucrist laa reeman din yaguij reeman lod za' ree bën guxhaal laa reeman, rëb reeman loj reeman: "Chignë Dios lëjt zagdxe." ³⁴ Per Silas beenman xgab baya'nman ni mazri. ³⁵ Abi' Pab con Bernabë baya'n reeman Antioquia mazri, laa reeman con ree ben ren basnuu balüü reeman gutie'ch tëë reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudëd tio'p choon dxej, dxel rëb Pab loj Bernabë:

—Yo' stjib yugnaj dux compniar ree bën rliidx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabë guyën ninë reeman Waj, bën la gajc Marcw. ³⁸ Per Pab ad cwëjbt ninë reeman laaman, din chi we reeman niz Panfilia guro'nladxaman laa reeman, ad binëtraman laa reeman. ³⁹ Abi' ni'qui tijbaman ni'qui zatjibaman ad baya'nt conform, zianz gula' lasa' reeman. Dxel binë Bernabë Marcw, guyu reeman loj barcw zë reeman yuj la Chipre ni riga' loj nijsdoo, ⁴⁰ dxel gulej Pab Silas din chinëman laaman abi' rëb los demazri ree bën rliidx Jesucrist loj reeman guial chinë Dios laa reeman zagdxe. ⁴¹ Zianz gudëd reeman niz Siria në niz Cilicia, ragu' reeman luxdoo ree bën rliidx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe në guiedx Listra abi' Listra bidxaagloj reeman tijb bën rliidx Jesucrist, laman Timoteo, xniaanman naj bën Israel, nëman rliidx Jesucrist guiaá xdadaman naj bën grieg. ² Graczi ree bën rliidx Jesucrist, bën zojb ree guiedx Listra në Iconio ruza't laaman zagdxe. ³ Dxel rëb Pab chinëman Timoteo, per yaloj badxe'man laaman sen ni ru ree bën Israel, chitëë xhie guiëb ree bën Israel riga' niz ni, din gra reeman ragbee guial naj xDadaman bën grieg. ⁴ Graczi ree guiedx ni gudëd reeman bagojn reeman bën rliidx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rliidx laaman Jerusalén. ⁵ Zianan zeel guzudxi'ch ree bën niz ni loj guialrliidx reeman Jesucrist, abi' guixie guixie gojcxhie mazri ree bën rliidx laaman.

Baliüloj tijb bën Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia ⁷ abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. ⁸ Dxelri gudëdzinejz reeman niz Misia, bidxin reeman guiedx Troas. ⁹ Yagaj, guxhinzii guzajc Pab zi'c ruluü cane'xhchaalaman. Baguiaaman tijb xinguaaw zëëd niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. ¹² Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bëlzi ree dxej. ¹³ Abi' tijb dxej raziiladx ree bejn, bariin luguiedx guin bio'n tijb ruguiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxza'c Jesucrist loj ree bëngunaa bado'p yagaj. ¹⁴ Tijb ree bëngunaa guin la Lidia, najman bën Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman. Dios guxhal xquiarגיעjnman din gucaagdiajgaman zagdxe gra ni rëb Pab. ¹⁵ Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliidxidi guial ma rliidxan Jesucrist, gol baya'n lidxan.

Dxel beenman naguiejn baya'nan lidxaman.

¹⁶Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdooom, abi' por xguialrniabee xindxab guin rnieeya'm guiaád ree bèn guzii laam dád zro' milia rüjn reeman gan por dxiin guin. ¹⁷Dxel bidnalim Pab con dunujn, rbidxa'm rëbim:

—Bèn guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

¹⁸Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdooom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdooom.

¹⁹Per chi gogbee ree bèn guzii laam guial ad zajctri güünm gan milia par laa reeman, dxel gunaaaz reeman Pab con Silas, binë reeman laa reeman roylay loj guxtis. ²⁰Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, ²¹abi' ruluü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²²Dxel wajs gra ree bèn guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var. ²³Chi gulox gudijn da't reeman laa reeman, dxel bilu' reeman laa reeman ladxguuib abi' gunabee reeman bèn rajp ro' ladxguuib guin din gapdxi'chaman laa reeman. ²⁴Chi biguiejn bèn rajp ro' ladxguuib guin zian, dxel bilu'man laa reeman xt lën cuart bigra yu' lën ladxguuib guin, guxhiiman guia' reeman loj tabl naal con caden.

²⁵Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiaj los demazri ree bèn yu' ladxguuib guin. ²⁶Dxel tijbzi golp guzuloj xudoxh, niz ni niz guie rurlia xcimiant ladxguuib guin. Loj hor zii gajc bixal gra ree xpontan abi' baxiec ree caden naxii gra ree bèn yu' lënan. ²⁷Chi baban bèn rajp ro' ladxguuib guin abi' baguiaaman zobjyal gra ree xpontan, gulëë xi espadaman din nugüjt laagajcaman guial gunaladxaman gra ree bèn yu' ladxguuib guin ma baxüün. ²⁸Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹Laa gunab gajc bèn guin tijb guij, dxel ruxüünman guyuman, rniiman guial rdxebam, bigzuxibaman loj Pab në loj Silas. ³⁰Dxel babëëman laa reeman, gunabdiidxaman loj reeman, rëbaman:

—Dad, gol guna, çxhie rayal günan din güün Dios naj perdon?

³¹Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

³²Abi' be reeman xtiidx Dios lojman con loj gra ree bèn zobj lidxaman. ³³Zianz guxhin zii gajc gudiibaman lod nadxeelgudjdx reeman, dxel gurobnijsaman con gra xfamilaman. ³⁴Abi' bignëman laa reeman lidxaman, dxel badëëman ni gudaw reeman. Guiaád laaman dád nix yu' luxdoooman con gra xfamilaman Guial ma rliladx reeman Dios.

³⁵Chi bareguiaal, guxhaal ree guxtis guin suldad ree persi biguiedx reeman loj bèn rajp ro' ladxguuib guin guial guslaaman Pab con Silas. ³⁶Abi' rëb bèn rajp ro' ladxguuib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

³⁷Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bèn guiedx, ni'quid banet reeman mod nadëëdan cwent loj reeman con badxe' reeman dunujn ladxguuib. Abi' yan, çguslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

³⁸Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. ³⁹Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. ⁴⁰Chi barii reeman ladxguuib, wej reeman lidx Lidia. Zianz chi gulox guneenë reeman los demazri ree bèn rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

17

Bidxin ree Pab con Silas Tesalónica

¹Chi zë Pab con Silas, gudëd reeman niz Anfipolis në niz Apolonia zianz bidxin reeman luguiedx Tesalónica lod yu' tijb xyadoo ree bèn Israel. ²Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx

Dios. ³ Bagojnman balüü tēeman laa reeman loj xtiidx Dios lod rēb guial naj sagdiaj Cristo, abi' chi ma güjtaman yabanman stijb. Rēbaman loj reeman:

—Jesús ruzat gajcan lojdi, laagajcaman naj Cristo din yabēeman dunuj ree loj lod.

⁴ Yu' ree bēn Israel guin bililadx abi' bachajg reeman Pab con Silas. Nē zien ree bēn grieg rēn Dios bililadx, nētēē zien ree bēngunaa zobjbloj bililadx Jesús. ⁵ Per ree bēn Israel ad bililadxt Jesucrist, gudēdloj reeman abi' bato'p reeman benmal ziza ree lunejz persi gulēē reeman wadijl luguiedx guin, abi' guyu reeman lidx Jasón, raguuil reeman Pab con Silas din cwēē reeman laa reeman guzuj reeman laa reeman loj ree bēn guiedx guin. ⁶ Per guial ad badxejlt reeman laa reeman yagaj, dxel guxoobyuj reeman Jasón nē ree ben ren bēn rliiladx Jesucrist, binē reeman laa reeman loj guxtis, rbixdiaj reeman, rēb reeman:

—Tio'p ree xin cabēē wadijl guidib guidxliuj, ma bi't reex guie, ⁷ abi' lidx Jasón zobj reex. Laa reex con gra ree bēn nuchajg laa reex, ad cayüjnt reex zi'c rniabee xley rey César, din rēb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman. ⁹ Per Jasón con los demazri ree bēn guyu ladxguib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzi gajc, guxhaal ree bēn rliiladx Jesucrist Pab con Silas luguiedx Berea. Chi bidxin reeman ni, wej reeman lēn xyadoo ree bēn Israel. ¹¹ Mazri benza'c naj ree bēn Israel guin guial loj ree bēn Israel zobj Tesalónica. Con gan bacaagdiajg reeman ni rēb Pab. Abi' guixie guixie rusiid reeman xtiidx Dios, din gagbee reeman waliqui ni rēb Pab ya. ¹² Zeel dād zien reeman bililadx Jesucrist, nētēē zien bēn grieg bililadx laaman zi'c ree xinguaaw zi'c ree bēngunaa zobjloj niz ni. ¹³ Chi gogbee ree bēn Israel zobj Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiw reeman bejn ree din guidxe'ch reeman Pab. ¹⁴ Per ree bēn rliiladx Jesucrist ad goglaat reeman, laa guxhaal gajc reeman Pab niz ro' nijsdoo. Guiaad Silas con Timoteo baya'n reeman mazri Berea. ¹⁵ Abi' ree bēn biglu'nejz Pab, xt Atenas binē reeman laaman. Chi baza reeman ni, bignē reeman xruson Pab din diob che Atenas con Timoteo chinal reeman laaman.

Bidxin Pab Atenas

¹⁶ La'tgaj cabēz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. ¹⁷ Zeel wejman lēn xyadoo ree bēn Israel bigneenēman laa reeman nē los demazri ree bēn rēn Dios zi'c ree bēn Israel, guixie guixie rniēenēman chutēēz bēn rdxaglojman niz galay guiedx guin. ¹⁸ Guneenē tēeman garol ree bēn zinal ni balüü bēn brii laj epicureo, nē za garol ree bēn estoicos. Abi' yu' reeman rēb:

—¿Xhienin rniee xin guin zeel rniee da'tix?

Yu' tēē reeman rēb:

—Rulüü xtiidx dios ren ree bēn ad nagueienbeet ree catie'chix.

Rēb reeman zian guial caneenē Pab laa reeman xtiidxza'c Jesucrist nē xcwent guial babanman stijb. ¹⁹ Dxel binē reeman Pab tijb luar la Areópago, lod rado'p reeman. Abi' gunabdiidx reeman lojman, rēb reeman:

—¿Zajc nal ya xhie ree nicüb guin zidgalüül niz guie? ²⁰ Din rül diidx du lojn ni ad rayagbeetan, zeel rayēnan yayagbeen xhie rēn guiēban.

²¹ Graczi ree bēn Atenas, con los demazri ree benzit zobj ni, zianczi za' reeman zian. Ruladx reeman tēd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópago, rēbaman:

—Bēn Atenas, por graczi ni ma baguian, ma gogbeen guial dād zien ree xdiosidi. ²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rēb: “Par Dios ad nagueienbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa nē loj guidxliuj. Ad za'taman lēn yadoo ni rüjn ree bejn. ²⁵ Ad riaadx tēētaman chu güün xhienin par laaman, din laaman naj bēn razaladx bi nabajnnē' ree, laaman razaladx guialnaban duloj ree nē ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tēē cwe reeman. ²⁷ Din yaguuil reeman Dios majszi zi'c chi rgan bejn chi raguuilaman xhienin, zian güün reeman din yadxejlaman. Majszi diidxliczi ad zijtt za'man par gra bejn. ²⁸ Din por Dios nabajn ree, por laaman raniib ree radxoo tēē ree, por laaman nadxu' ree loj guidxliuj. Zi'c rēb tēē ree xbēnrignia'di, chi rēb reeman: “Dunuj ree nayajc xi'n Dios.” ²⁹ Zeel bal nayajc ree xi'n Dios, ad rayalt yaguieen ree xgab guial Dios najnē or, o plajt, o guiaj ya zi'c naj ni rüjn ree bejn

zi'c naj xixgab reeman. ³⁰ Tiamp gulal cwëjb Dios been ree bejn zi'c naladx reeman guial achetzi ragbee reeman, per yan gra ladczi canabeeman gra ree bejn din yayüjn reeman xgab por xtol reeman. ³¹ Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³² Chi biguejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—[Zatijb dxej yasnuu yacaagdiajgan ni canal!

³³ Dxel baza Pab lod za' reeman. ³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zojbloj lën Areópago laman Dionisio, nè stijb béngunaa la Dámaris nè ree ben ren.

18

Bidxin Pab Corinto

¹ Dxel brii Pab Atenas zëman Corinto. ² Yagaj bidxaaglojman tijb bën Ponto laman Aquila, zëédaman diaa Israel. Aquila con xbéngunaaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman.

³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. ⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balüü tëëman bën Israel ree guial Jesús naj Cristo bën cabëz reeman. ⁶ Per guzuloj bidxe'ch reeman Pab abi' guneee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. ⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Nè zien ree bën Corinto bililadx chi biguejn reeman xtiidx Jesucrist abi' gurobnijs reeman. ⁹ Tijb guxhin balüüloj Dios loj Pab, rëbaman lojman:

—Ad rdxebil, basnuu guneee da diidxan, ad gucwëëzil, ¹⁰ naj za'në' lüj, achutczzi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bën guin ree xtiidx Dios.

¹² Per chi goc Galión gubernador Acaya, bën Israel ree bachajg lasa' reeman persi gunaaz reeman Pab binë reeman laaman loj gubernador guin, ¹³ rëb reeman loj gubernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma niniee Pab, chi guneee Galión rëbaman loj ree bën Israel guin:

—Bal niajcan tijb falt o tijb guialquia naroo beenman zeel zidnëdi laaman, züncwentan lëjt. ¹⁵ Per najn por ree diidx nè por laj ree bejn nëtëë por xleydi, zeel lëjt gajc gol gunaj xhienaag güündi, ad rëntan günan guialguxtis xcwent ree ni guin.

¹⁶ Abi' laa babëë gajcaman laa reeman roylay guin. ¹⁷ Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwent gubernador guin laa reeman.

Badxin Pab Antioquia

¹⁸ Zienri ree dxej baya'n Pab Corinto. Dxel bazaadiidx nëman los demazri ree bën rililadx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guijc Pab, por tijb promejs ni beenman. ¹⁹ Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bën Israel zojb ree ni, bigneenëman bën Israel rado'p ree lën yadoo guin. ²⁰ Abi' guyën reeman niaglaa Pab ni mazri, per ad cwëjbtaman. ²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. ²² Chi bidxinman Cesarea, dxel wejman Jerusalén bicajpdiozaman bën rililadx ree Jesucrist, dxelri zëman Antioquia. ²³ Chi ma gojc xchej za'man Antioquia, dxel briiiman zatijb. Wejman tijb gaj ree guiedx riga' niz Galacia nè niz Frigia, ragu'man luxdoo gra ree bën rililadx Jesucrist.

²⁴ Tiamp zii bidxin tijb bèn Israel luguiedx Éfeso, laman Apolos, gojlaman Alejandria. Dád radxejlaman diidx par guinieeman abi' dád rajcaman xtiidx Dios. ²⁵ Basiidaman xtiidx Dios, dxel con gan balüüman bejn ree, zagdxex tēē rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶ Abi' Apolos, sin gualrdxeb guzuloj caneeman xtiidx Dios loj ree bèn Israel lèn xyadoo reeman, zianz chi biguiejn Priscila con Aqula ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷ Chi been Apolos xgab cheman niz Acaya, gra ree bèn rliiladx Jesucrist bèn za'në laaman, badxe' reeman luxdooan din cheman, abi' guxhaal reeman tijb gui'ch loj ree bèn rliiladx Jesucrist bèn zobj ree niz Acaya din yaca' reeman laaman zagdxex chi guidxinman niz ni. Chi bidxinman niz Acaya dád beenman yudar bèn ma rliiladx ree Jesucrist guial gognë Dios laa reeman. ²⁸ Din delant loj gra ree bejn rëbaman guial ad laat zë ree bèn Israel, abi' achutczu gojc nadxi' xtiidxaman guial graczi ni rëbaman naj diidxli, balüü tēēman loj xtiidx Dios gra luar lod rëb guial Jesús naj Cristo bèn gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bèn rliiladx Jesucrist. ² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bèn bayüjn ree xgab por xtol reeman. Per rëbaman guial rayal chililadx reeman bèn zëed xijchaman abi' laaman naj Jesús, bèn naj gajc Cristo.

⁵ Chi biguiejn reeman zian, dxel gurobnijs reeman por Dad Jesús. ⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëd reeman xtiidx Dios loj ree bejn. ⁷ Loj gra reeman naj cost chiptio'p xinguaaaw.

⁸ Choon bëw wej Pab lèn xyadoo ree bèn Israel zobj ni. Sin gualrdxeb guneenëman laa reeman xtiidx Dios, guneenëman laa reeman abi' beenman naguiejn din güünman gan chililadx reeman xhienaaag naj xguialrniabee Dios. ⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bèn ma rliiladx Jesucrist, binëman laa reeman lèn tijb zxcuel bèn la Tiranno. Ni balüüman laa reeman guixie guixie, ¹⁰ loj tio'p ijz beenman zian. Abi' graczi ree bèn zobj niz Asia, zi'c ree bèn Israel zi'c ree bèn ad najt bèn Israel, bacaagdiajg reeman xtiidx Dad Jesucrist. ¹¹ Abi' por xguialrniabee Dios been Pab milagr narooob ree, ¹² xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tēē ree xindxab yu' luxdoo reeman.

¹³ Per guyu bëlzi ree bèn Israel ziza rabëë reeman xindxab luxdoo ree bejn, abi' guyënt reeman nüjnnë reeman dxiin laj Dad Jesucrist dxel rëb reeman loj ree xindxab guin:

—¡Por Jesús bèn ruza't Pab, rniabee lëjt, gol barii!

¹⁴ Zian naj ni been gajdx ree xi'ngaan tijb bèn Israel la Esceva, bèn goc tijb bixhioz rniabee ree bixhioz. ¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tēen chunin naj Pab, per lëjt ni'quid nünbeetan lëjt.

¹⁶ Abi' bèn yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënü guin, ziladzi reeman nadxeelguijdx tēē reeman. ¹⁷ Graczi ree bèn zobj Éfeso, zi'c ree bèn Israel zi'c ree bèn ad najt bèn Israel, gogbee reeman gojc zian, dxel dád bidxeb reeman abi' baza't reeman Dad Jesús zagdxex.

¹⁸ Në zien ree bèn rliiladx Jesucrist bidxin abi' delant loj gra ree bejn baneero' reeman gra ni mal ma been reeman. ¹⁹ Nëtëë zien ree bèn been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchi mil milia plajt lasajc reen. ²⁰ Abi' zian bire'ch xtiidx Jesucrist biguien tēē xguialrniabeeman.

²¹ Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman guial chi ma wejman Jerusalén dxelri cheman në Rom. ²² Abi' guxhaalaman tio'p bën rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bën Éfeso nadxeb por xtiidx Jesús. ²⁴ Din Demetrio, bën rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bën rüjnnëman dxiin. ²⁵ Dxel bato'paman laa reeman con ree ben ren bën rüjn gajc ree lasa' dxiin guin, abi' rëbaman loj reeman:

—Gol bacaagdiagj, lëjt ragbee guial loj dxiin guie raguieen ree gan milia ro'. ²⁶ Per yan lëjt ruguiaa rigueijn tëëdi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, në guidib niz Asia. ²⁷ Dxel nadxeb yasëëb dux chiin ree, abi' ad tijbtizi dux chiin ree, në xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bën rën ree bejn guidib niz Asia në guidib loj guidxliuj.

²⁸ Chi bigueijn reeman zian, bidxe'ch reeman abi' gurixdiaj reeman rëb reeman:

—¡Bën zojbloj naj Diana, xdios ree bën Éfeso!

²⁹ Abi' gurixdiaj ree bën guiedx guin wajs reeman, gunaaz reeman tio'p ree bën Macedonia, Gayo në Aristarco, bën rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bën guiedx. ³⁰ Guyën Pab niuman yagaj din ninieenëman bejn ree, per ad cwëjbt ree xcompniaraman, bën ma rililadx ree Jesucrist. ³¹ Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni. ³² Zianz gurixdiaj ree bën guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³ Dxel galay ben zien guin babëë ree bën Israel tijb xcompniar reeman bën la Lejandir din guinieenëman bën guin ree. Dxel beenman sen loj ree bën guin din yacwëëz ro' reeman din guinieeman por ree bën Israel delant loj ree bën guiedx guin. ³⁴ Per chi gogbee reeman guial najman bën Israel, tiblazujzi gurixdiaj reeman cost tio'p hor, rëb reeman:

—¡Bën zojbloj naj Diana, xdios ree bën Éfeso!

³⁵ Dxel chi been squiarban luguiedx guin gan bacwëëz ro' reeman, dxel rëbaman:

—Bën Éfeso, gra bënguidxliuj ragbee guial luguiedx guie zianczi rniaj ree bejn xyadoo dios Diana abi' rën tëë ree bejn dios Diana biajb xanyabaa. ³⁶ Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. ³⁷ Din bën bidnëdi achet ni mal been reeman yadoo guin, ad wanee tëët reeman diidxguidx dux dios ree. ³⁸ Bal Demetrio con ree xcompniaraman bën rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. ³⁹ Per bal xhieri mazri rëndi, chi gac xgabilt bën guiedx dxel gacan reglad. ⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¡abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹ Chi gulox rëbaman zian, dxel bare'ch reeman.

20

Wej Pab Macedonia në Grecia

¹ Chi babedxe ree bën Éfeso, gurejdx Pab bën rililadx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. ² Bitixlojman bën rililadx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia ³ lod guzuman choon bëëw. Ma niuman loj barcw din niejman Siria, chi gogbeeman guial nuynë ree bën Israel nüjn reeman laaman xhienin. Dxel mejorli beenman xgab bayejcaman niz Macedonia. ⁴ Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófito, bën niz Asia ree. ⁵ Gra reeman guned abi' gulëjz reeman Pab con naj Lujc guiedx Troas. ⁶ Guiáad dunuj chi gudëd lanij ni raw ree bën Israel guidaxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guidaxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, ⁸ guiáad lënü ladya lod rado'pan dád zien ree guij re'c. ⁹ Tijb xinguiag zojb ro' ventan lax Eutico. Guial xchej da't guneeñë Pab laa reeman, dxel xt garej gunaaz bacaal xin guin, abi'

gudidya'x diidz yu bayon guin xt luyuj, ma güjtix chi bales reeman laax. ¹⁰ Dxel biguiaj Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. ¹² Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. ¹⁴ Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. ¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. ¹⁶ Been Pab xgab ad zejzaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rililadx Jesucrist, bën zojb ree Éfeso. ¹⁸ Chi bidxin reeman dxel rëbaman loj reeman:

—Diidz dxej yaloj ni bialan niz Asia xt yan, lëjt ragbee xhienaag cayünan. ¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj gualzi ma gudëëdan por ni rën ree bën Israel güünnë reeman naj. ²⁰ Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidixidi balün lëjt. ²¹ Abi' zi'c ree bën Israel në ree bën ad najt bën Israel, ma rën loj reeman din yayün reeman xgab por xtol reeman yadxi' tëë loj reeman loj Dios chilliladx tëë reeman Dad Jesucrist. ²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. ²³ Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't gualzi naj ni cabëz naj. ²⁴ Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, güñ tëën mandad ni banee Dad Jesús naj guial gatiechan xtiidxa'caman xhienaag rën Dios dunuj ree.

²⁵ Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguiaatridi naj. ²⁶ Zeel ganin lojdi yan guial ad achetri dol ra'pan bal id nabandi xnejz. ²⁷ Din ma bagojnan lëjt gra xhienaag naj xixgab Dios achetci baquiechan. ²⁸ Yan, gol gojp lëjt gajc, gol gojp tëë ree bën rililadx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejman ma gudiidxaman por xtol reeman. ²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rililadx ree Jesucrist. ³⁰ Loj gajquidi grii ree bën guluü ganax ni rusquiee, din güün reeman gan güüncwent ree bën rililadx Jesucrist xtiidx reeman luar güüncwent reeman xtiidx Dios. ³¹ Zeel gol guzujsin, gol gojp cudad, gol basaaladx, loj choon iijz ad bacwëëzt gunenë'n lëjt xt ronan banen lëjt consejw.

³² Yan, compniar raliduladx ree Jesucrist, gusa'nan lëjt con Dios con xtiidxa'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi guneë tëëman lojdi ni ma rëbaman gudëëdaman loj ree bën ma naj xbejnman. ³³ Achut xmilia achu tëët xab rzëëbladnan. ³⁴ Lëjt ragbee zagdxe guial con quijb yan benan dxiin persi dudawnë'n bën guzu ree con naj. ³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bën razaladx guial loj bën rtia'.”

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman. ³⁷ Gra reeman biin, gudiidx reeman Pab abi' gudaw reeman laaman xid. ³⁸ Dád guyunaya reeman por ni rëbaman loj reeman guial ad zuguiaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. ² Ni badxaaglojn tijb barcw ni ma che niz Fenicia zianz badxu'n lojn. ³ Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. ⁴ Ni badxaaglojn bën rililadx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman loj Pab guial ad bal cheman Jerusalén. ⁵ Per chi baza' gajdx dxej guin, dxel badxoon luguiedx guin, dxel gra reeman con xbëngunaa reeman con xi'n reeman, biglu'nejz reeman dunujn

xt ro' nijsdoo. Ro' nijs guin badxu'xiban barejdx banaaban Dios. ⁶ Dxel bazaadiidxnë'n laa reeman abi' badxë'pan loj barcw guíaad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēën bugneenë'n bën zojb ree ni, bën rlladx ree Jesucrist abi' baya'nan con laa reeman tib dxej. ⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bën rtie'ch xtiidx Jesucrist. Felip guin naj tijb ree bën gajdx cwabee din qui's reeman ni ryal tia' ree bēnprob abi' baya'nan lidxaman. ⁹ Yu' tajp xi'ndxa'paman biinxtijb ree abi' laa reem rudēēd xtiidx Dios loj ree bejn. ¹⁰ Ma gojc zien dxej nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea. ¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

¹² Chi baguiejnan zian, dunujn con ree bēn rlladx Jesucrist luguiedx guin baguieenan naguiejn loj Pab ad cheman Jerusalén. ¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitēē cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudēd ree dxej guin dxel baguieenan purvinid bio'n Jerusalén. ¹⁶ Bunë'n bēlzi ree bēn Cesarea rlladx ree Jesucrist, laa reeman binē dunujn lod baya'nan lidx tijb bēn Chipre, ma gojc xchej rlladxaman Jesucrist, laman Mnasón.

Bignaj Pab Jacob

¹⁷ Abi' ree bēn Jerusalén rlladx Jesucrist dād nix guyu luxdoo reeman baca' reeman dunujn. ¹⁸ Chi bareguiaal bunë'n Pab bugnajn Jacob, ni riga' gra ree bēn rniabee loj ree bēn rlladx Jesucrist. ¹⁹ Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bēn ad najt bēn Israel. ²⁰ Chi biguiejn reeman zian, baza't reeman Dios zagdxe, zianz rēb reeman loj Pab:

—Lüj ragbee guial entr loj ree bēn Israel zien da't reeman ma bililadx Jesucrist, abi' gra reeman rēb guial rüjn naguiejn güün bejn zi'c rniabee xley Moisejs. ²¹ Ma biguiejn tēē reeman guial lüj culüü bēn Israel ree, bēn ad zojbt ree loj nacion Israel guial ad züjncwntt reeman xley Moisejs, rēb tēēl loj reeman guial ad rüjnt naguiejn chu' xi'n reeman sen ru ree bēn Israel ad zinal tēēt reeman dux costumbr ree. ²² Yan, ¿xhienaag cac? Laa reeman guchajgczí lasa' reeman chi gagbee reeman guial ma bi'til. ²³ Zeel meyorli güün ze: Yu' tajp ree xin no'ch du lojn xin ryal ree güün cumplid ni cwēb reex loj Dios. ²⁴ Binē reex, gol been zi'c rēb loj ley din gaquidi naya, gudijx tēē por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tēēt ni biguiejn reeman xcwentil. ²⁵ Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

Gunaaz ree bēn Israel Pab

²⁶ Dxel binē Pab guidap ree bēn guin, abi' chi bareguiaal been reeman zi'c rniabee ley par gac reeman naya. Dxel guyu reeman lēn yadooro' Jerusalén din gugojn reeman goc yayaaloj dxej güün reeman zi'c rniabee ley, dxej ryal chinē tijb gaj reeman tijb be guiēt zi'c tijb gon par Dios.

²⁷ Chi ma yayaaloj gajdx dxej ni naj güün reeman zi'c rniabee ley, yu' ree bēn Israel zēēd niz Asia, baguiaa reeman Pab lēn yadooro' Jerusalén abi' gurixdiaj reeman wajs reeman, gunaaz reeman laaman, ²⁸ rēb reeman:

—¡Bēn Israel, gol been yudar! Xin guie naj xin ziza gra lad caneeguidjdx bēn Israel ree nē dux yadoo ree, rēb tēēx loj ree bejn guial ad güün reeman zi'c rniabee dux ley ree. Abi' ad tijbtzi laan, nē ma badxe'x bēn ad najt ree bēn Israel lēn dux yadoo ree ni nada par dunuj ree ma beenx laan zi'c tijb luar ad rüjnt sirv.

²⁹ Rēb reeman zian guial baguiaa reeman Pab zizaman ni con tijb bēn Éfeso bēn la Trófimo, zeel gunaladx reeman binē Pab laaman lēn yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babēē reeman laaman lēn yadoo guin laa basiaaw gajc reeman port guin ree. ³¹ Za mer nugüjt reeman laaman, chi bidxin ruson guin loj suldad rniabee ree suldad guial gra ree bēn Jerusalén cayüjn nadxeb. ³² Laa bato'p gajc suldad rniabee guin xsuldadix nē za tio'p choon ree suldad rniabee, baxüün reex wej reex lod riga' ree bēn guin. Chi baguiaa ree bēn guin bidxin suldad rniabee guin con ree

xsuldadix, dxel bacwëez gudijn reeman Pab. ³³ Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman. ³⁴ Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bigné reex Pab lod yu' ree suldad. ³⁵ Chi bidxin reex loj ree scliar lod yu' ree suldad guin, gulejn reex Pab guial dád nadoxh rijn ree bën zien nal laa reex. ³⁶ Abi' gra reeman rbixdiaj, rëb reeman:

—jGol bagüjtix!

Gunee Pab loj ree bejn

³⁷ Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? ³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bën bagüjt ree bejn?

³⁹ Dxel rëb Pab lojx:

—Bën Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenë'n bën guie ree.

⁴⁰ Dxel cwëjb suldad guin, abi' guzuli Pab loj ree scliar guin beenman sen loj ree bën guin con yaaman din yacwëez ro' reeman. Chi bacwëez reeman, dxel guneenëman laa reeman diidx hebreo, rëbaman:

22

1—Lëjt bengol në los demazridi, gol bacaagdiaj ni ganin por naj.

² Chi biguejn reeman caneenëman laa reeman diidx hebreo, mazri bacwëez reeman. Abi' basnuuman rëbaman loj reeman:

³—Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan. ⁴ Dxel guzunaalan bën rililadx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaazan badxe'n ladxguuib. ⁵ Bixhioz mazri zobjloj rniabee graczi ree bixhioz në gra ree guxtis Israel ragbee guial naj ni wali. Din laa reeman baneet tijb gui'ch par gulün loj du lasa' bën Israel ree, bën zobj ree luguiedx Damasco din chile' yaguilan bën rililadx ree Jesucrist luguiedx guin, ganaaz tëën laa reeman guidnë'n laa reeman Jerusalén din téd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

⁶ Per chi za'n lünejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, ⁷ abi' breeyujn. Dxel biguejnan cha' bën na: "Saulo, Saulo, ¿chexquiza zeel rzunalil naj?" ⁸ Abi' gunabdiidxan rën: "¿Chu lüj Dad?" badxi'man laan naman: "Naj naj Jesús, bën Nazaret, bën rzunalil." ⁹ Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj. ¹⁰ Dxel gunabdiidxan rën: "¿Xhie rayal gūnan Dad?" Abi' na Dad Jesucrist lon: "Bixche, basnuu xnejzil wej Damasco. Ni na reeman gra ni rayal güünl." ¹¹ Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

¹² Ni zobj tijb bën la Ananías, rünman cumplid gra zi'c rniabee xley Moisejs. Abi' gra ree bën Israel zobj luguiedx Damasco nünbee laaman guial nabanman xnejz. ¹³ Ananías guin bidganaj naj, chi bi'taman naman lon: "Saulo, ma zajc yaguiaal stijb." Loj hor guin gajc baguian stijb abi' baguian laaman. ¹⁴ Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëël cha'man, bën rijn zi'c rayal. ¹⁵ Din chigneel xtiidxaman loj gra ree bénguidxliuj, gü tëël diidx loj reeman ni baguiaal ni biguejn tëël. ¹⁶ Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtolil."

Be Pab diidx xhienaag wejman loj ree bën ad najt bën Israel

¹⁷ Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'xhchalan. ¹⁸ Baguian Dad Jesús naman: "Baquiejn. Cari barii Jerusalén, din ad zünjcwentt reeman ni guiëbil por naj." ¹⁹ Abi' rën lojman: "Dad, laa reeman ragbee guial naj wa gra lën ree yadoo gunaazan bën rililadx ree lüj, badxe'n laa reeman ladxguuib gudin tëë laa reeman. ²⁰ Në chi bagüjt reeman Esteban, bën gunee xtiidxil, laagajc naj za' ni rën zagdeñ naj guiëtaman abi' xt gunan xab ree bën bagüjt laaman." ²¹ Per na Dad Jesús lon: "Wej, naj gaxhal lüj zijt loj ree bën ad najt bën Israel."

Badxe' reeman Pab lod yu' ree suldad

²² Xt guintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tēē reeman yuj niz ladia. ²⁴ Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rëbixdiaj ree bën guin zian contr laaman. ²⁵ Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bën Rom ya, chi gadidi gagbee xhie beenman?

²⁶ Chi bigueijn suldad rniabee guin zian, dxel bicojnx suldad rniabee ree suldad guin, rëbix lojx:

—Gojp cudad ni güünnël xin guin, din xin Roman.

²⁷ Dxel wej suldad rniabee guin lod za' Pab, abi' gunabdiidix lojman rëbix:

—¿Walin ya xin Rom lüj?

Badxi' Paban rëbaman:

—Walican.

²⁸ Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diidz goolan najn bën Rom.

²⁹ Chi bigueijn ree suldad niguin Pab, guial bën Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaa, guyën suldad rniabee guin niagbeecheawix chexc zeel za' ree bën Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëex Pab bazujx laaman loj gra reeman.

23

¹ Baguiaa Pab loj ree guxtis guin, abi' rëbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

² Dxel Ananías, bixhioz mazri zobjloj rniabee graczi ree bixhioz, gunabeeman bën za' ree gajxh cwè' Pab din ca'p reeman ro'man. ³ Per badxi' Paban rëbaman loj bixhioz guin:

—¡Ziangajc ca'p Dios ro'l, bën rusquiee! ¿Id zobjil yagaj ya par güñl guialguxtis zi'c rniabee ley? Abi' ¿chexquiza zeel rüjn! zi'c ad rniabee ley, rniabeel ca'p reeman ro'n?

⁴ Abi' ree bën za' yagaj rëb reeman lojman:

—¿Zian rusaglojl xbixhioz zobjloj Dios ya?

⁵ Dxel rëb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rëb: “Ad gusaglojl bën rniabee ladxil.”

⁶ Chi gogbee Pab guial garol reeman naj bénsaducew za garol reeman naj bënfarisew, dxel guneeman rejs rëbaman:

—Naj naj bënfarisew, xi'n bënfarisew naj. Abi' guial riladxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bënfarisew con ree bénsaducew abi' gojc reeman tio'p lala'. ⁸ Din bénsaducew ree ad riladxat reeman guial yaban ree bengüt, ad riladxat tēt reeman guial yu' ree anjl në ree sprijt, per ree bënfarisew riladxat reeman gra ree ni guin. ⁹ Abi' been reeman naquie' yagaj. Dxel guzuli bëlzi ree bënfarisew naj mextr rülüü ley, rëb reeman:

—Achet ni mal wayüjn bën guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëe reex laaman galay ree bën guin, chinë tēē reex laaman lod yu' ree suldad stjib.

¹¹ Chi gure guiaa stjib, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaa, garol ree bën Israel baya'n reeman diidx din gugüjt reeman Pab, rëb tēē reeman guial achet gaw reeman achet tētëe guie' reeman xt gugüjt reeman laaman. ¹³ Nadëe

tiuu naj ree bèn rëb zian. ¹⁴ Abi' wej reeman bigneenë reeman bixhioz ree bèn rniabee ree bixhioz nè ree xbgoule ree bèn Israel, rëb reeman loj reeman:

—Dunujn ma raguie'ch guial achetczi yadaawan xt chi ma bagüjtan Pab. ¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. ¹⁷ Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binëx laax tiblad, gunabdiidxix lojx rëbix:

—¿Xhie rënl nal lon?

²⁰ Abi' rëb xin guin lojx:

—Bën Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. ²¹ Per ad bal chililadxil laa reeman, din nadëd tiuu naj ree bèn cwëz laaman guquie'chloj reeman lunejz, abi' ma rëb reeman guial achet gaw reeman ache tëtët guië' reeman xt gugüjt reeman laaman. Yan za'sin reeman cabëz reeman ni guiëbil.

²² Dxel rëb suldad guin loj xin guin:

—Baguij. Achu loj guiëbil ni ma nal lon.

Guxhaal reeman Pab loj gobernador Félix

²³ Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nè za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. ²⁴ Abi' gunabee tëtëx güün reex porvinid way cwib Pab, rëbix loj reex guial guinia reex Pab din guidxinman zagdxe loj gobernador Félix. ²⁵ Abi' guxhaalnëx laa reex tijb gui'ch ni rëb:

²⁶ “Naj Claudio Lisias, rugajpdiozan lüj gobernador Félix, lüj guial najl bën zobjloj. ²⁷ Bën Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglëen laax loj reeman. ²⁸ Abi' guial rënan gagbeen xhie rüjnx zeel rdxe'ch reeman laax, dxel bazun laax loj ree guxtis Israel. ²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguiib. ³⁰ Nè guial ma gogbeen guial xixgab ree bën Israel naj gugüjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lüj güün reeman reglad ni rajp reeman contr laax. Laanan rugojnan lüj.”

³¹ Been ree suldad guin zi'c gunabee suldad rniabee guin abi' guxhin binë reex Pab luguiedx Antipatris. ³² Chi bareguiaal suldad zë ree guia' bayejc reex lod yu' ree suldad, guidaad ree suldad dxib way zinë reex laaman luguiedx Cesarea. ³³ Chi bidxin reex Cesarea, badëed reex gui'ch guin loj gobernador guin, bayü tëtë reex Pab lojman. ³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëedaman, ³⁵ dxel rëbaman lojman:

—Chi gui't ree bën za' ree contr lüj, dxel gucagdiagan ni nal.

Abi' gunabeeman gap reex Pab lën xpalas Herodes.

24

Ni gunee Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nè tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ² Chi bidxinne reex Pab, guzuloj Tértulo caneeman contr laaman, rëbaman loj gobernador guin:

—Quixtëe lüj dad gobernador, por lüj nadxu'dxen, nè por xguialrajquil zien ree ni rüjn sirv cayajc du ladxan. ³ Gra ladczzi za' ree bejn conform por gra ni cayüjnl dad gobernador Félix, lüj naj bën zobjloj, quixtëeczi lüj. ⁴ Per chitëe günlaan lüj mazri, rniaaban lojl din gucaagdiajguil ni yanan lojl tibrajtoczi. ⁵ Dunujn bayagbeen xin guie naj zi'c tijb guialguijdx loj ree bën Israel, guidibczzi guidxliuj zizax rustijlix laa reeman abi' laax rniabee loj tib cwaa ree bën rniee reeman nazaren. ⁶ Abi' guyën tëtëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyän. ⁷ Per laa bi't gajc suldad Lisias con ree xsuldadix, babëëxuu reex laax du lojn.

⁸ Abi' rëb suldad rniabee guin guial lojl gui't ree bën rbe'c xguialquia Pab, yan lüj gajc zajc guiniabdiidx lojx din gagbeel zagdxe guial walican ni ranan xcwentix.

⁹ Abi' ree bën Israel za' ni rëb reeman guial waliqri gra ni guin. ¹⁰ Dxel been gobernador guin sen loj Pab din guinieeman, abi' rëb Pab:

—Guial ragbeen diidz gocli rniabeel nacion Israel, zeel ad yu'nawëëgtan yadxi'n ni rudxiib reeman guican. ¹¹ Abi' lüj gajc zajc cwe'quail ruson din gagbeel guial qui gojcri chiptio'p dxej badxinan Jerusalén din ganajchi'n Dios. ¹² Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. ¹³ Bën guie ree ad zajct na reeman lojl guial ni diidxli naj ni rudxiib reeman guican. ¹⁴ Per ni naj diidxli naj guial rliadixan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bën guie guial ad xnejzt Diosan, per cayünan zian guial rliadixan gra ni zëëd loj ley në ni bacaa ree bën badëëd xtiidx Dios loj ree bejn. ¹⁵ Abi' zi'cgajc rliadix ree bën guie Dios, ziangajc rliadixan laaman guial yaban ree bengüt stijb, zi'c ree bën goc benza'c në ree bën goc benmal. ¹⁶ Zeel rünan naguiejn gabajnan zagdxe chitëë xhie ganaladixan delant loj Dios ni'qui delant loj ree bejn.

¹⁷ Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tëen gon ni rayal gudëdan loj Dios. ¹⁸ Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëëtan wadijl. ¹⁹ Yan, bën gunaaz ree naj, laa reeman naj bën rayal su guie din na reeman xhie rünan xhie pornin rdxe'ch reeman naj. ²⁰ O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. ²¹ Tijbzi ni benan chi za'n galay reeman gurixdiajn rën: “Guial rliadixan yaban ree bengüt, zeel za' ree bejn contr naj yan.”

²² Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

²³ Dxel gunabee gobernador guin tijb ree suldad rniabee guin din gusuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacaa'gdiag reeman ni rëbaman xcwent guialrliadix bejn Jesucrist. ²⁵ Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëëd ree bejn cwent loj Dios, dxel dád bidxeb gobernador guin abi' rëbaman loj Pab:

—Baguij. Ganetan lüj chi chu'n luar stijb.

²⁶ Per Félix në milian rbëzaman gudëëd Pab lojman din guslaaman laaman, zeel gurejdxaman laaman zien volt din guinieenëman laaman. ²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguilib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ² Yagaj, bixhioz rniabee ree bixhioz con ree bën Israel mazri zojbloj, wej reeman lojman bile'c reeman xguialquia Pab, ³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. ⁴ Per badxi' Festo xtiidx reeman rëbaman guial Cesarea nayaaw Pab guiaad laaman nayob yaguijman ni, ⁵ abi' rëbaman loj reeman:

—Bën rajp ree gualrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. ⁷ Chi bidxinnë reex laaman, bën Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bën Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxe loj ree bën Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquail.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxë guial achet ni mal wayünan bën Israel ree. ¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

¹² Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lüj na tëdil loj rey César, yan lojman tëdil.

Za' Pab loj rey Agripa

¹³ Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. ¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguuib. ¹⁵ Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquix, gunab reeman ganabeen guiëtix. ¹⁶ Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c xguialquiaman din guiëbaman walin ya o ad walitan ni rudxiib reeman guijcaman. ¹⁷ Zeel chi bi't ree bën Israel guin guie, achet guial niaglaan, bareguiaal gajc gure loj da yagxhilar, abi' gunabeen bidnë reex xin guin. ¹⁸ Per ree bën bi't gule'c xguialquix, achet ni nadxeb na reeman zi'c gunaladxan ninia reeman por laax. ¹⁹ Tijbzi xguialquix ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin. ²⁰ Abi' guial ad ragbeetan xhie gūnan por zian, dxel gunabdiidxan loj Pab bal rënch chex Jerusalén din gac reglad ni guin ree ni. ²¹ Per laax gunab tëd loj rey César din gac reglad ni rëb reeman por laax, zeel gunabeen yaawsiix it chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

²³ Chi bareguiaal, dád zagdxë ca' xab rey Agripa con Berenice bidxin reeman con ree bën rniabee suldad con los demazri ree bën zojbloj luguiedx guin, bidxin reeman guyu reeman lënü lod gucaagdiajg reeman ni guiëb Pab. Dxel gunabee Festo bica' reex Pab. ²⁴ Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. ²⁵ Naj, achet xfaltix radxejlan guial rayal guiëtix. Guiáad laax gunab tëd loj César Augusto lod gac reglad xcwentix, abi' ma benan xgab yaxhalan laax. ²⁶ Per ad radxejlitan ni gucan por laax loj gui'ch ni gaxhalan loj rey César, bën rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojch dxel ma yu' ni gucan por laax. ²⁷ Din naj ruluü ad xnejzt naj yaxhalan tijb bën yu' ladxguuib loj rey César abi' ad zëtan xhie beenman.

26

Ni gunee Pab loj rey Agripa

¹ Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

² —Dád nix yu' luxdon guial bile' za'n lojl yan rey Agripa, par ganen lojl yadxi' tëën gra ni rudxiib ree bën Israel guican. ³ Din lüj ragbee zagdxë gra xcostumbr ree bën Israel, në conin rüjn persi rdildiidx reeman. Zeel rniaaban lojl gapil pasens gucaagdiajguil ni ganin.

Zi'c guban Pab gocli

⁴ Gra ree bën Israel ragbee xhienaag gubajnan con laa reeman zi'c ladxan zi'c Jerusalén, diidx xindoon. ⁵ Ragbee tëë reeman abi' zajc na reeman laan bal rën reeman, guial diidx xindoon najn bënfarisew, abi' ree bënfarisew naj bën mazri zinal xley ree bën Israel. ⁶ Abi' yan za'n guie, badëed reeman naj loj ree guxtis guial rliladxan yasban Dios bengüt ree zi'c beenman promejs loj ree dux béngulal ree. ⁷ Gra guidxiptio'p cwa' ree bën Israel cabëz dxej güün Dios zian, zeel rën reeman laaman rüjn tëë reeman sirv lojman dxej guiaal. Abi' yan guial rliladxan laan zeel rbe'c ree bën Israel da guialquian, rey Agripa. ⁸ ¿O naladxidi ya nawëëg yasban Dios bengüt ree?

Be Pab diidx xhienaag guzunalaman bën rliladx ree Jesucrist

⁹ 'Guia'xchej benan xgab rayal gūnan xhienin bēn rliiladx ree Jesús, bēn Nazaret, ¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bēn rliiladx Jesucrist badxe'n ladxguuib. Abi' chi rugūjt reeman laa reeman, nē naj rē guiētri reeman. ¹¹ Zien volt benan laa reeman xhienin dīn gūnan naguiejn gusa'n reeman guialrliiladx reeman Jesucrist. Zian benan lēn gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist
(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz. ¹³ Per ganin lūj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bēn zinē'n. ¹⁴ Abi' dugraczan bareeyuj, dxel biguiejnan cha' bēn guneec naj con diidx hebreo, naman: "Saulo, Saulo, ¿chexc zeel rzunalil naj? Lūj gajc rguuil xguialnaal zi'c go'n rudxegua' loj yag rulaagnē reeman laab." ¹⁵ Dxel rēn: "¿Chu lūj Dad?" Badxi'man laan naman: "Naj naj Jesús bēn rzunalil. ¹⁶ Per bixche, guzuli, dīn balūlon lojl par gūnl naj sirv gūn tēē diidx ni baguiaal yan nē ni gulūn lojl. ¹⁷ Naj gaxhal lūj loj ree bēn Israel nē loj ree bēn ad najt bēn Israel, abi' naj gagnē' lūj chitēē xhie gūn reeman lūj. ¹⁸ Gaxhalan lūj loj reeman dīn guixhialil loj reeman gusa'n reeman nejz mal, chinal reeman nejz zagdxe. Ad tiēbri reeman nabee xindxab laa reeman, chinal tēē reeman xnejz Dios. Abi' chililadx reeman naj dīn gac xtol reeman perdon yayal tēē reeman ni rayal gra ree xbejn Dios, bēn ma naya ree delant lojman."

Bazoob Pab diidx ni balūuloj lojman

¹⁹ 'Zian gojc, rey Agripa, bazoban diidx benan ni na Jesucrist lon chi guneeman naj diidz xanyabaa. ²⁰ Yaloj luguiedx Damasco gutiechan xtiidxaman, dxelri Jerusalén nē guidib niz Judea nē loj ree bēn ad najt bēn Israel. Rēn loj reeman dīn yayūjn reeman xgab por xtol reeman, yadxi' loj reeman loj Dios gūn tēē reeman ni rayal gūn reeman dīn guiguien guial ma bidxaa mod naban reeman. ²¹ Abi' por zian, gunaaz ree bēn Israel naj lēn yadooro' Jerusalén, guyēn reeman nugūjt reeman naj. ²² Per con xyudar Dios laa naj guie xt yan cusnuu cayūn xtiidxaman loj gra ree bejn, zi'c ree bēn zojbloj zi'c ree bēn ad zojblojt. Abi' gra ni rēn loj reeman naj ganax ni bacaa ree bēn badēē xtiidx Dios loj ree bejn nē ni bacaa Moisejs xhienaag naj ni gac, ²³ guial Cristo naj guial tēdaman guialzi, guiētaman. Per chi ma gūjtaman yaloj laaman naj bēn yaban loj ree bengūt, abi' gugojnman bēn Israel ree nē ree bēn ad najt bēn Israel xhienaag gap reeman perdon.

Nuyēn Pab nililadx Agripa Jesucrist

²⁴ Chi cayēb Pab zian, dxel gudidxa' Festo rēbaman:

—¡Rajcguijquil Pab! guial tant rusiidil ma rajc guijquil.

²⁵ Per badxi' Pab laan rēbaman:

—Ad guictan rajc, gobernador Festo. Ni canin najn xnejz nē diidxli. ²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, dīn ad canitan ni goc ralan lod achut zajc gagbee laan. ²⁷ ¿Rliiladxil ni rēb ree bēn badēēd xtiidx Dios loj ree bejn ya, rey Agripa? Naj ragbee guial rliiladxil.

²⁸ Dxel badxi' rey Agripa laan rēbaman:

—Sta'nczi nūjn! naj gan nililadxan Jesús.

²⁹ Abi' rēb Pab:

—Majsi sta'nz o majsi ryaadxri, na Dios guial ad tijbtzi lūj, nē gra ree bēn cucaagdiajg ni canin yan, guidinx dxej chililadxidi Jesús zi'c naj, majsi ad nēt ree caden guie.

³⁰ Dxel bisu rey Agripa con gobernador Festo con Berenice nē gra ree bēn zojbnē laa reeman ni. ³¹ Chi bariica reeman tiblax guzuluj cayūnē lasa' reeman diidx, rēb reeman:

—Achet wayūjn xin guie ni rayal guiētix, o chu'x ladxguuib.

³² Dxel rēb rey Agripa loj Festo:

—Zile' naslaa reex, balidix niniab tēdix loj rey César.

27

Baxhaal reeman Pab Rom

¹ Chi rēb reeman ma yaxhaal reeman dunujn Italia, dxel bayū reeman Pab con sta'n ree bēn yu' ladxguuib loj tijb suldad rniabee la Julio, laax rniabee tib cwaa ree suldad la Augusto. ² Abi' Cesarea badxu'n loj tijb xbarcw ree bēn Adramitio, barcw ni ma grii chen guiedx riga' ree niz Asia. Nē Aristarco bunē'n, bēn Tesalónica, guiedx riga' niz Macedonia. ³ Chi bareguiaal, badxinan Sidón, lod goc Julio xinza'c da't con Pab, cwējbix bitixloj ree xmiw Pab luguiedx guin abi' badēēd reeman ni ryaadxaman. ⁴ Chi badxoon Sidón

badiaawan Chipre yuj riga' loj nijsdoo, basa'nanan dux ladruvejsan chitëe yachaaglojn zro' bi, din niz du lojn rliaj bi guin. ⁵ Badüüdan loj nijsdoo gajxh Cilicia në Panflia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandria ni che Italia, zianz nax yadxu'n lojn. ⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. ⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, ¹⁰ rëbaman loj reeman:

—Dad, ad zagdxtet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹ Per suldad rniabee guin mazri beencwenti bën rusa barcw guin në bën naj xbarcw laan, guial loj ni rëb Pab. ¹² Abi' guial ad zagdxe tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴ Per ad wayajct xchej zio'n chi birii tijb bidoxh la Euroclidón loj nijs guin. ¹⁵ Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunuj niz lod cucadxaa bi guin laan. ¹⁶ Dxel badüüdan xijch tijb yujdobëz la Claudia riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëe yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunuj niz lod rucadxaa bi guin laan. ¹⁸ Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹ Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. ²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunuj ad naguieentri du luxdoon yalaan loj nijs guin.

²¹ Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajgudi da diidxan ad nariit ree Creta, zian ad nadüüdt ree tarbajw guie achet tëët nasëeb ree. ²² Per achet güüdan, ad rdxebidi din ni'qui tijbidi ad zëjt, tijbzi barcw guin yaze'n. ²³ Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. ²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiet reeman.” ²⁵ Zeel yan dad, gol badxe' luxdoodi zagdxe, din naj riladxaan Dios, ragbee tëen zagdxe guial gac zi'c na anjl guin lon. ²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. ²⁸ Dxel bare'xh reeman plact naxhit nijs guin, najn zi'ctiubitit mejtr naxhit. Mazri delant bare'xh reeman laan zatijb ma najn gajlbiadx mejtr naxhit. ²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdoo reeman yareguiaal. ³⁰ Bën nulen ree barcw guin, been reeman bën sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman. ³¹ Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaatridi.

³² Dxel batüüg ree suldad guin ni naxii canu guin persi zinë nijs canu guin. ³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëstidi achet tëët wayawidi. ³⁴ Naj rni lëjt, gol gudaw din guibandi, din gradi ni'qui tijb guidxguijgudi ad zusëëbtidi.

³⁵ Chi rëb Pab zian, cwa'man tijb guiadxtil, abi' badëëman quixtëe loj Dios niz loj gra reeman, dxel gula'man guiadxtil guin guzuloj cayawaman. ³⁶ Dxel bayu luxdoo gra reeman, guzuloj nëgajc laa reeman cayaw. ³⁷ Tio'pgayuu gayojnchiibixho'p nayajc dugran zio'pan loj barcw guin. ³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaal, bèn nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëd ro'n, abi' been reeman xgab badxig reeman barcw guin yagaj. ⁴⁰ Dxel batüüg reeman ni naxiinë ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹ Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. ⁴² Dxel nuyën ree suldad guin nugüjt reex bèn prejs guin ree, chitëe nixoobnijs reeman abi' nuxüün reeman. ⁴³ Per suldad rniabee guin ad cwëjbtix niabc zian guial ad rëntix niëjt Pab, dxel gunabeex guial bèn rajc rxoobnijs ree, yaløj laa reeman chu' loj nijs guin güün reeman naguiejn yarii reeman ro' nijs guin. ⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. ² Bèn naj ree bèn ni, dád benza'c gojc reeman con dunujn. Been reeman tijb bajl guial nayaag nëtëe guial cayal guia, abi' na reeman du lojn din yubiigan cwë' bajl guin. ³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl guin, abi' gudawya'b yaa Pab nalbéztib yaaman. ⁴ Chi baguiaa ree bèn Malta guin nalbéz bëel guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtzciz por ni beenx.

⁵ Per gudxiyp yaa Pab abi' biajb bëel guin loj bajl guin, guiáad laaman achet gocaman. ⁶ Gra reeman cabëz saaguip yaaman, o dxejlcziz yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bèn zobjloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tëe gojcaman con dunujn. ⁸ Nadxel naga' xdadaman, ragxuuman, yu'man xliaa rajc tëeman yooibrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. ⁹ Chi gogbee ree bënragxu zobj ni ni goc, bi't reeman lod za' Pab persi bayüjnman laa reeman. ¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoön yagaj, banee reeman gra ni rayaadxan lünejz.

Bidxin Pab Rom

¹¹ Choon bëew badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree dxan bèn la ree Cástor në Pólux. ¹² Dxel badxinan tijb guiedx la Siracusa, yagaj badxu'n choon dxej. ¹³ Abi' yagaj badxoon bio'n gadëd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. ¹⁴ Yagaj badxaagan tio'p choon ree bèn naj ree bèn ni në reeman riladx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. ¹⁵ Guiáad ree dux compniran bèn riladx ree Jesucrist, bèn zobj ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëeman quixtëe loj Dios. ¹⁶ Chi badxinan Rom, dxel bayü suldad rniabee guin bèn prejs guin ree loj tijb ree suldad rniabee ni. Per cwëjb reeman gurej Pab stibj yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bèn Israel zobjloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bèn Israel ni'qui contr xcostumbr ree dux bëngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. ¹⁸ Abi' ree bèn Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. ¹⁹ Per ree bèn Israel guin badxoon reeman abi' zagdxeli gunaaban gadëdan loj rey César, per ad guial ra'ptan xhienin contr ree bèn Israel. ²⁰ Zeel guredxan lëjt, din guidganajdi naj din ganin lojdi guial por ni riladxan guial yaban ree bengüt zi'cgajc riladx gra ree du lasa' bèn Israel ree, zeel naxiin con ree caden guie.

²¹ Dxel rëb reeman lojman:

—Dunujn ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lùj. ²² Per rayënan yaguiejn xhienaag naj xixgabil, din dunujn rayagbee guial gra ladczi rniee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxge guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tëëman lod rniee xcwent Jesús loj xlibr ley Moisejs në ni bacaa ree bén badëë xtiidx Dios loj ree bejn. ²⁴ Yu' reeman bililadx ni rëb Pab, per yu' reeman ad bililadx. ²⁵ Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqni ni rëb Isaiás bén badëëd xtiidx Dios loj ree dux béngulal ree guial rëb xSprijt Dios:

²⁶ Wej, güjdx loj ree bén guin:

Majsi riguejn reeman, per achetzi chignia' reeman,
abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,

abi' rüjn reeman zi'c rulüü ad ruguiaat reeman,

ad riguejn tëët reeman, chitëë guguiaa reeman,

abi' guien reeman chignia' tëë reeman.

Din ad rënt reeman gui't reeman con naj,

abi' gūnan laa reeman perdon.

²⁸ Zeel gol gogbee guial diizd yan, loj ree bén ad najt bén Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rëb Pab zian, dxel zia ree bén Israel guin, cadildiidxnë lasa' reeman.

³⁰ Tio'p ijz gurej Pab ni, yu lod gudixaman. Ni rnieenëman gra ree bén rtixloj laaman.
³¹ Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

Gui'ch ni guxhaal San Pabl loj ree bèn Rom rliladx Jesucrist

Rxhiaal San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bèn badëe xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. ⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bèn chililadx laaman, bèn guzoob tée xtiidxaman. ⁶ Abi' në lëjt ma nayab loj ree bèn gule Dios din gaquidi xbejn Jesucrist.

⁷ Zeel caxhalan gui'ch guie lojdi bèn ree Dios, bèn zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tée reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëe loj Dios por gradi, guial guidibczi ruza't reeman lëjt xhienaag rliladxidi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaban laaman por lëjt. ¹⁰ Ad rucwëëz tëet rbedx rniaban Dios din guneeaman mod guidganan lëjt, zi'c naj da xgaban diizd gocli. ¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn. ¹² Din güün tëedi naj yudar zian yagueien du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bèn chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt. ¹⁴ Par naj naladxan da cwentan naj guial gulün chutëëz benan xtiidx Dios, bal najman bèn ciuda o najman bèn guiedxdoo ya, bal rignia'man o ad rignia'taman. ¹⁵ Zeel rënejzdoon guidganan lëjt din gatiechan xtiidx Dios Rom.

Xgualrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xgualrniabee Dios, din gra ree bèn chililadx laan laa reeman loj dol, zi'c ree bèn Israel zi'c ree bèn ad najt bèn Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bèn naban zi'c rën Dios, guidib tiamp ni nabanman rliladxaman laaman."

Dol ni rajp bejn

¹⁸ Dunuj ree rayagbee guial diizd xanyabaa zëed xcastiro' Dios par ree bèn ad ridxga't laaman, bèn ad rüjnt ree zi'c rayal, abi' zi'c naban reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman. ²⁰ Majsi ad ruguaat bejn Dios, per diizd chi go'tchaaw guidxliuj raguaiaa ree ni beenman, abi' por ni ma beenman rayagbee ree guial ad yu't dxej lox xgualrniabeeman abi' laa tëeman naj Dios. Zeel ad zajct xhie gudxiib bejn guijc guial achet ragbeeman xcwent Dios. ²¹ Din majsi yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëe tëet reeman quixtëe lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rëb reeman guial rajc da't reeman abi' mazri na tont reeman. ²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëel.

²⁴ Zeel ma gulëeladx Dios laa reeman loj xixgab mal reeman, abi' rüjn reeman ni natu ree con ree ben ren. ²⁵ Luar chinal reeman xdiidxli Dios, zinal reeman ni rusucuee ree. Abi' rën reeman rajp tée reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

²⁶ Zeel gulëeladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. ²⁷ Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëeladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün

reeman rùjn reeman, za'nè reeman xinguaaw ren o béngunaa ren, zien ree ni mal rùjn reeman, rzèèbladx reeman gap reeman ni rajp ree ben ren. Dád nadèdloj reeman, rugùjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbèè reeman xtiidxguijdx bejn. ³⁰ Rnieeguijdx tèè reeman bejn, ralen reeman Dios, ad rajpt reeman bejn respejt, rlies xvalor gajc reeman, rùjn reeman benro'. Abi' rbèèguijc reeman ni mal ree, ad ruzoob tèèt xtiidx xdad xniaa reeman. ³¹ Dád nad reeman, ad rùjnt cumplid xtiidx reeman, ad rënt lasa' reeman, ad raya tèèt lasa' reeman. ³² Ragbeechaaw reeman rèb Dios guial chi guièt ree bejn, dxel gra ree bèn rùjn gra ree ni guin yayal casti. Per majsi zian, rusnuu gajc rùjn reeman ni mal guin ree abi' xt rabaa reeman chi rùjn ree ben ren zian.

2

Xgualguxtis Dios

¹ Zeel chutèèz lùj guial rëbil xhie casti rayal bejn, ad rajptil derejch guièbil zian, din lùj gajc rayal casti guin guial cayùjn zi'cgajc rùjn reeman. ² Per dunuj ree rayagbee guial Dios rùjn guialguxtis zi'c rayal, chi rudèèdaman casti bèn rùjn ree ni mal guin. ³ Abi' lùj guial rëbil xhie casti rayal bejn abi' nègajquiza lùj rùjn zi'c rùjn reeman, ad naladxil laal loj xcasti Dios. ⁴ Ad rëntil gualnaza'c Dios con lùj, ad rëntil guial rdaanman lùj rajp tèëman lùj pacens, ni'quid ragbeetil guial pacens guin rùjn lùj yudar din gapil tiamp par yayùjn xgab por xtolil. ⁵ Per guial dád nadil, ad rëntil yayejqul loj Dios, zeel lùj gajc cayùjnxhie xtolil par dxej ni gudèèd Dios casti, dxej ni güünman guialguxtis zi'c rayal. ⁶ Par gudèëman ni rayal tijbgaj bejn bal gonin beenman. ⁷ Gudèèdaman gualnaban tiblyaaa loj ree bèn ad radxagt rùjn naguiëjn guiban zagdxè guial rùjn reeman naguiëjn yayal reeman gualnaza'c yu' xanyabaa, rùjn tèè reeman naguiëjn yaya'n reeman zagdxè loj Dios din gap reeman cuerp ni ad yu't dxej nit. ⁸ Per ree bèn ad ruzoobt diidx, rdxe'ch Dios laa reeman abi' gudèèdaman laa reeman casti, din luar chinal reeman xtiidxliman, zinal reeman nejz mal. ⁹ Gra ree bèn zinal nejz mal, naya sac reeman sagdiã reeman, yaloj ree bèn Israel dxel bèn ad najt ree bèn Israel. ¹⁰ Guiáad ree bèn zè loj nejz zagdxè, guilies Dios xvalor reeman, yabaanëman laa reeman, yabe'cdxe tèëman luxdoo reeman, yaloj xgaj ree bèn Israel dxelri bèn ad najt ree bèn Israel.

¹¹ Din Dios tiblojzi rùjnman guialguxtis con gra bejn. ¹² Gra ree bèn cayùjn dol sin guial ad nünbeet reeman ley hadèèd Dios loj Moisejs, tèd reeman casti sin ley guin. Guiáad ree bèn cayùjn dol majsi ragbee reeman ley guin, laa reeman tèd casti zi'c rniabee ley guin. ¹³ Din ad guial guientzi bejn ley guin ma nayaman loj Dios, bèn rùjn ree zi'c rniabee ley guin laa reeman naj bèn naya loj Dios. ¹⁴ Per chi ad najt bejn bèn Israel, abi' cayùjnman ni zagdxè sin guial güünbeeman ley guin, dxel ma cayùjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxè con tèè nin naj ni mal, abi' guijc gajc reeman zèèd xley reeman. ¹⁵ Din zi'c naban reeman, rguien guial guijc reeman zèèd conin rayal güün reeman con tèè nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxè o chi ma been reeman ni mal. ¹⁶ Zian gac chi güün Dios guialguxtis por gra ree ni nagui'e'ch ni rùjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

Bèn Israel ree nè xley Moisejs

¹⁷ Yan, lùj guial najl bèn Israel yu'guijqul guial rajquil ley hadèè Dios loj Moisejs, abi' rùjn nabè guial najl xbejn Dios, ¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxè güün. ¹⁹ Abi' naladxil zile' guzuxnejzil bèn ad nünbeet ree ley guin nè ree bèn ad nünbeet xnejz Dios, ²⁰ naladxil zile' gulüül bèn ad rajct ree nè ree bèn rajc ta'nzi, guial por ley guin ragbeel gra, ragbee tèèl conin naj diidxli. ²¹ Per zi'c nabanl, çchexc zeel ad ruüüt lùj gajc luar gulüül ben ren? Din lùj rëb guial ad laat cwan bejn, abi', çchexquiza zeel rbanl? ²² Rëbil guial ad laat sunè bejn bèn ad najt lachealaman, abi' lùj, çchexquiza zeel rùjn zian? Rëb tèèl guial rdxe'chil ni naladx bejn naj dios, abi', çchexquiza zeel rbanl lèn yadoo lod yu' ree Dios guin? ²³ Dád nabè rùjn guial nünbeel ley, per rusa'nxtul Dios guial ad rùjntil ni rniabee ley guin. ²⁴ Ze'cli rëb loj xtiidx Dios: "Bèn ad najt ree bèn Israel rniee reeman Dios diidxguijdx por lèjt."

²⁵ Diidxli rùjnqui sirv guial ru xcuerp bejn sen ni ru ree bèn Israel, bal rùjnman zi'c rniabee xley Dios. Per bal id rùjnman zi'c rniabee ley guin, achet sirvan guial yu'man sen guin. ²⁶ Per bal tijb bèn ad yu't sen guin nabanman zi'cgajc tijb bèn rajc xley Dios majsi ad nünbeetaman laan, dxel ma nayabaman zi'c tijb bèn yu' sen, majsi ad yu'taman sen guin. ²⁷ Bèn rùjn zi'c naj xley Dios, majsi ad nünbeetaman ley ad yu' tèëtaman sen, gusa'nxtu'man lùj guial nünbeel ley guin yu' tèèl sen guin, abi' ad rùjntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' tèëtaman sen ni ru ree bèn Israel ma najman bèn Israel loj Dios, ²⁹ bèn wali naj bèn Israel loj Dios, guidib luxdooman zinalaman xnejz Dios, ad por guial

yu'taman sen ru ree bën Israel, ad por xcostumbr tēët reeman, por guial naban reeman con xSprijt Dios. Abi' bën naban zian, Dios rlies xvaloraman sa'n ad bēnguidxliujt.

3

¹ Zeel zanadi lon xhieczy gan naj bejn bën Israel o xhieczy gan chu'man sen ru ree bën Israel. ² Per naj gani lojdi guial gadxagayaa mod lasajc guial naj bejn bën Israel, din yalojxgaj loj ree bën Israel badēēd Dios xtiidxaman. ³ Yan ad naladxidi por guial yu' ree bën ad zinalt xnejz Dios, ad zūjntraman cumplid ni rēbaman din xo güün Dios ni rēbaman güünman con ree bën zinal xnejzaman. ⁴ Din laaman ad yu't dxej guchara xtiidxaman, majsi gra bēnguidxliuj naj bën rusquiee, per Dios ad nētaman rusquiee, zi'c rēb tiblajt loj xtiidxaman lod rēb:

Gra bejn güünbee lūj guial rūjn cumplid xtiidxil, abi' achet zajc gudxiib reeman guijquil.

⁵ (Per yu' bejn rūjn xgab) guial bal por dol ni cayguieen ree rulūū guial benza'c naj Dios, ¿chexquiza zeel najman benmal rudēēdaman bejn casti? ⁶ Per naj rni lojdi guial ad najt Dios benmal, din bal najman benmal xoza güün xguialguxtisaman con bēnguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rūjn yudar xtiidxli Dios din gap bejn laaman mazri respejt, dxel ad zajctri guiēb Dios naj bejn bēndol. ⁸ Abi' mazri ma yaguieen ree ni mal din gui't ni zagdx, zi'c rēb ree bejn culūn bejn ree, per Dios gudēēd casti bën rēb ree zian.

Graczi bejn ma been dol

⁹ Zeel zi'c ma rnin por ree bën Israel, nē por ree bën ad najt bën Israel, abi' ma ragbeedi guial ad zajct guiēbidi guial mazri benza'c naj ree bën Israel guial loj ree bën ad najt bën Israel, din tiblojzi nayajc ree bēndol. ¹⁰ Zi'c ca tiblajt loj xtiidx Dios lod rēb:

Achutczzi naj benza'c, per ni'qui tijb bejn.

¹¹ Achutczzi rignia'.

Achutczzi raguiil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczzi cayūjn ni zagdx, per ni'czi tijb bejn.

¹³ Zi'cgajczzi tijb baa ni zojbyal,

zian ganax ni dxuudx ririi ro' reeman.

Ganax diidx rusquiee rniee reeman.

Abi' xtiidx reeman naj zi'c xvenen bēēl.

¹⁴ Ganax diidx mal ririi ro' reeman,

diidxgujdx ni rūjnnaa lasa' reeman.

¹⁵ Za'sin reeman din gugūjt reeman bejn.

¹⁶ Bantēēz guin zē reeman, rūjn reeman ni dxuudx ree.

Abi' rusagzi reeman bejn ree.

¹⁷ Ad nūnbee tēēt reeman xhienaag naj guialrbajn bejn zagdx.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zēēd loj xley Dios, naj par ree bën zinal ley guin, chitēē chu guiēb guial achut ragbee xhienin naj dol, laan naj par gagbee bejn guial najman bēndol loj Dios. ²⁰ Din ad guial güünt bejn gra ni rniabee ley guin ma nayaman loj Dios, ley guin rulūū din gagbee bejn guial najman bēndol.

Por guialrliladx ma naya bejn loj Dios

²¹ Per yan Dios ma balūū dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin nē por ni bacaa ree bën badēē xtiidx Dios loj ree bejn. ²² Rayagbee ree guial rūjn Dios bejn cwent zi'c bën ad yu't xtol por guialrliladxaman Jesucrist, din par Dios tiblojzi naj bejn. ²³ Din gra bejn ma been dol, achutczzi naya niz loj Dios. ²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bën gudix por dux tol ree chi gütaman loj crūjz. ²⁵ Dios guxhaal Jesucrist, din por xrejnman chu' perdon par bēnguidxliuj. Abi' perdon guin naj par ree bën rliladx Jesucrist. Zian rguien guial graczi rūjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, ²⁶ guial ma ragbeeman goc güün xguialguxtisaman. Zian rusnuu rulūūman guial graczi rūjnman xnejz, zeel rūjnman perdon xtol ree bën rliladx Jesucrist.

²⁷ Yan, ¿xhienaag yaguieen ree nabē? Achet yaguieennē' ree nabē, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree

Jesucrist. ²⁸ Zeel rayagbeechaaw ree guial Dios r jn perdon xtol ree bejn guial r liladx reeman Jesucrist, ad guial r jnt bejn naguiejn g nman gra ni rniabee ley guin.

²⁹  Wen xDios ree b n Israel naj Dios ya, ad n t ree b n ad najt b n Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman r jn perdon xtol ree b n r liladx Jesucrist, yu'man o ad yu'taman sen ni rniabee ley chu' ree b n Israel. ³¹ Ad nalaxidi cayguieen ree ley guin tiblax guial r liluladx ree Jesucrist, din ad ziantan, guial r liluladx ree laaman rguieen guial nadxu'guijc ree ley guin.

4

Xguialr liladx Abraham

¹ Yan,  xhie zajc yaguie'ch ree xcwent dux b ngulax ree Abraham? ² Bal niyab Abraham zi'c tijb b n gad g n dol por ree ni beenman, guyu mod n nman nab  loj ree bejn, per ad lojt Dios. ³ Din r b loj xtiidx Dios: "Guial bililadx Abraham Dios, zeel been Dios laaman cwent zi'c tijb b n ad beent dol." ⁴ Chi r jn bejn dxiin, milia ni rajxaman ad ni razaladxt reeman, rtia'man laan por dxiin ni r jnman. ⁵ Per guial gac bejn perdon loj Dios, ad zajc gui b bejn guial rayalaman perdon guin por ni beenman, din achut naya loj Dios. Perdon guin z  dan guial r liladx bejn Jesucrist, zeel r jn Dios bejn cwent zi'c b n ad yu't xtol. ⁶ Zi'c gunee rey Davi guial xiquilbaa ree b n been Dios cwent sin dol sin guial g n reeman xhienin par yayal reeman perdon guin. ⁷ R baman: Xiquilbaa ree b n been Dios perdon xtol, b n ma badxi'caman xtol.

⁸ Xiquilbaa ree b n ma been Dios cwent sin dol.

⁹ Ad gunee Davi diidx guie ree naabzi par b n yu' ree sen ni ru ree b n Israel, guneeaman diidx guin ree par gra ree bejn. Din zi'c ma raguie'ch ree, Dios been Abraham cwent zi'c b n ad yu't xtol guial bililadxaman laaman. ¹⁰ Abi' chi biyabaman zi'c b n ad yu't xtol, ni'qui gadaman chu' sen ni ru ree b n Israel, chi gad Abraham chu' sen guin mal n jn Dios laaman cwent zi'c b n ad yu't xtol. ¹¹ Chi biabaman zi'c b n ad yu't xtol, dxel guyuman sen guin din sen guin naj guial ma n jn Dios laaman cwent zi'c b n ad yu't xtol guial bililadxaman laaman. Zeel naj Abraham dad par ree b n r liladx Dios, majsi ad yu't reeman sen ni ru ree b n Israel, per por guialr liladx guin n jn Dios laa reeman cwent zi'c b n ad yu't xtol. ¹² Naj t   Abraham dad par ree b n majsi yu' sen guin per r liladx reeman zi'c bililadx Abraham Dios diidx chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham n  loj ree xdiaaman, guial gud  daman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb b n ad yu't xtol. ¹⁴ Yan bal ganaxzi ree b n zinal ley guin tia' ni gud   Dios, achet cwent naj guialr liladx ree bejn laaman, ache t  t cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu gui b guial ad cay jnt bejn ley guin cumplid.

¹⁶ Zeel chi been Dios promejs loj Abraham guial gud  daman ni r baman par gra ree xdiaaman, beenman promejs guin lojman guial bililadx Abraham guin laaman, din guiguieen guial najman benza'c abi' ad parzi ree b n zinalt ley guin naj promejs guin, n gajc par ree b n r liladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidx Dios lod r baman loj Abraham: "L j gac dad par zien ree b nguidxliuj." Zian naj promejs ni been Dios loj Abraham, Dios b n rusban ree beng t abi' rnieeman xcwent ree ni gad chu' loj guidxliuj guie zi'c rulu  ma yu' reen.

¹⁸ Majsi ragbeechaaw Abraham guial ad zajtaman famil, per chi r b Dios lojman zian, bililadxaman ni r b Dios, bililadxaman guial gac gra ni r baman lojman. Zianan zeel najman dad par gra ree b n r liladx Dios zi'cgajc laaman. Zi'c r b Dios lojman, chi r baman: "Zian gaquil famil, d d famil narooob gaquil." ¹⁹ Cost tibgayuu ijz ma yu' Abraham nadxel, ragbeeman guial ma naj reeman bengol n  xb ngunaaman Sara guial chu' xi'n reeman, per ad guyunaw  gtaman, bililadxaman ni r b Dios lojman. ²⁰ Ad yu't dxej ad bililadxaman ni r b Dios. Diidxli bililadxaman laaman abi' rud  eman quixt   lojman, ²¹ din guidiblagaa bililadxaman guial rajp Dios guialrniabee g nman zi'c ma r baman. ²² Zeel been Dios cwent Abraham zi'c tijb b n ad yu't xtol.

²³ Abi' lod r b guial been Dios laaman cwent zi'c b n ad yu't xtol guial bililadxaman laaman, ad tijbzi Abraham ruza't yagaj, ²⁴ n gajc dunuj ree din ma r liluladx ree Dios. Abi' n  dunuj ree ma n nman cwent zi'c b n ad yu't xtol, Dios b n basban Dad Jesucrist loj guialg jt, ²⁵ Dad Jesucrist b n g t por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nūjn Dios dunuj ree cwent zi'c bèn ad yu't xtol guial raliduladx ree laaman, zeel ma nadxu' ree zagdxe con laaman por xguialgūjt Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëéz ree yayal ree xanyabaa lod za'man. ³ Abi' ad ziantzi, nē guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. ⁵ Ni ralëéz ree por Dios, ad zasa'nxutan dunuj ree, din rayagbee ree guial rēn da'taman dunuj ree por xSprijtaman bēn ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol. ⁷ Dunuj ree rayagbee guial nawëég naj chu' bēn tiēb guiēt por zatijb bejn. Ni'czi por tijb bēn naban xnejz, o wed yu' bēn tiēb guiēt por tijb benza'c da't. ⁸ Per Dios ma balüüman guial rēnman dunuj ree, zeel güjt Jesucrist por dunuj ree majsi nayajc ree bëndol. ⁹ Per yan ma naya ree loj Dios por xguialgūjt Jesucrist, abi' ad ziantzi, nē ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgūjt Xi'nman Jesucrist, diidxgui yan ad zūjtaman dunuj ree perdon ya, guial ma nabajnnē' ree Jesucrist, bēn guxhal nejz par loj Dios. ¹¹ Abi' ad laatzan, nē guial yu' du luxdoo ree nix radëéd ree quixtēē loj Dios por Dad Jesucrist, din por laaman ma nadxu' ree zagdxe con Dios.

Adán nē Cristo

¹² Por tijb xinguaaw guzuloj guyu dol loj guidxliuj, abi' por dol guin guzuloj guyu guialgūjt, gra ree bejn bayal guialgūjt guin guial been reeman dol. ¹³ Diidz chi gad ley ni badëéd Dios loj Moisejs chu' mal yu' dol, per guial achet ley guyu nadxel, achut zajc guiēb guial cayūjn bejn dol. ¹⁴ Per majsi zian, bidxinczi dxej ni güt reeman, diidz xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bēn naj gui't.

¹⁵ Din garen naj dol ni been Adán guial loj perdon ni zëéd por Dios. Por xtol tijb bejn guzuloj guyu guialgūjt par gra bejn, per por tijb bejn zëéd xperdon Dios, abi' laaman naj Jesucrist. Por Jesucrist rūjn Dios dunuj ree perdon, abi' ni been Jesucrist naj ni mazri lasajc, nē ni mazri zagdxe par zien ree bejn. ¹⁶ Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgūjt par gra ree bejn. Per por ni been Jesucrist bi't perdon par gra ree bēn rililadx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgūjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon nē guialnaban loj Dios. ¹⁹ Din por tijb bēn ad bazoobt diidz gra bejn naj bëndol. Per ziangajc por tijb bēn bazoob diidz ma zajc gap bejn perdon loj Dios.

²⁰ Abi' Dios badëē ley loj Moisejs, din por ley guin gagbee ree bejn guial cayūjn reeman dol. Abi' chi ragbee bejn guial cayūjnman zien dol loj Dios, ziangajc mazri benza'c naj Dios par güünman laaman perdon. ²¹ Guia'xchej gunabee dol bejn ree, abi' por dol guin guzuloj guyu guialgūjt. Per yan mazri nadxu'guijc ree guial rēn Dios dunuj ree, din guial rēnman dunuj ree nūjnman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bayëjt ree par dol per nabajnnē' ree Jesucrist

¹ Ad naladxidi canin lojdi guial yaguieen ree dol mazri din guiēn Dios dunuj ree mazri. ² Din ad ziantan, ma bayëjt ree par dol ad rayaltri yaguieenz yaguieen ree dol. ³ Din gol bignia' guial chi barobnijs ree por Jesucrist, laan naj zi'c ruluü guial nē dunuj ree ma bayëjt con laaman. ⁴ Chi barobnijs ree rēn guiēban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rēn Dios.

⁵ Abi' bal chi barobnijs ree ma nayajc ree tijbzi con Jesucrist loj xguialgūjtaman, zi'c babanman ziangajc yaban ree. ⁶ Din dunuj ree rayagbee guial chi güt Jesucrist loj crūjz, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëég güün dol dunuj ree gan din ad rniabeetri dol guin dunuj ree. ⁷ Din bēn ma güjt por dol, ad rniabeetri dol guin laaman. ⁸ Abi' guial güjt Jesucrist por dux tol ree, zeel ma bayëjt ree par dol guin, yabajn tēē ree con laaman.

⁹ Din dunuj ree rayagbee guial chi baban Jesucrist ad yu'tri dxej gui taman din ad rniabee guialg jt laaman. ¹⁰ Con tivoltizi g jt Jesucrist por xtol ree bejn, yan ma nabanman par Dios. ¹¹ Ziangajc l jt gol been cwent guial ma g jtidi par dol, abi' ma nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad ti bidi nabee dol l jt, ad ti b t edi g un ree xgabdxuudx l jt gan. ¹³ Ad cw  ladx l jt gajc loj dol par g undi ni mal, zagdxeli gol cw  b nabee Dios l jt, zi'c tijb b n ma g jt, abi' yabandi par laaman. Gol cw  b nabeeman l jt par g undi ni zagdx. ¹⁴ Zian ad zanabeetri dol l jt, per ad por guial yu'guijctidi ni r b ley ad g undi, ad zanabeetri dol guin l jt por guial zinalidi guial r n Dios l jt.

Ma gulara ree loj dol

¹⁵ Ad canitan por guial ma zunaal ree guial r n Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. ¹⁶ L jt ragbee bal yu' chu rniabee dunuj ree, yazoob ree xtiidx b n rniabee dunuj ree. Yan bal dol guin rniabee l jt yayalidi casti, per bal ruzoobidi xtiidx Dios dxel ma ryalalidi perdon. ¹⁷ Per quixt   Dios guial majsi gua'xchej gunabee dol l jt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan guial ad rniabeetri dol l jt, ma nabandi din g undi zi'c r n Dios. ¹⁹ (Canen n l jt con ganax diidx ni zajc chignia'di xhie r n gui b ni canin, din ragbeen guial naw  g naj chignia'di ni guin ree.) Zi'c gunabee dol l jt gua'xchej persi beendi ni dxuudx ree n  graloj ree ni mal, ziangajc yan guidiblagaa gol cw  b nabee Dios l jt din gac g undi ni zagdx guiban t edi zi'c r nman.

²⁰ Chi gunabee dol l jt ni'quid guyutidi xgab nibajndi zi'c r n Dios. ²¹ Per,  xhieza gan beendi por ni mal ni beendi nadxel, ni mal ni ratun di yan guial ma ragbeedi por laan z  d xcasti Dios? ²² Per yan guial ad rniabeetri dol l jt ma zinalidi xnejz Dios, abi' laan naj ni zagdx din por zian ma zajc guibandi zi'c r n Dios gap t edi guialnaban tiblyaa con laaman. ²³ Din ni r jn bejn gan por dol laan naj casti, per ni razaladx Dios naj guialnaban tiblyaa par ree b n ma naj tijbzi con dux Dad ree Jesucrist.

7

Ni naj zi'c guialruxhliia

¹ Compniar raliduladx ree Jesucrist, l jt ragbee xhienaag naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliia bejn, ad zajc guxhliiaan man ben ren la'tgaj naban lacheelaman. Per bal gui t lacheelaman dxel ad yu't ley ni gudxoos guial guxhliiaan man ben ren. ³ Zeel bal naban lacheelaman abi' guchajgaman ben ren, dolan cay jnman. Per bal ma g jt lacheelaman dxel achet ley gudxoos guial guxhliiaan man ben ren ad cay jn t etaman dol.

⁴ Ziangajcan l jt compniar raliduladx ree Jesucrist, por xguialg jt Jesucrist ma g jtidi par xley Moisejs. Yan ma najdi xbejn Cristo b n baban zatijb, abi' zian ma zajc yaguieen ree zi'c r n Dios yaguieen ree. ⁵ Din chi babajn ree zi'ctzi bay n ree, mazri baguieen ree ni rudxoos ley guin yaguieen ree abi' bunaal ree ni mal ni rayal casti. ⁶ Per yan guial ma bay jt ree par ley guin, yan guial ad rniabeetri ley guin dunuj ree guial ma bidxaa t   mod ni nabajn ree, ma zajc yaguieen ree zi'c r n Dios por xSprijtaman b n nabajnn  ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee t etan guial dol naj guialrz  bladx, bal id r b loj ley guin: "Ad s  bladxil." ⁸ Per chi gogbeen guial ni mal naj guialrz  bladx, mazri gojcxhieje da dolan por gra ni guz  bladxan. Bal id yu' ley, ad zagbeet bejn xhienin naj dol. ⁹ Chi gadan g nbee ley guin, par naj zagdx nabanman. Per chi benbeen ley guin, gogbeen guial cay nan dol abi' por dol guin rayalan casti. ¹⁰ Bi't ley guin din gagbee bejn xhienaag guibanman, per par naj bi'tzan par gud edan naj casti. ¹¹ Din basquiee dol guin naj guial zile' g nan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios z edan abi' gra ni z ed loj ley guin loj Dios z edan, abi' zagdx xnejz t   naj ni r b loj ley guin. ¹³ Ad ley guint rajp dol guial rayalan casti, dol guinan naj ni basquiee naj din g nan ni rayal casti. Abi' por ley guin gogbeen guial ni dxuudx da't naj guial g un bejn dol.

¹⁴ Dunuj ree rayagbee guial por Dios z ed ley guin, per guial najn b nguidxliuj zeel zianczi r jn dol guin naj gan. ¹⁵ Ad rignia'tan xhienin rajcan, din ad r ntan ni r nan, aal ni ad r ntan r nan. ¹⁶ Abi' chi r nan ni ad r ntan g nan, zian ragbeen guial ni zagdxequi naj ley guin, din por ley guin ragbeen xhienin cay nan. ¹⁷ Zeel ad najtcsi r n guial r nan ni ad r ntan, r nan laan guial najn b ndol, abi' zianczi r jn dol guin naj gan. ¹⁸ Din guial najn b nguidxliuj, ragbeen guial ni'czi ta'n ad najtan benza'c, majsi r nan g nan ganax ni zagdx,

per ad rajctan. ¹⁹ Ad rüntan ganax ni zagdxé ni rënan günan, aal ganax ni mal rünan ni ad rëntan günan. ²⁰ Yan bal rünan ni ad rëntan günan, ad najtci rün par günan laan, rünan laan guial najn béndol abi' zianczi rüjn dol naj gan.

²¹ Ragbeen guial majsi rënan günan ganax ni zagdxé, per laa za' gajc dol guin par günan naj gan. ²² Dád ruladnan gra zi'c rniabee Dios günan, ²³ per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjn naj gan.

²⁴ ¡Prob naj! ¿Chu zajc yabëë naj loj casti rayalan por dol ni rünan guial naj naj bénguidxliuj? ²⁵ Per quixtéë Dios guial por dux Dad ree Jesucrist ma gulaan loj casti guin. Diidxcizci da xgaban naj guial günan ganax ni rniabee Dios, per guial najn bénguidxliuj zeel zianczi rüjn dol guin naj gan.

8

Guialnaban runee xSprijt Dios

¹ Gra ree bèn riladx Jesucrist ad rayaltri reeman xcasti Dios, bèn ad nabantri ree zi'ctzi rën reeman, laa reeman ma rüjn reeman naguiejn naban reeman zi'c rniabee xSprijt Dios.

² Din por xguialrniabee xSprijt Dios, bèn runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tëëtri ree xcasti Dios. ³ Guial nayajc ree bénguidxliuj ad bile't nüjn ley dunuj ree yudar, ley ni badëëd Dios loj Moisejs. Per yan ma been Dios ni ad bile't nüjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi güjtaman por dux tol ree chitëë nabeeri dol dunuj ree. ⁴ Laaman been zian, din yaguieen ree zi'c rënman zi'cgajc tijb bèn cayün zi'c rniabee ley guial ad nabantri ree zi'ctzi rayën ree, ma nabajn ree zi'c rniabee xSprijt Dios.

⁵ Bén naban ree zi'ctzi naj xixgab reeman, mazri yu'guijc reeman güün reeman zi'ctzi rën reeman. Per ree bèn naban zi'c rniabee xSprijt Dios, mazri yu'guijc reeman güün reeman zi'c rniabee Sprijt guin. ⁶ Guial yu'guijc bejn güünman zi'ctzi naj xixgabaman zeel zëëd casti. Per bèn yu'guijc güün zi'c rniabee xSprijt Dios, zajpaman guialnaban con Dios yabe'cdxe tëë Dios luxdooan. ⁷ Bén yu'guijc ree guiban zi'ctzi naj xixgab reeman, rdxe'ch Dios laa reeman din ad rënt reeman guzoob reeman xtiidxaman ad rile' tëët güün reeman zi'c rënman. ⁸ Zeel bèn naban ree zi'ctzi naj xixgab reeman, ad ruladxt Dios ni rüjn reeman.

⁹ Per lëjt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannëdi xSprijt Dios. Din bèn ad nabannët xSprijt Dios, ad najtaman xbejn Cristo.

¹⁰ Per bal ma nabannëdi Cristo, rën guiëban guial ma güjtidi par dol, ma nabannëdi xSprijt Dios din ma nüjn Dios lëjt cwent sin dol. ¹¹ Abi' bal ma nabannëdi xSprijt Dios, bèn basban Jesucrist loj ree bengüt. Majsi guiëtidi per zasban Dios lëjt din tia'di zatijb guialnaban por xSprijt Dios bèn nabannëdi.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. ¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios bèn nabannëdi ma basa'ndi dol tiblax dxel ma gapidi guialnaban tiblyaa con Dios.

¹⁴ Gra ree bèn rtiëjb rniabee xSprijt Dios laa reeman, laa reeman naj xi'n Dios. ¹⁵ Din ad nabannët reeman xSprijt Dios par guidxeb reeman, zi'c rdxeb tijb bejn xpatronian, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: "¡Dad!" ¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios. ¹⁷ Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

¹⁸ Ma benan xgab guial achet lasajc guialrzagdiaj ni caydüüd ree yan guial loj guialnaza'c ni yaca' ree xanyabaa. ¹⁹ Abi' xt gra ree ni badxe' Dios loj guidxliuj, ma rën nejzdoo reen guidxin dxej guiguien chu ree nin naj xi'n Dios. ²⁰ Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin ²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. ²² Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman. ²³ Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni guneë Dios duloj ree. Abi' cayzaagdiaj ree la'tgaj caylëz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. ²⁴ Dunuj ree rayagbee guial gac zian, laan naj ni ralëz ree guialraliduladx ree ma nayajc ree perdon. Lëjt ragbee bal ni ralëz ree ma gojcan, ad zalëztri reen din ad zajctri cwëz bejn ni ma gojc. ²⁵ Per bal gad ni caylëz ree gac, ad rayalt yadxag ree yalëëz ree gacan.

²⁶ Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiaraguejn ree, dxel laaman rbejdx rniab Dios por dunuj ree. ²⁷ Abi' Dios, bèn nünbee luxdoo gra ree bejn ragbeeman xhienin

canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

Achet zajc güün dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman. ²⁹ Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bèn nabee loj gra ree bèn naj Xi'n Dios. ³⁰ Gra ree bèn ragbee Dios guial chililadx reeman laaman, rbejdxaman laa reeman din gac reeman xbejnman, rünman laa reeman cwent sin dol abi' rudëeman xanyabaa loj reeman lod zojbaman.

³¹ Yan, guial ma rayagbee ree gra ree ni guie, achet güünan chutëez güün xcontr dunuj ree, dunuj ree rayagbee guial Dios gagnë dunuj ree. ³² Ad gurexuut Dios nudëe Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, çdiidxgui ree ni ren ree nid zuneeman duloj ree ya? ³³ Çchu zajc cwe'c dux guialquia ree nayajc ree bèn ma gulej Dios? Din Dios ma nünj dunuj ree cwent sin dol. ³⁴ Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. ³⁵ Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rünj bejn dunuj ree, o por guialrliaan, o por guial ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. ³⁶ Zi'c rëb loj xtiidx Dios: Guial nayajcan xbejnl, zianczi nadxu'n loj guialgüjt.

Rünjë reeman dunuj zi'c ree xiil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bèn rën dunuj ree. ³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac, ³⁹ o ni zëed xanyabaa, o lën liuj, ni'qui tijb ni been Dios, achetçi achut tëet zajc chiqüied guialrën Dios dunuj ree por dux Dad ree Jesucrist.

9

Dios gulej bën Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial guixie guixie dád yu'naya luxdoo, xt ni'quid radxejlt xhie günan. ³ Balzianclaa majsi ad zayaltan pardon, majsi güün Cristo naj tblad, per bal zian chile' günan yudar bèn ladx reen chitëe yayal reeman casti. ⁴ Laa reeman naj bën Israel, abi' laa reeman naj bèn gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëenin güün reeman, badëe tëe xleyaman loj reeman. Rëbaman loj reeman xhienaag guiën reeman laaman, been tëeman promejs loj reeman. ⁵ Zëed reeman loj xdiaa ree bèn been ree sirv loj Dios gulal, loj gajc ree bèn zëed Cristo chi bi'taman loj guidxliuj, laaman naj bèn nagle' zianczi rajp tëeman guialrniabee loj gra ni yu'. Amën.

⁶ Ad canitan guial ad züjntri Dios xpromejsaman cumplid, ni canin naj guial ad gra ree bèn Israel naj xbejn Dios. ⁷ Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: "Diizd xi'n! Isaac suloj xdiaal." ⁸ Laan rulüü dunuj ree guial ad por guial najt bejn bën Israel, ma najman xbejn Dios, xbejn Dios naj ree bèn naj cwent loj xdiaa Abraham guial rililadx reeman xtiidx Dios zi'c Abraham. ⁹ Din Abraham bililadxaman Dios chi rëb Dios lojman: "Zatib ijz tiamp guie gajc guialan abi' dxej zii ree ma ca' Sar tijb xindobëz."

¹⁰ Abi' ad laatzan. Grop ree xi'n Rebeca gojc xdad reex Isaac, bèn goc dux béngulal ree, ¹¹⁻¹³ per chi gad reex gal, chi ad wayüjn tëet reex ni zagdxe ni'qui ni mal, rëb Dios loj Rebeca: "Xin yaløj guin laax güün sirv loj xinguiag guin." Zi'c rëb loj xtiidx Dios lod rëb: "Guyënan Jacob, per bidxe'chan Esaü." Zian rguien guial ma ragbee Dios chu rbeman ad por ni rünjt bejn, laaman ma ragbee chu rucaabeeman.

¹⁴ Yan, çpor zian yaguie'ch ree ya, ad rünjt xguialguxtis Dios zi'c rayal? çPer ad ziantan! ¹⁵ Din Dios rëb loj Moisejs: "Yayan bèn rënan yayan abi' bèn rayal ree casti, bal rënan ad zudëëdtan laa reeman casti." ¹⁶ Zeel ad zile't yaya Dios bejn por xixgabzaman o por ni rünjman, laaman mal ragbee chu rënman yayaman. ¹⁷ Loj xtiidx Dios rëb guial rëbaman loj rey Egipto: "Naj ben lüj rey din guiguien da guialrniabeen din güünbee gra bénguidxliuj naj." ¹⁸ Zeel rnin lojdi guial ma ragbee Dios chu yayaman chu tëe güünman luxdoo gojl.

¹⁹ Per wed por zian nadi: "Bal zianan, çchexquiza zeel rdxe'ch Dios guial nayajc ree zi'c nayajc ree awa ad zajct yadxoön ree zi'c naj xixgabaman?" ²⁰ Per, çchu naj bénguidxliuj din guinieeman Dios zian? Wen zajc guieb tijb guiajs loj bèn been laan ya: "çChex zeel beerl

naj zian?" ²¹ ¿Nid bèn rüjn guiajs guin rüjnnë bajn guin zi'tctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie guixie o güünman guiajs güün dxiin dxej zojbloyzi ree.

²² Yan, ziangajc Dios ma ragbeeman chu rayal casti, abi' xt zajc laa nudëed gajcaman casti din guiguëin xguialrniabeeman. Per gudaanman gojp tëëman pacens bèn ad ruzoobt ree diidx, bèn rayal ree nit. ²³ Gudaanman laa reeman din guiguëin guial laaman guinia xhienaag güünman, guial laaman naj bèn ca' gualrniabee abi' bayaman bèn ragbeeman diidx guia'xchej guial yayal reeman xanyabaa. ²⁴ Abi' laa reeman naj dunuj ree bèn ma gurejdx Dios, loj ree bèn Israel në loj ree bèn ad najt bèn Israel. ²⁵ Zi'c ca loj libr ni bacaa Oseas bèn badëë xtiidx Dios loj ree bejn, lod rëb:

Bèn ad najt ree da bejnan,
guiën loj reeman guial naj reeman da bejnan,
abi' ree bèn ad yu't bèn rën laa reeman,
naj guiën laa reeman.

²⁶ Abi' lod rëb Dios loj ree bejn: "Ad da bejntan lëjt".

Yagaj gac reeman xbejnman, laaman guial najman bèn naban.

²⁷ Gui'ad Isaias bèn badëë xtiidx Dios loj ree bejn, rëbaman por ree bèn Israel: "Majsi zien da't naj ree bèn Israel zi'c üx riga' ro' nijsdoo, per ta'nz naj ree bèn laa loj casti, ²⁸ din Dios nayob güün cumplid xtiidxaman loj guidxliuj guie zi'c ma rëbaman." ²⁹ Abi' diidx gocli rëb Isaias loj ree bejn:

Bal nitiëjb dux Dad ree Dios
bèn rajp gra gualrniabee
ninijt gra ree dux bëngulal ree,
diidx gocli mal gunijt dux diaa ree
zi'c gunit ree bèn Sodoma në ree bèn Gomorra.

Bèn ad najt ree bèn Israel ma naj reeman perdon loj Dios

³⁰ Yan, ¿xhie yaguie'ch ree? Bèn ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliiladx reeman Jesucrist. ³¹ Abi' ree bèn Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb "guiaj ni rliidx guia' bejn" ³³ zi'c ca loj xtiidx Dios lod rëb:

Ma gulen tijb bejn luguiedx Sión, bèn gac zi'c tijb guiaj
ni ladx guia' ree bejn abi' gusajban laa reeman.
Abi' bèn chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni rënan rniaab tëen loj Dios naj guial gac ree bèn Israel perdon. ² Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdxe xhienaag rën Dios güün reeman. ³ Din ad rtiëjt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. ⁴ Din por Jesucrist bayaaloj zi'c rniabee ley güün bejn, yan bèn rliiladx ree laaman, ma naya reeman loj Dios.

⁵ Bèn rën gac naya loj Dios guial zinalaman ley, rëb Moisejs guial bèn güün zi'c tal rëb ley, zajpaman gualnaban la'tgaj cayüjnman zi'c rniabee ley guin. ⁶ Per guial rajc bejn naya loj Dios por guial rliiladxaman Jesucrist, naj guial ad züjntaman xgab: "¿Chuczi zajc chë'p xanyabaa?" (Din rën guiëban guial ad rliiladxaman, abi' rënman guguaaman guiat Cristo loj guidxliuj.) ⁷ Ad guiëb tëëman: "¿Chu zajc che lod za' ree bengüt?" (Din rën guiëban guial ad rliiladxaman, abi' rënman guguaaman yaban Cristo loj ree bengüt.) ⁸ Per loj xtiidx Dios rëb: "Gajxh za' xtiidx Dios con lüj, ryaadxzi güünl xgab guiëb tëël bal chililadxil laan." Din gualrliiladx ni ratie'ch ree naj ze. ⁹ Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. ¹⁰ Din chi chililadx bejn Jesucrist con guidib luxdooan, diidx loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios rëb: "Gra ree bèn chililadx laaman ad yu't dxej yaya'nxtu reeman."
¹² Laan rën guiëb guial loj Dios tibloyzi naj bejn, achet güünan chutëëz najman, bal najman bèn Israel o ad najtaman bèn Israel. Din tijbzi Dios naj Dad par dugra ree, abi' dád benza'can con gra ree bèn rbejdx rniab laaman. ¹³ Din loj xtiidx Dios rëb: "Gra bèn yanab perdon loj Dios, gacaman perdon." ¹⁴ Per, ¿xhieza naag cwedx guiniab reeman laaman

awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bèn guinee xtiidxaman loj reeman? ¹⁵ ¿Xhienaag chu' bèn guitie'ch xtiidxaman awa achut guixhiaal laa reeman? Loj xtiidx Dios rëb: “iNi za'cdxoon naj chi rdxin bèn zinë ruson zagdxe!”

¹⁶ Per ad grat bejn ridxga' xtiidxza'c Dios. Zi'c rëb Isaías: “Dad, ¿chu ma rililadx ni ranen por lüj?” ¹⁷ Zeel guialrliladx zëed por ni rigueijn bejn, abi' ni rigueijn bejn naj xtiidxza'c Jesucrist.

¹⁸ ¿Wen nid wagueijn ree bejn laan ya? ¿Per naj rni guial ma bacaagdiajg reeman laan! Din loj xtiidx Dios rën:

Guidib guidxliuj ma bire'ch xtiidx Dios

abi' xt luar bigra lod naguie'ch ma biguiejn reeman xtiidxaman.

¹⁹ Yan rünan xgab: ¿Wen id rignia' ree bèn Israel xtiidx Dios ya? Per diizd guia'xchej bacaa Moisejs ni rëb Dios por laa reeman chi rëbaman:

Naj gün din tédlojdi por ni gūnan

con ree bèn ad najt bèn Israel.

Në por ni gūnan con laa reeman,

majsi ad ragbeet reeman, abi' zadxe'chidi.

²⁰ Abi' sin guialrdxeb bacaa Isaías ni rëb Dios por ree bèn Israel, chi rëbaman:

Bèn naj ree bèn Israel, majsi ad baguuilt reeman naj,

per badxejl reeman naj.

Abi' ma balülon loj reeman,

majsi ad gunabdiidxt reeman por naj.

²¹ Bacaa tée Isaías ni rëb Dios por ree bèn Israel, chi rëbaman: “Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj.”

11

Xixgab Dios

¹ Ad canitan lojdi guial ma gulëeladx Dios bèn Israel ree, din ad ziantan. Lëjt ragbee guial bèn Israel naj abi' loj xdiaa Abraham zialan, guial zialan loj xdiaa Benjamín. ² Diizd guia'xchej, gulej Dios bèn Israel ree din gac reeman xbejnman, zeel ad rbëeladxtaman laa reeman. ¿Nid rusaaladxidi tiblajt loj xtiidx Dios ya lod zëed chi gule'c Elias bèn badëe xtiidx Dios loj ree bejn xguialquia ree bèn Israel loj Dios? Chi rëbaman: ³ “Dad, ma bagüjt reeman gra ree bèn badëe xtiidx loj ree bejn ma bachijl tée reeman xialtar reel, najzi baya'n abi' nëgajc naj rën reeman gugüjt reeman.” ⁴ Per badxi' Dios xtiidxaman rëbaman: “Ma gulëcan gajdx ml bejn par naj, bèn ad wazuxibtzi ree loj dios la Baal.” ⁵ Yan ziangajc yu' ta'n bèn Israel, por guial rayaman laa reeman gulejman laa reeman par laaman. ⁶ Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

⁷ Zian gojc, bèn Israel bèn gule Dios, badxejl reeman laaman guial rililadx reeman laaman. Per ree bèn Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c rënman zeel beenman luxdoo reeman gojl, ⁸ zi'c rëb loj xtiidx Dios lod rëb: “Basiaaw Dios xquiargueijn reeman, abi' naj reeman zian xt yandxej, majsi ruguiaa reeman per ruluü ad ruguiaat reeman, abi' majsi rigueijn reeman per ruluü ad riguejnt reeman.” ⁹ Rëb tée Davi:

Xguialraw zagdxe reeman con gra xguialnaza'c reeman

laan gusquiee laa reeman guial zëqui reeman zagdxe.

Laan gusquiee laa reeman din téd reeman casti ni ryal reeman.

¹⁰ Yaya'n reeman zi'c tijb bèn ad ruguiaat,

abi' sac reeman zi'c tijb bèn ca bëw xijch.

Gac ree bèn ad najt bèn Israel perdon

¹¹ Ad canitan lojdi por guial ad rtiëjbt ree bèn Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bèn ad najt ree bèn Israel perdon, din chile' sëëbladx ree bèn Israel gap reeman perdon guin. ¹² Yan bal guial ad bazoobt ree bèn Israel diidx, beenan sirv par din yayal los demazri ree bënguixliuj xguialnaza'c Dios, bèn ad najt ree bèn Israel. Yan, ¿rünjdi xgab ya xhienaag güünle' Dios bejn ree chi tiëb ree bèn Israel güün reeman zi'c rën Dios?

¹³ Yu' ni rënan ganin lëjt bèn ad najt ree bèn Israel, lëjt ragbee guial Dios guxhaal naj din gün xtiidxaman lojdi abi' dád cayünan naguiejn gūnan zi'c ryal. ¹⁴ Rënan guial ree bèn ladx reen bèn Israel ree sëëbladx zi'c rünjdi din güün reeman zian din chile' gac reeman perdon.

¹⁵ Walican guial chi ad bazoobt ree bèn Israel xtiidx Dios, guyu mod gojc los demazri ree

bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb. ¹⁶ Abi' zi'c chi beenle' Dios bèn Israel ree gulal laan naj tijb sen guial güünle'man los demazri ree bèn Israel, ziangajc bal güünle' Dios xliuj tijb yag guidib yag guin ma nagle'.

¹⁷ Bèn Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bèn Israel najl zi'c tijb xidx yag olivo ni yu' dajn ni rguuid lod biru' xidx yag olivo guin, zeel rajpil guialnaban por xliuj yag guin. ¹⁸ Zeel ad naladxil guial mazri zagdx najl guial loj yag oliv ni rnin naj ree bèn Israel. Per bal rüjnl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.” ²⁰ Waliquil, per xidx yag olivo ni canin naj ree bèn Israel, gurug reen guial ad bililadxt reen abi' lüj guyal xluar reen guial rililadxil. Zeel ad rüjnl nabë, zagdxeli gojp cudad. ²¹ Din bal bèn Israel ni canin naj ree xidx yag guin, ad bayat Dios laa reeman, ziangajc zajc saquil. ²² Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bèn ad bazoobt xtiidxaman, abi' ma beenman ni zagdx con lüj. Per rayal guibanl zi'c rënman, bal id züjnl zian züjn xguialguxtisaman con lüj. ²³ Abi' bal yayejc ree bèn Israel con Dios, abi' chililadx reeman perdon ni zëed por laaman, züjnman laa reeman cwent con los demazri ree bèn Israel rililadx. Din laaman rajp guialrniabee par yayünman laa reeman tijbzi con los demazri ree bèn Israel. ²⁴ Din lüj guial ad najtil bèn Israel, lüj guial canin najl zi'c tijb yag olivo ni yu' dajn, zile' najquil tijbzi con yag olivo zagdx ni rnin naj ree bèn Israel, ¡diixgui ree bèn Israel ni ad ruzoobt ree xtiidx Dios, nid zayajc reeman tijbzi ya con los demazri ree bèn Israel bal guzoob reeman xtiidx Dios!

Gac ree bèn Israel perdon

²⁵ Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güündi nabë. Bèn Israel rüjn ree nad par guzoob reeman xtiidx Dios, cayajc zian xt chi ma bayaaloj bililadx ree bèn ad najt ree bèn Israel, bèn ma naj ree par chililadx xtiidx Dios. ²⁶ Chi ma gojc zian, dxel graczi ree bèn Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Sión za bèn gagnë ree bèn zëed loj xdiaa Jacob.

Din yariica reeman loj nejz mal zinal reeman.

²⁷ Dxel gac cumplid da diidxan,

Zi'c ma rën loj reeman guial gūnan perdon xtol reeman.

²⁸ Per yan guial dád nad ree bèn Israel par chililadx reeman xtiidxza'c Jesucrist, zian yu' mod persi rililadxidi guial ad najtidi bèn Israel. Abi' majsi zian, rën gajc Dios laa reeman zi'c beenman promejz loj ree xbéngulal reeman. ²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx tëëtaman bèn ma gulejman par laaman. ³⁰ Gocli ad binaltidi xnejz Dios, per yan por ree bèn Israel ad ruzoobt xtiidx Dios, ma balüüman lëjt guial rayaman lëjt. ³¹ Abi' bal yan ad ruzoobt ree bèn Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bèn Israel në ree bèn ad najt bèn Israel ad zuzoobt reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, në xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayünman. ³⁴ Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman? ³⁵ ¿O chu ma badëë xhienin lojman din cwëzaman quixaman laaman?” ³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

12

Guialnaban cüb

¹ Zeel compniar raliduladx ree Jesucrist, rniabaan lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tëëman, din guibandi zi'c rënman, abi' zian guiëndi laaman. ² Ad guibanridi zi'c naban los demazri ree bèn yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx, conin ruladxaman, con tëënin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiarguejn ni banee Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjnan. ⁵ Ziangajc dunuj ree guial raliduladx ree

Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiarguiejn ni baca' ree, zi'c naj ni guyèn Dios baneeman dunuj ree. Zeel bal ma baneeman quiarguiejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiarguiejn par yaguieen ree sirv ben ren ree, rayal yaguieen ren ze'c rayal. Bèn cwa' quiarguiejn par gulüüman bejn ree xtiidx Dios, rayal gulüüman bejn ree. ⁸ O bèn cwa' quiarguiejn par gudëeman consejw loj ree bejn, rayal gudëeman consejw. Guiáad bèn cwa' quiarguiejn par yazaladxaman xhienin loj ree bejn, rayal yazaladxaman con guidib luxdooan. Abi' bèn cwa' quiarguiejn par nabeeman, rayal gapaman cudad nabeeman zi'c rayal, o bèn cwa' quiarguiejn par güünman yudar bèn cazagdiaj ree, rayal chu' luxdooan zagdxe güünman laa reeman yudar.

Ni rayal güün ree bèn rliladx Jesús

⁹ Gol guyèn lasa'di con guidib luxdoodi, gol basa'n ree ni mal tblad, gol binal ni zagdxe.

¹⁰ Gol guyèn gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bèn ploj par güüdi ni rayal güüdi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabëzidi tia'di, gol gudaan tëe loj ni rzagdiajdi, ad gucwëez cwedx guiniabidi Dios.

¹³ Chi xhie ryaadx xcompiaridi, bèn rliladx ree Jesucrist, gol been reeman yudar. Gol gojc benza'c con ree bèn ri't lidxidi.

¹⁴ Gol gurejdx Dios por ree bèn rzunal lëjt par güün reeman lëjt ni mal, ad guzaalidi diidxmal gujc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bèn yu' luxdoo nix, per con ree bèn yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdxe con ree lasa'di, ad güüdi nabë, gol gojc bèn naxanladx. Ad naladxidi mazri rajquidi guial loj ree ben ren.

¹⁷ Ad güüdi ni mal bèn rüjn lëjt ni mal, gol been naguiejn güüdi ni zagdxe loj gra ree bejn.

¹⁸ Gol been naguiejn da't din cwenëdi bejn ree zagdxe. ¹⁹ Compniar raliduladx ree Jesucrist, ad rgu' guialxyajn luxdoodi con ree bèn rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: "Naj naj bèn rayal güün xguialguxtis, gudë tëen ni rayal bejn. Zian rëb dux Dad ree Dios." ²⁰ Rëb tëëman: "Bal rliaan bèn rdxe'ch lüj, badëed ni gawaman, o bal re'caman nijs, badëed ni gui'ëman, zian guguaal yatuman." ²¹ Ad bal tiëbil güün ni mal lüj gan, been ni zagdxe din güünl ni mal guin gan.

13

Raya' yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed guialrniabee ni rajp reeman. ² Zeel bèn ad ruzoobt xtiidx ree bèn rniabee guin, rën guiëban guial ad rënt reeman güün reeman zi'c rniabee Dios. Abi' ree bèn rüjn zian laagajc reeman rguuil xcasti, ³ din bèn rajp ree guialrniabee ad za't reeman par guchejb reeman bèn rüjn ree ni zagdxe, za' reeman par guchejb reeman bèn rüjn ree ni mal. Yan bal rën'l guibanl guial ad zadxebtil bèn ca' ree guialrniabee, gubajn zagdxe din yaya'n'l zagdxe loj reeman. ⁴ Din laa reeman cayüjn reeman sirv loj Dios din yalaj reeman lüj. Per bal cayüjn ni mal, zadxebil bèn ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëed reeman casti bèn rüjn ree ni mal. ⁵ Zeel rayal guzoobidi xtiidx ree bèn ca' ree guialrniabee, ad güüdi zian naabzi par ad zayaltidi casti, gol been zian guial ragbeedi zian rayal güüdi. ⁶ Gol gudijx tëe impuest, din gusnuu nabee ree bèn ca' ree guialrniabee, din laan naj mandad bayal reeman par güün reeman sirv loj Dios.

⁷ Zeel gol badëed ni rayal gudëëdidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bèn rayal guzoobidi xtiidx, gol gojp respejt bèn rayal respejt. ⁸ Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bèn rën bejn ree, ma cayüjnman cumplid gra ni rniabee xley Dios. ⁹ Xmandamient Dios rëban: "Ad sunël bèn ren bèn ad najt lacheelil, ad gugüjtil bejn, ad cwanl, ad sëëbladxil ni rajp ben ren", per mandamient guie ree, con ree xmandamient ren Dios rajc cumplid con tijb mandamient rëb: "Guyèn ben ren ree zi'c rën lüj gajc." ¹⁰ Din bèn rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaalaj rüjnman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree

xtiidxa'caman. ¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinè dunuj ree loj nejz mal, abi' yaguien ree naguiejn yaguien ree ganax ni zagdxe din yunaal ree nejz zagdxe. ¹³ Rayal yabajn ree zagdxe zi'c rayal, ad yaguien ree ni natu. Ad yazüdx ree, o ad rayalt yaguien ree lanij naabzi par chu' mod yaguien ree ni dxuudx. Ad rayalt sunè bejn ben ren bèn ad najt lacheelaman, o guial gapaman graloj vijs, o guialrdil o guialrdédloj. ¹⁴ Gol basa'n lèjt gajc loj dux Dad ree Jesucrist, ad rayalt guibandi zi'ctzi rëndi.

14

Ad gusa'nxtudi bèn qui rliadxri xtiidx Dios

¹ Zagdxe gol guneeñ bèn qui rliadxri Jesucrist ad gusa'nxtudi laaman guial mazri rajquidi guial lojman. ² Din yu' ree bèn rliadx Jesucrist naladx reeman zajc gaw reeman xhietèez nin, per yu' ree bèn qui rliadxri naladx reeman guial zagdxei naj ad zajwt reeman bëel. ³ Bèn rüjn xgab guial zajc gawaman xhietèez nin, ad rayalt güünman tiblax bèn naladx yu' ni ad zajct gaw bejn. Guiáad bèn rüjn xgab guial yu' ni ad zajct gaw bejn, ad rayalt guze'man bèn naladx zajc gaw bejn xhietèez nin. Din niz loj Dios tiblojzi ma naj reeman xbejnman. ⁴ Zeel, ¿chu naj bejn din guze' xcompniaraman bèn rliadx Jesucrist por niguinzi ree? Diosqui ragbee bal cayüjnman ni zagdxe o cayüjnman ni mal. Abi' bal ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

⁵ Ziangajc yu' ree dux compniar ree bèn raliduladxnè' ree Jesucrist naladx reeman guial yu' dxej zobjloj, yu'za ree bèn naladx guial tiblojzi naj gra dxej, per achet güünan, tijbgaj bejn con ni naladxman naj zagdxe par laaman. ⁶ Din bèn rüjn xgab guial yu' dxej zobjloj, rüjnman zian persi rënman Dios. Guiáad bèn naladx guial tiblojzi naj gra dxej, rüjnman zian persi rënman Dios. Abi' bèn raw graloj, rawaman guial yu'guicjcaman guial por Dios zëédan abi' rudëeman quixtèe lojman. Guiáad bèn naladx guial yu' ni ad zajct gaw bejn, rüjnman zian guial naladxaman zian cayajpaman Dios respejt abi' rudëeman quixtèe lojman.

⁷ Ni'qui du tijb ree ad nabant ree por dux xgabzi ree, o ad zayèjtt ree por dux xgabzi ree. ⁸ Bal nabajn ree por dux Dad ree Jesucrist par laa tëeman nabajn ree. Abi' bal yayèjt ree por laaman par laa tëeman yayèjt ree. Zeel bal nabajn ree o yayèjt ree, par dux Dad ree Jesucrist ma nayajc ree. ⁹ Din par zian güjtaman abi' babanman, din gacaman Dad loj ree bèn naban nè loj ree bèn ma güjt.

¹⁰ ¿Chexquiza din guze' lasa'l bèn rliadx Jesucrist o güün lasa'l tiblax ya? Awa dugra ree rayal yadxu' loj Dios din yadèed ree cwent lojman. ¹¹ Zi'c ca loj xtiidxaman lod rëb:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

¹² Abi' tijbgaj dunuj ree rayal yadèed ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguijdx du lasa' ree bèn rliadx ree Jesucrist, zagdxei yaguien ree naguiejn yaya'p ree cudad chitèe por dunuj ree güün reeman dol. ¹⁴ Naj najn xbejn Jesús, ragheen guial ad dolt naj gaw bejn xhietèeznin. Per par bèn naladx guial ad zajct gawaman xhietèeznin, par laaman dolan cayüjnman bal gawaman xhietèeznin. ¹⁵ Yan bal por ni rawil naladx tijb xcompniaril bèn rliadx Jesucrist guial dolan cayüjn, abi' bal id ridxga'l laaman rën guëban guial ad rëntil laaman. Gojp cudad chitèe por ni rawzil güün xcompniaril dol, din nêgajc por laaman güjt Jesucrist loj crüjz. ¹⁶ Ad güünl tijb ni guinieeguijdx ree xcompniaril lüj, majsi lüj ragbee guial ad ni malt naj ni cayüjn. ¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tée luxdooan nix por xSprijt Dios. ¹⁸ Abi' bèn naban zian guial zinalaman Jesucrist, cayüjnman zi'c rën Dios, zi'c ruladx tée bejn.

¹⁹ Zeel rayal yaguien ree naguiejn yabajnnè' du lasa' ree zagdxe yabedxe tée du luxdoo ree, din yasnuu yayagbee ree xhienaag yunaal ree xnejz Dios. ²⁰ Gol gojp cudad chitèe por ni rawzidi gunijitidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjn. ²¹ Zeel zagdxei naj guial ad zajwtl bëel ad zè' téeitil vin o xhie stjib nin bal por laan güün xcompniaril dol. ²² Majsi lüj ragbee guial achet güünan gaw bejn xhietèeznin, per zagdxei lüjzi con Dios. Naj rni guial, ¡xiquilbaa bèn ad yu'nawëegt luxdoo rawaman xhietèeznin! ²³ Per bèn yu'nawëeg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

15

RayaI yaguieen ree ni naladx bejn naj zagdxe

¹ Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bèn ad wazudxi'cht loj guialriladx Jesucrist luar yaguieen ree ni rayentzi ree, ² dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në gualragnë chitëë yalenyä' ree yalëjz ree ni ralëjz ree yaca' ree. ⁵ Dios, bèn razaladx pacens në gualragnë chitëë yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. ⁶ Din tiblojz guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bèn ad najt bèn Israel.

⁷ Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxe, bèn rliadx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gulüüman bèn Israel ree xtiidx Dios, zian bidgaguieenman sirv loj reeman, persi gojc cumplid promisejs ni been Dios loj ree xbëngulal reeman, abi' zian biguieen guial rüjnqui Dios cumplid xtiidxaman. ⁹ Bi't tëë Cristo loj guidxliuj din por laaman, bèn ad najt ree bèn Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bèn ad najt bèn Israel guzatan lüj
guial najl benza'c.

Gol tëen cant ree par lüj.

¹⁰ Ziangajc rëb zatibljat loj xtiidx Dios:

Lëjt bèn ad najt ree bèn Israel,

gol babaa zi'c rabaa ree bèn Israel.

¹¹ Zatibljat loj xtiidx Dios rëb:

Gra ree bèn ad najt bèn Israel.

Në los demazri ree bejn, gol gules xvalor Dios.

¹² Rëb tëë Isaias:

Loj xdiaa Isai, grii tijb bèn nabee bënguidxliuj ree,

xt ree bèn ad najt bèn Israel, chililadx laaman.

¹³ Dios bèn ragnë dunuj ree ralëjz ree ni caylëjz ree, laaman yagu' luxdoodi zagdxe yabe'cdxe tëëman luxdoodi guial rliadxidi laaman, din cwëz da'tidi ni guneeman por xSprijet Dios.

¹⁴ Compniar raliduladx ree Jesucrist, naj ragbeecheaaw guial zagdxe nabandi con ree xcompniaridi, ma ragbee tëëdi zagdxe xhienaag chinalidi xnejz Dios, xt rajc rudëëdidi consejw rulüü tëë xcompniaridi. ¹⁵ Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por gualrniabee ni ma baneë Dios naj, ¹⁶ din günan sirv loj Jesucrist. Din da dxiinan naj gulün bèn ad najt ree bèn Israel xtiidxza'c Dios din guiban reeman zi'c rën Dios, din gac reeman naya niz lojman por xSprijetaman. ¹⁷ Ra'pan xhie günnë'n nabë, guial ragnë Jesucrist naj por ree dxiin cayünan por Dios. ¹⁸ Per achetctzi zajc guiën bal id zën guial por Cristo cayünan laan, din laaman cayagnë naj persi cayünan yudar bèn ad najt ree bèn Israel din gac chililadx reeman guzoob tëë reeman xtiidx Dios. Yan ma rliadx reeman laaman por ni rën loj reeman në por guial ruguiaa reeman xhienaag nabanan, ¹⁹ në guial ma baguiaa reeman sen ree con ree milagr ni ma gojc por xgualrniabee xSprijet Dios. Zian ma gutiechan xtiidxza'c Jesucrist guidibctzi, diizd Jerusalén xt guidib niz Ilirico. ²⁰ Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntctzi reeman xcwent Cristo, ²¹ zi'c ca loj xtiidx Dios lod rëb:

Bèn ad waguiejntct ree xcwentaman,

güünbee reeman laaman.

Guiáad ree bèn ad wayagbeet xcwentaman,

gagbee reeman laan.

Rüjn Pab xgab cheman Roma

²² Abi' guial wan guidibctzi lod ma rnin lojdi, zeel ad wayajct gan guidganan lëjt, majsi zianctzi guyënan nidganan lëjt. ²³ Per yan guial ma gulox gutiechan xtiidx Dios guidibctzi niz guie, abi' guial ma gojc zien iyz ni rënan guidganan lëjt, ²⁴ zeel rünan xgab guidganan lëjt chi gan España. Abi' chi gadëëdan gugüian lëjt, chi ma gojc tio'p choon dxej yu' luxdoon zagdxe guial za'n con lëjt, dxel ma güülrüdi naj yudar din gan España. ²⁵ Per yan yaloj gan

Jerusalén chigsa'nan tijb yudar par ree dux compniar ree bèn rililadx ree Jesucrist. ²⁶ Din bèn Macedonia ree con ree bèn Acaya bèn rililadx gajc ree Jesucrist, been reeman xgab guto'p reeman yudar guin par ree bènprob zojb ree Jerusalén, bèn rililadx ree Jesucrist. ²⁷ Abi' por xixgab reeman guixhiaal reeman yudar guin, per zagdxé naj ni cayüjn reeman din mal nuzëëb reeman loj reeman. Din por ree bèn Israel bidxin xtiidx Dios loj reeman, dxel yan laa reeman guial ad najt reeman bèn Israel, zagdxen guial güün reeman yudar bèn Israel ree zi'ctzi gac reeman. ²⁸ Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt. ²⁹ Naj ragbee guial chi guidganan lëjt, zien da't ni gunee Dad Jesucrist par ganin lëjt.

³⁰ Yan por dux Dad ree Jesucrist në guial rën xSprijt Dios dunuj ree, rniaaban lojdi din güündi naj yudar yarejdx yanaab ree Dios por naj. ³¹ Gol gurejdx gunab Dios din gagnëman naj loj ree bèn Judea, bèn ad rililadxt ree Jesucrist, gol gurejdx tëë Dios por dux compniar ree bèn rililadx ree Jesucrist, bèn zojb ree Jerusalén din tiëb reeman tia' reeman yudar ni chigsa'nan par laa reeman. ³² Dxel bal gagnë Dios ma chu' luxdon zagdxé guidganan lëjt dxel ma zajc yaziiladxan la'tgaj za'n con lëjt. ³³ Dux Dad ree Dios bèn rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

¹ Yan ni gui't Febe ladxidi, bëngunaa ni naj dux compniar ree guial raliduladx ree Jesucrist, bèn cayüjn tëë sirv lën yadoo ni zojb guiedx Cencrea. ² Gol baca'man zagdxé por Dad Jesucrist, zi'c rayal yaguieennë' ree dux compniar ree bèn rililadx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

³ Gol bagajpdioz Aquila con xbëngunaaman Priscila, bèn cayüjn ree naj yudar cayguieenan sirv loj Jesucrist. ⁴ Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bèn rililadx ree Jesucrist bèn ad najt ree bèn Israel rudëë quixtëë loj reeman. ⁵ Gol bagajpdioz ree bèn rililadx Jesucrist, bèn rado'p ree lidx Priscila con Aquila. Gol bagajpdioz da miwan Epeneto, bèn goc bèn yaløj bililadx xtiidx Jesucrist niz Acaya. ⁶ Gol bagajpdioz Li, bèn ma been da't lëjt yudar. ⁷ Gol bagajpdioz ree bèn ladxan Adrónico con Junias, bèn guyu'në' reen ladxguuib. Abi' ree xi apóstoles Jesús dád rën reeman laa reeman, abi' yaløj laa reeman bililadx Jesucrist guial lon.

⁸ Gol bagajpdioz Amplias, da miwan bèn rën da'tan guial nayajcan xbejn Jesucrist. ⁹ Gol bagajpdioz Urbano, bèn cayüjn naj yudar cayguieenan sirv loj Jesucrist. Gol bagajpdioz tëë da miwan Estaquio. ¹⁰ Gol bagajpdioz Apeles, bèn ma balüü guial diidxliczi rililadxaman Jesucrist, gol bagajpdioz tëë xfamil Aristóbulo. ¹¹ Gol bagajpdioz tëë Herodiön ben ladxan, në ree xfamil Narciso, bèn ma rililadx Jesucrist. ¹² Gol bagajpdioz Trifena në Trifosa, bèn cayüjn ree sirv loj Jesucrist. Gol bagajpdioz tëë Pérsida, bèn naguieenbee ree guial dád cayüjman sirv loj Jesucrist. ¹³ Gol bagajpdioz Rufo, bèn diidxliczi zinal xnejz Dios, gol bagajpdioz tëë xniaaman, bèn rënan zi'c da nan. ¹⁴ Gol bagajpdioz Asíncrito, Flegonte, Hermas, Patrobas, Hermes në gra ree bèn za' con laa reeman, bèn ma rililadx ree Jesucrist. ¹⁵ Gol bagajpdioz Filólogo, Julia, në Nereo con bizanman, në Olimpas con gra ree bèn rililadx Jesucrist bèn za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bèn raliduladx ree Jesucrist bèn za' ree guie, rugajpdioz reeman lëjt.

¹⁷ Compniar raliduladx ree Jesucrist, rniaaban lojdi din gapidi cudad con ree bèn rlia' lasa' ree bejn, bèn rusquiee ree bejn guial rülüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bèn ad ragbeetzzi ree o bèn ad ragbeeza'ct ree xtiidx Dios. ¹⁹ Per lëjt, guidibczzi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdxé ad par güüntidi ni mal. ²⁰ Dios, bèn rabe'cdxe luxdoo bejn, laaman gagnë lëjt nayob chitëë güünri xinxab lëjt gan. Dux Dad ree Jesucrist gagnë lëjt.

²¹ Rugajpdioz Timoteo lëjt, bèn cayüjn naj yudar con xchiin Dios ni cayünan, në ree bèn ladxan bèn la ree Lucio, Jasón, në Sosípater, rugajpdioz reeman lëjt.

²² Në Tercio, bèn cayüjn gui'ch guie rugajpdioz lëjt por dux Dad ree Jesucrist.

²³ Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bèn rililadx ree Jesucrist. Në Erasto, bèn naj tesorer luguiedx guie në bèn la Cuarto been rililadx Jesucrist, rugajpdioz reeman lëjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radëen quixtëë loj Dios din laaman zile' gagnë lëjt din gusnuu gagbeedi sudxi'ch tëëdi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej.

²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badëë xtiidx Dios loj ree bejn zi'c gunabee Dios laa reeman, bén naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

²⁷ ¡Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

Gui'ch yaløj ni guxhaal San Pabl loj ree bèn Corinto rlliladx Jesucrist

Rxhiaal Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn rlliladx Jesucrist. ² Caxhalan gui'ch guie par lèjt najdi bèn rlliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bèn gra lad bèn rlliladx ree Jesucrist, bèn naj Dad par dunuj ree nè par laa reeman. ³ Dux Dad ree Dios nè Dad Jesucrist güünle' lèjt, yabe'cdxe tèë reeman luxdoodi.

Rudëèd Pab quixtëè loj Dios

⁴ Gra dxejzi rudëdan quixtëè loj Dios por lèjt zi'c ma gognëman lèjt guial rlliladxidi Jesucrist. ⁵ Nè guial najdi tijbzi con Jesucrist dád ma gognë Dios lèjt, baneeman lèjt quiargueijn din guineeidi chignia' tèëdi xtiidxaman. ⁶ Zian rguien guial diidxli naj ni ma biguejndi por Cristo diidx chi guzuløj bililadxidi laaman. ⁷ Abi' zianczi rajpidi xyudar Dios la'tgaj rbëzidi dxej ni gui't Jesucrist zatijb. ⁸ Abi' Dios gagnë lèjt din sudxi'chidi guidiblagaa loj ni rlliladxidi laaman, chitëè xhie xtolidi chu' dxej ni gui't dux Dad ree Jesucrist zatijb. ⁹ Din Dios diidxli rüjn xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. ¹¹ Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj. ¹² Guial garent garen rëb ree bejn, yu' reeman rëb: "Naj naj xbejn Pab", yu' tèë reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tèë reeman rëb: "Naj naj xbejn Cristo." ¹³ Per naj rni lojdi guial Cristo tijbzi najman, din ad najt güt loj crüjz por lèjt, ad gurobnijs tèëtidi par gaquidi da bejnan. ¹⁴ Quixtëè Dios chi wan ladxidi achut mazri barobnijsan, Crispozi nè Gayo. ¹⁵ Chitëè guiëbidi guial gurobnijsidi par gaquidi da bejnan. ¹⁶ Barobnijs tëën xfamil Estëfanas, per ad rusaaladxtran chu mazri barobnijsan. ¹⁷ Din ad guxhaal Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tèëtan con diidx ni yadxaløj ree bejn naj luar cu'guijx reeman par xhie güjt Cristo loj crüjz.

Xguialrniabee Dios nè xquiargueijnman

¹⁸ Gra ni raguie'ch ree guial por xhie güjt Cristo loj crüjz, achet lasajcan par ree bèn zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios. ¹⁹ Abi' loj xtiidx Dios rëb:

Gunijtan xquiargueijn ree bèn ni rëb guial rajc da't reeman,

abi' guscayjan xquiargueijn ree bèn ni rëb guial rignia' da't reeman.

²⁰ Yan, ¿con ree bèn rëb guial rajc da't reeman? ¿Con ree mextr rajc ley? ¿Con ree bèn rëb guial rajc da't reeman xcwent ree ni yu' loj guidxliuj? Par Dios achet lasajc xquiargueijn bénguidxliuj. ²¹ Abi' por xquiargueijn Dios ragbeechaawaman guial ad zayübbeet bénguidxliuj laaman por xquiargueijn reeman, zeel beenman xgab yabëëman bejn loj casti por xtiidxaman ni caylüün bejn ree. Abi' ree bèn yarii loj casti guin laa reeman naj bèn rlliladx laaman, majsi par ree ben ren achet lasajc ni canin por Cristo.

²² Din bèn Israel ree rën reeman guguiaa reeman milagr din chililadx reeman, abi' ree bèn ad najt bèn Israel rën reeman guien reeman ni mazri nawëëg din chililadx reeman.

²³ Per dunuj ni caylüün bejn ree naj par xhie güjt Cristo loj crüjz, abi' ree bèn Israel rdxe'ch reeman, guiaad par ree bèn ad najt bèn Israel achet sirv rüjn ni caylüün. ²⁴ Per par ree bèn ma bacaabee Dios, zi'c ree bèn Israel zi'c ree bèn ad najt bèn Israel, por Cristo rguien xguialrniabee Dios nè xquiargueijnman. ²⁵ Din ni rülüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj. ²⁶ Gol gogbee compniar raliduladx ree Jesucrist guial ta'nzi ree bèn rlliladx laaman naj bèn rignia' zi'c naladx ree bénguidxliuj, ta'nzi ree bèn rlliladx laaman rajp guialrniabee loj guidxliuj guie, abi' ta'nzi ree bèn rlliladx laaman naj ree bèn za loj ree famil ni naj bèn zøjbloj. ²⁷ Abi' Dios gulej ree bèn ni naladx ree bejn ad rajza'ct din yaya'nxtu ree bèn rajc da't, gulej tèëman bèn ad ca't ree guialrniabee din yaya'nxtu ree bèn ca' guialrniabee. ²⁸ Dios gule ree bèn ni naladx ree bejn guial achet sirv laa reeman, bèn ni naladx ree bejn guial achet lasajc reeman, bèn ni achut naj loj guidxliuj

guie din chiquiedaman xgualdxal ree bèn naj ree chunin loj guidxliuj guie. ²⁹ Zianan zeel achut zajc güün benro' delant loj Dios. ³⁰ Yan por Dios ma najdi tijbzi con Jesucrist, dxel por laaman rtia'di xgualrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios. ³¹ Zianan din gac zi'c rēb loj xtiidx Dios lod rēb: “Bal yu' bèn rēn guilies xvalor gajc, luar güündi zian gol gules xvalor dux Dad ree Jesucrist.”

2

Xtiidx Jesucrist bèn cwa loj crüzj

¹ Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di. ² La'tgaj guzun con lējt ad gunetan diidx ren ree lojdi, tijbzi xcwent Jesucrist bèn cwa loj crüzj. ³ Abi' chi wan ladxidi zi'c tijb bèn ni ad yu't gojl, rnijczan guial rdxeban bialan lojdi. ⁴ Nē chi gunenē'n lējt, chi gunen xtiidx Dios lojdi, ad gunenē'tan lējt con ree diidx ni günan lējt gan por da diidxan, benan gan riladxidi Jesucrist por xyudar xSprijt Dios nē xgualrniabeeman. ⁵ Din guiguien guial ni riladxidi Jesucrist zēēdan por xgualrniabee Dios ad por xgualrajct bēnguidxliuj.

Por xSprijt Dios nünbee bejn laaman

⁶ Majs chi ralüün bèn ni ma rajc ree mazri xtiidx Dios, ralüün laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bèn rniabee, guialrajc ni yu' dxej nit. ⁷ Ralüün laa reeman por guialrajc ni zēēd por Dios, din yanee ree zi'c naj xixgab Dios, xgab ni goc ni naguie'ch par ree bēnguidxliuj, abi' xgab guin naj guial chüliladx reeman Jesucrist, diidx chi gad guidxliuj gacchaaw been Dios xgab guin din gac yayal ree xanyabaa. ⁸ Laan naj tijb ni ad dogbeet ree bèn rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crüzj, bèn ca' gualrniabee. ⁹ Per loj xtiidx Dios rēb:

Achut waguiaa, achu tēēt waguiejn

abi' ni'quid wayüjnt bēnguidxliuj xgab

por ni nagu'chaaw Dios par ree bèn rēn laaman.

¹⁰ Per dunuj ree ma balüü Diosan duløj ree por xSprijtaman bèn naban con dunuj ree, din xSprijt Dios gan ragbeeman, xt ni mazri naguie'ch ni zēēd por Dios.

¹¹ Achut ragbee xhie xgab cayün tijb bejn. Xsprijtsaman ragbee xhie xgab cayünman. Ziangajc xSprijt Dios tijbzi laaman ragbee xhienaag naj xixgab Dios. ¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajnt ree con Sprijt zēēd loj Dios, din por xSprijt Dios yayagbee ree gra ni ma bazaladx Dios duløj ree guial najman benza'c. ¹³ Abi' laa reen naj ni caylün bejn ree, per ad por dux quiarguejntan, xSprijt Dios culüü dunujn xhienaag yanen. Zian ralüün xcwent Dios bèn ma nabannē xSprijtaman.

¹⁴ Per bèn ad nabannēt xSprijt Dios ad riladxtaman ni zēēd ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rēn guiēban. ¹⁵ Per bèn ma nabannē xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannēt xSprijt Dios ad rignia't chexc zeel rignia'man ni guin ree. ¹⁶ Loj xtiidx Dios rēb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

3

Compniar rüjn ree sirv loj Dios

¹ Compniar raliduladx ree Jesucrist, chi guzun con lējt ad gunenē'tan lējt zi'c ree bèn ma nabannē xSprijt Dios, gunenē'n lējt zi'c ree bèn ad nabannēt xSprijt Dios, zi'c ree bèn qui guzuløjri riladx Jesucrist. ² Diidx ad nawēēgt ree gunenē'n lējt zi'c rudēē bejn lejch loj tijb xindobēz guial xo gawix ni raw bengol, zian gunenē'n lējt diidx ad nawēēgt ree. Abi' ni'qui yan ad zile't ganenē'n lējt zi'c ree bèn ma rignia' mazri xtiidx Dios. ³ Din sta nabandi zi'c naban gra ree bēnguidxliuj. Nadēdloj lasa'di rdil tēēdi, zian rguien guial sta nabandi zi'c gra ree bēnguidxliuj bèn ad zinalt ree xnejz Dios. ⁴ Din chi rēbidi: “Naj naj xbejn Pab”, o chi rēbidi ya: “Naj naj xbejn Apolos”, zian rguien guial sta cayüjndi zi'cgajc chutēēz bēnguidxliuj.

⁵ Per naj rni lējt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. ⁶ Yaguie'ch ree guial naj naj zi'c bèn rxübin abi' Apolos naj bèn rguuil, per por Dios cayagbeedi mazri xtiidxaman zi'c rusni'saman tijb cwaandoo. ⁷ Abi' zi'c bèn rxübin zi'c bèn caguuil mandadzi cayüjn reeman, Diosan naj bèn ni rusni's ni rxübin reeman. ⁸ Yan ziangajc

naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandan ni baneeman yaguieen tijb gaj dunujn. ⁹ Zeel naj con Apolos nayajcan compniar cayguieenan xmandad Dios.

Yaguie'ch ree lèjt naj xguiniaa Dios lod cayguieenan dxiin o lèjt naj zi'c tijb yu ni cayüjn Dios. ¹⁰ Abi' naj guial catechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj gúnan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin, ¹¹ din achut zajc guchaa cimiant ni ma benan, abi' cimiant guin naj guial rilaladx Jesucrist. ¹² Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrilaladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. ¹³ Per chi guidxin dxej ni güün Dios xguialguxtisaman, dxel guiguieen xhienaag naj xchiin reeman. Din dxej guin gac zi'c chi rajc prueb xhienin loj guij din guiguieen xchiin tijb gaj bejn. ¹⁴ Abi' bal rüjn sirv ni beenman zi'c tijb bèn ni ruzooz tijb yu ni ad re'ct, zaca'man ni rayalaman por ni beenman. ¹⁵ Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

¹⁶ Zeel gol gogbee guial lèjt naj zi'c tijb xyadoo Dios guial nabandi con xSprijt Dios. ¹⁷ Abi' bal chu bèn gutie'chdojn bèn rilaladx ree Jesucrist, zunidloj Dios laaman guial ruse'nman xyadoo nagle'man ni canin naj lèjt guial najdi xbejnman.

¹⁸ Ad gusquiee lèjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bènrajc da't. ¹⁹ Din delant loj Dios achet lasajc gualrajc bênguidxliuj, tib lajt loj xtiidxaman rëb: "Ad rudëët Dios mod grii zagdxe ni naj xixgab ree bèn naladx guial dád nasin reeman par güün reeman tijb ni ad najt xnejx." ²⁰ Rëb tée loj xtiidxaman: "Dios ragbeechaaw guial xixgab ree bèn rajc da't achet lasajcan." ²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. ²² Ma nulendi dunujn, naj Pab, Apolos në Béd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. ²³ Abi' lèjt ma najdi xbejn Cristo abi' Cristo naj Xi'n Dios.

4

Dxiin ni been ree bèn naj ree xi apóstoles Jesús

¹ Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. ² Per lèjt ragbee guial tijb mojs naj par güünman gra ni rayal güünman din gap reeman laaman confianz. ³ Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajc ganin xhienaag najn. ⁴ Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. ⁵ Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguieen conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin lèjt wen par lèjtan. Abi' Apolos con naj nayajcan tijb ejempl par lèjt, din por dunujn gusiididi ad tédlay guiliesidi xvalor bejn chitëë por zian gusa'ndi trajs stijb bejn. ⁷ Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

⁸ Lèjt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lèjt! ⁹ Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bèn ad lasajct, zi'c ree benmal ni rayal guialgüjt, abi' radxaloj ree anjl në ree bênguidxliuj dunujn. ¹⁰ Abi' la'tgaj nayajcan zi'c ree bèn ad yu't xquiarguejn par bênguidxliuj guial ratie'chan xtiidxza'c Cristo, lèjt rlies xvaloridi guial rignia' da'tidi guial rilaladxi laaman. Dunujn nayajc zi'c bèn ad yu't gojl guiaád lèjt naladxidi yu' da'tidi gojl abi' rajp ree bejn lèjt respejt guiaád dunujn ad rënt reeman dunujn. ¹¹ Xt yandxej sta cayzaagdiajn por guialrliaan, guial re'c nijs në guial ryaadx du xaban. Zienloj ni rüjnnë ree bejn dunujn, achet du lidxan. ¹² Abi' dád radxagan ragueenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanaan ni rüjnnë'tzi reeman dunujn. ¹³ Abi' chi rnieeguidx reeman dunujn, raneeza'cnë'n laa reeman. Xt yan nayajcan zi'c tijb guix par bênguidxliuj, nayajcan zi'c tijb ni ad rüjnt sirv par laa reeman. ¹⁴ Ad cucatan gui'ch guie par gusa'nxtun lèjt, cucan laan din gunen lèjt consejw zi'cgajc da xi'n reen guial rënan lèjt. ¹⁵ Din majsi gapidi zi'c chii mil ree bèn gusiid lèjt, per najzi naj zi'c

tijb Dad par lèjt. Din por naj guzuløj rliładxidi Jesucrist chi basidan lèjt xtiidxxa'caman. ¹⁶ Zeel rniaaban lojdi din guibandi zi'c nabanan.

¹⁷ Din par zian rxhialan Timoteo guitixlojman lèjt, bèn rēnan zi'c da xi'nān laaman diidxli rliładxaman Jesucrist. Laaman gusaalādx lèjt xhiēnaag nabanān guial rliładxan Jesucrist, dīn zi'c nabanān naj ni cusidan bèn rliładx ree Jesucrist gra lod ran. ¹⁸ Yu' ree xcompniaridi nalādx guial ad zitiixlotran lèjt ābi' rliēs xvalor reeman guial naban reeman zagdx. ¹⁹ Per Dios gunēē permis dīn diob guitixlon lèjt dxel gagbeen wali reeman ya naban reeman zi'c rniēē reeman o rniēēz reeman. ²⁰ Dīn guial guiban zi'c rniābee Dios ad najtan diidxxi, rayal gūūn bejn zi'c rniābee Dios con xguialrniābeeman. ²¹ Yan, ζconin rēndi gūnān chi guitixlon lèjt, gadilē'n lèjt ya o guiēnān lèjt ganēnē'n lèjt diidxxa'c?

5

Xhiēnaag gac con bèn rūjn tijb dol

¹ Ma bacagdiān guial tijb lèjt bèn rliładx ree Jesucrist nabannē xnarojpidi zi'c lacheelidi, ni'quiza ree bèn ad nūnbeet Dios ad rūjnt lasa' dol guin. ² Abi' lèjt rūjndi benro', luar rūjndi benro' gol guyunaya gol babēē tēē bèn guin lojdi. ³ Majsi ad za'tan con lèjt, per rūnān xgab por lèjt zi'cgāj rulūū za'n con lèjt, ābi' ma benchaawan xgab xhie rayal bèn rūjn dol guin. ⁴ Zi'c guialrniābee ni bānēē Jesucrist naj, naj rni lèjt: "Gol bachājg lasa'di." Dxel gol gunalādx guial za'n con lèjt ābi' por xguialrniābee Dad Jesucrist, ⁵ gol been bèn guin tiblād, gol basā'nman loj xindxab dīn gagnaaman o sagdiājman por ni cayūjnman dīn gacaman perdon dxej ni gui't dux Dad ree Jesucrist.

⁶ Ad nixtan guial rliēs xvalorgājquidi ābi' rtiējbidi rajc lasa' ree dol guin. Gol gogbee guial zi'c rūjn levadur cob par guiādxtil ziāngāj con tijb bèn gūūn dol ma zē gājcan zian con gra ree lasa'di. ⁷ Zeel gol been nāguējn dīn gaquidi naya zi'c cob harin ni ad yu't levadur guijc. Dīn zi'c bagūjt ree bejn tijb xiil lanij pascw dīn yaya xtol reeman, ziāngājg dunuj ree por xguialgūjt Jesucrist ma naya ree loj Dios. ⁸ Abi' guial yabāā ree por zian naj guial yabājn ree guidū dol luxdoo ree zi'c rayal, zi'c guiādxtil ni ad no'cht levadur, luar yabājn ree con ree ni mal nē ree dol zi'c babājn ree yaløj.

⁹ Abi' zi'c ma rniin lojdi loj stijb gui'ch ni ma guxhālan lojdi, ad guchājquidi bèn naban ree nadxuudx. ¹⁰ Ad canēnē'tan lèjt zian por ree bèn ad rliładxt Dios, bèn naban ree nadxuudx o rzēēbladx reeman ni ruguiaa'tzi reeman o naj reeman gubaan o rēn reeman ni ren luar guiēn reeman Dios, dīn bal zianān dxel ryaādx yariidi loj guidxliuj guie. ¹¹ Bèn ni canin lèjt naj ree bèn ni rēb naj ree xcompniaridi, bèn rliładx ree Jesucrist ābi' naban reeman nadxuudx, o rzēēbladx reeman ni ruguiaatzi reeman, o rēn reeman ni ren ree luar guiēn reeman Dios, o rbēē reeman xtiidx bejn, o naj reeman bēngu', o bēngubaan. Xcompniaridi bèn naban ree zian ni'quid rayalt gawnēdi laa reeman. ¹²⁻¹³ Ad da cwenttan naj ganen por ree bèn ni ad najt dux compniar ree loj ni rālidulādx ree Jesucrist bal rajp reeman dol o ad rajpt reeman dol, Dios naj bèn gūūn guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliładx ree Jesucrist. Zeel gol babēē bèn cayūjn dol entr lojdi.

6

Chi yu' wadijl entr ree bèn rliładx Jesucrist

¹ Zi'c chi xhie rzācnē tijb xcompniaridi bèn rliładx Jesucrist, ζchexc zeel rējdi loj guxtis dīn yabēēxnejzaman ni rzājquidi luar chedi loj ree xcompniaridi bèn rliładx ree Jesucrist? ² ζId rliładxidi ya guial yu' dxej bèn rliładx ree Jesucrist laa reeman naj bèn gūūn xguialguxtis loj ree bēnguidxliuj? Abi' bal yu' dxej gūūn xguialguxtis reeman loj bēnguidxliuj, ζchexcquiza zeel ni ad nawēēgt ni rzājc ree xcompniaridi ad rajct rabēēxnejzidi? ³ ζId ragbeedi ya guial xt loj ree xianjl Dios yu' dxej yaya'p ree guialrniābee? ĩAbi' xt mazri zile' yalēēxnejz ree ni cayza'c ree loj guidxliuj guie! ⁴ Zeel zi'c chi xhie rzācnē lasa'di, ζchexc zeel zēdi loj ree bèn ad najt xbejn Cristo dīn yabēēxnejz reeman ni rzājquidi? ⁵ Canin lèjt ni guin ree dīn yatu lojdi. ζWen nid yu'czi tijb lèjt zajc yabēēxnejz ni rzājc lasa'di ya? ⁶ Per lèjt luar gūūndi zian aal rudēēd lasa'di loj ree bèn ni ad rliładxt Dios.

⁷ Abi' natun guial gudēēd xcompniaridi loj guxtis guial cadilidi, mejorli gol gudaan ni rūjnnē reeman lèjt. Mejorli tiēbidi cuan reeman xieendi. ⁸ Per luar gūūndi zian, lējtli cayūjn ree ni mal guin con ree xcompniaridi bèn rliładx ree Jesucrist. Rtiā'di xieen reeman ābi' rūjnnēdi laa reeman ni ad rayalt gūūnnēdi laa reeman.

⁹ ζId ragbeedi ya guial bèn naj ree benmal ad zut reeman loj xguialrniābee Dios? Gol gogbee guial loj xguialrniābee Dios ad zut ree bèn ni naban ree nadxuudx, nē ree bèn rēn ree ni ad najt ree Dios, nē ree bèn za'nē bèn ad najt lacheel reeman, nē ree xinguiāaw rūjn zi'c bēngunāā nē ree xin rēn lasa' xinguiāaw zi'c bēngunāā. ¹⁰ Nē ree bēngubaan, nē ree

bèn rzëëbladx ni ruguiaatzí reeman, nè ree bengú' con ree bèn rnieeguidx bejn, nè ree bèn raguil xhiënaag chiquied reeman xieen bejn, ad zut reeman loj xgualrniabee Dios. ¹¹ Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xgualrniabee Dad Jesucrist nè por xSprijt Dios bèn ma nabannëdi.

Dux cuerp ree naj par Dios

¹² Walican zajc yaguieen ree zi'ctzi rayën ree, per ad gratan naj zagdxë par güün bejn. Zajc günan zi'ctzi rënan, per ad zatiëëbtan xhie nabee naj. ¹³ Yu' ree bejn rëb: "Gualraw naj par lën bejn, abi' lën bejn naj par gualraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xgualrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tibia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb bëngunaa dxuudx? ¿Ad rayalt gac zian! ¹⁶ ¿Nid ragbeedi ya guial chi runë bejn tijb bèn ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzi." ¹⁷ Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güündi ni dxuudx ree con bèn ad najt lacheelidi. Xhietëëz dol ren ad ruxhiantan xcuerp bejn zi'c rxin xcuerpaman chi rüjman ni dxuudx con bèn ad najt lacheelaman. ¹⁹ Din gol gogbee guial lëjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. ²⁰ Din par zian gudijx Jesucrist por dunuj ree chi gütan loj crüz. Zeel gol beennë xcuerpidi dxin par güündi Dios bèn zøjbloj, din laaman naj bèn rniabee lëjt.

7

Consejw xcwent gualruxhliaa

¹ Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxë naj guial ad zuxhliat bejn. ² Per chitëë güün bejn dol con stibj bejn, zagdxen guial tijb gaj xinguaaaw chu' lacheel o tijb gaj bëngunaa chu' lacheel, ³ din gudëë xinguaaaw guin gust lacheelix abi' bëngunaa guin gudëëzaman gust lacheelaman. ⁴ Din chi ma baxhliaa tijb bëngunaa ad laatraman rniabee xcuerp, xinguaaaw guin naj xin rniabee laan. Ziangajc chi ma baxhliaa xinguaaaw, ad rniabeetri xcuerpix, bëngunaa guin ma rniabee laan. ⁵ Zeel xinguaaaw nè bëngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëd ree dxej guin, gol bachajg lasa'di stibj chitëë güün xindxab lëjt gan con ree xixgabidi.

⁶ Ad canitan lojdi guial najczi guxhliaa bejn, per ad ni maltan guial guxhliadi. ⁷ Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiargueijnman guial xhiënaag guibanman, bal guxhliamaan o bal id zuxhliamaan.

⁸ Par ree bèn stibj nè par ree bëngunaa bizëjb, naj rni guial zagdxeli yaya'n reeman zi'c naj. ⁹ Per bal id zadaan reeman guial ad zuxhliat reeman, dxel zagdxeli guxhliaa reeman luar gudëëd xcuerp reeman casti guial taan reeman.

¹⁰ Guiáad ree bèn ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt bëngunaa lacheelaman. ¹¹ Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stibj. Ziangajc xinguaaaw ad najt yala' lacheelix.

¹² Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaaw riladx Jesucrist abi' lacheelix ad riladxt, abi' bal par bëngunaa guin achet güünan, dxel ad najt yala' lasa' reex. ¹³ Ziangajc bal riladx bëngunaa guin abi' lacheelaman ad riladxt, abi' bal par xinguaaaw guin achet güünan, dxel ziangajc ad rayalt yala' reeman. ¹⁴ Din xinguaaaw ni ad riladxt Jesucrist, züjnle' Dios laax guial riladx lacheelix. Guiáad bëngunaa ni ad riladxt Jesucrist züjnle' Dios laaman guial riladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol. ¹⁵ Per bal xinguaaaw o bëngunaa ni ad riladxt Jesucrist rënan yala' lacheelaman guial riladx lacheelaman Jesucrist, yala'ri reeman. Bèn riladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. ¹⁶ Din bëngunaa guin ad ragbeetaman bal güünman gan chililadx lacheelaman, o bal xinguaaaw guin ma riladx dxel ni'qui laax ad ragbeet bal güünx gan chililadx lacheelix.

¹⁷ Naj rni guial tijbgaj ree bèn ni ma riladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuløj riladx

reeman Jesucrist. Zianan naj ni cayèn loj ree dux compniar ree bèn rliiladx ree Jesucrist giün reeman. ¹⁸ Bal tijb bejn chi guzuløj bililadxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuløj bililadxaman Jesucrist, ad najt chu'man sen guin. ¹⁹ Din achet giünan bal yu' bejn sen guin o ad yu'taman sen guin, ni mazri lasajc naj guial giünman zi'c rniabee Dios. ²⁰ Zeel gol baya'n zi'c najdi chi guzuløj bililadxidi Jesucrist. ²¹ Bal najl zi'c bèn nado' chi guzuløj bililadxil laaman, ad najtan ni chu'l xgab xhienaag giünl. Per bal zile' ad zajc tril zi'c bèn nado', mazri zagdxé barii loj ni najl zi'c bèn nado' guin. ²² Bèn ni naj zi'c bèn nado' chi guzuløj bililadxaman Cristo ma najman zi'cgajc bèn ni ad najt zi'c bèn nado' par giünman sirv loj Cristo. Abi' bèn ni ad najt zi'c bèn nado' chi guzuløj bililadxaman Cristo, dxel Cristo ma rniabee laaman. ²³ Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bënguidxliuj lëjt con ree ni rusquiee. ²⁴ Zeel rnin lojdi compniar raliduladx ree Jesucrist, gol baya'n zi'c najdi chi guzuløj bililadxidi Jesucrist.

²⁵ Yan lëjt bèn ad waxhliat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag giündi, abi' da xgaben naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. ²⁶ Zeel naladxan guial zi'c naj tarbajw ni caydüd ree yan, zagdxeli naj guial ad zuxhliatidi. ²⁷ Bèn ni ma baxhliaa ad najt gusa'n lacheelaman. Guiáad bèn ni ad waxhliat ad rayalt giünman naguiejn guxhliamaan. ²⁸ Per bal rüjn l xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bèn ruxhliaa, abi' laan ad rëntan saquidi.

²⁹ Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneeztan lëjt zi'cgajc ree bèn ni ad waxhliat. ³⁰ Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial giün bejn xmandad Dios. ³¹ Bèn ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

³² Ni rënan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn giünx zi'c ruladx Dios. ³³ Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanë lacheelix laax. ³⁴ Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliat mazri rüjnman xgab por ree xmandad Dios guidiblagaa rüjnman sirv loj Dios par giünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

³⁵ Gra ni canin lojdi, canin laan par giünan lëjt yudar ad par gudxontan guxhliaa, caninan din guiband i zi'c rayal xnejz dxel gol been gol gubajn tée zi'c rën dux Dad ree Jesucrist sin guial gudxoon xhienin lëjt.

³⁶ Chutééz xinguaaaw rüjn xgab guxhliaanë biin rnieenëx abi' bal ma yu' biingunaa guin iijz par guxhliam, giünri reex ni naladx reex naj zagdxé par laa reex. Bal guxhliaa reex, guxhliari reex. Ad doltan guial guxhliaa bejn. ³⁷ Ziangajc chutééz bèn ni ad rüjnt xgab guxhliaa, ad rayalt giünman xgab guial rüjn naguiejn guxhliamaan bal ma beenman xgab zagdxé guial ad zuxhliataman. Din zagdxé gajcan bal id zuxhliaa bejn. ³⁸ Zeel rnin lojdi zagdxen guial chu guxhliaa, per mazri zagdxé bal id zuxhliaa bejn.

³⁹ Tijb béngunaa chi ma baxhliamaan, ad rayalt sunëman xinguaaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliiladx Jesucrist. ⁴⁰ Per naladxan guial mazri zagdxé guibanman bal id zuxhliamaan stijb. Zian rünan xgab guial nabannë'n xSprijt Dios zi'cgajc lëjt.

8

Guialraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por gualrignia' rlies bejn xvalor gajcaman. Per gualrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. ² Bal yu' bèn naladx guial ma bayaaloj rignia'man gra, cusquiee laagajcaman din ryaadx da'tri chignia'man. ³ Per bèn ni rën Dios, Dios nünbee laaman.

⁴ Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet gualrniabee rajp ree dios guin loj guidxliuj guie, din tijbzi Dios yu'. ⁵ Majsi yu' ree bejn naladx guial yu' zien ree dios bèn rniabee xanyabaa në loj guidxliuj, ⁶ per dunuj ree rayagbee guial tijbzi dux Dad ree Dios yu' abi' por laaman yu' gra

ni yu' por laa tēeman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree gualnaban.

⁷ Per ad grat ree bejn rüjn xgab zian. Din yu' ree bën ni guyēn graloj ni naladx reeman naj Dios, abi' yan gual qui bililadxri reeman Jesucrist naladx reeman gual dolan gaw tijb bejn gualraw ni ma gurej loj ree dios guin. ⁸ Dunuj ree rayagbee gual ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree gualraw guin. ⁹ Per majsi lējt ragbee gual zalc gawidi xhietēēznin, rayal gapidi cudad ad güündi gual ree bën qui rliladxri Jesucrist güün reeman dol. ¹⁰ Din bal lüj gual achet naladxil rawil xhietēēznin, zøjbil cayawil gualraw ni ma gurej loj ree ni ad najt dios. Dxel guguaa tijb ree bën qui rliladxri Jesucrist lüj abi' nēgajcanan sēēbladx gaw gualraw guin majsi lēn luxdooman naladxaman gual ad zagdxtet naj ni cayüjnman. ¹¹ Dxel por xgualrajquil cayüjn gual güünman dol gual ad nixt yu' luxdooman cayawaman ni guin ree, per badxe'gujic gual nē por laaman güjt Jesucrist loj crüzj. ¹² Zeel bal rüjn tijb ni naj ni mal par ree bën qui rliladxri ree Jesucrist abi' rüjn reeman dol por lüj, dolan cayüjn delant loj Cristo. ¹³ Bal por tijb ni rawan rüjn ree da compnarian dol, mejorli ad zawtran laan chitēē güünman dol por naj.

9

Ni zalc güün tijb apóstol

¹ Lējt ragbee gual zalc güün ni rēnan por gualrniabee ni ra'pan gual najn apóstol. Ma baguaan dux Dad ree Jesucrist abi' lējt naj ree bën ni ma benan gan par laaman gual ma bililadxidi laaman. ² Bal yu' ree bën ni ad nünbeet naj zi'c apóstol, per lējt ragbee gual apóstol najn. Din zi'c ma rliladxidi Jesucrist dxel ma rguien gual diidxli najn apóstol.

³ Abi' par ree bën ad rliladxt gual najn apóstol, ze naj ni rēn loj reeman: ⁴ Ra'pan derejch gunee reeman ni gawan nē ni guiē'n. ⁵ Abi' zalc tēē guxhlian con tijb bēngunaa naj dulasa' raliduladx ree Jesucrist din chinē'n laaman bantēēz guin gan, zi'c rüjn los demazri ree apóstoles con ree bijch Dad Jesucrist nē Bēd. ⁶ ¿O najzi con Bernabé bayal yaguieenan xmandad Dios dux cwentan ya? ⁷ Per ni'qui tijb suldad ad rejt loj wadijl xcwentaman, yu'czi bēn rguijx xgaxtaman. Ziangajc bēn rxübin uv, ¿wen id zalc gawaman laan ya? Laadx bēn ni rajp vag ree, ¿wen id zalc guiē'man xlejch reeb ya? ⁸ Abi' ad xixgabtzi bēnguidxliujn canin lojdi, nē loj ley ni badēē Dios loj Moisejs rēb zian. ⁹ Din loj ley guin rēb: "Ad gudxe'di guijxh ro' ree be gui'xh la'tgaj cayüjn reeb dxiin." Ad rēbt Dios zian gualzi yu'man laa reeb xgab, ¹⁰ rēbaman zian por dunuj ree. Din zi'c bēn rlia' yuj zi'c bēn rusia trigo, grop reeman yu'gujic gual yu' ni yaca' reeman. ¹¹ Yan ma balün lējt xhienaag chinalidi xnejz Dios, ¿wen zro' da't yanaaban lojdi ya bal güündi dunujn yudar din gusnuu dux gualnaban? ¹² Bal tijb ree bën ni rusiud lējt rila' rtia' reeman ni rayal gudēēdidi loj reeman, dxel ziangajc dunujn raya'pan mazri derejch güündi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitēē xhie cwib gujic gual ad zucaagdiajgtri ree bejn xtiidxza'c Jesucrist. ¹³ Lējt ragbee gual gra ree bixhioz ni rüjn sirv lēn xyadoo Dios, rtia' reeman tibda'n ni rinē ree bēn Israel loj Dios persi rila' rbajn reeman. Ziangajc gra ree bixhioz ni rüjn ree sirv lule' yadoo guin lod rinē ree bejn be ree par Dios, nē reeman rtia' ta'n ni rinē ree bejn persi rila' rbajn reeman. ¹⁴ Yan laagajcan rēb dux Dad ree Jesucrist por ree bēn ni rulüü xtiidxza'caman, gual por ree bēn ni rulüü reeman rayal guiban reeman. ¹⁵ Per naj achet caca'n, ad caxhal tēētan gui'ch guie lojdi din guneedi xhienin. Din par naj zagdxe'li naj güiētan luar chu' bēn chiquied gualrabaa guin luxdon gual cusidan bejn ree xtiidxza'c Jesucrist.

¹⁶ Ad rayalt gales da valor gajcan gual cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! ¹⁷ Zeel bal cayünan mandad guin gual ruladxan günan laan, dxel yu' ni gaca'n. Per ni'qui bal id ruladxan günan mandad guin, laan bayal günan. ¹⁸ Abi' ni rünan gan naj gualrabaa ni yu' luxdon majsi ad naxtan, majsi ad caca'tan ni rayal tia' bēn ni rulüü xtiidxza'c Jesucrist, per cusnuu culün diidxza'c guin ree bejn ree.

¹⁹ Abi' majsi ad yu' bēn rniabee naj por mandad guin, per laa naj guie par gra ree bejn din gac günan sirv xbejn Cristo. ²⁰ Abi' chi za'n con ree bēn Israel, rünan naguiejn persi yu'gujic reeman gual nayajcan bēn Israel din günan gan gac reeman xbejn Cristo. Chi za'n con ree bēn Israel bēn rüjn ree naguiejn chinal xley Moisejs dxel rünan zi'c bēn zinal ley guin, din günan gan gac reeman xbejn Cristo, majsi ragbeen gual ad rniabeet ley guin naj. ²¹ Abi' chi za'n con ree bēn ad najt bēn Israel, bēn ad zinalt ree ley guin dxel majsi ragbeen gual Dios naj bēn rniabee naj gual nabanani zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. ²² Chi za'n con ree bēn yu'nawēēg par güün reeman o gaw reeman xhienin, dxel rünan naguiejn din

su reeman zagdxe con naj din gūnan laa reeman yudar gac reeman xbejn Cristo. Bantëëz lod ran rūnan naguiejn din guguiaa reeman naj zi'cgajc tijb lasa' reeman, din günczan gan majsi ta'nzi reeman gūnan gan gap reeman perdon por Cristo.

²³ Gra ree ni guie cayūnan guial rēnan xtiidxa'c Jesucrist, din tiblojzi güünle' Dios naj con gra ree bèn rliiladx diidxa'c guin ree.

²⁴ Lëjt ragbee guial chi yu' tijb carrer zien bejn ruxūūn, per tijbzaman naj bèn rtia' prem. Ziangajc lëjt gol been naguiejn tia'di ni gunee Dios. ²⁵ Bèn ni ruxūūn ree rajp laagajc reeman cudad chitëë xhie gudxoon guxūūn reeman. Rūjn reeman zian din güūn reeman gan, abi' ni rūjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶ Abi' ragbeechaawan xhienin cayūnan, ad cayūntan zi'c tijb bèn ni ruxūūn sin guial gagbeen chexc, ad rūntan zi'c tijb bèn ni rga'p sin guial gagbeeman ban ca'paman. ²⁷ Zeel cusagdiaj naj gajc din gac ganabee naj gajc gūnan zi'c rayal gūnan, chitëë guial culūn bejn ree xtiidxa'c Jesucrist achet yayalan delant loj Dios.

10

Guial rēn ni ad najt ree Dios

¹ Compniar raliduladx ree Jesucrist, gol basaaladx guial dux bengol gulal ree bèn binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia. ² Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin nē loj nijsdoo guin. ³ Gra tēē reeman gudaw guialraw ni bi't diidz xanyabaa. ⁴ Gra tēē reeman gu' nijs ni bazaladx Dios loj reeman, nijs brii lad tijb guiaj. Rēn guiēban guial diidz nadxel mal naban Cristo con laa reeman lod zētzi reeman. ⁵ Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laa yaguieen ree lasa' ree ni mal ni been reeman. ⁷ Ad rayalt yayēn ree ni rēb ree bejn naj ree Dios zi'c been zien ree dux bengol gulal ree, din rēb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." ⁸ Ad rayal tēēt güūn bejn ni dxuudx con bèn ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. ⁹ Ad zaneegujdx tēēt ree Dios zi'c been zien ree bèn guin, abi' gudaw bëēl laa reeman persi güjt reeman. ¹⁰ Ad rayal tēēt yaguie'ch ree guial ad cayūnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagūjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laa yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. ¹² Zeel bèn ni naladx za'dxi'ch loj xnejz Dios, mejorli gapaman cudad chitëë güūn dol laaman gan. ¹³ Gra ni cazajquidi ad najtan ni ad rzajc bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güūn lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rēnan lëjt rnin lojdi gapidi cudad ad goc guiēndi ni naladx ree bejn naj dios. ¹⁵ Naj ragbee guial najdi ganax bèn rignia', zeel lëjt gajc gol been xgab bal zagdxe naj ni canin lojdi. ¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. ¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaag rūjn ree bèn Israel chi rinē reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios. ¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰ Din bèn rūjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rēntan gaquidi tijbzi con ree xindxab guin. ²¹ Ad zacjt güūndi zian par guiguien guial ma najdi tijbzi con ree xindxab guin, abi' gaw tēēdi guiadxtil con vin din guiguien guial ma najdi tijbzi con Cristo. ²² ¿O rēndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc güūn ree xbejn Dios

²³ Graczi zajc güūn bejn, per ad gratan naj zagdxe guial güūnman. Majsi gra zile' güūn bejn, per ad gratan rūjn sirv par güūn lasa'man yudar chinalaman xnejz Dios. ²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëel luguia', ad guiniabdiidxidi bal ma gurejn loj xdios reeman, chitëë xhie guinialadxidi chi gawidi laan. ²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bèn ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni guneë reeman lojdi ad xhie guiniabdiidxidi chitëë xhie naladxidi. ²⁸ Per bal yu' xcompniaridi na guial ni cuneë bèn guin cayawidi ma gurejn loj xdiosaman, ad gawidi laan por bèn bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin. ²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: "Per, çchexc zeel ad züntan gra ni ragbeen ad najt ni mal por xixgabzi stijb bejn?" ³⁰ Wed rëb tëedi: Naj ragbee guial rudën quixtëë loj Dios por gra ni rawan, çchexquiza zeel güün reeman xgab mal por naj?" ³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di në gra ree ni rüjndi rayal güündi laan par güündi Dios bèn zøjbloj. ³² Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn rliiladx ree Jesucrist ad züjnt reeman xgab mal por lëjt. ³³ Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

¹ Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaan'ën lëjt guial rusaaladxidi naj, guial yu'guijquidi rüjn tëedi zi'c balün lëjt. ³ Rën tëen gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee búngunaa. ⁴ Tijb xinguaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. ⁵ Ziangajc chutëéz búngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb búngunaa ni biäj guijc xt garej. ⁶ Zeel bal tijb búngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. ⁷ Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' búngunaa guial rxhioob xhienin guijcaman, zian rulüüman respejt ni rajpaman xinguaaw. ⁸ Din ad gojct xinguaaw con guxtil lad búngunaa, búngunaa guin gojc con guxtil lad xinguaaw. ⁹ Ad gojct xinguaaw par búngunaa, búngunaa guin gojc par xinguaaw. ¹⁰ Zeel búngunaa rayal guixhioob xhienin guijcaman din guigüien guial xinguaaw rniabee laaman zi'c rülüü ree anjl chu rniabee laa reeman. ¹¹ Majsi delant loj Dios tiblojzi naj bejn, din bal id búngunaa niu achut xinguaaw niu, abi' bal id chu xinguaaw niu achut búngunaa niu. ¹² Walican, guial con guxtil lad xinguaaw gojc búngunaa, per yan por búngunaa ri't xinguaaw loj guidxliuj, zeel zi'c xinguaaw con búngunaa por Dios yu' reeman loj guidxliuj.

¹³ Naj rni lëjt, lëjt gajc gol been xgab bal zagdxen cwedx guiniab tijb búngunaa Dios abi' achet naxhoob guijcaman. ¹⁴ Bejn gajc ragbee guial natun bal id zugaj guijc xinguaaw. ¹⁵ Per par búngunaa mazri zagdxen rguienman bal guyool guidxguijcaman, din rajpaman laan par gusiaawan guijcaman. ¹⁶ Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bèn rliiladx xtiidx Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin lëjt, ad zile't ganin guial zagdxen naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi. ¹⁸ Yaløj rrin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tiblad rliiladxanan. ¹⁹ Din nawëëgi najn guial ad zajct zian, abi' zian rguien chu diidxli zinal xnejz Dios. ²⁰ Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. ²¹ Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliian, yu'di raw da't abi' xt rzüdxidi guial rë'di zi'ctzi rëndi. ²² Çid yu' lidxidi ya lod gawidi guië' tëedi zi'ctzi rëndi?, ço ad rëntidi xcompniaridi bèn rliiladx ree xtiidx Dios ya, zeel rusa'nxtudi bënprob ree bèn achet rajp? Yan, çrëndi ya chu' luxdon zagdxen con lëjt por zian? Per zian zi'c cayüjndi, ad zajct ganin lojdi guial zagdxen naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün lëjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. ²⁴ Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lëjt. Abi' chi güündi zian, gol beenan guial gusaaladxidi naj.” ²⁵ Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güündi zian, gol been zian guial rusaaladxidi naj.” ²⁶ Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' tëëdi vin, zian rulüüdi guial güjtaman por lëjt, gol been zian xt chi gui'taman loj guidxliuj guie zatijb.

Xhienaag rayal gac xche

²⁷ Yan bal yu' bèn raw guiadxtil rë' tëëman vin xche guin, abi' ad yu' guijectaman ni rën guiëb ni cayüjman, dolan cayüjman guial ad yu'guijectaman ni rën guiëb xcuerp në xrejn dux Dad ree Jesucrist. ²⁸ Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' tëëman vin xche guin. ²⁹ Din bèn raw guiadxtil guin con vin guin abi' ad yu'guijectaman ni rën guiëb xcuerp Jesucrist. Laagajcaman caguüil xcasti. ³⁰ Din guial rüjn ree bejn zian zeel dád ziendi ragxuu, zien tëëdi ad yu't gojl abi' zien reeman ma güjt. ³¹ Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. ³² Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëë yaguieen ree dol, chitëë yayal ree casti ni rayal ree bèn ad rlliladxt xtiidxaman.

³³ Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. ³⁴ Per bal yu'di ad zajct cwëz guial ma rliaandi, zagdxeli gaw lidxidi chitëë yayalidi xcasti Dios guial ad zjüntidi zi'c rayal. Gra ni rayal ganin lojdi, chi gualan guidganan lëjt dxel yanee ree.

12

Quiarguejn ni runee xSprijt Dios

¹ Yan ganin lëjt, quiarguejn ni runee Dios loj tijb gaj bejn por xyudar xSprijt Dios, din ad rëntan guibandí sin guial gagbeedi ni guin ree.

² Lëjt ragbee guial chi gadidi güünbee Dios dxel godxadi, bidxga'di ni na ree bejn lojdi naj ree dios abi'za ni'quid rnieet reen. ³ Zeel gol gogbee, chutëëz bèn rnieeguijdx Jesucrist, rën guiëban guial ad nabannëtan xSprijt Dios. Achu tëët bejn zajc guiëb: “Jesucrist naj bèn rniabee naj!”, bal id nabanman con xSprijt Dios.

⁴ Quiarguejn rent quiarguejn ren runee Dios dunuj ree, per Sprijt guin gajc naj bèn ragnë dugra ree. ⁵ Majsí ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. ⁶ Abi' majsí garent garen cayüjn tijbgaj bejn, Dios gajc naj bèn ni cayüjn yudar tiblojzi. ⁷ Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. ⁸ Din con xyudar xSprijt Dios yu' ree bèn ma ca' quiarguejn par guiniee reeman, yu' tëë ree bèn ma ca' quiarguejn par chignia' reeman diidxli xcwent Dios. ⁹ Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëë ree bèn ma cwa' guialrniabee par yayüjn reeman bënragxuu ree. ¹⁰ Yu' tëë ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguejn par gudëëd reeman xtiidx Dios loj ree bejn. Yu' tëë ree bèn ma cwa' ree quiarguejn par gagbee reeman bal wali o ad walit ni canee bèn rëb guial caneeman xtiidx Dios. Yu' tëë reeman ma ca' quiarguejn par guiniee reeman gadxagayaa ree diidx, abi' yu' reeman ma ca' quiarguejn par yadëëd reeman tijb diidx par stijb diidx. ¹¹ Per por xyudar gajc xSprijt Dios rüjn bejn ni guin ree, laaman ma ragbee conin rudëëman güün tijb gaj bejn ni naladxaman naj zagdxë.

Tijbzi cuerp nayajc dugra ree

¹² Din zi'c dux cuerp ree majsí zien la' najn, per tijbzi nayajc ree. Ziangajc dunuj ree guial raliduladx ree Jesucrist majsí zien nayajc ree per tijbzi nayajc ree con laaman. ¹³ Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsí nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴ Lëjt ragbee guial ad tibia'tzi naj xcuerp bejn, zien la' naj xcuerp bejn. ¹⁵ Yan bal guiëb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man. ¹⁶ Ziangajc majsí guiëb guidiajg bejn: “Ad najtan tibia' xcuerp bejn din ad najtan guiaalojman”, ad por ziant ad najtri guidiajgaman tibia' xcuerpaman. ¹⁷ Din bal guidib xcuerp bejn niajc guiaalojman, ¿xhieza naag niguiëjman?, o bal guidib xcuerp

bejn niajc guidiajgaman,  xhieza naag niuxi'man? ¹⁸ Per Dios ma ragbeeman banguin rayal guzoobaman tibli'a'gaj ni naj xcuerp bejn din gacaman zi'c r nman. ¹⁹ Din bal niajc xcuerp bejn tiblojzi, dxel ad najtran cuerp. ²⁰ Per zi'c ma rnin l jt majsi zien la' naj xcuerp tijb bejn per tijbzi naj guidiban.

²¹ Ad zajct gui b guiaaloy bejn loj yaaman: "Ad ryaadxtan l j." Ad zajct t  t gui b guiuj bejn loj guia'man: "Ad ryaadxtan l jt." ²² Din luar lod rul   ad r jnza'ct sirv, laa reen naj ni mazri r jn sirv. ²³ Abi' ree luar lod ad rguient zagdx, raguieen ree naguiejn din guiguieen reen zagdx. Guiaad ree luar naguie'ch, mazri raya'p ree cudad luar guin ree rata'cw reen din guiguieen reen zagdx. ²⁴ Ad zro't radxu' ree xgab por ree luar ni rguieen, mazri raya'p ree cudad luar naguie'ch ree zeel radojt ree xhienin din guiguieen zagdx dux cuerp ree. Zianan been Dios xcuerp bejn ²⁵ din chit   yaguieen ree xgab guial yu' lod ad r jnt sirv, guidib dux cuerp ree r jn yudar lasa'. ²⁶ Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷ Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibli'a' cuerp guin. ²⁸ Abi' entr gra dux compniar ree b n rliladx Jesucrist. Dios yaloy bacaabeeman b n naj ree xi ap stoles Jes s, ni barojp bacaabeeman b n gud  d ree xtiidxaman loj ree bejn, bayon bacaabeeman b n gul   ree xtiidxaman bejn ree, dxel bacaabeeman b n gap ree guialrniabee par yay jn reeman b nragxuu ree. Bacaabee t  man b n g  n ree gadxagayaa milagr. Bacaabee t  man b n ni g  n ree yudar bejn ree. Bacaabee t  man b n ni nabee ree loj ree b n rliladx xtiidxaman abi' bacaabeeman b n ni rnnee ree zien ree diidx. ²⁹ Ad grat ree bejn naj ap stoles ad gra t  t ree bejn zajc gud  d xtiidx Dios loj ree bejn, ad grat ree bejn zajc gul   xtiidx Dios bejn ree. Ad grat ree bejn zajc g  n milagr, ³⁰ ad gra t  t ree bejn zajc yay jn ree b nragxuu, abi' ad grat bejn zajc guiniee zienloj diidx ad gra t  t bejn zajc yay jn tijb diidx zatijb diidx. ³¹ Per gol been naguiejn din gunee Dios l jt quiarguiejn zagdx ree, abi' naj ganin l jt conin naj nejz mazri zagdx chinalidi.

13

Xcwent guial r n bejn ree

¹ Din bal rajc rnien zienloj diidx ni rnnee b nguidxliuj n  xtiidx ree anjl yu' xanyabaa, per bal id r nan bejn najzan zi'c tijb guilb rzijdx o zi'c tijb plati ni yu' cha'. ² O bal nayalan nud dan xtiidx Dios loj ree bejn, o nia'pan quiarguiejn par niagbeen gra ni z  d por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id r nan bejn ree achet lasajcan. ³ Ziangajc majsi gagui'san gra ni ra'pan loj ree b n ni ryaadx laan abi' yay  da cuerpan din che'can, per bal id r nan bejn ree achet lasajc ni cay nan.

⁴ Guial r n lasa' naj gap pacens lasa' bejn, gac bejn benza'c con lasa'man, ad zad dlojt lasa' bejn, ad z jnt bejn nab , ad z jnt bejn benro' loj lasa'man. ⁵ Guial r n lasa' naj gap respejt lasa' bejn, ad gac bejn naxhien, ad yalenyaman, ad chu'xyajin t   lasa' bejn, ⁶ ad rayalt yabaa bejn por ni mal ni cay jn bejn o ni cazajcaman, rayal yabaaman chi z  bejn xnejz. ⁷ Guial r n lasa' naj g  n bejn perdon lasa'man ni g  nn tzi reeman laaman, abi' chililadx lasa'man, ad zadxag t  taman cw zaman ni cab zaman, taan t  man ni r jnn tzi reeman laaman. ⁸ Guial r n lasa' ad yu't dxej loxan, per guialrajc yu' dxej loxan, ad zu t  tri b n ni rud  d ree xtiidx Dios loj ree bejn ni'qui ree b n rnnee zienloj diidx. ⁹ Din yan bal rayignia' ree, tibda'nzi naj ni rayignia' ree abi' bal rad  d ree xtiidx Dios loj ree bejn, tibda'nzi rayagbee ree xcwentaman. ¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tiblax. ¹² Ziangajc yan ad rayignia't ree gra zi'cgajc chi ad rguient zagdx loj tijb guiaawajn, per chi guidxin dxej yadxin ree lod zobj Dios dxel yayignia' ree gra. Yan yu'zi ni rignia'n per chi guidxin dxej guidxinan lod zobj Dios dxel g nbeen gra zi'c n nbeeman naj.

¹³ Choon naj ree ni ad yu't dxej lox, guialrliladx Dios, guialrb z ni gunee Dios, n  guial r n Dios dunuj ree. Per loj guiyon ree ni guin mazri lasajc guial r n Dios dunuj ree.

14

Guialrnnee stijb diidx

¹ Gol been naguiejn gol guy n ree bejn, gol gurejdx gunab t   Dios din guneeaman xquiarguiejndi din g  ndi xmandadaman, per mazri r jn naguiejn gapidi quiarguiejn par gud  di xtiidx Dios loj ree bejn. ² B n rnnee tijb diidx ni ad rignia't gra bejn, g  nman cwent guial achut caneen man. Tijbzi Dios caneen man guial achut rignia' xtiidxaman, tijbzi

laaman ragbee ni caneeman per bejn ree ad ragbeet reeman ni rèn guiëb ni caneeman. ³ Per tijb bèn rullü xtiidx Dios bejn ree cayünman yudar xhienaag chinal bejn xtiidx Dios, cudëädaman consejw loj ree bejn ragu' tēëman luxdoo reeman. ⁴ Abi' bèn rniee tijb diidx ni ad rignia't gra ree bejn, par tijbzi laaman naj ni caneeman, per bèn rniee xtiidx Dios cayünman yudar gra ree xbejn Dios din gusunu chinal reeman xnejzaman.

⁵ Bal zianclaa gradi nazri nniee zienloj ree diidx, per meyorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rèn guiëb ni rnieeman din güün sirv ni rnieeman gra ree bejn. ⁶ Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, çxhieza sirv güüan lëjt bal id canin lojdi zagdx ni balüü Dios naj o ni ragbeen o bal id canen xtiidx Dios lojdi zagdx o xhietëëz zatijb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdx ad zignia't ree bejn xhienin cucwejdxaman. ⁸ Ziangajc bal id zucwejdx reeman zagdx trompejt loj wadjil, çxhieza naag chignia' reeman guial ma rayal suchaaw reeman par til reeman con ree bèn rayal tilnë reeman? ⁹ Yan ziangajc bal guinieenëdi bejn ree con tijb diidx ni ad rignia't reeman, çxhieza naag chignia' reeman ni rëbidi! Xlia'zi caneedi achut rignia' ni rnieedi. ¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan. ¹¹ Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman. ¹² Zeel zi'c rëndi gapidi quiarגיעjn por xyudar xSprijt Dios par güündi xhietëëz ni naj xchiin Dios, gol gunab loj Dios din yazaladxaman quiarגיעjn lojdi din gac güündi ni rüjn sirv par gra ree xbejn Cristo.

¹³ Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. ¹⁴ Din zi'c naj bal gabledx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. ¹⁵ Zeel ni rayal günan naj, gabledx ganaaban loj Dios con da sprijtan abi' gagbeen xhie rèn guiëb ni canen. Ziangajc chi rolan cant ree par Dios rayal gagbeen chignia' tēen xhie rèn guiëb ni cayolan. ¹⁶ Din bal rnieel diidx zagdx ree loj Dios con diidx ni ad rignia't ni'qui lüj. Dxel bèn za' con lüj, ad zajc guiëbaman "Amën" chi ma gulox badëëdil quixtëë loj Dios guial ad rignia'taman ni rnieel. ¹⁷ Majsi nix da't badëëdil quixtëë loj Dios, per achetzi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil. ¹⁸ Quixtëë Dios naj mazri rajc zien loj diidx guial loj gradi. ¹⁹ Per majsi zian chi za'n lod rado'p ree dux compniar ree bèn rliladx ree Jesucrist par ganenë'n laa reeman, par naj meyorli naj ganenë'n laa reeman con gaay diidx per diidx ni chignia' reeman në ni güün laa reeman sirv din guluü reeman ben ren ree luar ganenë'n laa reeman con chiimil diidx ni ad rignia't reeman.

²⁰ Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. ²¹ Loj xtiidx Dios rëb: "Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios." ²² Zeel guial rniee zienloj diidx, najn tijb sen par ree bèn ad rliladx xtiidx Dios din chililadx reeman. Per guial rullüü bejn ree ni rèn Dios gagbee reeman, laan naj ni güün sirv par ree bèn ma rliladx ad par bèn ad rliladxt. ²³ Per ni'qui zian chi radxaag lasa'di par gucaagdiajguidi xtiidx Dios, abi' bal suløj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladx ree xtiidxaman, çwen id zanaladx reeman ya guial guijquidi rajc? ²⁴ Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guigiejnman ni caneedi, gagbeeman xhie dol cayün reeman, laagajcaman gagbee chu najman. ²⁵ Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni guluü ree bejn, bèn gugojn bejn ree conin balüü Dios lojman, bèn guiniee diidx ren ni ad rignia't gra bejn në bèn gudëëd xtiidxaman loj ree bejn. Per gra ni güündi güün sirv par güüan yudar ree demazri ree xcompniaridi din gusunu sudxi'ch reeman loj ni rliladx reeman xtiidx Dios. ²⁷ Bal yu' bèn rniee tijb diidx ni ad rnieet gra bejn, tio'pzman o choonzaman guiniee diidx ni rajcaman, abi' tijb gaj tijb gaj reeman guiniee, chu' tēë bèn ni guiëb loj ree bejn xhie rèn guiëb ni rëb reeman. ²⁸ Per bal id yu' bèn zajc gugojn bejn ree xhienin rëb reeman con diidx ni rajc reeman, meyorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman. ²⁹ Abi' ree bèn gugojn delant

loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman. ³⁰ Per bal tijb bèn zojb cucaagdiajg loj hor guin gulüü Dios laaman xhienin, rayal yacwëëz bèn canee dìn gac gugojn bèn guin bejn ree xhie nin balüü Dios lojman loj hor guin. ³¹ Gra ree bèn ni bayal gudëëd xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi dìn gra ree bèn cucaagdiajg gusiid reeman chu' tëë luxdoo reeman. ³² Gol badxe'guijc guial ree bèn rudëë xtiidx Dios loj ree bejn laagajc reeman rniabee laa reeman dìn guiniee reeman chi rayal guiniee reeman. ³³ Dìn Dios ad rëntaman tijb ni ad najt xnejz, rënman tijb ni naj xnejz dìn yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, ³⁴ loj hor ni ma cucaagdiajg reeman xtiidx Dios ad yu't permis guiniee ree béngunaa rayal guzoob reeman xtiidx xixinguaaw reeman zi'c rëb Dios güün reeman diizd gulal. ³⁵ Bal xhie rën reeman gagbee reeman, meyorli lidx reeman guiniabdiidx loj lacheel reeman, dìn natun guiniee tijb béngunaa loj hor ni cucaagdiajg reeman xtiidx Dios.

³⁶ Gol basaaladx guial ad lëjt it naj bèn yaløj cwa' xtiidx Dios ad tijb tëëtzi lëjt ragbee xtiidx Dios dìn güündi zi'c naj xixgabidi. ³⁷ Bal chu bèn naladx guial ma cwa'man quiargueijn par gudëëman xtiidx Dios loj ree bejn o por xSprijt Dios ma cwa'man xhie stjib quiargueijn, dxel laa gagbee gajcman guial ni cucan loj gui'ch guie najn zi'c rniabee dux Dad ree Dios. ³⁸ Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn dìn gapidi quiargueijn dìn gudëëdi xtiidxaman loj ree bejn, ad bal gudxoondi guiniee tijb ree xcompniaridi bèn rniee tijb diidx ni ad rignia'tidi. ⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tëën gusaaladxidi xtiidxza'c Jesucrist ni ma rnin lojdi, diidxza'c ni ma bililadxidi loj ni za'dxi'chidi. ² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yalojxgaj balün lëjt ni basidan yaløj. Rnin lojdi guial Cristo güt por dux tol ree zi'c rëb loj xtiidx Dios. ⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios. ⁵ Chi ma babanman, dxel balüülojman loj Bëd dxel loj los demazri ree apóstoles. ⁶ Zianz balüülojman në loj ree tijb cwa ree bèn rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. ⁷ Balüü loj tëëman loj Santiaaw dxelri loj ree apóstoles. ⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix. ⁹ Dìn naj ta'nzi lasajcan loj los demazri ree apóstoles, abi' ad rayalt guiriü lan apóstol guial basagzin bèn rliladx ree Jesucrist. ¹⁰ Per guial naj Dios benza'c zeel najn ni najn, abi' ad bayaxlia'tzaman naj dìn naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan. ¹¹ Zeel achet güünan bal por chunin biguiejndi xtiidx Dios bal por naj o por stjib ree xbejn Jesús, ni mazri lasajc naj guial ma biguiejndan abi' ma bililadxidan.

Yaban ree bengüt

¹² Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt? ¹³ Bal id zaban ree bengüt, rën guiëban guial ad babant Cristo. ¹⁴ Abi' bal id baban Cristo dxel achet sirv ni caylün lëjt, ache tëët sirv ni rliladxidi laaman. ¹⁵ Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. ¹⁶ Dìn bal id zaban ree bengüt, dxel ni'qui Jesucrist ad babantri. ¹⁷ Abi' bal id babanman, achet sirv guial rliladxidi laaman ache tëët perdon yu' por xtolidi. ¹⁸ Bal naj zian, xt ree bèn ma güjt achet xperdon reeman majsi bililadx reeman Jesucrist. ¹⁹ Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutëëz bënan.

²⁰ Per diidxliczi Jesucrist naj bèn baban, abi' laaman naj quijb bèn yaløj baban. ²¹ Abi' zi'c bidoonloj gualgüjt loj guidxliuj guie por tijb bejn, ziangajc por tijb bejn yaban ree bengüt. ²² Zi'c bidoonloj gualgüjt par gra ree bejn por Adán, ziangajc yan por Jesucrist ma yu' stjib guialnaban par ree bèn rliladx laaman. ²³ Per gra gac zi'c rayal: Yaløj Jesucrist naj bèn baban, dxel chi gui'taman stjib dxel ma yaban ree bengüt bèn bililadx ree laaman. ²⁴ Abi' chi ma beenman gan gunabeeman gra ree bèn rdxe'ch laaman, zi'c ree bèn rajp gualguxtis në ree bèn rajp graløj guial rniabee, dxel ma yayü xguialrniabeeman loj dux

Dad ree Dios. ²⁵ Din rayal nabee Cristo xt chi ma beeman canabeeman gra ree b n rdxe'ch laaman. ²⁶ Abi' ni chigra gunidlojman naj guialg jt. ²⁷ Loj xtiidx Dios r b guial Dios bad e guialrniabee loj Jesucrist din nabeeman gra, per ad r nt gui ban guial n  Dios rniabeeman din Dios bad ed guialrniabee lojman. ²⁸ Abi' dxej ni ma rniabee Jesucrist loj gra dxe'ch yay man guialrniabee ni bad ed Dios lojman din ma nabee tijbzi Dios gra.

²⁹ Yan bal id zaban ree beng t,  chexquiza zeel yu' ree b n rirobnijs xcwent ree b n ma g jt, abi'za bal id zaban ree beng t?

³⁰ Achet sirv guial nadxu'n loj ni nadxeb gra hor. ³¹ Din rugojnan l jt, gra dxej za'n loj guialg jt, laan naj ni diidxli ni rnin l jt zi'cgajc walin guial dad nix yu' luxdon con l jt guial najdi xbejn Cristo. ³² Yan bal naabzi loj guidxliuj guie g  n sirv ni cay nan dxe'ch achet sirv ni basajc ree b n  feso naj, naj reeman bendoxh zi'c ree bedoxh. Din bal id zaban ree beng t mejorli yaguieen ree zi'c r b ree b n r b: "Yadaaw ree yad ' t e ree din guixie ma bay jt ree."

³³ Per naj rni l jt ad ti bidi gusquiee reeman l jt. Din guial ridxga' xtiidx ree b n ni ad z t xnejz, najzan par guxhiinan zi'c nabandi. ³⁴ Zeel gol been xgab zi'c rayal ad bal r jn t eridi dol din yu'di ni'quid n nbeetidi Dios, zeel canin lojdi zian din yaya'nxtdi.

Xhienaag yaban ree beng t

³⁵ Per wed yu'di r jn xgab: " Xhieza naag yaban ree beng t?  Xhienaag naj cuerp ni gap reeman?" ³⁶ Per xgab guin xgab tontzan. Din l jt ragbee guial chi rx bin bejn tijb xhaj xhienin, chi rliejan dxe'ch rniyt xhaj ni gux binman. ³⁷ Ad cwaan ni rliejn guint rx bin bejn, xhajinan rx binman, zi'c r jn bejn con trigo o xhiet ez stjib xhaj nin. ³⁸ Per chi rliejan ma najn cwaandoo zi'c rniabee Dios gacan, xhiet ez xhaj nin ni rx bin bejn ma yu' cwaando ni guilienan. ³⁹ Zi'c nadxaa xcuerp bejn con xcuerp ree be, nadxaa t e b jl con xcuerp ree biguijn. ⁴⁰ Nadxaa t e ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj. ⁴¹ Nadxaa xbacha' gubijdx guial loj b ew nadxaa t e xbacha' ree bajl xanyabaa, xt ree bajl xanyabaa garent garen naj xbacha' reen.

⁴² Yan ziangajc gac con guial yaban ree beng t. Cuerp ni rguie'ch rodxa, per cuerp ni gap bejn stjib ad yu't dxej godxa. ⁴³ Cuerp ni rguie'ch rxinan, per chi yaban bejn stjib ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stjib ma gapaman cuerp ni yu' gojl. ⁴⁴ Rguie'ch cuerp ni rajp bejn loj guidxliuj guie, per chi yaban bejn stjib ma gapaman tijb cuerp ni g n sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵ Loj xtiidx Dios r b guial yaloy Ad n gojp guialnaban loj guidxliuj guie. Dxe'ch bi't Jesucrist, b n razaladx guialnaban loj ree bejn. ⁴⁶ Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxe'ch guialnaban xanyabaa. ⁴⁷ Ad n gojcaman con yuj zeel najman b nguidxliuj, per Jesucrist xanyabaa z edaman. ⁴⁸ Gra ree b nguidxliuj naj xcuerp reeman zi'c goc xcuerp Ad n loj guidxliuj guie, per chi guidxin dxej dxe'ch gap ree bejn tijb cuerp lasa' cuerp ni rajp Jesucrist xanyabaa. ⁴⁹ Din zi'c nayajc ree zi'c goc Ad n loj guidxliuj guie, ziangajc yayajc ree zi'c naj Jesucrist xanyabaa.

⁵⁰ Abi' rugojnan l jt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodxa ad zajct chu'n lod yu' ni ad rodxt. ⁵¹ Per r nan gagbeedi tijb ni achutczu wayagbee xt yan guial ad dugrat ree yay jt, per dugra ree guidxaa zi'c nayajc ree, yaya'p ree cuerp ren. ⁵² Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxe'ch tibrajtzi zi'ctzi chi ruchip guialloj bejn zian guidxaa zi'c nayajc ree. Chi guibejdx trompejt guin yaban ree beng t dxe'ch ad yu'tri dxej gui t reeman abi' hor zii ma bidxaa zi'c nayajc ree yan. ⁵³ Din r jn naguejn guidxaa cuerp ni rodxa por stjib cuerp ni ad yu't dxej godx guidxaa t e cuerp ni r jt por stjib cuerp ni ad yu't dxej gui t. ⁵⁴ Abi' chi ma bidxaa cuerp ni rodxa por stjib cuerp ni ad yu't dxej godx guidxaa t e cuerp ni r jt por stjib cuerp ni ad yu't dxej gui t, dxejzii naj dxej ni ma gojc cumplid ni r b loj xtiidx Dios lod r b: "Xt guin ma bayaaloj gojc gan loj guialg jt." ⁵⁵ Nadxel t e ma gojc cumplid zi'c r b loj xtiidx Dios lod r b: "Guialg jt,  conza guial r jn gan?  Conza guial rusagzil bejn?" ⁵⁶ Guialrusagzi guialg jt naj por dol, abi' por ley ragbee bejn guial dol guin naj ni rniabee laaman. ⁵⁷ Per quixt e dux Dad ree Dios, b n r jn dunuj ree yudar par yaguieen ree gan por xguialg jt Dad Jesucrist.

⁵⁸ Zeel compniar raliduladx ree Jesucrist zi'c r nan l jt rnin lojdi, gol guzudxi'ch ad chu' t e luxdoodi tio'p. Guixie guixie gol been naguejn g ndi mazri xmandad Dios, din l jt ragbee guial ad ni xlia'tzi gra ni cay jndi par Dad Jesucrist.

16

Milia ni rdo'p par ree xbejn Dios

¹ Yan por milia ni naj guto'pidi par güüнди yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn rliladx ree Jesucrist niz Galacia. ² Gazob dumingw tijb gajdi gol gule'c cintabl zi'tctzi beendi gan lèn toxman, din chi guialan ad rüjntri naguiejn guido'pidi milia guin. ³ Abi' chi guialan, bèn ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. ⁴ Abi' bal guguian guial rüjn naguiejn gan dxel chinë'n laa reeman.

Xhienaag naj xixgab Pab

⁵ Yaløj gadëëdan niz Macedonia dxel guialan Corinto guidganan lëjt. ⁶ Wed xchej gazun con lëjt. Wed guidib tiamp nayaag gazun con lëjt, dxel güüнди naj yudar din gan lod naj gan. ⁷ Ad rëntan gadëëdzi nejzan gaguixlon lëjt, rënan gaglaan con lëjt bal gunee Dios permis. ⁸ Per yan naj yaya'nan Éfeso xt lanij pentecostés, ⁹ din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdxe con lëjt, din lasa'gajc xmandad Dios ni cayünan cayünman. ¹¹ Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixlojman lëjt chi guneen laaman tiamp.

Diidx bigra ni bacaa Pab loj gui'ch guie

¹³ Gol guzujsin gol guzujdxi'ch tëë loj ni rliladxidi Jesucrist. Gol gudaan ni gui'tzi gol guzujdxi'ch tëë. ¹⁴ Gra ni güüнди gol beenan guial rëndi bejn ree.

¹⁵ Compniar raliduladx ree Jesucrist, lëjt ragbee guial Estéfanos con xfamilaman laa reeman naj bèn yaløj bililadx Jesucrist niz Acaya, ragbee tëëdi xhienaag cayün reeman yudar dux compniar ree bèn rliladx ree Jesucrist. Zeel rnin lojdi: ¹⁶ Lasa' ree bèn guin gol bazoob xtiidx reeman con gra ree bèn cayün xmandad Dios në ree bèn cayün yudar cayajc mandad guin.

¹⁷ Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. ¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bèn guin gol gojp reeman respejt.

¹⁹ Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bèn rado'p ree lidx reeman, rugajpdioz reeman lëjt, nayajc ree xbejn Cristo. ²⁰ Gra ree dux compniar ree bèn rliladx ree Cristo rugajpdioz reeman lëjt, gol bagajpdioz tëë lasa'di zi'c rayal.

²¹ Naj Pab, quijb naj cuca lëjtr guie ree par gugajpdiozan lëjt.

²² Bal yu' bèn ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

²³ Abi' dux Dad ree Jesucrist güünle' gradi. ²⁴ Zi'c nayajc ree xbejn Cristo tiblojzi rënan gradi. Amén.

Gui'ch barojp ni guxhaal San Pabl loj ree b n Corinto r liladx Jesucrist

Rugajpdioz Pab b n Corinto r liladx ree Jesucrist

¹ Naj Pab, Dios bacaabee naj gacan xi ap stol Jesucrist, n  dux compniar ree Timoteo za' con naj. Naj cuca gui'ch guie par l jt guial ma r lilaxidi xtiidx Dios luguiedx Corinto n  los demazri ree b n riga' niz Acaya. ² Dux Dad ree Dios con Dad Jesucrist g nle! l jt yabe'cdxe t e reeman luxdoodi.

Tarbjaw ni gud d Pab

³ Quixt e Dios xDad Dad Jesucrist, b n naj Dad b n raya dunuj ree naj t eman Dios b n ragu' du luxdoo ree. ⁴ Laaman ragu' du luxdoo ree loj xhiet z guialrzagdiaj ni rad ud ree din gac yalu' ree luxdoo ree b n cad  xhiet z guialzi, yalu' ree luxdoo reeman zi'c ragu' Dios du luxdoo ree. ⁵ Din majsi cayzaagdiaj da't ree guial nayaj ree xbejn Cristo, ziangajc d d ragu'man du luxdoo ree. ⁶ Abi' bal cayzaagdiajn, cayzaagdiajn din yaguieenan l jt yudar din chu' luxdoodi din laa t edi loj dol. Abi' bal cu'man du luxdoo, rgu'man du luxdoo din chu' luxdoodi din gac taandi lasa' ree guialzi ni cayd udan. ⁷ Ad yu' naw egt du luxdoo con l jt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoo.

⁸ Compniar raliduladx ree Jesucrist, ray nan gagbeedi guial d d zro' naj ni baza'can niz Asia. Naya baza'can niz ni, par dunujn ad zadaantran, ad naguienran nejz guial yabajnran mazri, ⁹ baguieenan xgab guial ma bay tan. Per baza'can zian din yadxeguijcan guial achet zajc yaguieen dunujn sin xyudar Dios, b n rasban ree beng t. ¹⁰ Laaman bab e dunujn loj gualg jt guin abi' gagn man dunujn loj lasa' ree ni nadxeb guin. Dunuj ree rayagbee guial gusunu g nman dunujn yudar, ¹¹ mazri bal g ndi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gud ed quixt e lojman zi'c cayagn man dunujn.

Chexc ad wejt Pab Corinto

¹² Abi' ni rabaan rnin lojdi guial achetdzi naduladxan guial rayagbeen nabajnan naya delant lojdi n  delant loj ree b nguidxliuj, abi' diidxli cayguieenan ni royal yaguieenan. Per ad cayguieentan zian por dux quiarguejnzan, cayguieenan zian por xyudar Dios. ¹³ Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. ¹⁴ Zi'cgajc ta'ngaj cayagbeedi guial chi gui't Dad Jesucrist zatijb l jt yabaadi con dunujn guia d dunujn yabaan con l jt.

¹⁵ Laan naj ni yu'guican, zeel yaloj benan xgab nidganan l jt din nabaadi guial ma barojp volt bidganan l jt. ¹⁶ Benan xgab nidganan l jt chi nialan niz Macedonia, abi' chi nazaan Macedonia nialan nidganan l jt stijb, dxel nagu'nejzidi naj par Judea. ¹⁷ Ad g ndi xgab guial chi rnin guidganan l jt rnizan zian. Ad g ndi xgab guial r nan zi'c r jn gra ree b nguidxliuj, ganin gualan abi' ragbeen guial ad zialtan. ¹⁸ Dios ragbee guial ad raguie'chtan yaguieenan ni rayagbeen ad zaguienran. ¹⁹ Din Jesucrist Xi'n Dios, b n ni ma baguieen xtiidx lojdi, naj con Silvano con Timoteo, ad najt Jesucrist b n na g nman ni ragbeeman ad z jntaman, laaman ganax diidxli rnieeman. ²⁰ Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios. ²¹ Abi' Dios laaman cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. ²² Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad r ntan gadil n l jt, abi' Dios gud ed naj casti bal id wali ni canin. ²⁴ Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni r liladxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

2

¹ Zeel benan xgab ad zidganatan l jt yan, chit e chu'naya luxdoodi. ² Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon? ³ Zeel bacan zi'c bacan loj gui'ch ni guxhalan lojdi, din chi gualan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. ⁴ Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj

gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

Yu' perdon par b n badxe' falt

⁵ Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin graczidi guyunaya por zian. ⁶ Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin. ⁷ Yan gol beenman perdon gol bagu' t e luxdooman chit e chu'naya luxdooman xt ad zadxejlt xhie g nman. ⁸ Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej. ⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g undi gra ni ganin lojdi. ¹⁰ Yan chut e z b n g undi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt ¹¹ chit e g n xindxab dunuj ree gan, din dunuj ree rayagbee xhienaag naj xguialrusquiee xindxab.

Ad nixt guyu luxdoo Pab guzujman Troas

¹² Chi bidxinan guiedx Troas par ganen xtiidxa'c Jesucrist, d d gogn  Dios naj par g nan mandad guin ni. ¹³ Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

Ragn  Jesucrist dunujn zianczy

¹⁴ Per quixt e Dios guial por Jesucrist guixie guixie cayagn man dunujn chit e xhie g n dunujn gan abi' por dunujn cayagbee ree bejn xtiidxa'c Jesucrist, diidxa'c guin ree naj zi'c tijb ni rliaa nejxh ni rire'ch cha' guidibczy. ¹⁵ Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree b n rliadx Jesucrist n  loj ree b n ad rliadx. ¹⁶ Par ree b n ad rliadx laaman, dunujn nayajc zi'c tijb go'xh ni rug jt, per par ree b n rliadx laaman dunujn nayajc zi'c tijb go'xh ni runee guialnaban. Per, zchu zajc g n ree ni guin sin xyudar Dios? ¹⁷ Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxab.

3

Nejz c b ni yu' par yadxin ree loj Dios

¹ Chi ranan zian, ad naladxidi guial dunuj gajcan cayles dux valoran. L jt ragbee guial ad r jnt naguiejn yal n tijb gui'ch lojdi par gagbeedi chu dunujn o yanaaban gui'ch lojdi ni g n dunujn yudar par gagbee ree bejn chu nayajcan zi'c r jn ree ben ren. ² Din l jt gajc naj tijb gui'ch par dunujn, gui'ch ni yu' du luxdoon ni rool ree bejn ni n nbee t e reeman. ³ Zi'c rul u yaguie'ch ree l jt naj tijb xtiidx Cristo ni bataan, per ad bacaatanan con tint, bacaanan con xSprijt Dios b n naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist, ⁵ abi' ad raguieentan xgab guial yu' ni raguieen dunujn, din gra ni raguieenan, raguieenan laan con xyudar Dios. ⁶ Dios naj b n razaladx dunujn qiuarguiejn par yagojnan bejn ree xcwent nejz c b ni ma yu' par yadxin ree loj Dios, nejz c b ni ad ryaadxt chinal bejn tijb ley ni z ed loj gui'ch, per r jn naguiejn chinalaman ni z ed por xSprijt Dios. Din ley castizi naj ni zidn n, per xSprijt Dios guialnaban naj ni rud eman loj ree bejn.

⁷ Abi' majsi castizi naj ni zidn  ley ni bad e Dios loj Moisejs loj tijb guiaj nata', per d d bidiin bacha' loj Moisejs chi cwa'man ley guin, xt ad gojct nuguaia ree b n Israel lojman por bacha' guin, bacha' ni ta'ngaj ta'ngaj gumidlojn. ⁸ Bal chi bi't ley guin gojc zian, yan, jmazri ni za'cdxoon naj guial gucaagdiaj ree bejn xcwent nejz c b ni rul u xSprijt Dios ni ma rajp bejn con Dios! ⁹ Din chi bi't ley ni ridn  casti par ree bejn, con bacha' bi'tan, yan, jmazri ni za'cdxoon naj guial guien ree bejn xhienaag gac reeman naya delant loj Dios! ¹⁰ Abi' bal ni za'cdxoon gojc chi bi't xley Dios loj guidxliuj guie, yan achetczy lasajc guialza'cdxoon guin par guialza'cdxoon ni naj por nejz c b ni ma rajp ree bejn con Dios. ¹¹ Abi' bal ni ad r jnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

¹² Abi' guial yu'guijc ree zian, zeel sin guialrdx b cayl nman bejn ree. ¹³ Ad raguieentan zi'c been Moisejs, basiaaw lajd lojman chit e gagbee ree b n Israel guial ziquied guialrulaa bacha' lojman, bacha' ni laa gunit gajc. ¹⁴ Per ad lojtzi Moisejs biaaw, ne gajc xquiarguiejn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. ¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiarguiejn reeman. ¹⁶ Per b n rliadx Jesucrist, laaman rxhial xquiarguiejnman. ¹⁷ Din tijbzi naj Jesucrist con xSprijt Dios, abi'

lod ma naban bejn con xSprijt Dios achetri rniabee laaman. ¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c r nman yayajc ree, abi' guixie guixie cusniman dunuj ree por xSprijtaman.

4

¹ Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. ² Dunujn achet raquie'chan, achet ni ad r njt sirv cayguieenan, ad caysquieetan bejn ree ad caychaa t etan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. ³ Per bal yu' b n ni ad rignia't xtiidxza'c Jesucrist ni cayneen, ad rignia'taman laan guial ad z taman loj xnejz Dios. ⁴ Abi' xindxab rniabee loj guidxliuj guie ma bascajyix xquiargueijn reeman, guial ad r nt reeman chililadx reeman, chit e gusni xtiidxza'c Jesucrist laa reeman abi' ad zajct guguaia reeman xgualrniabeeman, laaman guial najman zi'c gajcz Dios. ⁵ Ad caytie'chtan dux tiidx gajcan, ni caytie'chan naj xtiidxza'c Jesucrist, b n naj Dad par dunuj ree. Abi' ni ranazan lojdi guial cayguieenan sirv l jt por guial ray nan Jesucrist. ⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiargueijnan, guxhalaman dux quiargueijnan din yayignia'n xhienaag naj xgualrniabeeman, guialrniabee raguiaa ree por Jesucrist.

Yabajn ree por guialrliladx

⁷ Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee z ed por Dios ad por dunujtan. ⁸ Majsi graloj guialzi cayd udan per ad ralenya'tan. Majsi rul u achetri zajc yaguieenan, per radxejl gajc xhienaag yaguieenan. ⁹ Majsi xhiet ez r jnn  bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. ¹⁰ Bant ez guin zio'n nadxu'n loj guialg jt zi'cgajc guzajc Jesucrist, per zian ral un guial raya'pan xgualnabanman. ¹¹ Dxel la'tgaj nabanan, guixie guixie nadxu'n loj guialg jt guial nayajcan xbejn Jesucrist, per zian ral un guial raya'pan xgualnabanman, majsi guidxin dxej nit dux cuerpan. ¹² Nadxu'n loj guialg jt guial caytie'chan xtiidx Jesucrist, per por zian ma rajpidi guialnaban delant loj Dios.

¹³ Loj xtiidx Dios r b: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan. ¹⁴ Din dunujn rayagbee guial Dios, b n basban dux Dad ree Jesucrist loj guialg jt, ziangajc yasbanman dunuj ree guial ma nayajcan tijbzi con Jesucrist dxel l jt con dunujn tijbzi chign man dunuj ree lod zojbaman. ¹⁵ Din gra ni cayguieenan n  gra ni cayza'can, cayza'can zian din yaguieenan l jt yudar din gusnuu gacxhiej ni rililadxidi Jesucrist. Zian ma gac ree bejn mazri zien gud ed reeman quixt e loj Dios, guza't t e reeman laaman zagdxe.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie cayc b Dios laan. ¹⁷ Achetctzi lasajc ree guialzi ni cayd udan loj guidxliuj guie din najn ni rd ed, per por guialzi guin ree rayalan xgualnaza'c Dios, guialnaza'c ni lasajc mazri abi' ad yu't dxej nitan. ¹⁸ Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaat ree. Din ni raguiaa ree loj guidxliuj guie yu' dxej nit reen, per ni ad raguiaat ree yan ad yu't dxej nit reen.

5

¹ Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por b nguidxliuj zi'c rajc tijb yu, abi' cuerp guin yaya'p ree par tiblayaa. ² La'tgaj raya'p ree cuerp guie loj guidxliuj ralu' ree gualquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. ³ Din ad ganaxtizi Sprijt yayajc ree xanyabaa, n gajc cuerp yaya'p ree. ⁴ La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial ray nan yay jtan, ni ray nan naj guial yaya'pan cuerp c b ni yaya'pan par tiblayaa din nit dux cuerpan ni rayal nit. ⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist. ⁷ Per dunuj ree zunaal reeman guial raliduladx ree laaman ad guial raguiaat ree xhienaag gac. ⁸ Zeel raya'p ree confians guin, abi' ma ray n ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. ⁹ Zeel achet g unan bal loj guidxliuj guie o bal xanyabaa, per ni

ray n ree naj guial yaguieen ree zi'c r n Cristo. ¹⁰ Din dugra ree rayal yadxin lojman lod g nman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

Xhienaag gap bejn nejz par guidxinman loj Dios

¹¹ Zeel por respelj ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa n  l jt g nbee dunujn guial dunujn cayguieencan xnejz. ¹² Ad caylest dux valoran, ni ray nan naj guial yabaadi guial gagbeedi ni naj diidxli por dunujn, din gac yadxi'di diidx loj ree b n r jn naguiejn yaya'n reeman zagdxe delant loj ree bejn luar g n reeman xgab xhienaag naban reeman delant loj Dios. ¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par l jt nad dguieenan zeel cayguieenan mandad guie, cayguieenan laan par yaguieenan l jt yudar. ¹⁴ Guial r n Cristo dunujn zeel cayguieenan ni cayguieenan, din dunujn rayagbee guial Cristo g jt par gra bejn abi' gra ree bejn ma naj zi'c beng t par dol. ¹⁵ Abi' Jesucrist g jtaman por gra bejn din b n chililadx ree laaman ad zabajntri reeman zi'ctzi r n reeman, ma guiban reeman zi'c r nman, laaman guial g jtaman por laa reeman abi' babanman stibj. ¹⁶ Zeel bal guia'xchej baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, ¹⁷ din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. ¹⁹ Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. ²⁰ Zeel dunujn nayajc b n canee por Cristo, cayd edan xtiidx Dios din gagbee ree bejn xhie rniab Dios g n reeman. Abi' por Jesucrist ranaaban lojdi: Gol guzuj zagdxe con Dios. ²¹ Din Jesucrist achetczi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

6

¹ Zeel zi'c cayguieenan xmandad Dios, dunujn ranaab lojdi: Ad g nbee xlia'di guial r n Dios l jt. ² Din loj xtiidxaman r b:

Chi bidxin dxej guidxga'n l j,
bidxga'n l j
abi' chi bidxin dxej gapil perdon
dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g nman l jt perdon.

³ Dunujn ad cayguieentan tijb ni g n guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal n bejn ree. ⁴ Par gra cayl n bejn ree guial dunujn nayajc b n cay jn sirv Dios caydaan t en xhiet z ni raza'can, zi'c guialzi, tarbajw, ni naya, ⁵ n  guial naa ni r jn ree bejn dunujn. N  guial rgu' reeman dunujn ladxguuib, rgu' t e reeman dunujn loj wadijl, ni radxagan guial tant zien ni raguieenan, ni ral en bacaa, ne guialrliaan ni rad ndan. ⁶ Cayl n t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray nan ben ren ree, ⁷ guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios. ⁸ Yu' dxej rajp ree bejn dunujn respelj, yu' t e dxej rnieeguijdx reeman dunujn. Yu' dxej rniee reeman diidxza'c ree por dunujn, yu' t e dxej rniee reeman dunujn diidxguijdx. R jnn  reeman dunujn zi'c b n rusquiee majsi diidxli naj ni raneen. ⁹ Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul n ma yay jtan per ad ray jttan, abi' majsi xhiet z r jnn  reeman dunujn per ad rug jt reeman dunujn. ¹⁰ Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

¹¹ B n Corinto, dunujn ma ranan gra por dunujn, achet ni naguie'ch par dunujn guial diidxli ray nan l jt. ¹² Dunujn ad rliox ray nan l jt, l jt bal id r nridi dunujn. ¹³ Per naj rnien  l jt zi'c rnieen  tijb dad gra xi'nman: Gol guy n dunujn zi'c ray nan l jt.

Nayajc ree zi'c xyadoo Dios naban

¹⁴ Gol gojp cudad xhie ree compromis güündi con ree bèn ad rliadxt Dios, din garen naj xixgab ree bèn ma zinal ree xnejz Dios guial loj xixgab ree bèn contzi naban. Garen naj xixgab ree bèn ridxga' xtiidx Dios guial loj xixgab ree bèn ad ridxga't laan. ¹⁵ Lëjt ragbee guial ad zajct gac Cristo tijbzi con xindxab, ziangajc garen naj bèn rliadx Cristo guial loj bèn ad rliadxt laaman. ¹⁶ Garen naj ree bèn rliadx dux Dad ree Dios guial loj ree bèn rliadx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoman zi'c rëb tiblajt loj xtiidxaman lod rëb:

Naj gabajnné' laa reeman gazu tëen con laa reeman bantëëz guin che reeman.

Naj gac xDios reeman
abi' laa reeman gac da bejnan.

¹⁷ Rëb tëë loj xtiidx Dios:

Gol barii loj ree ben mal, gol been tibläd.

Ad güündi ni dxuudx din yaca'n lëjt,

¹⁸ Abi' naj gac tijb Dad par lëjt

guiáad lëjt gaquidi da xi'ngaanen nê daxi'ndxa'pan.

Zian rëb dux Dad ree Dios bèn ca' gra guialrniabee.

7

¹ Ni guin ree naj ree promejs ni ma been Dios con dunuj ree nayajc ree bèn rliadx ree Jesucrist. Zeel rayal yaguieen ree naguiejn yabajn ree naya. Yasa'n ree tibläd dol, xgab mal, nê gra ree ni dxuudx. Abi' guixie guixie yaguieen ree naguiejn yabajn ree zi'c rën Dios por respejt ni raya'p reeman.

Raba Pab guial bayüjn ree bèn Corinto xgab por xtol reeman

² ;Gol gojc benza'c con dunujn! Dunujn achet waguieenan lëjt, achet ni mal waguieenan lëjt ad wasquiee tëetan lëjt. ³ Ad naladxidi caneguidxan lëjt, din zi'c ma rnin lojdi diizd guia'xchej guial dunujn rayënan lëjt, abi' majsi yayëjtan o majsi yabajnan per tijbzi nayajcan con lëjt. ⁴ Dád ra'pan lëjt confianz abi' dád rabaanë'n lëjt. Majsi xhietëëz guialzi caydüüdan, per zi'c rgu'di du luxdoon nix zeel dád rabaan, majsi xhietëëz cayza'can

⁵ Din diizd chi badxinan niz Macedonia achetctzi guial yaziiduladxan por gra ni cayza'can, zi'c ni rüjnné ree bejn dunujn nê guialnadxeb ni caydüüdan. ⁶ Per Dios bèn ragu' luxdoo ree bèn yu'naya luxdoo, laaman bagu' du luxdoo chi bi't Tito guie. ⁷ Abi' ad guialzi bi'ttaman bayu du luxdoo nix, nê guial bagu'di luxdooman zeel bayu du luxdoo. Naman du lojn guial dád rëndi guguaadi naj, yu' tëëdi xgab yu'naya tëëdi por naj. Laan naj ni rabaanë'n guial yu'quidi xgab por naj.

⁸ Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblädëd, ⁹ per yan nix yu' luxdon, ad guial guyu nayatidi, yu' luxdoo nix din por guialguyunaya guin ma bayüjndi xgab zëdi loj xnejz Dios. Guyunayadi abi' gudaandi zi'c rën Dios, abi' achet ni mal waguieenan lëjt. ¹⁰ Din chi runaya luxdoo bejn zi'c rën Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. ¹¹ Per lëjt gol baguiaa zi'c ma been yudar guial guyunayadi abi' gudaandi zi'c rën Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lëjt, abi' balendi bidxeb tëëdi por ni cayüjnx. Dxel ma rënejzdoodi gazun con lëjt, badëë tëëdi laax casti zi'c rayal. Por gra ni beendi zian biguinen guial achet dol rajpidi por zian. ¹² Gui'ch ni guxhalan lojdi, ad guxhaltanan guialzi rüian xgab por bèn cayüjn dol guin o guial rünan xgab por bèn cazagdiaj por xtol bèn guin. Guxhalan gui'ch guin lojdi din guluüdi loj Dios guial yu'guijçquidi dunujn. ¹³ Laan naj ni rabaanë'n guial beenquidi zian.

Abi' yan mazri rabaan guial raguaian Tito yu' luxdooman zagdxe baguiaadaman guial dád naza'c gojquidi con laaman. ¹⁴ Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tëë diidxli naj ni raguie'chan loj Tito por lëjt. ¹⁵ Yan dad rusaaladxaman lëjt guial rusaaladxaman xhienaag bazoobidi xtiidxaman nê gra respejt ni gopidi laaman chi guzuman con lëjt. ¹⁶ Dád nix yu' luxdon guial ra'pan lëjt confianz par gra.

8

Guial rudëëd gon con guidib luxdoo

¹ Yan compniar raliduladx ree Jesucrist, rayënan gagbeedi xhienaag cayagnë Dios bèn rliadx ree Jesucrist niz Macedonia. ² Majsi xhietëëz cazajc reeman, per ad rucwëëzt rguien

guial dád rabaa reeman. Majsi dád bènprob reen, per dad rabaa reeman rudëéd reeman cintabl par gagnë reeman bejn ree. ³ Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. ⁴ Dád been reeman naguiejn du lojn din yatiëjban guial në laa reeman güün yudar bèn rliadax ree Jesucrist, ⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. ⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. ⁷ Dunujn rayagbee guial par gra zagdxe zëdi: Diidxli rliadaxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tëedi dunujn, yan gol been naguiejn din guiguien guial najdi benza'c par güündi yudar con ni ranan lojdi. ⁸ Ad rüntan lëjt naguiejn guial gudëëdi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. ⁹ Din lëjt ragbee zi'c naza'c Dad Jesucrist, bèn basa'n gra guialnaza'c xanyabaa, abi' hi'taman loj guidxliuj zi'c tijb bèn ni achet rajp din por laaman yayal në lëjt xguialnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. ¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gudëëdi ni rdo'p zi'ctzi galguzujdi. ¹² Din chi diidxli rën bejn güünman yudar, xhietëez naag zajc güünman yudar. Ad rayalt gudëédaman xt ni ad rajptaman.

¹³ Ad canitan lojdi guial tëdidi tarbajw cwe'quidi xt ni ad rajptidi par güündi yudar bèn ryaadx ree xhienin chitëë xhie guiyaadx reeman, ni rayënan naj guial tibloj yaguieen dulasa' ree yudar. ¹⁴ Yan lëjt zajc güündi yudar bèn ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar. ¹⁵ Loj xtiidx Dios rëb: "Bèn bato'p zro' achet been sobr, abi' bèn bato'p ta'nzi achet biaadxaman."

Tito con ree xcompniaraman

¹⁶ Quixtëë Dios badëëman loj Tito lasa'gajc xgab rünan por lëjt. ¹⁷ Yan chi raguie'chan lojman guidganajman lëjt, laa cwëb gajcaman guial ma rënman guguiaaman lëjt, ad beent naguiejn chu niniabee ni'taman.

¹⁸ Abi' con laaman cayxhaalan stijb dux compniaran bèn ma nünbee ree dux compniar ree bèn rliadax ree Jesucrist guidibzci, guial rulüüman bejn ree xtiidxza'c Dios zagdxe. ¹⁹ Ma bacaabee tëë ree dux compniar raliduladax ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxe. ²⁰ Zeel cwabee bèn guie din saman con dunujn chitëë xhie gucaaquia reeman dunujn por gra yudar ni cado'p ni naca'n par yugsa'nan. ²¹ Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

²² Yan cayxhaalan Tito con bèn guin cayxhaalnë'n laa reeman stijb dux compniaran bèn ma balu'been zien volt guial diidxli rënman güünman yudar, abi' mazri yan guial dád rajpaman lëjt confians. ²³ Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compniaran bèn zë ree con laaman, dux compniar ree bèn rliadax ree Jesucrist guxhaal laa reeman, abi' ruza't reeman Jesucrist zagdxe. ²⁴ Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliadax Jesucrist xcwentidi, din guguiaa tëë reeman guial ni diidxli naj ni ma rën loj reeman xcwentidi.

9

Yudar par ree xbejn Jesucrist.

¹ Yan por yudar ni rayal yale'can par yaguieenan yudar dux compniar ree bèn rliadax ree Jesucrist, ad ryaadxt ganin mazri xcwentan, ² din naj ragbee guial ruladaxidi güündi yudar. Abi' xt nix yu' luxdon rën loj ree bèn Macedonia guial lëjt bèn Acaya diidz gudibijz cayüjndi naguiejn cayüjndi yudar, abi' gra ree bèn Macedonia been naguiejn güün yudar chi biguiejn reeman zian. ³ Zeel caxhalan Tito con za tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi naguiejn güündi yudar zi'c ma rën por lëjt. ⁴ Din bal guidnë'n tio'p choon ree bèn Macedonia ad yadxaaglojn lëjt ad za'tidi porvinid, abi' natun par naj chitëë ganin natun par lëjt por confians ni ra'pan lëjt. ⁵ Zeel benan xgab rën loj Tito con za tio'p dux compniar ree guial mejorli ned gaj reeman guidganaj reeman lëjt, din güün tëë reeman yudar guloox guto'p reeman yudar ni ma nadi

din ma najn purvinid chi guialan. Zian guiguiein guial diidxli r ndi yazaladxidi ad guialzi canabeetan l jt.

⁶ Naj rni lojdi b n rx bin ta'n, ta'n gajc raca'man, gui aad b n rx bin zro', zro' gajc raca'man. ⁷ Tijbgaj l jt gol bad   zi'c naj xixgabidi gud  di, ad mal gant ad naguiejn t  t, din Dios r nman b n razaladx guidib luxdoo. ⁸ Abi' Dios rajpaman gra guialrniabee par g unman l jt yudar gapidi gra ni ryaadxidi chit   xhie guiyaadxidi din g undi yudar zi'c rayal. ⁹ Loj xtiidx Dios r b:

B n ni rgui's ni rajpaman abi'
rud  eman laan loj ree b nprob,
ad yu't dxej yayanladx reeman
ni zagdxe ni r jnman.

¹⁰ Yan Dios b n razaladx bin rx bin bejn, b n razaladx guialraw par ree bejn, laaman gul   l jt xhie g undi din gapidi gra ni rayal gapidi, din gac g undi yudar mazri b n ryaadx ree xhienin. ¹¹ Zian mazri naj ni gunee Dios lojdi din gusnuu g undi yudar yazaladxidi. Abi' por yudar ni guixhiaaln di dunujn par ree compniar rliadx ree Jesucrist, laa reeman gud  d quixt   loj Dios. ¹² Abi' yudar guin ad z jntan sirv naabzi par loj ni ryaadx reeman laan, g unan sirv n  par gud  d reeman mazri quixt   loj Dios. ¹³ Por yudar guin gagbee reeman guial cuzoobquidi xtiidzxa'c Jesucrist zi'c rliadxidi laan abi' guza't reeman Dios zagdxe por zian, n  guial najdi benza'c rgui'sidi ni rajpidi par laa reeman n  par gra ree b n ryaadx laan. ¹⁴ Abi' z n reeman l jt, cwedx t   reeman Dios por l jt por xgab za'c ni banee Dios lojdi guial g undi yudar. ¹⁵ Quixt   Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

10

Guialrniabee ni rajp Pab guial najman xi ap stol Jesucrist

¹ Naj Pab, yu' ree b n na guial benza'c naj chi za'n con l jt, abi' chi za'n zijt sin guial rdxeb rdil 'n l jt. Per zi'cgajc ninieen  Cristo l jt con respejt n  con diidzxa'c, rniaaban lojdi guial ² xi nix chi guialan guidganan l jt ad r jnt naguiejn gadil 'n b n r b ree por da xgabzan cay nan ni cay nan, din ad rdxebtan ganen 'n laa reeman. ³ Walican nayajcan b nguidxliuj, per ad raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios. ⁴ Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhiet  z ni mal. ⁵ Por guialrniabee guin baguieenan gan loj ni rudxiib ree bejn duguijcan, abi' baguieen t  n gan loj guial nadxal reeman ni rudxoon g unbee reeman Dios. Zianan rase'nan xhiet  z xgab din chile' gucaagdiajz reeman xtiidx Jesucrist. ⁶ Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdxe.

⁷ L jt mazri ridxga'di zi'c ruguiaadi bejn. Bal yu' b n r jn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. ⁸ Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par g unan l jt yudar chignia'di mazri xcwent xnejzaman ad par gunijttan l jt. ⁹ Ad naladxidi guial r nzan gucheban l jt con ree da gui'chan. ¹⁰ Din yu' ree b n ni r b guial diidx naa abi' sin guialrdxeb rni en' n l jt loj ree da gui'chan, abi' chi za'n con l jt ni'quid rul  t lasajcan par l jt, ni'quid radxat loj ree bejn ni rnien. ¹¹ Per naj r nin lojdi guial b n r b ree zian rayal gagbee reeman guial zi'cgajc raneen 'n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

¹² Din dunujn ad raguieentan zi'c r jn ree b n rlies xvalor gajc, per ni'ci ta'n ad raguieentan xgab yaguieenan zian. Din nitontzi r jn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. ¹³ Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cw jbaman badxinan ladxidi. ¹⁴ Zeel ad g undi xgab guial cad  t  caysnaben l jt, din yaloz dunujn bio'p ladxidi par yasiidan l jt xtiidzxa'c Jesucrist. ¹⁵ Dunujn ad ralest dux valor gajcan por tijb ni been stijb bejn. Per ral  zan guial ni's xguialrliadxidi, din yasnuu yaguieenan l jt yudar gusnuu g unbeedi ni rayal gagbeedi xhienaag rayal yaguieen ree. ¹⁶ Zian ma zile' yo'n mazri delant ladxidi par yatie'chan xtiidzxa'c Jesucrist, per lod achut wazuloz chit   yales dux valor gajcan con ni ma been ben ren.

¹⁷ Bal yu' b n r n guilies xvalor gajc, mejorli guiliesaman xvalor dux Dad ree Dios. ¹⁸ Din ad b n rliest xvalor gajc naj b n raya'n zagdxe loj Dios, b n raya'n zagdxe naj b n rlies xvalor Dios.

11

Pab con ree apóstoles bèn rusquiee ree

¹ Yan, ¡Xi nix taandi naj con tio'p choon ree da xgab tontan! Per naj rni lojdi gol gudaan naj. ² Naj rënan lëjt zi'cgajc rën Dios lëjt. Zi'cgajc tijb dad rajp xi'ndxa'p biin ni ma naj guxhliiaa din chile' guidxinm naya loj xin tia' laam, zian rënan guidxinë'n lëjt loj Cristo naya sin dol. ³ Per rdxeban chu' bèn gusquiee lëjt zi'c basquiee bëel Eva, abi' ad züntridi xgab guidib luxdoodi xcwent Jesucrist. ⁴ Din chi ri't ben ren rüman diidx lojdi xcwent Cristo, per garen guial zi'c ma balüün lëjt, o chi ri't bën ren rüman diidx lojdi xcwent Sprijt, per ad lasa't xSprijt Dios bèn ma nabannëdi, o chi ri't ben ren lojdi naman xhienaag dín gapidi perdon, per garen guial loj ni ma ranan lojdi, lëjt laa ridxga' gajquidi laa reeman. ⁵ Per naj rulüü achet ryaadxan delant loj ree bën rëb laa reeman naj quijb xi apóstoles Jesús. ⁶ Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

⁷ Per, çchuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios? ⁸ Ben renli ree bën naj ree xbejn Cristo cwa'n xmliaa reeman persi beenan naj yudar la'tgaj guzun con lëjt persi basidan lëjt xtiidx Dios. ⁹ Abi' chi guzun con lëjt, chi biaadxan xhienin ad gunaabtan lojdi güüdi naj yudar, bèn Macedonia ree bën rililadx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëët dxej ganin guial rüjn naguiejn güüdi naj yudar. ¹⁰ Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luxdon zagdxë guial guiën ni benan con lëjt. ¹¹ Abi' çchexc zeel benan zian con lëjt? çGuial ad rëntan lëjt ya? Per Dios ragbee guial dád rënan lëjt.

¹² Abi' gusunü günan zi'c cayünan xt yandxej guial ad zanaabtczan lojdi güüdi naj yudar, din chitëe xhie guinee ree bën ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. ¹³ Din laa reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c rulüü naj reeman xi apóstoles Jesús. ¹⁴ Per xt ni'quid radxat loj bejn por zian, din xt xindxab zile' gulüüloj loj bejn zi'c tijb xianjl Dios. ¹⁵ Dxel xt ni'quid radxat loj bejn guial bën ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni rayal reeman por ni cayüjn reeman.

Tarbajw ni gudëd Pab guial najman xi apóstol Jesucrist

¹⁶ Yan canin lëjt stijb: Ad naladxidi guial ad nadëdguientan, per bal rüjndi xgab zian gol basa'n za naj ganen zi'c tijb bën ad nadëdguient din nëgajc naj gales da valoran majsi tibda'nzi. ¹⁷ Ad nat Dios guial gales da valoran zi'c cayünan, per gales da valoran zi'c tijb bën ad nadëdguient. ¹⁸ Zi'c yu' zien ree bën rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. ¹⁹ Din guial najdi bën rignia' ad nawëëgt naj taandi bën ad nadëdguient ree. ²⁰ Rdaandi bën rniabee ree lëjt rüjn reeman zi'ctzi rën reeman, rdaandi bën rtia' ree ni rajpidi, bën rusquiee ree lëjt, o rniee reeman lojdi ganax ree diidx nabë abi' xt rtiëjbidi rëëz reeman ro'di. ²¹ Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bën ad nadëdguient, din ad xnejztan. ²² Per bal na reeman guial naj reeman bën Hebreo, nëgajc naj naj bën Hebreo. Bal na reeman guial naj reeman bën Israel, ziangajc naj bën Israel gajc naj. Bal na reeman guial loj xdiaa Abraham zëëd reeman, nëgajc naj zial loj xdiaa Abraham. ²³ Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniee bën ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguuib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt. ²⁴ Gaay volt ma gudijn ree bën Israel naj, abi' beegaj gudijn reeman naj zi'ctiubitap volt rugaz reeman duu ladan. ²⁵ Choon volt ma wej barcw lod za'n xan nijsdoo, abi' tibdxëj tibguiaal baya'nan loj nijsdoo. ²⁶ Guidibczi lod ma wan, gudëëdan loj ree ni nadxeb chi gudëëdan loj ree guiüw, loj ree bëngubaan, loj ree bën ladxan bën Israel ree në loj ree bën ad najt bën Israel. Ma gudëëd tëën loj ree ni nadxeb luguiedx ree, dajn ree, loj nijsdoo, në loj ree bën rusquiee na reeman guial naj reeman xbejn Cristo. ²⁷ Dád ma guzaagdiajn. Dád zien volt ma gulën bacaal, ma gulaanan, ma we'can nijs, abi' ma guyu dxej ni achetczzi gudawan. Ma gognajlan, ma biaadx tëë da xaban.

²⁸ Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bën zojb ree niz lod ma wan. ²⁹ Bal xhie cazajc tijb ree bën rililadx Jesucrist, cayünan xgab por laaman. Abi' bal cusquiee reeman tijb ree bën rililadx Jesucrist par güünan dol, dád ralenan yu' tëën laaman xgab. ³⁰ Bal rüjn naguiejn gales da valor

gajcan, tijbzi ni ganin por naj, naj por gualrzagdiaj ni ma gud edan. ³¹ Abi' Dios xDad Dad Jesucrist, laaman b n rayal respejt guidib tiamp, laaman ragbee guial diidxli naj ni canen. ³² Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj. ³³ Per guyu ree b n ni badxe' naj l n tijb dx m abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

12

Ni balu loj lon

¹ Achet r jn bejn gan guial guilies xvalor gajcaman, per rayal ganin lojdi por ree ni balu loj lon n  ree ni balu  Dad Jesucrist naj. ² Naj n nbee tijb xinguaaaw rliladx Jesucrist, ma gojc chidaj ijz wejx xanyabaa lod zobj Dios. Ad ragbeetan bal bin  xcuerpix o xsprijtzix wej, ad ragbeetan, tijbzi Dios ragbee. ³ Bal bin  xcuerpix o xsprijtzix wej, ad ragbeetan, tijbzi Dios ragbee. Per naj ragbee ⁴ guial wejx lod zobj Dios, lod bigueijnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. ⁵ B n zii zajc galesan xvalor, per ad rliestan da valor gajcan, ni rnizan por naj por ree gualrzagdiaj ni ma gud edan. ⁶ Abi' majsi gales da valoran, ad cay ntan zi'c tijb b n ad nad dguient din ganax ni diidxli naj ni ganin. Per ad r ntan zian chit   yadxaloj bejn naj mazri guial loj ni rayal por ni ruguiaa reeman r nan, o por ni rigueijn reeman rnien.

⁷ N  par chit   gales da valoran zro' por gra ni ma balu  Dios naj, cad edan tijb gualzi ni naj zi'cgajc zi'c chi yu' tijb gui ejch tiblajt bejn. Laan naj xchiin xindxab par g  nnaax naj chit   gales da valoran. ⁸ Choon volt ma canaaban loj Dios din chiquiedaman gualzi ni cad edan, ⁹ per laaman na lon: "Zi'c r nan l j achet gac, din mazri rguien da gualrniabeen chi cazagdiaj bejn." Zeel rabaan por ree gualrzagdiaj ni cad edan din guiguien guial nabanan con xgualrniabee Cristo. ¹⁰ Rabaan por xhiet  z gualrzagdiaj ni cad edan, o n  chi rnieeguidx bejn naj, o chi ryaadxan xhienin, o chi xhie r jn bejn naj, n  gra ree tarbajw ni cad edan, guial cad edan laan guial r nan Cristo. Din chi cazaagdiajn dxel mazri ra'pan xyudar Cristo.

Yu' Pab xgab por ree b n rliladx Cristo luguiedx Corinto

¹¹ Gunen 'n l jt por naj gajc zi'c tijb b n ad nad dguient, per l jt rajp dol guial benan zian. Din l jt naj b n rayal guilies da valoran delant loj ree b n ni r b guial laa reeman naj quijb xi ap stoles Jesucrist. Din majsi tijbzi b n ad r jnt sirv naj, per achet ryaadxan delant loj reeman. ¹² Chi guzun con l jt ad balenya'tan guial g nan milagr ree n  gra los demazri ree ni badxalojdi ni benan n  graloj ree ni benan ni been sirv zi'c sen guial diidxli najn xi ap stol Jesucrist. ¹³ Gra zi'c ma benan con gra ree compniar rliladx Jesucrist lod ma wan, ma benan laan con l jt. Tijbzi ni ad bentan con l jt naj guial ad rnitan lojdi guial g ndi naj yudar con gra ni ryaadxan la'tgaj guzun con l jt, per bal guneguidxan l jt por zian  Gol been naj perdon!

¹⁴ Yan ma cay nan xgab guidganan l jt stijb, laan naj ni yayon volt guidganan l jt. Abi' ni'qui yan ad zanitan lojdi guial g ndi naj yudar, ad ni rajptidi r nan, l jt naj b n r nan. Din ad xi'nt bejn rguil xhienaag guibanman, dad guin ree rguil xhienaag guiban ree xi'n reeman. ¹⁵ Abi' majsi gra ni ra'pan g nan gaxt, o majsi yadib da cuerpan par g nan l jt yudar, per achet g nan. Majsi rulu  chi mazri r nan l jt, ta'nzi r ndi naj.

¹⁶ Walican guial ad gunaabt n lojdi niagn di naj nuneedi xhienin, per yu' ree b n r b guial benan zian din nasinan par gusquien l jt. ¹⁷  Wen basquieen l jt ya chi guxhalan b n bidganaj ree l jt? ¹⁸ N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n rliladx Jesucrist,  wen yu' ni basquiee Tito lojdi ya?  Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

¹⁹ Por gra ni ma ranan lojdi, ad naladxidi guial caylaj dunuj gajcan, din achet waguieenan l jt. Dios ragbee guial zi'c nayajcan xbejn Cristo cayneen 'n l jt, abi' gra ni caynan lojdi najn par yaguieenan l jt yudar chinalidi xnejz Dios guial rayenan l jt. ²⁰ Din rdxeban guial chi gualan guidganan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaadi naj. Rdxeban gadxaaglojn l jt con wadilj, gualnad dloj, gualrdxe'ch, gualrlies xvalor gajc, gualrniee guidx lasa', guial ruza't bejn, guial r jn benro' n  guial ad nadxagtri lasa'di. ²¹ Rdxeb t en guial chi guidganan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  zt rzun  reeman b n ad najt lacheel reeman, ad rucw  z t  t reeman vijs ni rajp reeman o stijb ree ni ad r jnt sirv ni r jn reeman.

13*Diidx bigra bacaa Pab loj gui'ch guie*

¹ Yan ni yayon volt guidganan lèjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. ² Abi' zi'c rën loj ree bèn ni cayüjn dol chi bialan bidganan lèjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan lèjt stijb, achetctzi ni téd zezi par ree bèn ni cayüjn dol. ³ Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par güünman zi'c rayal güünman con lèjt abi' con lèjt culüü xguialrniabeeman ni rajpaman. ⁴ Walican güjt Jesucrist loj crüjz zi'c tijb bèn ad rajpt guialrniabee, per yan nabanman por xguialrniabee Dios. Abi' zi'c güjtaman zi'c tijb bèn ad rajpt guialrniabee ziangajc dunuj ree rülüü ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con lèjt.

⁵ Lèjt gajc gol been xgab bal walidi rliladxidi Jesucrist. Lèjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. ⁶ Balzianclaa gagbeedi guial dunuj diidxli raliduladxan laaman. ⁷ Abi' rarejdxan Dios por lèjt chitëë güündi ni mal, ad par yaya'ntan zagdxé delant loj ree bejn, cayguieenan zian par güündi ni naj zagdxé, majsi par ree bejn ad cayguieentan zi'c rayal. ⁸ Per ad zajct yaguieenan tibladi ni naj diidxli, dunuj caynazan ni naj diidxli. ⁹ Zeel yu' du luxdooon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. ¹⁰ Abi' caxhalan gui'ch guie lojdi dxelri guidganan lèjt, din chi guialan guidganan lèjt ad ryaadxt gadilë'n lèjt por guialrniabee ni baneé Dad Jesucrist lon, guialrniabee ni baneeman lon par günan lèjt yudar chignia'di mazri zagdxé xnejz Dios, ad par gunijttan lèjt.

¹¹ Yan compniar raliduladx ree Jesucrist par guloxan gui'ch guie, naj rni lèjt: Gol badxe' luxdoodi zagdxé, gol been naguiejn gol gubajn zi'c rayal, gol bagu' luxdoodi gol gubajn tée zagdxé, gol babe'cdxe luxdoodi con ree xcompniaridi. Abi' Dios bèn rën dunuj ree rabe'cdxe téeéman du luxdoo ree laaman gagnë lèjt. ¹² Xhietëéz hor ni radxaag ree xcompniaridi, gol bagajpdioz lasa'di zi'c rayal. ¹³ Gra ree dux compniar ree bèn rliladx ree Jesucrist niz guie rugajpdioz reeman lèjt.

¹⁴ Dad Jesucrist güünle' gradi, guial rën Dios lèjt abi' xSprijtaman gagnë lèjt zianctzi. Amén.

Gui'ch ni guxhaal San Pabl loj ree bèn Galacia rliladx Jesucrist

Rugajpdioz San Pabl bèn rliladx ree Jesucrist

¹ Naj Pab najn apóstol, per ad bénguidxliujt bacaabee naj ad laa tēet reeman guxhaal naj, najn apóstol por Jesucrist nē por dux Dad ree Dios bèn basban laaman loj guialgūjt. ² Gra ree dux compniar ree bèn za' ree guie con naj ragajpdiozan lējt najdi bèn rliladx Jesucrist niz Galacia. ³ Dux Dad ree Dios nē Dad Jesucrist gūünle' lējt yabe'cdxe tēē reeman luxdoodi. ⁴ Jesucrist gūjt por dux tol ree persi babēēman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. ⁵ Zeel rayalczi yaya'p reeman respejt zianczi. Amén

Achetri diidx ren ni zajc yabēē dunuj ree loj dol

⁶ Dád radxalon guial dád cari cabēēladxidi xtiidx Dios, abi' laaman guial rēn Jesucrist lējt zeel gurejdxaman lējt. Per lējt diidx ren ma ridxga'di ⁷ abi' ni'quid xtiidx Diosan. Diidxliczi yu' ree bèn rēn gagdxadi abi' rēn reeman guxhaal reeman zi'c naj xtiidx Cristo. ⁸ Per bal yu' bèn rulūū lējt diidx ren ree guial loj ree diidx ni ma balūn lējt par gaquidi perdon, laaman ma rayal xcasti Dios, majsi chutēēznin majsi naj gajc o majsi tijb xi anjl Dios. ⁹ Zi'c ma rnin lējt abi' yan ma rninan zatijb: Bal chu rulūū lējt diidx ren ree guial loj xtiidx Cristo ni ma bililadxidi, laaman ma rayal xcasti Dios.

¹⁰ Ad ragultan mod guial yaya'nag zagdxe loj ree bénguidxliuj, rünan naguiejn din yaya'nag zagdxe loj Dios. Din bal gūnan naguiejn yaya'nag zagdxe loj ree bénguidxliuj dxel ad cuzobtran xtiidx Cristo.

Xhienaag gojc zeel gojc Pab apóstol

¹¹ Compniar raliduladx ree Jesucrist, rēnan gagbeedi guial xtiidx Cristo ni ma balūn lējt ad bénguidxliujt gulēēguicj laan. ¹² Abi' ad cwa'tanan ad basid tēētān laan por bénguidxliuj, Jesucrist gajc naj bèn balūū laan naj.

¹³ Lējt ma biguiejn guial chi guyu'n loj xreligion ree bèn Israel, guzunaalan bèn rliladx ree xtiidx Dios din gūnan laa reeman ni mal abi' benan naguiejn din gusa'n ni rliladx reeman. ¹⁴ Abi' naj mazri guzudxi'chan loj religion guin guial loj ree lasa' zidnē'n tijbzi guial benan naguiejn benan gra ree xcostumbr ree dux béngulalan. ¹⁵ Per guial rēn Dios naj, diidx chi gadan guial loj guidxliuj mal gulejman naj. Dxel chi beenman xgab. ¹⁶ Balūūloj xi'nman lon din gatiechan xtiidxza'caman loj ree bèn ad najt bèn Israel. Abi' chi goc zian achut loj bignabdiidxan, ¹⁷ ad watan Jerusalén nignan bèn ma naj ree xi apóstoles Jesús gocli diidx chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

¹⁸ Chi goc choon ijz dxel wan Jerusalén persi benbeen Bēd abi' guzun con laaman chiin gubijdx. ¹⁹ Per achut apóstol ree baguiejan tijbzi Jacob bijch Dad Jesucrist. ²⁰ Gra ni canin lējt naj diidxli abi' Dios ragbeecha guial ad rusquieetan.

²¹ Dxelri wan niz Siria nē niz Silicia. ²² Per ree bèn rliladx Cristo, bèn zojb ree niz Judea ad wayünbeet reeman naj nadxel. ²³ Rguiejnzi reeman rēb ree bejn: "Bèn guzunal dunuj ree yalōj par gūnman dunuj ree ni mal yan ma catie'chaman xtiidx Jesucrist, majsi yalōj beenman naguiejn din yasa'n ree ni raliduladx ree Jesucrist." ²⁴ Abi' rudēē reeman quixtēē loj Dios guial nē naj ma rliladx Cristo.

2

Bachajg Pab bèn naj ree apóstoles

¹ Chi goc chidaj ijz, dxel wan Jerusalén zatijb. Binē'n Bernabé con Tito, ² din Dios na guial gan ni. Abi' Jerusalén guin badxaag dulasa'n tijb luar con ganax ree bèn rniabee loj ree xbejn Cristo persi benē'n laa reeman diidx por xtiidx Jesucrist ni culūn bèn ad najt ree bèn Israel. Benan zian din ad rēntān guial ni ma benan o ni cayūnan gacan dxiin xliā'. ³ Per ni'quī Tito bēn guz ni con naj, majsi najman bēn grieg ad beent reeman laaman naguiejn chu'man sen ni ru ree bèn Israel. ⁴ Din guyu' tio'p choon ree bèn Israel been reeman zi'c rulūū naj reeman dux compniaran persi gojc bachajg reeman dunujn par gula'ch reeman conin ad ragueentan guial ma raliduladxan Jesucrist din gac nabee reeman dunujn yaguieenan zi'c rniabee ley. ⁵ Per ni'czi tibda'n ad batiējbtan nūjn reeman dunujn gan, din ad rayētān cwēēladxidi xtiidxli Jesucrist ni ma zinalidi.

⁶ Abi' ree bèn rniabee loj ree xbejn Jesucrist achetri na reeman lon guial rayal gūnan, majsi chutēēz naj reeman din delant loj Dios tiblojzi naj bejn. ⁷ Luar nīnia reeman xhie mazri nūnan, laa gogbee gajc reeman guial Dios gulej naj din gatiechan xtiidxza'c Jesucrist loj ree bèn ad najt bèn Israel, zi'cgajc gulejman Bēd din guitie'chaman diidxza'c guin ree

loj ree bèn Israel. ⁸ Abi' Dios bèn bacaabee gajc Béd din gacaman apóstol loj ree bèn Israel, laagajcaman bacaabee naj din gacan apóstol loj ree bèn ad najt bèn Israel.

⁹ Zeel Jacob, Béd con Waj bèn rniabee ree mazri loj ree bèn rliiladx Jesucrist, gogbee gajc reeman guial Dios naj bèn banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' tēē reeman conform guial naj con Bernabé yuglūūn bèn ad najt ree bèn Israel, guiaád laa reeman gullūū reeman bèn Israel ree. ¹⁰ Ni gunabzi reeman du lojn din yaguieenan yudar bēnprob ree, abi' laan naj ni ruladxan gūnan.

Gudilē Pab Bēd

¹¹ Per chi we Béd guiedx Antioquía, dxel gudilē'n laaman guial ad cayūjntaman zi'c rayal. ¹² Guial yaloj gudawnēman bèn ad najt ree bèn Israel. Per chi bidxin ree bèn guxhaal Jacob guiedx Antioquía, dxel ad bachajgraman bèn ad najt ree bèn Israel guial bidxebaman xhie niējb ree bèn zinal ley. ¹³ Nē los demazri ree bèn Israel bèn rliiladx ree Jesucrist bèn zobj ree ni nē reeman been zi'c been Béd abi' xt nē Bernabé been zian. ¹⁴ Zeel chi baguian guial ad cayūjnt reeman zi'c rēb loj xtiidzza'c Jesucrist, dxel rēn loj Béd delant loj gra reeman: “Lūj najl bèn Israel abi' ad nabantil zi'c laa reeman, ζchexc zeel rūjnł nagueijn guiban ree bèn ad najt ree bèn Israel zi'c naban ree bèn Israel?”

Guiaartiladx Jesús rabēē bejn loj dol

¹⁵ Dunuj ree nayajc ree bèn Israel diizd chi bayajl ree abi' ad yu't dxej babajn ree sin xley Dios zi'c ree bèn ad najt bèn Israel. ¹⁶ Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliiladxaman Jesucrist. Zeel nē dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

¹⁷ Yan bal cayguieen ree nagueijn yayajc ree naya delant loj Dios, laan rulūū dunuj ree guial nayajcqui ree bēndol, ζwen mazri bēndol cayūjn Cristo dunuj ree ya? ¡Dunuj ree rayagbee guial ad ziantan! ¹⁸ Din bal ma basa'nan xley Moisejs, abi' yaye'can con ley guin zatijb dxel naj gajc cayūn naj bēndol. ¹⁹ Zeel ma basa'nan ley guin din gabajnan par Dios. ²⁰ Abi' rūnan cwent guial nē naj gūjt chi gūt Cristo loj crūjz dxel ad nabantri da xtijban, ma nabannē'n Cristo. Abi' yan zi'c nabanan, ma nabanan zi'c rliiladxan Xi'n Dios, bēn rēn naj gūjt tēēman por naj. ²¹ Abi' ad rūntan tiblax guial rēn Dios dunuj ree, din bal nile' niajc bejn naya niz loj Dios guial rūjn bejn zi'c rniabee xley Moisejs dxel achetri lasajc guial gūjt Cristo.”

3

Guiaartiladx Jesucrist rquied dol

¹ ¡Bēn Galacia, chexc zeel ad radēdguientidi! ζChu bascajy xquiarguejndi? Awa chi balūn lējt, delant loj gradi bagojnan lējt par xhie gūjt Cristo loj crūjz. ² Yan rēnzax gagbeen: ζNabannēdi xSprijt Dios ya guial rūjndi zi'c rniabee xley Moisejs o por guial rliiladxidi xtiidx Jesucrist ni ma bacaagdiajguidi? ³ Xipxi nadidi zeel awa ma nabannēdi xSprijt Dios abi' yan naladxidi guial din yaaaloj gaquidi zi'c rēn Dios rayal chinalidi ley. ⁴ ζWen achet lasajc guialrzagdiaj ni gudēdidi ya, o guzagdiaj xlia'zidi ya? ⁵ Chi runeen Dios xSprijtaman lojdi abi' rūjnman milagr ree delant lojdi, ζwen rūjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

⁶ Gol basaaladx guial Abraham por guial bililadxaman Dios, been Dios laaman cwent zi'c tijb bèn ad wayūjnt dol. ⁷ Zeel gol gogbee guial gra ree bèn rliiladx Dios, laa reeman naj zi'c xi'n Abraham. ⁸ Diizd gocli mal ragbee Dios guial majsi loj ree bèn ad najt bèn Israel yu' ree bèn gūnman cwent zi'c bèn ad wayūjnt dol guial rliiladx reeman laaman. Din tiblajt loj xtiidxaman rēb guial rēbaman loj Abraham: “Gūnle'n gra ree bēnguidxliuj por lūj.” ⁹ Zeel rūjnle' Dios gra ree bèn rliiladx laaman zi'cgajc beenle'man Abraham guial bililadxaman laaman.

¹⁰ Gra ree bèn zinal xley Moisejs yu' casti par laa reeman din loj gajc libr ley guin rēb: “Bēn ad zinalt gūn gra zi'cgajczi rēb loj ley guin, yayalaman casti.” ¹¹ Zeel rayagbee ree ad zile't gac bejn naya loj Dios por guial rūjnman zi'c rniabee ley. Din loj xtiidx Dios rēb: “Bēn rliiladx Dios rajpaman guialnaban delant lojman guial ma nūjnman laaman cwent sin dol.” ¹² Per ley guin ad rniabtan chililadx bejn laan, loj libr ley guin rēb: “Bēn gūn zi'c gajczi rniabee ley, zajpaman guialnaban.”

¹³ Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rēb: “Ma zē maldicion guijc bēn rējt loj crūjz.” ¹⁴ Zian guzajc Jesucrist par chile' gūūnle' Dios bèn ad najt ree bèn Israel, zi'c beenle'man Abraham. Abi' guial rliiladx reeman Jesucrist zeel ma naban reeman con xSprijt Dios zi'c tal rēb Dios diizd guial'xchej.

Xley Moisejs n  xpromejs Dios

¹⁵ Yan compniar raliduladx ree Jesucrist ganin l jt xhienaag r jn ree b nguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa gui'c ree diidx ni ca loj gui'ch guin. ¹⁶ Ziangajc gol gogbee, chi been Dios promejs guial g unle'man Abraham con xdiaaman, ad r bt loj xtiidx Dios guial g unle'man "b n z ed ree" loj xdiaa Abraham. Ad r btan zien bejn, r ban tijbzi bejn, din laaman r b g nle'n "B n z ed" loj xdiaaman. Abi' b n z ed loj xdiaaman laaman naj Cristo. ¹⁷ Abi' ni canin l jt naj guial xley Moisejs bi'tan tajpgayuu gajlbichii i'z despuejs ni been Dios promejs con Abraham, zeel ad zajct guse'n ley guin promejs ni ma been Dios. ¹⁸ Din bal par yaca' ree ni r b Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni r baman por promejs ni beenman lojman.

¹⁹ Wed zanabdiidxidi lon,  par xhieza r jn ley guin sirv? Bad e Dios ley guin din gagbee bejn guial najman b ndol, abi' been ley guin sirv xt dxej ni bi't b n z ed loj xdiaa Abraham zi'c tal been Dios promejs con laaman diidx guia'xchej. B n naj ree xianjl Dios bad e ley guin loj Moisejs, abi' Moisejs bad ed laan loj ree bejn. ²⁰ Per chi been Dios promejs con Abraham achutczu bad ed xtiidxaman, quijb laaman guneen  Abraham.

Xhie sirv r jn ley

²¹ Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalamen ley. Per ad ziantan ²² din loj xtiidx Dios r b guial dol rniabee gra bejn din gra ree b n chililadx Jesucrist tia' reeman gra ni r b Dios.

²³ Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn bal ez ree guidoonloj guialrliladx Jesucrist. ²⁴ Zeel par dunuj ree ley guin naj ni bal u dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din g unman dunuj ree cwent zi'c tijb b n ni ad way jnt dol guial raliduladx ree laaman. ²⁵ Per yan guial ma raliduladx ree Jesucrist ad r jntri nagauejn gul u ley guin dunuj ree.

²⁶ Din guial raliduladx ree Jesucrist ma nayajc ree xi'n Dios. ²⁷ Abi' guial barobnijs ree por Jesucrist zeel ma nayajc ree tijbzi con laaman din ma nabajnn ' reeman. ²⁸ Abi' zi'c b n Israel zi'c b n ad najt b n Israel, zi'c b n naj zi'c b n nado' zi'c b n ad najt zi'c b n nado', zi'c xinguaaw zi'c b ngunaa, par Cristo tiblojzi nayajc ree din ma nayajc ree tijbzi con laaman. ²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni r b Dios loj Abraham diidx gulal.

4

¹ Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpix, zi'cgajc tijb mojs, majsi xieenx naj gra ni rajp xdadix. ² Abi' yu' ree b n rajp laax yu' t e ree b n rniabee laax n  ree ni rajpix, xt chi guidxin dxej ni r b xdadix tia'x ni rayalix. ³ Ziangajc dunuj ree, zi'c tijb xindoo bayajc ree yaloy guial bunaaldxi'ch ree gra ree xcostumbr ree b nguidxliuj. ⁴ Abi' chi bidxin dxej gojc zi'c r b Dios gac, guxhaal xi'nman Jesucrist loj guidxliuj guie, tijb b nguidxliuj gojc xniaaman. Abi' gubajnman zi'c rniabee ley ni basa'n Moisejs duloj ree ⁵ persi bile' bab eman dunuj ree loj ley guin bile' t e nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnn ' reeman, abi' por Sprijt guin raguie'ch ree: "iDux Dad ree Dios!" ⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

Yu' Pab xgab por ree b n rliladx Jesucrist

⁸ Yaloy chi gadidi g unbee quijb Dios, beendi sirv loj ree ni naladxidi naj Dios, per diidxli ad Diost reen. ⁹ Per yan guial ma n nbeedi Dios o guial ma n nbeeman l jt,  chexc zeel r ndi yabi'di g undi graloy ni ad r jnt sirv ni beendi yaloy?  chexc zeel r ndi gaquidi zi'c b n nado' loj ree ni guin ree zatijb? ¹⁰ Abi' yan guial sta zin di cwent xhie dxej o xhie b ew o xhie tiamp o xhie i'z naj ni zobjloy par l jt par g undi xhienin zi'c goc xcostumbridi. ¹¹ D d rdxeban por l jt, doolgui basid xlia'zan l jt.

¹² Zeel rniaaban lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj ¹³ din l jt ragbee guial yaloy chi basidan l jt xtiidxza'c Jesucrist, ragxuun nadxel. ¹⁴ Per majsi zian, gudaandi naj. Ad beentidi naj tiblax ad gul eladx t etidi naj, bidxga'di naj zi'c tijb xianjl Dios o zi'cgajc Jesucrist. ¹⁵ Naj ragbee guial bal zile'n xt guiallojdi zajc cw edi par guneedan lon. Laadx yan,  conzan guial rabaanedi naj? ¹⁶  o al rdxex'chidi naj ya guial rnin ni naj diidxli lojdi?

¹⁷ Rnin lojdi guial ree b n cay jn naguiejn guial guidxga'di xtiidx reeman, ad zagdxe r n reeman l jt, xixgab reeman naj din gusa'ndi ni basidan l jt abi' mazri guidxga'di xtiidx reeman. ¹⁸ Ad ni malt naj guial gui n bejn lasa' bejnman, per par ni zagdxe n  zianczi, ad chi za'tzan con l jt. ¹⁹ Par naj l jt naj zi'c da xi'nan. Abi' cazaagdiajn por l jt zatijb, zi'c rzagdiaj tijb b ngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. ²⁰  Bal zianclaa za'n con l jt din ganen n quijb l jt, per yan ad ragbeetan xhienaag g nn n l jt!

Agar con Sara

²¹ Per gol guna, l jt b n r n ree guiban zi'c rniabee ley.  Wen id wayignia'di ni r b loj ley ya? ²² Loj ley r b guial guyu tio'p xi'n Abraham: Guyu xi'nman con tijb b ngunaa brii laj Agar b n goc xmojsaman, guyu t   stijb xi'nman con quijb xb ngunaa b n brii laj Sara. ²³ Xi'n Abraham con b ngunaa goc xmojsaman, guyux guial bagaal Abraham laaman. Per xi'nman xin guyu con quijb xb ngunaa guyux ad por guial bagaaltzi Abraham xb ngunaa, n  par goc cumplid promejs ni been Dios lojman. ²⁴ Yan, Sara n  Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni bad  d Dios loj Moisejs ruguia' Sina , abi' b n zinal ree ley guin naj reeman zi'c b n nado' loj ley guin zi'c goc Agar loj Abraham. ²⁵ L jt ragbee guial niz Arabia naj guia' Sina , abi' ree b n niz ni rn ee reeman guia' guin Agar. Per yan Jerusal n naj zi'c guia' guin, din gra ree b n z  d niz Jerusal n, b n zinal ree ley, laa reeman naj zi'c b n nado' loj ley. ²⁶ Per dunuj ree du ladx ree naj Jerusal n ni yu' xanyabaa abi' Jerusal n guin ad najtan zi'c ni nado' loj ley guin zi'c ad gojct Sara loj Abraham. ²⁷ Loj xtiidx Dios r b:

Babaa b ngunaa ni ad zajct chu' xi'n.

Babaa da't guial ad n nbeetil guialrzagdiaj

ni rd d b ngunaa ni rajl xi'n.

Din b n ad rut xi'n, mazri zien xi'nman chu'

guial loj b n ru xi'n.

²⁸ Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. ²⁹ Abi' l n ree dxejzii, xi'n Agar baze'x xi'n quijb xb ngunaa Abraham, ziangajc yan b n zinal ree ley ruze' reeman dunuj ree nabajnn ' ree xSprijt Dios, guial ma nayajc ree xi'n Dios, ³⁰ Per,  xhie r b loj xtiidx Dios? R ban: "Balaagdx xmojsil con guidib xi'nman, din ad rayalt gac tio'p lala' ni rayal tia' xi'n quijb xb ngunaa." ³¹ Zeel compniar raliduladx ree Jesucrist, dunuj ree ad nayajct ree zi'c xi'n b n naj zi'c b n nado' guin, nayajc ree zi'c xi'n quijb xb ngunaa Abraham guial ad rniabeet ley dunuj ree.

5

Gol guzujdxi'ch loj ni rliladxidi xtiidx Dios

¹ Cristo naj b n bab   dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c b n nado' guial g undi zi'c rniabee ley.

² Naj Pab rnnin l jt. Bal rudi sen zi'c rniabee ley, achet lasajc guial rliladxidi Jesucrist.

³ Abi' rnnin l jt zatijb: Chut  z b n ru sen guin rayal g unman zi'c tal rniabee ley. ⁴ L jt guial r jndi xgab guial g undi zi'c rniabee ley ma najdi naya delant loj Dios, laan r n gui b guial ad najtridi xbejn Cristo ad yu'guijc t  tridi guial r n Dios l jt. ⁵ Per dunuj ree por xSprijt Dios n  guial raliduladx ree Jesucrist nadxu'guijc ree guial yadxin ree naya delant loj Dios. ⁶ Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxe yay n dulasa' ree. ⁷ L jt ma z di zagdxe.  Chu na lojdi guial ad zidxga'tidi ni naj diidxli?

⁸ Din xgab guin ad z  d tan por Dios, b n gule l jt. ⁹ Zeel gol gojp cudad "din con ta'nnijt zajc gusquiee reeman gradi." ¹⁰ Per naj ra'pan Cristo confians guial ad zusa'ntidi ni basidan l jt. Abi' Dios gud  d casti b n cusquiee ree l jt, majsi chut  znin. ¹¹ Bal r n guial r jn naguiejn chu' ree bejn sen, ad zazonaltri ree b n Israel naj. Ziangajc bal gui n guial rayal chu' ree bejn sen, r n gui ban guial achet lasajc guial g jt Cristo. ¹² Balzianclaa gra ree b n ruslen l jt guial rayal chu'di sen,  mejorli gut  g laagajc reeman tiblayaa!

¹³ Din l jt ma gulaadi loj ley, per ad guial ad rniabeetri ley l jt din g undi ni r ntzidi, rayal gui ndi g un t   yudar lasa'di. ¹⁴ Din con tijbzi mandamient ma been bejn gra zi'c rniabee xley Dios. Mandamient guin r b: "Guy n ben ren zi'c r n l j gajc." ¹⁵ Per bal rdxe'ch lasa'di abi' rdilidi, gol gojp cudad chit   zianzi la' lasa'di.

Guialnaban ni rune xSprijt Dios

¹⁶ Zeel rnnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. ¹⁷ Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi

naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajt guiban bejn zi'ctzi rënman. ¹⁸ Per bal xSprijt Dios naj bèn rniabee lëjt dxel ad rniabeetri ley lëjt. ¹⁹ Yan laa rguien gajc con ree nin zëéd con xixgabzi ree bejn: Guialrzunë xinguaaaw ren o bëngunaa ren, guialrÿjn bejn nidxuudx, guialrajp bejn gadxagayaa vijs, ²⁰ guial rën bejn graløj ni naladxaman naj Dios, guial rÿjn bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, ²¹ guialrdëdloj, guialrugÿjt bejn, guialrzÿdx, guialnala në xhietëez ni mal lasa' ree ni guin. Rugojnan lëjt zi'cgajc ma rnin lojdi yaloj, bèn cayÿjn ree lasa' ree ni guin ad zayalt reeman lod rniabee Dios.

²² Per ni zëéd por xSprijt Dios naj, guialrën lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial rÿjn cumplid xtiidx, ²³ guial rÿjn naya, guialrniabee bejn xixgab mal gajcaman. Abi' ad yu't ley ni rudxoon guial gÿün bejn ni guin ree. ²⁴ Abi' ree bën ma naj xbejn Cristo ma basa'n reeman gra dol, në gra ree ni mal ni rën reeman gÿün reeman din ma gÿjt Cristo por gra dol. ²⁵ Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

²⁶ Ad yales dux valor gajc ree, ad yache'ch du lasa' ree, ad yadëdloj du lasa' ree.

6

Yaguieen du lasa' ree yudar

¹ Compniar raliduladx ree Jesucrist, rnin lëjt, bal chu xcompniaridi rÿjn dol gan, lëjt guial ma rajquidi mazri xtiidx Dios gol guneenëman con ganax ree diidxza'c, din rayal cu'guijquidi guial nëgajc lëjt zajc gÿün dol lëjt gan. ² Gol gognë lasa'di loj xhietëez guialzi ni rdëdidi, zian ma cayÿjndi ni rniabee Cristo gÿündi.

³ Bal yu' bèn ni naladx guial rajcaman gra abi' achetczy rajcaman, dxel laagajcaman cusquiee laaman. ⁴ Tijbgaj bejn rayal gÿün xgab bal nabancaman xnejz. Abi' bal nabanman xnejz, tijbzi laaman rayal yabaa luar gÿünman xgab guial nabanman zagdxe loj gra ree bejn. ⁵ Din tijbgaj dunuj ree rayal yaya'p ree xhienaag yabajn ree.

⁶ Chutëez bèn cusiid xtiidx Dios, rayal gÿünman yudar bèn culüü laaman con ni ryaadxaman.

⁷ Ad gusquiee lëjt gajc, din achut zajc guze' Dios. Ni rxÿbin bejn laagajcan yato'paman. ⁸ Bal nabanman zi'ctzi naj xixgabaman zadxin dxej yayalaman casti. Per bèn naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. ⁹ Ad rayalt yadxag ree guial yaguieen ree ni zagdxe, din bal id zadxag ree chi guidxin dxej yaca' ree ni yaya' ree. ¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree bèn rliladx ree Jesucrist.

Xconsejw Pab

¹¹ Gol baguiaa xi narooob ree lejtr ni cucan par lëjt con quijb yan. ¹² Bën cayÿjn ree naguiejn chu'di sen, rÿjn reeman zian par yaya'n reeman zagdxe loj ree bejn luar sagdiaj reeman guial rliladx reeman Jesucrist. ¹³ Per ni'qui ree bën yu' sen guin ad rÿjnt reeman gra zi'c rëb ley guin. Rënzi reeman chu'di sen guin din gÿün reeman nabë guial ma been reeman gan yu'di sen guin. ¹⁴ Per naj achet por ni gÿnan nabë, tijbzi por guialgÿjt Dad Jesucrist. Abi' guial gÿjtaman loj crÿjz ma basa'nan gra ree ni mal yu' loj guidxliuj guie abi' ma gÿjtan par ree ni mal guin. ¹⁵ Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. ¹⁶ Abi' ree bën ma zinal xnejz Cristo, Dios yaya laa reeman yabe'cdxe tëëman luxdoo reeman në gra ree bën diidxli naj xbejn Dios.

¹⁷ Diïzd yan ad rëntran chu guche'ch naj. Din dib ni ca ree ladan laa reen rulüü guial najn xiapöstol Jesucrist.

¹⁸ Compniar raliduladx ree Jesucrist, dux Dad ree Jesucrist gÿünle' gradi. Amén.

Gui'ch guxhaal San Pabl loj ree b n  feso rliadx Jesucrist

Rugajpdioz San Pabl b n  feso ree

¹ Naj Pab, najn tijb xi ap stol Jesucrist por xgualrniabee Dios. Cudan gui'ch guie par l jt guial diidxli zinalidi xtiidx Jesucrist, l jt guial ma najdi xbejn Dios luguiedx  feso. ² Dux Dad ree Dios n  Dad Jesucrist g  nle' l jt yabe'cdxe t e reeman luxdoodi.

Rijnle' Dios b n rliadx ree Jesucrist

³ Quixt e Dios, xdad Dad Jesucrist, d d benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloj guialnaza'c din gac yunaal ree xtiidxaman. ⁴ Laaman bacaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman. ⁵ Abi' guial r nman dunuj ree, diidz guia'xchej beenman guial yayajc ree xi'nman por Jesucrist zi'c beenman xgab gac. ⁶ Zeel ad racw e t raza't ree Dios zagdxe guial d d benza'c najman, ma beenle'man dunuj ree por Xi'nman Jesucrist, b n r nman, ⁷ b n ma gudijx por dunuj ree chi guxie' xrejman, abi' ma gojc perdon dux tol ree guial d d r n Dios dunuj ree. ⁸ Zeel d d zro' gualrajc n  gualrignia' ma bazaladxaman duloj ree, ⁹ abi' ma bal  man duloj ree xhienaag naj xixgabaman diidz gocli, zi'cgajczi ma beenman xgab gac. ¹⁰ Gui ad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa n  loj guidxliuj.

¹¹ N t e guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diidz guia'xchej, din laaman r jn gra zi'c r nman gac. ¹² Abi' laaman ma been zian, din dunuj ree nayajc ree b n yaloj bililadx Jesucrist, yayajc ree b n guza't laaman zagdxe por xgualrniabeeman. ¹³ N gajc l jt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c r b Dios guial guneeman xSprijtaman, dxel yan guial ma nabann di laaman, laaman naj zi'c tijb sen ni ruli  guial ma najdi par Dios. ¹⁴ Guial ma nabann  xSprijt Dios dunuj ree, yaca' ree ni r b Dios guneeman chi ma bara xbejnman za' xanyabaa, din chit e yacw e z yaza't reeman zagdxe por xgualrniabeeman.

Rniab Pab quiarguejn loj Dios

¹⁵ Abi' guial ragbeen rliadxidi Dad Jes s r n t edi los demazri ree b n naj xbejn Dios, ¹⁶ zeel ad racw e t rud n quixt e loj Dios por l jt, beegaj rbedx rniabaa laaman. ¹⁷ Laaman naj Dios rniabee diidz xanyabaa, xDad Dad Jesucrist. Rniabaa lojman yazaladxaman quiarguejn lojdi din chignia'di ni guli man lojdi gusnuu t e g  nbeedi laaman mazri. ¹⁸ Rniabaa lojman din guixhialaman xquiarguejndi din chignia'di xhie r n gui b ni rb zidi diidz chi bacaabeeman l jt, chignia' t edi guial ni za'cdxoon narob t e naj ni nagu'chaaw Dios par ree b n naj xbejnman. ¹⁹ Rniab t en lojman guial gagbeedi guial d d narob naj xgualrniabeeman ni cayagn  dunuj ree raliduladx reeman. Laagajc gualrniabee narob guin bal   Dios ²⁰ chi basbanman Jesucrist abi' gule'caman laaman xladbeeman xanyabaa ²¹ lod bad eman gualrniabee lojman ni mazri lasajc guial loj gra ree gualrniabee, n  loj gra gualguxtis n  loj gra gobiarn. Abi' mazri lasajc gualrniabee guin guial loj gra ree gualrniabee yu', n  ni qui chu'ri ree loj guidxliuj guie. ²² Dxel basa'n Dios gran loj Jesucrist, bacaabeeman laaman din nabeeman gra ree b n rliadx laaman. ²³ Gui ad ree b n rliadx laaman, guidiblagaa nabann man laa reeman abi' bant e z guin za'man din laaman guidiblagaa rniabee.

2

Nayajc ree perdon guial r n Dios dunuj ree

¹ Gocli gojquidi zi'c beng t loj Dios por ree ni mal n  por ree dol ² ni beendi guial binalidi nejz mal been t edi zi'ctzi r n xindxab g  ndi, sprijtman ni nabann  gajc ree b n ad ruzoobt xtiidx Dios. ³ Du gra ree ziangajc babajn ree guia'xchej. Baguieen ree zi'ctzi bay n ree, zi'ctzi goc dux xgab ree, abi' zi'cgajc rayal ree b n ad ruzoobt xtiidx Dios casti, ziangajc nayal ree casti. ⁴ Per guial raya da't Dios dunuj ree r n t eman dunuj ree, ⁵ zeel majsi bayajc ree zi'c beng t lojman por dux tol ree, per yan ma raya'p ree gualnaban lojman con Jesucrist. Guial tant benza'c naj Dios, zeel nayajc ree perdon. ⁶ Chi basbanman Jesucrist n gajc dunuj ree basbanman abi' zi'c ruli  ma nadxu'n ' ree Jesucrist xanyabaa. ⁷ Dios been zian din dxej z ed ree guiguien guial d d r nman dunuj ree, abi' benza'c t e najman con dunuj ree por Jesucrist. ⁸ Guial naj Dios benza'c, zeel ma nayajc ree perdon, ad guial

nayajct ree benza'c lojman. Por guial rliadax z  d xperdon Dios. ⁹ Ni'quid por ni zagdxe ni ma baguient ree z  d perdon guin chit   chu guilies xvalor gajc. ¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yaguieen ree ni zagdxe zi'c beenman xgab yaguieen ree diizd gocli.

Tijbzi nayajc ree por Jesucrist

¹¹ Zeel l jt b n ad najt ree b n Israel, gol basaaladax xhienaag guzajquidi yaloj. B n Israel ree gul  laj l jt b n ad yu't ree sen guial yu' reeman sen zi'c rniabee ley. ¹² Tiamp zii ad beenbeetidi Jesucrist, ad gojtidi cwent loj ree b n Israel ad gojc t  tidi cwent guial rayalidi ni r b Dios gud  man loj ree xbejnman. Contzi gubajndi achet gul jzidi ad gubajnn  t  tidi Dios. ¹³ Per yan guial ma rliadaxidi Jesucrist, l jt guial guzujdi zijt loj Dios, por xrejn Jesucrist ma bibiguidi lojman. ¹⁴ Din Jesucrist babe'cdxe du luxdoo ree. Laaman bis d gualrdxe'ch ni rudxoon gac ree b n Israel tijbzi con ree b n ad najt b n Israel. ¹⁵ Abi' por xgualg jt Jesucrist gulox gra ree costumbr rniabee xley ree b n Israel gi n ree bejn, laaman been persi gojc ree b n Israel con ree b n ad najt b n Israel zi'c tijbzi guiedx c b guial ma nayajc ree tijbzi con laaman. Zian babe'cdxeman luxdoo ree bejn. ¹⁶ Din por xgualg jt Jesucrist loj cr jz ma gulox gualrdxe'ch lasa' ree b n Israel con ree b n ad najt b n Israel, abi' ma nadxu'n ' ree Dios zagdxe guial ma nayajc ree tijbzi por Jesucrist. ¹⁷ Abi' laaman bidgagojn dugra ree, zi'c ree b n Israel zi'c ree b n ad najt b n Israel xhienaag yadxu'n ' ree Dios zagdxe. ¹⁸ Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnn ' ree. ¹⁹ Zeel ad najtridi zi'c b n z  d lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. ²⁰ L jt naj zi'c xze' tijb yu ni cayajc, gui ad ree xi ap stoles Jes s con ree b n bad   xtiidx Dios loj ree bejn, naj reeman zi'c xcimiant yu guin, gui ad Jesucrist naj zi'c guiaj zojbloj ni cayajcn  yu guin. ²¹ Abi' guial yagaj guzuloy cayajc yu guin, dxel cay 'pzi cay 'p ze' guin ni cayguie'ch ree najdi din yayajc ree tijbzi xyadoo Dios con Jesucrist. ²² N  yan guial ma najdi tijbzi con Jesucrist ma naj t  di tijbzi con los demazri compniar raliduladax reeman din yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxa'c Jesucrist

¹ Por zianan yu'n ladxguuib, naj Pab guial cay nan sirv loj Jesucrist din g nan yudar l jt b n ad najt ree b n Israel. ² L jt ragbee guial naj Dios benza'c zeel baneman dxiin guin lon din g nan l jt yudar chignia'di xtiidxaman. ³ Abi' laaman bal   naj xhienaag naj xixgabaman diizd gual, zi'cgajczi ma rnin lojdi diizd guia'xchej. ⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist. ⁵ Tiamp gual achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma bal  man laan loj ree xi ap stoles Jes s n  loj ree b n bad   xtiidx Dios loj ree bejn. ⁶ Abi' ni goc zi'c tijb ni naguie'ch par ree bejn naj guial por xtiidxa'c Jesucrist, n  ree b n ad najt b n Israel ma rayal ni gud   Dios loj ree b n Israel guial ma naj reeman tijbzi, dxel ziangajc ma nayab reeman loj promeys ni been Dios por Jesucrist.

⁷ Naj cugojn xtiidxa'c Jesucrist loj ree bejn, ad guial rayalt g nan dxiin guin. Guial naj Dios benza'c, zeel bazaladaxaman gualrniabee lon par g nan laaman sirv. ⁸ Naj naj b n bigra b n lasajc ta'nz loj gra ree xbejn Dios, per guial naj Dios benza'c, bacaabeeman naj din g n diidx loj ree b n ad najt b n Israel xcwent xgualnaza'c narooob Jesucrist, ⁹ n  par gugojn zagdxe gra reeman xhienaag naj xixgab Dios b n been gra, xgab ni ad bal   gajtaman loj ree bejn. ¹⁰ Din yan zi'c naj ree b n rliadax Jesucrist, gagbee gra ree b n rajp gualrniabee xanyabaa guial gra lojczy gualrajc rajp Dios. ¹¹ Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. ¹² N  guial raliduladax ree Jesucrist ma raya'p ree nejz par loj Dios, abi' con confians ma zajc yubiig ree lojman. ¹³ Zeel rnin lojdi ad runayadi por ree gualzi ni cad  dan por l jt, din zagdxen par l jt.

D d r n Jesucrist dunuj ree

¹⁴ Zeel ruzuxiban loj dux Dad ree Dios; ¹⁵ laaman naj Dad loj gra ni yu' loj guidxliuj n  xanyabaa. ¹⁶ Abi' rniabaan lojman por xgualrniabee narooobaman yazaladaxaman l jt gojl n  gualrniabee por xSprijtaman din yayu luxdoodi, ¹⁷ guibann  t  di Jesucrist guial rliadaxidi laaman. Din zian zi'c diidxli zinalidi zi'c r n Jesucrist dunuj ree, ¹⁸ dxel ma zajc gagbeedi con los demazri ree compniar raliduladax ree laaman guial gud  laj abi' xt banczi naaloj zro' r nman dunuj ree. ¹⁹ Zeel rniabaan loj Dios gagbeedi plact r nman dunuj ree, guial mazri zro' najn guial loj ni raguieen ree xgab, abi' zian guidiblagaa guibann di Dios.

²⁰ Laaman, gual rajpaman gualrniabee par gūnman mazri gual loj ni raguienee ree xgab o mazri gual loj ni ranaab ree lojman por xSprijtaman bèn nabajnné' ree, ²¹ abi' rayal yaza't reeman zagdxe gra dxej nè gra tiamp por Jesucrist, dunuj ree gual raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguuib gual cayūnan sirv Jesucrist, rniabaan lojdi zi'c ma najdi xbejn Dios, gol gubajn zi'c rayal guiban ree bèn ma naj ree xbejnman. ² Gol gojc benza'c nè bèn naxanladx, gol gojp pacens gol gudaan tēē lasa'di gual rēn lasa'di. ³ Gol been naguiējn gusnuu gaquidi tijbzi con xyudar xSprijt Dios bèn rabe'cdxe du luxdoo ree par yayajc ree tijbzi. ⁴ Dunuj ree nayajc zi'c tijbzi cuerp, abi' dugra ree nabajnné' xSprijt Dios, abi' zi'c ma nayajc ree xbejn Dios, ziangajc ralējz ree ni guneeman. ⁵ Tijbzi Dad, tijbzi gualrliladx nè tijbzi gualrriobnijs raya'p ree. ⁶ Din tijbzi Dios yu', bèn naj Dad par dugra ree, rniabeeman dugra ree, nabannēman dugra ree rūjn tēēman ujs dugra ree.

⁷ Per tijb gaj dunuj ree ma naj ni yaguienee ree, zi'ctzi ni banee Jesucrist yaguienee ree. ⁸ Zianan zeel rēb loj xtiidx Dios:

Chi bayē'paman xanyabaa,

beenman gan loj gra gualrniabee,

abi' badēēdaman loj ree bejn ni rayal gūn reeman.

⁹ Abi', xhie rēn guiēb lod rēb "bayē'paman"? Rēn guiēban bi'taman loj guidxliuj. ¹⁰ Guiáad Jesucrist bèn bi't loj guidxliuj, laagajcaman naj bèn bayē'p xanyabaa persi canabeeman guidib guidxliuj nè xanyabaa. ¹¹ Abi' ma badēēman loj ree bejn ni rayal gūn reeman, yu' reeman bayal gac apóstoles, yu'za reeman bayal gac bèn rudēē xtiidx Dios loj ree bejn, yu' reeman bayal gaitie'ch xtiidxaman, yu' tēē reeman bayal gudēē consejw guluū tēē reeman bèn rililadx ree laaman. ¹² Zian bacaaabee Jesucrist bejn ree din gusiid los demazri ree bèn rililadx laaman, gac tēē gūn reeman laaman sirv, gusnuu tēē gūnbee reeman laaman, ¹³ xt yayaaloy yaliduladx ree yaguienee tēē ree Xi'n Dios guidiblagaa, din yayaaloy yayignia' ree xhienaag rayal yunaal ree Jesucrist. ¹⁴ Dxel ad zayajctri ree zi'c ree xindoo rililadx xhietēēznin, ad zayajctri ree zi'c tijb ni rnē bi niz ni niz guie por graloj ni rū ree bèn raguiil mod gusquiee ree bejn, ¹⁵ rayal yayēn du lasa' ree, yadū ree diidx yunaal tēē ree ni diidxli din gusnuu yayignia' ree yaguienee tēē ree zi'c rēn Jesucrist bèn rniabee dunuj ree. ¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguienee ree par yaguienee du lasa' ree yudar din gusnuu yayēn dulasa' ree por Jesucrist.

Gualnaban cūb con Jesucrist

¹⁷ Yan por Jesucrist rnin lējt: Ad bal guibanridi zi'c naban ree ben ad nūnbeet Dios, din laa reeman naban zi'ctzi naj xixgab reeman, ¹⁸ nacay xquiarguiējn reeman, ad rajpt reeman gualnaban rēn Dios gap reeman, gual ad rignia't reeman ache tēēt naladx reeman. ¹⁹ Ma been luxdoo reeman gojl, ma gulēēladx laagajc reeman abi' cusnuu cayūjn reeman graloj nidxuudx. ²⁰ Per lējt ad beenbeetidi Jesucrist din guibandi zian, ²¹ bal walidi ma biguiējndi xcwentaman bal wali tēēdi ma basiididi diidxli zēēd por laaman. ²² Gol basa'n zi'c gubandi yaloy, din ruxhiinzi zi'c gubandi yaloy con xgabmal ni basquiee lējt gual beendi zi'ctzi guyēndi. ²³ Gol been naguiējn guidxaa xixgabidi guidiblagaa ²⁴ din gaquidi zi'c tijb bencūb been Dios zi'c rēnman, con tijb gualnaban naya nè zi'c rayal por xdiidxliman ni ma biguiējndi. ²⁵ Zeel ad bal rnieeridi diidx rusquiee. Gol guneē diidxli con xcompniaridi din tijbzi nayajc dugra ree con Jesucrist. ²⁶ Bal rdxe'chidi, ad gūndi dol. Ad gudxe' gualrdxe'ch guin luxdoodi dēchej, ²⁷ chitēē tiēbidi gūn xindxax lējt gan. ²⁸ Bèn rban, rayal gucwēēz cwanman abi' gūnman dxiin, din con dxiin zagdxe gūnman dxel ma rajpaman con xhie gūnman yudar bèn ryaadx ree xhienin. ²⁹ Ad rniee tēēdi diidxguijdx, gol guneē ganax diidxzagdxe ni gūn yudar chignia' ree ben ren bèn gucaagdiaj ree laan din gūnan laa reeman sirv. ³⁰ Ad rgu'nayadi xSprijt Dios, bèn ma nabannēdi zi'c tijb sen gual ma najdi xbejnman par dxej ni guidxindi lojman. ³¹ Gol basa'n tiblad gra gualralenya', gualrdxe'ch, gualralen lasa', gualrguidxa'nē lasa', gualrniee diidxguijdx loj lasa' nè graloj ni mal. ³² Gol gojc benza'c, gol baya lasa'di gol been tēē lasa'di perdon zi'c been Dios lējt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bèn rënman, gol been naguiejn güündi zi'c laaman. ² Gol gubajn zagdx, gol guyèn lasa'di zi'c guyèn Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

³ Yan lëjt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad rüjnt sirv ad rzëëbladx tëëdi gra par lëjt. ⁴ Ad rnieedi diidxgüjdx ree, diidxtont ree, diidx ni ad rayalt guinieedi din ad ni zagdxet reen. Mazri zagdx gol badëë quixtëë loj Dios. ⁵ Din lëjt ma ragbee guial ree bèn naban nadxuudx nê ree bèn rüjn ni ad rüjnt sirv, nê ree bèn rzëëbladx gap gra (mazri yu'guij reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios. ⁶ Gol gojp cudad achu gusquiee lëjt con ree diidx ad rüjnt wen, din por ree ni guin zëëd xcasti Dios par ree bèn ad ruzoobt diidx. ⁷ Zeel ad güündi zi'c rüjn reeman.

⁸ Gocli gubajndi zi'c tijb bèn nayaaw xquiarguejn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bèn ma zinal biani guin, ⁹ din guial chinal bejn biani guin ma zile' güünman ni zagdx ree bèn ni naj diidxli. ¹⁰ Gol been naguiejn gol been zi'c ruladx Dios. ¹¹ Ad nê lëjt güün ni ad rüjnt ree sirv ni rüjn ree bèn nayaaw xquiarguejn, gol guneeñ reeman din gagbee reeman ni rüjn reeman. ¹² Din xt ratu bejn güman ni rüjn reeman ralan. ¹³ Per por xtiidx Jesucrist laa gagbee gajc reeman xhienin rüjn reeman. ¹⁴ Din zianan zeel rëb loj xtiidx Dios:

Batie'ch xbacaaalil, lüj guial zinalil nejz mal.

Bariica loj dol din gusni Jesucrist xquiarguejnl.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bèn yu' xquiarguejn. ¹⁶ Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn. ¹⁷ Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi. ¹⁸ Ad südxidi, din gualrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa. ¹⁹ Chi rünë lasa'di diidx, gol baza't ni ca loj ree salmos, loj ree himno, nê gra loj ree cant ni naj par Dios. Abi' guidib luxdoodi gol bijl gol baza't tëë Dios zagdx. ²⁰ Abi' guixie guixie gol badëëd quixtëë loj dux Dad ree Dios por Dad Jesucrist por gra ni rüjnman par dunuj ree.

Zi'c rayal guibannë lasa' ree bèn rliadx Jesucrist

²¹ Gol bazoob xtiidx lasa'di por respekt ni rajpidi Jesucrist. ²² Nê lëjt bëngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. ²³ Din xinguaaaw ree rniabee lacheel zi'c rniabee Jesucrist bèn rliadx ree laaman, bèn babëë laa reeman loj dol abi' naj reeman xbejnman. ²⁴ Abi' zi'c ruzoob ree bèn rliadx Jesucrist xtiidxaman, ziangajc ree bëngunaa rayal guzoob xtiidx lacheel reeman. ²⁵ Nêgajc lëjt xinguaaaw nuxhliaa ree, gol guyèn lacheelidi zi'c rën Jesucrist bèn rliadx ree laaman, abi' xt güjtaman por laa reeman ²⁶ persi bisüdaman xtol reeman, basiaman laa reeman por xtiidxaman nê por gualrirobnijs, ²⁷ din guidxin reeman lojman nix da't nê ni'qui tijb ni mal, sin falt o dol ren ree, guidxin reeman lojman nayadxuj sin dol. ²⁸ Yan ziangajc ree xinguaaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rën. ²⁹ Din ni'qui tijb bejn ad rdxe'cht laagajcaman, ruyaanli laagajcaman rniajchi' tëë laagajcaman zi'c rüjnnë Jesucrist dunuj ree nayajc ree bèn rliadx laaman ³⁰ guial nayajc ree tijbzi con laaman. ³¹ Zeel zi'c rëb loj xtiidx Dios: “Xinguaaaw gusa'n xdad xnäax din gaquix tijbzi con lacheelix abi' grop reex ma naj tijbzi bejn.” ³² Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. ³³ Yan, xinguaaaw ree, gol guyèn lacheelidi zi'c rën lëjt gajc. Güüäd lëjt bëngunaa, gol gojp respekt lacheelidi.

6

¹ Nê lëjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi. ² Abi' mandamient yalaj ni rëb guial yu' ni yaca' ree bal yaguieen ree ni rëb: “Gojp respekt xdad xnäaal, ³ din guibanl zagdx guiban tëël xchej loj guidxliuj guie.” ⁴ Nêgajc lëjt dad na ad gusagdiaj xi'ndi chitëë guidxe'ch reex por zian. Mejrli gol basni's reex zagdx, gol guneeñ reex gol balüü tëë reex zi'c rën Dios. ⁵ Nê lëjt bèn rüjn ree xchiin bejn, gol bazoob xtiidx bèn naj xpatrondi loj guidxliuj guie. Con guidib luxdoodi gol gojp respekt gol bazoob tëë xtiidx reeman, gol gunaladx xchiin Jesucristan cayüjndi. ⁶ Gol been reeman sirv ad chi ruguaatzi reeman lëjt par yaya'ndi zagdx loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi. ⁷ Gol been dxiiin con gan, gol gunaladx xchiin Jesucrist cayüjndi, ad xchiint bënguidxliuj. ⁸ Din lëjt ma ragbee guial tijbgaj bejn majsi bèn rüjn xchiin bejn o bèn ad rüjnt xchiin bejn, per gudëë Jesucrist ni rayalaman zi'ctzi naj ni zagdx beenman. ⁹ Nêgajc lëjt bèn naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bèn rniabee laa reeman nê lëjt yu'man xanyabaa, abi' ad rbetaman loj bejn.

Gol guzudxi'ch loj ni rliladxidi

¹⁰ Rni tëën lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee naroobaman. ¹¹ Gol gojp lëjt gajc con xguialrniabee Dios din sudxi'chidi chitëë güün xindxab lëjt gan con ree ni rusquiee. ¹² Din ad cayguieent ree naguiejn yaguieen ree gan loj tijb ni naj bëël në dxijt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie. ¹³ Zeel gol gojp lëjt gajc con xguialrniabee Dios din chile' taandi xhietëëz loj guialzi gui't sudxi'ch tëëdi loj xhietëëz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tëë zi'c rayal guibandi. ¹⁵ Gol guzusun par guinieedi xtiidxza'c Jesucrist din por laan yadxu' ree zagdx con Dios. ¹⁶ Gol badxe'guijc tëë guial guialrliladx ni rajpidi naj ni ragnë lëjt loj gra ni zëëd por xindxab. ¹⁷ Në ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi. ¹⁸ Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusun par cwedx guiniabidi laaman, ad gucheeladxidi, gol gurejdx tëëman por gra ree xbejnman. ¹⁹ Gol gurejdx gunab tëëman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon. ²⁰ Dios bacaabee naj par ganen xtiidxza'caman, abi' por zian yu'n ladxguuib. Per gol gurejdx gunab Dios chitëë gadxeban güün xtiidxaman zi'c rayal güünan.

Diidx bigra ca ree loj gui'ch guie

²¹ Tiquico, tijb du lasa' ree bèn rayën da't ree, abi' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan, ²² din par zianczi caxhalan laaman din gugojnman lëjt xhienaag nadxu'n niz guie yagu' tëëman luxdoodi. ²³ Rniaaban loj Dios guial gra ree bèn rliladx Jesucrist, cwe'cdxeman luxdoo reeman guiën tëë lasa' reeman, chililadx tëë reeman laaman në Dad Jesucrist, ²⁴ güünle' tëëman gra ree bèn wali rën Dad Jesucrist.

Gui'ch guxhaal San Pabl loj ree bèn Filipos rlladx Jesucrist

Rugajpdioz Pab bèn rlladx ree Jesucrist

¹ Naj Pab con Timoteo, raguieenan sirv loj Jesucrist. Caycaan gui'ch guie par lèjt najdi bèn rlladx Jesucrist luguie dx Filpos, nè par ree bèn rniabee lojdi rulüü tëë reeman xtiidx Dios nè ree bèn rünj yudar bèn rlladx ree Jesucrist. ² Dux Dad ree Dios nè Dad Jesucrist güünle' lèjt, yabe'cdxe tëë reeman lèjt.

Rbejdx rniab Pab Dios por ree bèn rlladx Jesucrist

³ Zianczi chi rusaaladxan lèjt, rudèn quixtëë loj da Dadan Dios. ⁴ Abi' zianczi chi rbedx rniaban laaman dád nix ru luxdon, rbedx rniaban laaman por gradi. ⁵ Din diizd dxej ni guzuloj rlladxidi Jesucrist dxel guzuloj raguieen ree tijbi xgab par guire'ch xtiidxaman xt yan. ⁶ Ragbee chaawan guial diizd chi guzuloj rlladxidi xtiidx Dios, laaman cusnuu cayagnë lèjt din gaquidi zi'c rayal xt dxej gui't Jesucrist stijb. ⁷ Najczi guial günan xgab zian por gradi, din rusaaladxan lèjt, zi'c chi yu'n ladxguib ziangajc chi culün conin naj diidxli xcwent Dios din tibloj cayünle'man dunuj ree. ⁸ Dios ragbee guial dád rusaaladxan lèjt guial rënan lèjt zi'cgajczi rën Jesucrist lèjt. ⁹ Rniab tëën lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güündi, ¹⁰ din chile' cwedi ni naj mazri zagdxe. Abi' zian guibandi naya sin dol niz loj Dios, chitëë xhie naman contr lèjt dxej ni gui't Dad Jesucrist stijb. ¹¹ Abi' por laaman zajc guibandi zi'c rën Dios zi'c balüü Jesucrist lèjt din gap ree bejn Dios mazri respejt guilies tëë reeman xvaloraman.

Yabajn ree par Cristo

¹² Compniar raliduladx ree Jesucrist, rënan gagbeedi guial graczi ni guza'can cayün reen yudar pensar care'ch xtiidxza'c Jesucrist. ¹³ Abi' yan, gra ree bèn yu' lën palas nè gra ree bèn zojb niz guie ragbee reeman guial yu'n ladxguib por guial najn xbejn Jesucrist. ¹⁴ Abi' chi baguiaa ree compniar raliladxnë' ree Jesucrist guial yu'n ladxguib, mazri guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin gualrdxeb.

¹⁵ Per diidxliczi yu' reeman rtie'ch xtiidx guial rdëdloj reeman naj abi' rën reeman gac reeman mazri bèn zojbloj. Per yu' reeman rtie'ch xtiidxaman guial naj xixgab reeman zagdxe. ¹⁶ Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguib guial za'dxi'chnë'n xtiidxaman guial najcan diidxli. ¹⁷ Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguib guie. ¹⁸ Per achet güünan majsi zagdxe naj xixgab reeman o ad zagdxe yu', contzi ma catie'ch reeman xtiidx Jesucrist, laan naj ni rabaanë'n abi' mazri yabaan. ¹⁹ Din ragbeen guial yariin loj ni cadëedan guial cabejdx canabidi Dios por naj nè guial cayagnë xSprijt Jesucrist naj. ²⁰ Naj ragbee guial ad yu't dxej guslaa Dios naj yaya'nxtun, sin gualrdxeb gulün bejn ree xhienaag ra'pan respejt Jesucrist majsi nabanana o majsi guiëtan. ²¹ Din par naj la'tgaj nabanana cayünan laaman sirv, abi' bal guiëtan mazri zagdxen din ma gazun con laaman. ²² Per bal gabajnrän loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxe par naj. ²³ Din loj grop ree ni guin dád nawëëgan par gaben conin günan, tijb rënan yaca' Dios naj din gazun con Cristo, laan naj mazri zagdxe par naj, ²⁴ per por lèjt rünj naguiejn gabajnrän. ²⁵ Abi' naj ragbeen guial gabajnrän din günan lèjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. ²⁶ Abi' chi guidganan lèjt stijb, chu' ni yabaanëdi gudëë tëëdi quixtëë loj Jesucrist por ni beenman por naj.

²⁷ Per ganin lèjt, gol been naguiejn gol gubajn zi'c rayal, zi'c rëb loj xtiidx Jesucrist. Din bal guidganan lèjt o bal id zialan, per rënan guiguiejn guial za'dxi'chidi nadxag tëë lasa'di abi' tibloj cayünjndi naguiejn catie'chidi xtiidx Jesucrist. ²⁸ Ad guidxebidi bèn rdxe'ch lèjt. Zian guiguen guial ma canijt reeman loj Dios, per lèjt zian guiguen guial ma rajpidi perdon zëed loj Dios. ²⁹ Din ad cwabeetidi par chililadxzidi Jesucrist, cwabeedi nè par sagdiajdi por laaman. ³⁰ Lèjt con naj tibloj caydüüd ree tarbajw par yatie'ch ree xtiidx Jesucrist, ma baguiaadi xhienaag rdëedan tarbajw por xtiidxaman abi' yan caguiejn guial cusnuu cayünan mazran.

2

¹ Yan, zi'c ma yu' luxdoodi zagdxé por Cristo, zi'c ma yu' luxdoodi nix guial rusnuu rên lasa'di, nè zi'c ma nabannèdi xSprijt Dios nè zi'c yu' luxdoodi nix con lasa'di, nè zi'c raya lasa'di. ² Gol basnuu gol gubajn zian din yagu'di luxdoon nix. Gol gubajn, gol guyèn tèè lasa'di tibloj, gol gojc tijbzi, gol been tèè tijbzi xgab. ³ Ad sèèbladxidi güündi gan loj ree lasa'di o guilies xvalor lèjt gajc, mazri zagdxé gol been naya, gol been tèè xgab guial stijb lasa'di mazri lasajc guial lojdi. ⁴ Ad bal chu'di xgab por lèjtzi, gol guyu xgab por stijb lasa'di.

⁵ Gol been xgab zi'c been Jesucrist xgab. ⁶ Din majsi laaman naj Dios, per ad guzudxi'chtaman guial nièjbaman laaman naj Dios. ⁷ Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb bénguidxliuj. ⁸ Abi' chi gocaman zi'c tijb bénguidxliuj beenman naya abi' bazoob xtiidx xDadaman, xt güjtaman loj crüzj, majsi ni natu naj guial rëjt loj crüzj. ⁹ Zeel dád guialrniabee narooob badèè Dios lojman, badèè tèèman lojman laj bejn ni mazri lasajc loj gra laj bejn. ¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, nè gra ree ni yu' loj guidxliuj, nètèè ree ni yu' lèn liuj. ¹¹ Abi' gra bejn guièb guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

¹² Zeel compniar raliduladx ree Jesucrist, zi'c rënan lèjt abi' rnin lèjt guial zi'c bazoobidi da diidxan chi guzun con lèjt, ziangajc gol bazoob da diidxan mazri yan guial za'n zijt. Con guialrdxèb nè con respetj gol been zi'c rayal güün ree bèn ma naj perdon. ¹³ Din por Dios zèèd xgabza'c ni rüjndi, abi' laaman ragnè lèjt din güündi zi'c rënan.

¹⁴ Gol been gra ni rayal güündi, achet guial ad zayuladxtidi achet tèèt guial tildiidxidi, ¹⁵ chitèè xhie guinie bejn lèjt o chitèè xhie xfaltidi yadxejl reeman. Lèjt najdi xi'n Dios gol gubajn naya niz loj ree bèn ad zinalt xnejz Dios, bèn rüjn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, ¹⁶ guial za'dxi'chnèdi xtiidx Dios ni zidnè guialnaban. Abi' zian yabaan por lèjt dxej ni gui't Jesucrist stijb guial gagbeen ad bentan dxiin xlia' ad bizaa tèètan xlia'. ¹⁷ Din guial rliadixidi Dios laan naj zi'c tijb gon par laaman, abi' nix yu' luxdon majsi guiètan din yayaalój gon guin guial rabaan'è'n gradi. ¹⁸ Yan ziangajc gol babaa, gol babaa zi'c rabaan.

Timoteo nè Epafrodito

¹⁹ Dad Jesucrist gagnè naj din diob gaxhalan Timoteo lod zobjidi din xhienladxan chi gagbeen xhienaag riga'di. ²⁰ Din tijbzi Timoteo yu' lèjt xgab zi'c yu'n lèjt xgab. Achut bèn ru lèjt xgab zi'c laaman. ²¹ Graczi reeman ru xgab per por laagajc reeman, ad rut reeman xgab por ni rën Jesucrist güün reeman. ²² Per ma ragbeedi xhienaag naj Timoteo, ma ragbeedi xhienaag cayünman naj yudar persi catiechan xtiidx Jesucrist. Cayünman naj yudar zi'c rüjn bejn xDadaman yudar. ²³ Zeel rënan gaxhalan laaman din guitixlojman lèjt, gagbeezan xhienaag gariican loj cwent gue ²⁴ Dad Jesucrist gagnè naj din diob guidgana quijb naj lèjt.

²⁵ Abi' ruluü rüjn nagueijn gaxhalan da miwan Epafrodito ladxidi. Lèjt guxhaal laaman din güünman naj yudar loj ree ni ryaadxan. Abi' zian cayünman naj yudar, tiblojzi cayzaagdiajn. ²⁶ Dád rënman guidganajman lèjt abi' dád yu'man xgab guial gogbeedi gogxuuman. ²⁷ Abi' walican gogxuuman zamer nièjtaman. Per baya Dios laaman, abi' ad laatzaman, nègajc naj bayaman, chitèè chu'naya luxdon mazri zi'c ma guyu nayan. ²⁸ Zeel diob gaxhal gajcan laaman din yabaadi chi guguaadi laaman stijb chitèè chu'naya tèèn mazri. ²⁹ Gol babaa, gol baca'man guial najman tijb du lasa' ree bèn rliadix Jesucrist. Zian gol guyèn gra ree bèn naj zi'c laaman. ³⁰ Din zamer nièjtaman guial rüjman sirv loj Jesucrist, guzujman loj gualgüjt guial beenman naj yudar loj ni ad bile't nüjn quijb lèjt naj yudar.

3

Ni mazri lasajc

¹ Yan, compniar raliduladx ree Jesucrist, gol badxe' luxdoodi zagdxé por Dad Jesucrist. Par naj achetan guial ganin lèjt diidx ni ma rni gajcan tijb, din par lèjt lasajc ree diidx guin chitèè chu' ni gusquiee lèjt. ² Gol gojp cudad con ree bentont, bèn ad nadèdguient, benmal, bèn rüjn ree nagueijn din chu' ree bejn xsen bèn Israel. ³ Din mazri lasajc sen ni raya'p ree, abi' sen guin naj guial diidxi zunaal ree Dios por xSprijtaman bèn nabajnnè' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. ⁴ Majsi zajc gales da valoran guial zinaalan gra ree costumbr, per bal yu' bèn rlies xvalor gajc, nègajc naj zajc güñ zian. ⁵ Din chi goc toxman goolan, badxe' reeman naj sen ni ru ree bèn Israel. Abi' bèn Israel naj, loj xdiaa Benjamín zialan, rnien diidx Hebreo din xi'n ree bèn rniece diidx Hebreo naj. Benan gra ni rniabee ley din bënfarisew gojcan. ⁶ Benan zi'cgajczi rüjn ree bënfarisew, zeel xt guzunaalan bèn rliadix ree Jesucrist din günan laa reeman ni mal, benan gra zi'c tal rniabee ley abi' achut zajc nièjb guial ad cayüntan zi'c rayal. ⁷ Gra ni benan nadxel, par naj dád lasajcan nadxel, per yan achet lasajcan par naj, din yan Cristo

mazri lasajc. ⁸ Abi' achet ni mazri lasajc guial loj ni n nbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, ⁹ abi' gacan tijbzi con laaman. Ad naladxtan por guial r nan zi'c rniabee ley achet dol ra'pan niz loj Dios, naladxtan por guial rliladxtan Jesucrist, din por guialrliladxtan guin ma naya bejn loj Dios. ¹⁰ Zeel r nan g nbeechaawan Cristo, g nbee t en guialrniabee ni basban laaman, r n t en gadaan xhiet ez loj guialrzagdiaj ni gad edan zi'c gudaanman, ma guidxin dxej gacan zi'c rayal gacan por xguialg jtaman. ¹¹ Din yu'guican guial yabanan zi'c baban Jesucrist.

Ni gunee Dios xanyabaa

¹² Ad canitan lojdi guial ma bayaaloj benan gra o guial najn benza'c, per cay nan naguiejn din gacan zi'c r n Cristo gacan diidz chi guzuloj rniabeeman naj. ¹³ Compniar raliduladxtan ree Jesucrist, naj rni l jt guial ad wayaaloj g nan zi'c rayal, per cay nan naguiejn din yayanladxtan gra ni benan gocli din gac gusnuun par delant, ¹⁴ din yayaaloj g nan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree guial ma rayagbee ree zagdxe ni r n gui b xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gul   l jt conin naj diidxli. ¹⁶ Per r jn naguiejn yabajn ree zi'c ma rayignia' ree.

¹⁷ Compniar raliduladxtan ree Jesucrist, gol gubajn zi'c naban, gol baguiaa t e xhienaag naban ree b n naban zi'c naban. ¹⁸ Din zien volt ma rnin lojdi abi' yan caydxi'nan zatijb, xt ronan canin l jt guial zien ree bejn naban zi'c ree b n ad rliladxt guial g jt Cristo loj cr jz por dux xtol ree. ¹⁹ Abi' ree b n guin castizi naj ni rb z laa reeman din mazri ruladxt reeman g  n reeman ni dxuudx. Abi' luar yatu reeman por ni r jn reeman aal mazri rlies xvalor reeman guial mazri r jn reeman xgab por ree ni yu' loj guidxliuj guie. ²⁰ Per dunuj ree ma nayab ree xanyabaa abi' cayl jz ree guial diidz xanyabaa gui't Dad Jesucrist b n gudix por dux tol ree. ²¹ Laaman naj b n guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' g  nman zian con guialrniabee ni rajpaman par nabeeman gra.

4

Gol badxe' luxdoodi zagdxe por Dad Jesucrist

¹ Zeel compniar raliduladxtan ree Jesucrist, r nan l jt r n t en guidganen l jt, l jt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxtidi Dad Jesucrist.

² Yan, rniaaban loj Evodia n  loj Sintique din guidxag cwe reeman guial naj reeman compniar loj ni rliladxt reeman Dad Jesucrist. ³ Abi' ziangajc l j compniar ni cayguieen dxiin tijbzi, rniaaban loj din g  n l  yudar b ngunaa guin ree din laa reeman been naj yudar bire'ch xtiidx Jesucrist n  Clemente con ree ben ren, gra reeman ma yu' laj loj libr ni yu' laj ree b n guiban tiblyaa con Dios.

⁴ Zianczi gol badxe' luxdoodi zagdxe por Dad Jesucrist. Naj rni l jt ;Gol badxe' luxdoodi zagdxe! ⁵ Gol been naguiejn g  nbee gra bejn l jt guial najdi benza'c. Gol badxe'guijc guial zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad e t e quixt e lojman. ⁷ Dios yabe'cdxe luxdoodi, zro' rabe'cdxeman luxdoo bejn mazri guial loj ni naladxt bejn, abi' laan naj ni gagn  l jt din yayaalyuj luxdoodi yayaalyuj t e xquiarguiejndi guial ma najdi tijbzi con Jesucrist.

Gol badxe'guijc ganax ni zagdxe

⁸ Naga gad lox g nan gui'ch guie, compniar raliduladxtan ree Jesucrist, rnin l jt gol badxe'guijc ganax ni diidxli, ni rayal respejt n  ni naj xnejz. Gol badxe'guijc ganax ni r jn sirv, ni naj zagdxe n  ni rayal g  n b n z  xnejz. Gol badxe'guijc gra ni naj zagdxe n  ni guilies bejn xvalor.

⁹ Gol been zi'c basidan l jt, zi'c ma bal n l jt, gol been zi'c rnin l jt zi'c ma baguiaadi benan, zian gagn  Dios l jt b n rabe'cdxe luxdoo ree bejn.

Ni bad e ree b n filipos loj Pap

¹⁰ D d rabaan por Dad Jesucrist guial ma basaaladxtidi naj. Ad canitan bayanladxtidi naj, canin zian guial ad gojctri n jndi naj yudar. ¹¹ Ad canitan zian guial cayaadxtan xhienin din ma basidan gad edan con ni ra'ptzan. ¹² Ragbeen xhienaagan chi naban bejn loj guialprob ragbee t en xhienaagan chi achet ryaadx bejn, din ma basidan rdaanan ni z  dtzi, bal rawan o bal id rawan, bal r jnan naj sobr o bal ryaadxtan. ¹³ Rajc rdaanan ni z  dtzi con xyudar Jesucrist. ¹⁴ Per zagdxe naj ni beendi guial beendi naj yudar loj ni cazaagdiajn.

¹⁵ Ragbee tëëdi guial chi briin niz Macedonia din suloj gatie'chan xtiidxa'c Jesucrist, lëjtzi bazaladx xhienin lon guial loj gra ree guiedx lod ma riladx reeman xtiidx Jesucrist, zi'c benan lëjt yudar ziangajc beendi naj yudar. ¹⁶ Ziangajc chi guzun luguiedx Tesalónica chi biaadxan xhienin, bëlczî volt beendi naj yudar. ¹⁷ Ad caygultan mod din güüнди naj yudar mazri, ni rënan naj guial mazri yaya'ndi zagdx loj Dios. ¹⁸ Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. ¹⁹ Zeel Dios gunee lëjt gra ni ryaadxidi por ree ni za'c ni rajpaman xanyabaa con Dad Jesucrist. ²⁰ ¡Abi' por guialrniabee ni rajp dux Dad ree Dios, rayalczi yaya'p reeman respejt goctëëz! Amén.

Rugajpdioz ree bèn rliladx Jesucrist bèn Tesalónica ree

²¹ Gol bagajpdioz gra ree bèn ma naj xbejn Jesucrist, guiáad gra ree bèn rliladx Jesucrist bèn za'në' reen guie, rugajpdioz reeman lëjt. ²² Gra ree bèn zojb ree guie, bèn ma naj ree xbejn Jesucrist, në gra ree bèn rüjn sirv loj rey, në reeman rugajpdioz lëjt.

²³ Dux Dad ree Jesucrist güüne' gradi. Amén.

Gui'ch guxhaal San Pabl loj ree bèn Colosas rliladx Jesucrist

Rxhaal Pab xtiidx Dios

¹ Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, ² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tëëman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radëëdan quixtëë lojman por lëjt. ⁴ Din ma baguiejnan xhienaag rliladxidi Jesucrist xhie tëë naag rëndi gra ree bèn naj ree xbejnman. ⁵ Guial cabëzidi yayalidi gualnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. ⁷ Lëjt gogbee diidxli guin ree chi balüü Epafras laa reen lëjt. Laaman cayüjn dunujn yudar abi' dád rayënan laaman, din laaman diidxli cayüjn sirv loj Jesucrist delant lojdi. ⁸ Abi' tëë laaman be diidx du lojn xhienaag rën lasa'di guial yu' xSprijt Dios luxdoodi. ⁹ Zeel diidx chi baguiejnan xhienaag nabandi, ad racwëët rarejdxan Dios por lëjt din chignia'di zagdxe xhienaag rënman güündi gunee tëëman lëjt gra loj gualrajc guixhial tëëman xquiarguiejndi por xSprijtaman. ¹⁰ Abi' zian guiband zi'c rayal guiban ree bèn rliladx Jesucrist, din güündi zi'c tal ruladxaman abi' gusnuu güündi ganax ree ni zagdxe gusnuu tëë güünbeedi Dios mazri. ¹¹ Abi' ranaaban lojman din con xgualrniabee za'cdxonman gagnëman lëjt din sudxi'chidi, taan tëëdi xhietëëz loj gualzi tëëdi sin guial yalenyadi. ¹² Abi' xt nix chu' luxdoodi gudëëdi quixtëë loj dux Dad ree Dios guial basiaman lëjt din yayalidi ni rayal ree xbejnman, bèn zinal ree xnejzaman. ¹³ Laaman babëë dunuj ree loj xgualrniabee xindxab abi' bagu'man dunuj ree loj xgualrniabee xi'nman Jesucrist bèn rënman, ¹⁴ abi' gudijxaman por dux tol ree, yan ma raya'p ree perdon loj Dios.

Por xgualgüjt Jesucrist ma nadxu'në' ree Dios zagdxe

¹⁵ Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeenëman Dios diidx chi gad guidxliuj gacchaaw. ¹⁶ Por Jesucrist gojc gra ni yu' xanyabaa në loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graløj gualrniabee në graløj gualguxtis ni rajp ree ni ad rajt ruguaa ree bejn. Gran gojc por laaman në par laaman. ¹⁷ Mal yu' Jesucrist diidx guida'xchej chi gad guidxliuj gacchaaw, laaman dxiibguijc gra abi' rniabeeman gra. ¹⁸ Abi' laa tëëman rniabee gra ree bèn rliladx laaman, bèn ma naj ree xbejnman. Laaman naj bèn yaløj abi' yaløj laaman baban loj ree bengüt din guiguien guial tijbzi laaman rajp gualrniabee loj gra. ¹⁹ Din bayuladx Dios gac Jesucrist zi'c gajczi naj Dios. ²⁰ Abi' por Jesucrist gra bénguidxliuj ma za' zagdxe con Dios, zi'c ni yu' loj guidxliuj zi'c ni yu' xanyabaa. Za' bejn zagdxe con Dios por xgualgüjt Jesucrist loj crüjz. ²¹ Gocli ad gojctidi tijbzi con Dios, gojquidi zi'c bèn bidxe'ch laaman guial beendi ganax ni mal. ²² Per yan ma za'di zagdxe con Dios por ree gualzi ni gudëd Jesucrist chi gütaman loj crüjz din gac guidxindi lojman naya sin dol chitëë xhie naman lojdi. ²³ Per par zian rayal sudxi'chidi loj gualrliladx ni rajpidi, ad gucwëët chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bèn catie'ch diidxza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por gualzi ni cadëëdan guial rünan lëjt yudar abi' lasa'gajc gualzi ni gudëd Jesucrist cadëëdan din chile' günan yudar bèn rliladx ree laaman bèn ma naj ree xbejnman. ²⁵ Din Dios bacaabee naj par günan sirv loj ree xbejnman. Abi' laaman bane dxiin guin naj din gulün lëjt xtiidxaman zi'c tal najn. ²⁶ Diidx tiamp gulal ad bignia't ree bejn zagdxe ni rën guiëb xtiidx Dios. Per yan ma balüüman ni rën guiëban loj ree xbejnman. ²⁷ Din gugojn reeman bèn ad najt ree bèn Israel xhienaag naj xgualnaza'c za'cdxonman. Abi' ni ad balüüt Dios loj ree bejn tiamp gulal naj guial nabannë Jesucrist lëjt abi' por laaman ragbeedi zagdxe guial yu' dxej yayalidi xanyabaa. ²⁸ Abi' dunujn batie'ch xtiidx Jesucrist, baneenë'n bejn ree, balüü tëën laa reeman con gra quiarguiejn ni runee Dios din chi guidxin reeman lojman por Jesucrist ma naj reeman zi'c rënman gac reeman. ²⁹ Abi' naj dád cayünan naguiejn cayünan dxiin guie con gualrniabee ni baneeman naj.

2

¹ Rënan gagbeedi guial cayün da'tan naguiejn cayünan lëjt yudar, nè ree bèn zojb guiedx Laodicea nè gra ree bèn ad wayünbeet naj. ² Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tée xquiarguiejn reeman din chile' güünbee reeman ni ad balüüt Dios bejn ree gulal abi' laaman naj Jesucrist, ³ por laaman zëed gra guialrajc nè guialrignia'. ⁴ Canin diidx guie ree lojdi chitëe chu gusquiee lëjt con ree xtiidx zagdxe reeman. ⁵ Majsı ad za'tan con lëjt, per yu'guican lëjt abi' rabaan guial cayüjndi zi'c rayal, za'dxi'ch tēedi loj guialrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman. ⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwēez tēe gudēedi quixtēe loj Dios.

Guialnaban ni rudēed Jesucrist

⁸ Gol gojp cudad, ad tiëbidi güün ree bèn rën gusquiee lëjt gan con ree ni rulüü reeman o con ree diidx ni ad rüjnt sirv ni zēed por ree costumbr o por ree guialrniabee yu' loj guidxliuj, din ad zēedt reen por Jesucrist.

⁹ Din zi'cgajczi naj Dios, ziangajczi naj Jesucrist. ¹⁰ Abi' nabannēdi Dios guidiblagaa guial najdi tijbzi con Jesucrist, din laaman rniabee loj gra guialrniabee nè loj guialguxtis. ¹¹ Abi' tēe guial ma najdi tijbzi con Jesucrist ma yu'di xsenman, per ad lasa't sen ru ree bën Israel, sen yu'di por laaman najn guial ma basa'ndi dol tiblād. ¹² Chi gurobnijsidi, laan rën guiëb guial güjtidi con Jesucrist abi' babandi con laaman stıj guial rliladxidi Dios rajp guialrniabee persi basbanman Jesucrist loj guialgüjt. ¹³ Gocli gojquidi zi'c bengüt delant loj Dios por xtolidi nè por guial ad guyutidi sen ni ru ree bën Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. ¹⁴ Ma badxi'ca Dios dux tol ree ni bayal nadıjx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bën gudıjx laan por dunuj ree. ¹⁵ Abi' zian beenman gan gra loj ree guialguxtis nè loj gra guialrniabee zēed loj xındxab. Basa'nxtuman laa reeman loj ree bejn, beenman laa reeman gan guial güjtaman loj crüjz.

Gol been xgab ni yu' ree xanyabaa

¹⁶ Zeel achut rayal gula'ch lëjt por ni rawidi nè ni rē'di o por guial ad rüjntidi cwent dxej lanıj o dxej ni yu' bēew cüb o dxej razıiladx ree bejn. ¹⁷ Din gra ree ni guin naj zi'c tijb xbala Jesucrist abi' yan laaman naj bën ma bi't. ¹⁸ Ad tiëbidi gutiaalguiiw bën rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman bën naxanladx, per ad najt reeman laan rēb tēe reeman guial yu' ni rulüüloj loj reeman. Dxel laagajc reeman rlies xvalor por xıxgab gajc reeman. ¹⁹ Per laa reeman ad nabannēt reeman Jesucrist, bën rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xıxgab Dios.

²⁰ Yan bal walidi ma güjtidi con Jesucrist par ree ni rbēegüjce ree bēnguidxliuj, çhexquiza zeel ruzoobidi xtiidx ree bën rēb: ²¹ “Ad rayalt gugaalil ni guin, ad gawil ni guin, ad guiniaazil ni guin?” ²² Gra ree mandamıent guin yu' dxej nit reen, din bēnguidxliuj gulēegüjç laa reen. ²³ Diidxclızi rulüü lasajc da't ree mandamıent guin guial tant rüjn ree bejn naguiejn güün reeman laa reen cumplid abi' rüjn reeman bën naxanladx dxel rusagzi laagajc reeman, per achetçzi lasajc ree mandamıent guin par gucwēez reen ni mal rzēēbladx reeman güün reeman.

3

¹ Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ² Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa. ³ Gol gunaladx ma güjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴ Abi' chi gui't Jesucrist stıj, bën runee dunuj ree guialnaban, nè lëjt yayal guibannē laaman loj xguialrniabee za'cdxoonman.

Zi'c rayal guiban ree bën rliladx Jesucrist

⁵ Yan, gol basa'n gra ree ni mal riga' loj guidxliuj guie. Ad sunēdi bën ren bën ad najt lacheelidi. Gol basa'n ni ad rüjnt ree sirv, nè ree xgabmal nè ree ni mal yu'di gan güündi. Ad sēēbladx tēedi gapidi gra loj ni yu' loj guidxliuj din bën rüjn zian laan rēnman mazri luar Dios. ⁶ Abi' por ree ni guin zēed xcasti Dios par ree bën ad ruzoobt xtiidxaman. ⁷ Lasa' ree ni mal guin beendi çhi gadidi güünbee Jesucrist. ⁸ Per yan gol basa'n gra ree ni mal guin zi'c guialrdxe'ch, guialralen lasa', guialrüjn ni mal lasa', guialrnieegüjç nè guial rniee diidxgüjç. ⁹ Ad rusquiee loj lasa'di, din ad nabantrıdi zi'c gubandi gocli çhi beendi ni mal ree, ¹⁰ din yan ma bıdxaa mod nabandi. Ma najdi zi'c bencüb guial çhıgagaj ma cayajquidi zi'c rën Dios gaquidi din güünbeedi Dios mazri zagdxe, bën runee lëjt guialnaban. ¹¹ Abi' çhi

ma riladax bejn Jesucrist, achet güünan chutëez najman, bal najman bèn grieg o bèn Israel, bal yu'man sen ru ree bèn Israel o ad yu'taman laan ya, bal najman benzit o najman bèn zobj dajn, bal najman zi'c bèn nado' o ad najtaman zi'c bèn nado' Per ni mazri lasajc naj guialrliladaxaman Jesucrist, bèn rniabee za' tēeman con dugra ree.

¹² Abi' Dios rēn lējt, zeel gulejman lējt din gaquidi xbejnman. Zeel gol baya bejn ree, gol gojc benza'c, gol gojc bèn naxanladx, ad gaquidi bendax, gol gojp pasens lasa'di. ¹³ Ad yalenyā'nē lasa'di. Gol been tēē perdon lasa'di bal xhie rüjnnē reeman lējt. Zi'c been Dad Jesucrist lējt perdon ziangajc gol been perdon bejn ree. ¹⁴ Gol badxe'guijc guialrēn lasa' naj ni mazri lasajc. Abi' guialrēn lasa' guin rüjn yudar din guidxaag guiban bejn. ¹⁵ Gol cwējb nabee Jesucrist lējt din yabedxe luxdoodi, din par zian gulej Dios lējt par gaquidi tijbzi por Jesucrist gol badēē tēē quixtēē lojman por zian.

¹⁶ Gol badxe'guijc da' t xtiidx Jesucrist, gol balüü gol guneenē tēē lasa'di zi'c rayal. Gol badēē quixtēē loj Dios con ree cant nē ree salmos nē los demazri ree cant ni naj par Dios. ¹⁷ Xhietēez ni güündi ni guinee tēēdi, yaløj xgaj gol basaaladx Dad Jesús abi' por laaman gol badēēd quixtēē loj dux Dad ree Dios.

Zi'c rayal guiban tijb famil

¹⁸ Lējt bēngunaa yu' ree lacheel, gol bazoob xtiidx lacheelidi, din zian rayal güün bèn riladax Jesucrist. ¹⁹ Abi' ziangajc lējt xinguaaw yu' ree lacheel, gol guyēn lacheelidi ad gusagzi tēēdi laa reeman.

²⁰ Nē lējt xin naj ree xi'n, gol bazoob gra xtiidx ree xDadidi, din zian ruladx Dios. ²¹ Abi' ziangajc lējt dad na, ad gusagdiaj xi'ndi chitēē guidxe'ch reex abi' yalenyā' reex.

²² Lējt bèn rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman lējt par yaya'ndi zagdxe loj reeman, guitid luxdoodi gol been xchiin reeman por respejt ni rajpidi Dad Jesucrist. ²³ Xhietēez nin güündi, gol beenan con gan. Gol gunaladx loj Jesucrist cayüjndi sirv, ad lojt bēnguidxliuj. ²⁴ Din lējt ma ragbee guial zian yu' ni tia'di loj Dad Jesucrist guial cayüjndi laaman sirv. ²⁵ Per par ree bèn rüjn ni mal, laa reeman yayal casti por ni mal been reeman, din Dios ad rbetaman loj bejn.

4

¹ Nēgajc lējt bèn naj ree patron, gol been zi'c rayal con ree bèn rüjn xchiindi, gol gojc tēē benza'c con laa reeman, din lējt ragbee guial xanyabaa yu' bèn rniabee lējt.

² Gol guzusun, gol gurejdx Dios ad bal gucheeladxidi, gol badēē quixtēē lojman. ³ Gol gurejdx tēē Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguuib. ⁴ Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxe.

⁵ Gol gubajn zagdxe delant loj ree bèn ad waliladxt Jesucrist gol guneē tēē xtiidxaman loj reeman beegaj chi chu' mod. ⁶ Chi rüdi diidx, gol be diidx nejz din yayuladx bejn ni rnieedi gagbee tēēdi xhienaag yadxi'di ni rniabdiidx reeman lojdi.

Rxhiaal ree xbejn Jesucrist xtiidx Dios

⁷ Tiquico, tijb du lasa' ree, bèn rayēn ree, bèn diidxli cayüjn naj yudar cayünan sirv loj Jesucrist, laaman gugojn lējt gra xhienaag za'n niz guie. ⁸ Par zian caxhalan laaman din gugojnman lējt xhienaag nadxu'n niz guie din yagu' tēeman luxdoodi. ⁹ Abi' con laagajcaman caxhalan Onésimo, tijb du lasa' ree bèn rayēn gajc ree, bèn naban zi'c rayal, bèn naj bèn ladxidi. Laa reeman gugojn lējt gra ni cayajc niz guie.

¹⁰ Aristarco, bèn yu'nē'n ladxguuib, laaman rxhiaal xtiidx Dios lojdi. Nēgajc Marcw, bijchwin Bernabé rugajpdioz lējt. Abi' ma bagojnman lējt chunin naj Marcw, bal gui'taman guidganajman lējt, gol baca'man zagdxe. ¹¹ Abi' nēgajc Jesús, bèn la gajc Justo, rxhiaal xtiidx Dios lojdi. Loj gra ree bèn Israel riladax Jesucrist, laaz reeman cayüjn naj yudar caytie'chan xtiidx Dios abi' laaz reeman naj bèn cagu' luxdon. ¹² Nē Epafras, bèn ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lējt din sudxi'chidi chinalidi xnejz Dios güün tēēdi gra zi'c rēnman. ¹³ Naj ragbee zagdxe guial dád ruman xgab por lējt, nē por ree bèn Laodicea, nē por ree bèn Hierápolis. ¹⁴ Lujc, doctor rayēn da't ree, nē Demas, nē reeman rxhiaal xtiidx Dios lojdi.

¹⁵ Gol bagajpdioz ree dux compniar ree bèn riladax ree Jesucrist, bèn zobj ree luguiedx Laodicea. Gol bagajpdioz tēē Ninfas con los demazri ree xbejn Jesucrist bèn rado'p ree lidxaman. ¹⁶ Chi ma gulox biilidi gui'ch guie, dxel gol guxhaalan loj ree bèn riladax Jesucrist, bèn zobj ree luguiedx Laodicea, din nē reeman gool laan. Nē gui'ch ni guxhalan loj reeman rayal yaxhaal reeman lojdi din nēgajc lējt gool laan. ¹⁷ Abi' gol güjdx loj Arquipo din güünman cumplid ni ma bacaabee Dad Jesucrist güünman. ¹⁸ Naj Pab, quijb naj cuca lejtr guie ree par gugajpdiozan lējt. Gol basaaladx guial yu'n ladxguuib. Dios güünle' lejt. Amén.

Gui'ch yaloj guxhaal San Pabl loj ree b́en Tesalónica rliladx Jesucrist

¹ Naj, Pab con Silvan nē Timoteo, cayxhaalan gui'ch guie par lějt najdi b́en rliladx Jesucrist luguiedx Tesalónica, dux Dad ree Dios nē Dad Jesucrist güünle' lějt yabe'cdxe tēē reeman luxdoodi.

Rudēē Pab quixtēē loj Dios

² Guixie guixie radēēn quixtēē loj dux Dad ree Dios por gradi, rasaaladx tēēn lějt chi rarejdx ranaaban laaman. ³ Nē zianczi chi rarejdx ranaaban laaman, nadxe'duguijcan ni ma beendi guial rladixidi laaman, nē guial rēn lasa'di, nadxe'duguijcan tēēn guial cadaandi cabēzidi gui't Dad Jesucrist stibj. ⁴ Compniar raliduladx ree Jesucrist, dunujn rayagbee guial Dios rēn lějt, gulej tēēman lějt. ⁵ Din chi baneen xtiidzxa'caman lojdi, ad diidxtizi balüün lějt, balüün lějt con xguialrniabee xSprijt Dios abi' rayagbeen guial diidxli naj ni caynan lojdi. Lějt ragbee xhienaag babajnan chi badxu'nē'n lějt, babajnan zian din yaguieenan lějt yudar xhienaag guibandi.

⁶ Abi' lějt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. ⁷ Zian najdi tijb ejempl par gra ree b́en rliladx Jesucrist niz Macedonia nē niz Acaya. ⁸ Por lějt bire'ch xtiidxaman ad tijbtizi luarzii ree, gra ladczi ruzat' reeman xhienaag rliladxidi Dios, xt ni'qui chetri ryaadx yaguie'chan. ⁹ Din laagajc reeman rü diidx xhienaag baca'di dunujn chi budganajñ lějt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayjñdi laaman sirv. ¹⁰ Rū tēē reeman diidx xhienaag cabēzidi gui't Jesucrist Xi'n Dios diidz xanyabaa, b́en basbanman loj ree bengüt, Jesús b́en rabēē dunuj ree loj casti ni zēēd.

2

Ni been Pab luguiedx Tesalónica

¹ Lějt ragbee, compniar raliduladx ree Jesucrist, guial ad budganaj xlia'tzan lějt, ² majsi lějt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios baneen dunujn valor persi badün xtiidzxa'caman lojdi, majsi xhietēēz raza'can por ree b́en rdxe'ch dunujn. ³ Din ad baneenē'tan lějt diidx rusquiee, o par yaguieennē'n lějt zi'ctzi rayēnan ya, o par yasquieen lějt, ⁴ per zi'c bacaabee Dios dunujn din yaneen xtiidzxa'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nān zagdxe loj Dios, b́en ragbee gra ni yu' luxdoo bejn. ⁵ Lějt ragbee guial ad yu't dxej baneenē'n lějt zagdxe naabzi par guiēndi dunujn, ache tēēt guijc badxiiban din yaca'n xmiliadi. Dios ragbee guial laan naj diidxli. ⁶ Ad radiiltan guza't ree bejn dunujn zagdxe, ad radiil tēētan guza'tidi dunujn zagdxe, o guza't ree ben ren dunujn zagdxe, ⁷ majsi guial nayajcan xiapóstol Jesucrist, raya'pan derejch yanabeen lějt güündi xhienin par dunujn, per ad raguieentan zian. Lějt ragbee guial benza'c bayajcan chi badxu'nē'n lějt, zi'cgajczi tijb na rusni's rniaj tēē xi'n. ⁸ Abi' guial tant rayēnan lějt, ad tijbtzi xtiidx Dios baneen lojdi, nē dux guialnaban bayēnan naneen por lějt, guial tant rayēnan lějt. ⁹ Abi' lějt ragbee compniar, guial dád baguieenan dxiin. Dxej guiaal baguieenan dxiin, chitēē yalu'n xchiindi guial güündi dunujn yudar yabajnan la'tgaj balüün lějt xtiidzxa'c Dios.

¹⁰ Lějt nē Dios ragbeechaaw guial chi badxu'nē'n lějt, babajnan xnejz zi'c rayal, abi' achet chile' gudxiibidi du guijcan, lějt b́en rliladx ree Jesucrist. ¹¹ Lějt ragbee xhienaag baneen lějt consejw, xhie tēē naag balu'n luxdoodi zi'c rñjn tijb dad con ree xi'nman. ¹² Ma banan lojdi din guibandi zi'c rayal guiban b́en ma naj ree xbejn Dios, b́en rbejdx lějt din yayalidi xanyabaa lod rniabeeman.

¹³ Zeel nē dunujn ad racwēēzt radēēn quixtēē loj Dios, guial chi biguiejñdi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx b́enguidxliuj. Abi' diidx guin ree naj ni rusni xquiarguejñdi, lějt guial rliladxidi Jesucrist. ¹⁴ Abi' lějt compniar raliduladx ree laaman, ma guzajquidi zi'c guzac ree xbejn Dios, b́en Israel zojb ree niz Judea, b́en rliladx ree Jesucrist. Din zi'cgajc basagdiaj ree b́en ladxidi lějt, ziangajc basagdiaj lasa' b́en Israel reeman laa reeman. ¹⁵ Abi' tēē ree b́en Israel bagjñt reeman Dad Jesús, zi'cgajc bagjñt reeman b́en badēēd ree xtiidx Dios loj ree bejn, balaagdxa tēē reeman dunujn, ad rñjnt reeman zi'c rēn Dios, abi' contzi gra bejn rdxe'ch reeman. ¹⁶ Rudxoon reeman yalüün b́en ad najt ree b́en Israel xhienaag gac reeman perdon, zian laagajc reeman cutioob guijc xtol reeman, abi' yan ma cadēd reeman xcastiro' Dios.

Guyën Pab niejman Tesalónica stijb

¹⁷ Compniar raliduladx ree Jesucrist, chi basa'nan lëjt tio'p choondxey, majsi ad raguaaatan lëjt, per rasaaduladxan lëjt, abi' rayën nejzdoon yaguaan lëjt stijb. ¹⁸ Dád bayënan nudganajn lëjt. Naj Pab, zien volt da't guyënan nidganajn lëjt, per badxoon xindxab niajc zian. ¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. ²⁰ Lëjt naj bën rabaanë'n rlies tëëdi dux valoran.

3

¹ Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. ² Abi' baxhaal dux compniaran Timoteo, bën cayguieennë'n xchiin Dios caytie'chan xtiidxa'c Jesucrist, din yagu'man luxdoodi sudxi'chidi loj ni ma rliadxidi, ³ din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree. ⁴ Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc. ⁵ Zeel ad gudaantran, abi' guxhalan Timoteo din gagbeen xhienaag zinalidi ni rliadxidi, din rdxeban gusquiee xindxab lëjt, abi' achetri sirv nünj ni baguieenan por lëjt.

⁶ Per yan ni ma baguaad Timoteo ni bidganajman lëjt, ma bagojnman dunujn guial zinalidi zagdxë ni rliadxidi Jesucrist në zi'c rën lasa'di. Laaman na guial zianczi yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguaan lëjt. ⁷ Zeel, compniar raliduladx ree Jesucrist, majsi graloj tarbajw në guialzi caydüüdan, per dád nix yu' du luxdoon raguiejnan guial zagdxë zinalidi ni rliadxidi. ⁸ Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. ⁹ Dxel xt ni'quid radxejlant xhienaag yadëen quixtëë loj Dios por lëjt, guial dád nix yu' du luxdoon lojman por lëjt. ¹⁰ Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliadxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt. ¹² Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt. ¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

4

Zi'c rën Dios guiban ree xbejnman

¹ Yan, compniar raliduladx ree Jesucrist, raza'can lëjt liaadx, rana tëën lojdi por laaman, guial zi'c nabandi yan zi'c ma balüün lëjt guibandi, din güüнди zi'c rën Dios, gol been naguiejn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güüнди. ³ Ni rën Dios naj guial guibandi naya lojman, guial ad güüнди nidxuudx ree con ree bën ad najt lacheelidi. ⁴ Gol gogbee guial tijbgaj lëjt rayal guibannë lacheelidi zagdxë zi'c rën Dios con respejt, ⁵ ad chu' lacheelidi naabzi par grii xgustidi zi'c rünj ree bën ad nünbeet Dios. ⁶ Ni'qui tijbidi ad rayalt güünnaladx lasa'di, gusquiee lasa'di güüнди xhie nidxuudx con lacheel reeman. Din dux Dad ree Dios zudëëdaman casti gra ree bën rünj zian, zi'c ma banan lojdi zi'c ma bagojnman lëjt. ⁷ Din Dios ad gurejdxntaman dunuj ree yayajc ree xbejnman par yabajn ree nadxuudx, gurejdxntaman dunuj ree par yabajn ree naya. ⁸ Zeel bën ad ridxga't ni ma banan lojdi, ad bënguidxliujtan ad ridxga'taman, Diosan ad ridxga'taman, bën razaladx xSprijt duloj ree.

⁹ Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, ¹⁰ abi' laan naj ni cayüjndi con gra dux compniar ree bën rliadx ree Jesucrist niz Macedonia. Per raza'can lëjt liaadx din gusnuu guiën lasa'di mazri. ¹¹ Gol been tëë naguiejn guibannë lasa'di zagdxë, gol guyu xgab xchiüdi, zi'c ma ranan lojdi güüнди dxiin, ¹² din guibandi zagdxë loj ree bën ad rliadx Jesucrist në chitëë xhie guiaaxidi.

Ni gac chi gui't Dad Jesucrist

¹³ Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëë chu'nayadi zi'c ree bën ad rliadx Jesucrist. ¹⁴ Din bal raliduladx ree guial güjtaman abi' babanman stijb, ziangajc raliduladx ree guial ree bën ma güjt, bën bililadx ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidxaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree. ¹⁶ Din dxejzii guiguien cha' bën rniabee xhienaag gac, guiguien cha' anjl rniabee ree anjl,

guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaloy ree xbejnman bën ma güjt ree yaban stijb. ¹⁷ Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'nè' reeman tiblyaa. ¹⁸ Zeel gol bagu' luxdoo lasa'di con ree diidx guin.

5

¹ Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. ² Din lëjt ragbeechaaw guial zi'cgajczi ri't tijb bégubaaan guxhin, chi achut rbéz laaman, zian guidxin dxej gui't Dad Jesucrist stijb. ³ Chi guiéb ree bejn: "Zagdx zio' ree, achet gac", dxel dxejczzi gui't gualzi par laa reeman ni ad zariit reeman loj, zi'c chi rdxin hor ragnaa lën bégunaa chi ma gal xi'nman. ⁴ Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb bégubaaan. ⁵ Din gracziidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. ⁶ Zeel ad najt guial yabajn ree zi'c tijb bënnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguieidxuj. ⁷ Bën zinal ree nejzmal zi'c tijb bënnaayëjs, zi'c tijb bengui', zian zinal reeman nejz guin. ⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialriladx ni ma raya'p ree në loj ni rën Dios dunuj ree, abi' yadxu'dxi'ch tée ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëe yaya'p tée reen zi'c tijb ni gutëe dunuj ree loj ni mal. ⁹ Din ad gurejdxdt Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, ¹⁰ bën güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'nè' reeman. ¹¹ Zeel gol bagu' luxdoo lasa'di gol been tée yudar lasa'di din gagbeedi mazri xtiidx Dios zi'c ma cayüjndi.

Ni rayal güün ree bën rliiladx Jesucrist

¹² Compniar raliduladx ree Jesucrist, raza'can lëjt liaadx, gol gojp respejt bën rusiid ree lëjt xtiidx Dios, bën rülüü ree lëjt rnieenë tée reeman lëjt xhienaag chinalidi Jesucrist. ¹³ Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdx.

¹⁴ Ranaab tëen lojdi compniar, gol guneenë ree bën ad rënt güün dxiin, gol bagu' luxdoo ree bën ralenya'në xnejz Dios, gol been tée yudar bën ad za'dxi'cht ree loj xnejzaman, gol gojp pacens gra reeman.

¹⁵ Gol been naguiejn ad güündi ni mal bën rüjn ree lëjt ni mal, zagdxeli gol gojc benza'c con lasa'di në con gra ree bejn. ¹⁶ Gol badxe' luxdoodi zagdx zianczi. ¹⁷ Ad gucwëez cwedx guiniabidi Dios. ¹⁸ Gol badëe quixtëe lojman por gra, din zian rënman güündi, lëjt najdi xbejn Jesucrist.

¹⁹ Ad rbexuudi nabee xSprijt Dios lëjt. ²⁰ Gol bidxga' ni rniee ree bën rudëed xtiidxaman. ²¹ Yaloy xgaj gol gogbee zagdx xhietëeznin, dxel gol been ni naj zagdx. ²² Gol gubi'ca loj gra ree ni mal.

²³ Dios, bën rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaa diin gaquidi nayadxuj lojman dxej gui't Dad Jesucrist. ²⁴ Abi' Dios güün zian, din laaman, bën rbejdx dunuj ree par güünman dunuj ree xbejnman, rüjn xtiidxaman cumplid.

Diidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunuj. ²⁶ Gol badëe xtiidx Dios da cwentan loj gra ree compniar riladx Jesucrist. ²⁷ Abi' por laaman, naj rni lojdi rniabee tëen lëjt: Gol biil gui'ch guie loj gra ree compniar riladx laaman. ²⁸ Dux Dad ree Jesucrist güünle' lëjt.

Gui'ch barojp guxhaal San Pabl loj ree b́en Tesalónica rlliladx Jesucrist

¹ Naj, Pab con Silvan nē Timoteo, cayxhaalan gui'ch guie par lējt rlliladxidi Jesucrist luguedx Tesalónica, lējt najdi xbejn dux Dad ree Dios nē xbejn Dad Jesucrist. ² Dux Dad ree Dios nē Dad Jesucrist gúinle' lējt yabe'cdxe tēē reeman luxdoodi.

Rudēēd Pab quixtēē loj Dios

³ Guixie guixie radēēn quixtēē loj Dios por lējt compniar raliduladx ree Jesucrist, din zian rayal yaguieenan guial mazri cusnuu rlliladxidi laaman, abi' tijb gajdi mazri ma rēn lasa'di. ⁴ Zeel dád nix yu' du luxdooñ raza'tan lējt loj gra ree xbejn Dios, raguie'chan loj reeman pacens ni rajpidi nē gualrlliladx ni rajpidi, rdaan tēēdi gra ree ni rújnñē ree bejn lējt nē gra ree gualzi ni cadēdidi. ⁵ Zian rguien xnejz naj xgualguxtis Dios, guial gulejman lējt din yayalidi lod rniabeeman, din por laan cadēdidi gualzi.

⁶ Abi' guial gra ni rújn Dios naj xnejz, zeel gudēēdaman casti gra ree b́en cudēēd lējt casti. ⁷ Guiaád lējt cadēdidi gualzi yan, guneeman lējt gualraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlanan b́en ca' ree mazri gualrniabee. ⁸ Dxel gudēēdaman casti b́en ad bayagbeet ree Dios, b́en ad guyēnt ree nuzoob xtiidxza'c Dad Jesucrist. ⁹ Gudēēdaman laa reeman casti tiblayaa, su reeman zijt par Dios nē par xgualrniabee za'cdxoonman. ¹⁰ Zian gac dxej ni gui't Dad Jesucrist, din guza't ree bejn laaman zagdxe por ree xbejnman, yadxa tēē loj gra reeman laaman, abi' nē lējt, din ma bililadxidi xtiidxaman ni badün lojdi.

¹¹ Zeel ad racwēēz rarejdx ranaaban Dios por lējt din gagnēman lējt guibandi zi'c rayal, zi'c guredxaman lējt guibandi. Ranaab tēēn lojman guial con xgualrniabeeman gac cumplid gra xixgabzagdxdedi nē gra ni rújnidi guial rlliladxidi laaman. ¹² Abi' zian guiliesidi xvalor Dad Jesucrist, guiaád laaman guilies xvaloridi guial laaman con dux Dad ree Dios rēn reeman dunuj ree.

2

Gulüüloj b́en ca' xgualrniabee xinxab

¹ Yan, compniar raliduladx ree Dad Jesucrist, xcwent guial gui'taman stijb nē guial yadxaag ree con laaman, raza'can lējt liaadx, ² ad bal tiēbidi tibrajtzi gusquiee ree bejn lējt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian. ³ Ad tiēbidi chu gusquiee lējt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb b́en güün ganax ni rēn xinxab, b́en ma naj par gabijl. ⁴ Laagajc laaman guilies xvalor, abi' yalenman gra ni nünbee bejn zi'c Dios nē gra ni rnaijchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

⁵ Gol basaaladx guial zian rnin lojdi chi guzunē'n lējt. ⁶ Abi' yan lējt ma ragbee chu cutēē chitēē gulüülojman, la'tgaj guidxin dxej rayal gulüülojman. ⁷ Ma cayajc ree xgabmal guin, per yu' b́en cutēē gac reen cumplid. Chi ma bisüd b́en cutēē guin, ⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnēman gunidlojman laaman. ⁹ Benmal guin por xinxab gui'taman, abi' dád gapaman gualrniabee. Güünman zien ree ni yadxalój ree bejn, güün tēēman zien ree milagr par gusquieeman. ¹⁰ Con gralój ree ni mal gusquieeman b́en canijt ree loj Dios, guial ad guyēnt reeman ad cwējb tēēt reeman nililadx reeman ni diidxli zile' nuslaa laa reeman loj dol. ¹¹ Zeel ruslaa Dios gusquiee gra ree ni guin laa reeman, abi' guilliladx reeman ni ad najt ni diidxli, ¹² din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

Sudxi'ch reeman loj ni rlliladx reeman

¹³ Compniar, rēn Dad Jesucrist lējt. Zianczi rayal yadēēn quixtēē loj Dios por lējt, din diizd guia'xchej ma bacaabeeman lējt din laadi loj casti, guial ma nayadi por xSprijt Dios nē guial ma bililadxidi ni naj diidxli. ¹⁴ Par zian gurejdx Dios lējt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tēē ni balüün lējt chi badxu'nē'n lējt, nē ni ma banan lojdi loj gui'ch ren. ¹⁶ Abi' Dad Jesucrist gajc nē dux Dad ree Dios b́en rēn dunuj ree, b́en ragu' du luxdoo ree zianczi, b́en banee tēē ni ralējz ree

guial najman benza'c, ¹⁷ laaman yagu' luxdoodi gagnè tëëman lëjt din sudxi'chidi din gra ni guinieedi güün tëëdi gac zagdxë.

3

Rën Pab cwedx guiniab reeman Dios

¹ Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxë zi'cgajc beendi. ² Gol gurejdx gunab tëëman din yabëëman dunujn loj ree benmal, loj ree bendxuudx ad nabant xnejz, din ad grat bejn rliidx xtiidx Dad Jesucrist. ³ Per laaman zianczi rüjn xtiidxaman cumplid, abi' laaman gagnè lëjt din sudxi'chidi, guinia tëëman lëjt chitëë güündi ni mal. ⁴ Dunujn rayagbeechaaw guial laaman cayagnè lëjt cayüjndi gusnuu tëë güündi ni banan lojdi. ⁵ Gagnëman lëjt din guiëndi bejn ree zi'c rën Dios laa reeman gap tëëdi pacens zi'c gojp Dad Jesucrist pacens.

Rijn naguiejn güün bejn dxiin

⁶ Yan, compniar raliduladx ree Jesucrist, por laaman ranabeen lëjt: Gol bariica loj chutëëz compniar gaz za' ad rënt güün dxiin, bën ad naban tëët zi'c balüün lëjt. ⁷ Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, ⁸ achu tëët banee xlia' ni badaawan. Lëjt ragbee guial dád baguieenan naguiejn baguieenan dxiin, dxëj guiaal baguieenan dxiin chitëë yalu'n xchiindi guial güündi dunujn yudar din gac yabajnan. ⁹ Majsi zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güündi zi'c raguieenan. ¹⁰ Chi badxu'në'n lëjt, ranan lojdi: Bën ad rënt güün dxiin, ad zajw gajctaman. ¹¹ Per yan baguiejnan guial yu'di gaz za' ad rëntidi güündi dxiin, abi' rudi loj ni ad rayaltidi. ¹² Par bën zii ree dunujn rana ranabee tëën laa reeman por Dad Jesucrist yabedxe reeman, güün reeman dxiin din guiban reeman.

¹³ Guiáad lëjt compniar, ad yaleny'a'di güündi ni naj zagdxë. ¹⁴ Bal yu' tijbidi ad ruzoobt diidx guial güündi ni ranan loj gui'ch guie, gol baguiaa chu benan, ad guchajg tëëdi laaman din yatu lojman. ¹⁵ Per ad guguaadi laaman zi'c tijb bën rdxe'chidi, gol baguiaaman zi'c tijb bijchidi, gol guneenëman din guibanman zagdxë.

Diidx bigra ca ree loj gui'ch guie

¹⁶ Dad Jesucrist bën rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunè lëjt.

¹⁷ Naj, Pab, quijb naj cuca ree lejtr guie par gugajpdiozan lëjt. Zian rünan con gra ree da gui'chan, zian naj ree da lejtran. ¹⁸ Dad Jesucrist güünle' gradi.

Gui'ch yalaj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapóstoł Jesucrist por xguialrniabee Dios b́en rŭjn perdon dux tol ree ńe por Jesucrist b́en rayagbee ree gui't stijb. ² Cuan gui'ch guie par lŭj Timoteo, din par naj lŭj naj zi'cgajc da xi'n'an guial tiblojzi raliduladx Jesucrist. Dux Dad ree Dios ńe Dad Jesucrist gŭinle' lŭj, yayaman lŭj yabe'cdxe t́eeman luxdool.

Ŕeb Pab loj Timoteo xcwent ree b́en rusquiee

³ Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chit́e ruluu reeman bejn ree ni ad najt diidxli. ⁴ Ad chililadx reeman ni rb́eéguijc ree bejn, ad guidxga' t́e reeman ban za reeman, o chu rajc reeman xbengol gual reeman, din ad ni guint ree gagńe laa reeman par gusnuu chililadx reeman xtiidx Dios.

⁵ Canabeen lŭj din gŭin reeman zian din guiguien guial diidxli ŕen lasa' reeman, achat naladx reeman din guiguien t́e guial guidib luxdoo reeman rliladx reeman xtiidx Dios. ⁶ Din yu' reeman ad rŭjntri zian guial ganax ree ni ren ni ad rŭjnt ree sirv rŭ reeman. ⁷ Ŕen reeman gulŭu reeman bejn ree xhienaag naj xley Dios, abi' ni'qui laa reeman ad ragbeet xhie ŕen guiéb ni rníee reeman ni'quid rignia't reeman ni naladx reeman naj zagdxe culŭu reeman bejn ree.

⁸ Dunuj ree rayagbee guial zagdxe naj ley guin par b́en rignia' xhie sirv rŭjnan. ⁹ Abi' rayagbee ree guial ad baneet Dios ley guin par ree b́en naban xnejz niz lojman, baneeman ley guin par t́ed ree bejn casti, b́en naban ree zi'ctzi naj xixgab reeman, b́en ad ruzoobt ree diidx, b́en ad yu'guijct ree Dios, b́en rŭjn ree dol, b́en ad rajpt ree Dios respejt, b́en ad rŭjnt ree nagueijn guien reeman Dios, b́en rugŭjt xdad xníaa, ńe par gra ree b́en rugŭjt bejn, ¹⁰ rŭjn t́een sirv par xcasti ree b́en za'ńe xinguaaaw o b́engunaa ren, par ree xin ruladx lasa' xinguaaaw gajc o b́engunaa ruladx lasa' b́engunaa gajc, ńe par ree b́en rban bejn ree par guto' reeman laa reeman zi'c mojs, ńet́e par ree b́en rusquiee ńe ree b́en ruza't Dios par sudxi'chńe xguialrusquiee reeman ńe par gra ree b́en rŭjn xcontr ni naj diidxli. ¹¹ Diidxli guie ree naj ni źeéd ree loj xtiidxza'cdxoon Jesucrist. Dux Dad ree Dios, b́en rayal respejt, laaman naj b́en basa'nńe naj diidx guin ree din gatiechan laa reen.

Xhienaag baya Dios Pab

¹² Quixt́e Dad Jesucrist laaman cayagńe naj, rajp t́eeman naj confianz abi' bacaabeeman naj par gatiechan xtiidxaman, ¹³ majsi yalaj gunen laaman diidxguijdx abi' guzunaalan b́en rliladx ree laaman din gŭnan laa reeman ni mal abi' dád naya benńe'n laa reeman. Per Dios bayaman naj guial ad bignia'tan ni cayŭnan din gad naj chililadx Jesucrist. ¹⁴ Abi' dád benza'c gojcaman con naj, balŭuman naj xhienaag chililadxan balŭu t́eeman xhienaag guienan Dad Jesucrist.

¹⁵ Diidxli ni ganin ĺejt, rayal chililadx bejn: guial Jesucrist bi't loj guidxliuj par gŭnman xtol bejn perdon, abi' loj gra ree bejn naj naj mazri b́endol. ¹⁶ Per majsi najn mazri b́endol, baya Dios naj abi' gojp Jesucrist naj pacens din gagbee ree b́en chililadx xhienaag rajp Jesucrist pacens par chililadx bejn xtiidxaman, abi' zian gap reeman gualnaban tiblayaa con Dios. ¹⁷ Zeel zianczi rayal yaya'p reeman respejt yaza't t́e reeman zagdxe guial najman rey b́en ad yu't dxej guiét, abi' rajpaman gualrniabee par tiblayaa guial tijbzi laaman naj Dios abi' achut rajc ruguaaa laaman. Amén.

¹⁸ Timoteo, par naj lŭj naj zi'c da xi'n'an zeel rnin lŭj been zi'c gunee reeman xcwentil diidz yalaj, abi' zi'c tijb suldad ni rej loj wadijl ad guidxebil niz loj ree b́en za' ree contr xtiidx Dios. ¹⁹ Guzudxi'ch loj ni rliladxil Jesucrist, been t́e ganaxzi ree xgab zagdxe par gŭinl zi'c rayal. Din yu' ree bejn guial ad rŭjnt reeman zian, yan ma banijt reeman ni rliladx reeman Dios. ²⁰ Zian ma guzajc ree Himeneo con Lejandr, zeel ma bayŭn laa reeman loj satanás din gusiid reeman guial ad rayalt guinee reeman Dios diidguijdx.

2

Xhienaag cwedx guiniab bejn Dios

¹ Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree b́enguidxliuj, gud́eéd t́eédi quixt́e lojman. ² Rayal yarejdx yanaab ree Dios por ree rey ńe por gra ree guxtis loj guidxliuj din chile' yabajn ree zagdxe gusnuu t́e yabajn ree zi'c ŕen Dios. ³ Din laan naj ni zagdxe ni rayuladx t́e dux Dad ree Dios, b́en rŭjn perdon dux tol ree, ⁴ b́en ŕen guial gra bejn gac perdon guidxin t́e dxej gagbee bejn xhie ŕen guiéb xtiidxliman. ⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial

bi'taman loj guidxliuj zi'cgajc tijb bénguidxliuj. ⁶ Gújtaman loj crúzj persi gudixjaman por xtol gra ree bénguidxliuj, zian naj ni balúú Dios bejn chi bidxin dxej bacaabeeman gac zian. ⁷ Zeel bacaabeeman naj gacan xi apóstol Jesucrist din gatiechan xtiidxaman, nè par gusidan bén ad najt ree bén Israel conin naj diidxli, xhie tëë naag chililadx reeman Jesucrist, walín ad rusquieetan.

⁸ Yan rënan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin gualrdxe'ch nè sin wadijl. ⁹ Rën tëën guial ree béngunaa su reeman zi'c rayal, ad tëdlaj suchaaw reeman con or; nè ree perl nè ree vistid zagdxo o guial tëdlaj güünchaaw guidxguijc reeman. ¹⁰ Din mazri zagdxo güün reeman ni naj zagdxo, zi'c rayal güün ree béngunaa ni ma zinal xnejz Dios. ¹¹ Abi' rayal gucaagdiajgzi reeman ache guinee reeman chi rulúú ree xinguaaw xtiidx Dios. ¹² Din ad zatiëëbtan guial gulúú tijb béngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee béngunaa xinguaaw, rayal gucaagdiajgzaman. ¹³ Din Dios, yaloj Adán beenchaawaman, dxelri Eva. ¹⁴ Din ad Adánt basquiee reeman, yaloj Eva basquiee reeman, abi' por gualrusquiee guin beenman dol. ¹⁵ Per zajc gac béngunaa perdon, bal güün xchiinman zagdxo guial najman na, bal gusnuu chililadxaman Dios, guienman bejn ree guiban tëëman xnejz.

3

Xhienaag guiban ree bén rniabee

¹ Gol badxe'guijc da diidxan: Bal chu bén rën gap guialrniabee loj gra ree bén rliidx Jesucrist par gulúúman laa reeman xnejz Dios, zagdxequi naj ni rënman güünman. ² Per bén rajp guialrniabee guin rayal güünman zi'c rayal chitëë chu guinieeguidx laaman. Rayal chu' tijbzi lacheelaman, guibanman zagdxo chu' tëë xquiarguejnman din gap ree bejn laaman respejt. Gacaman benza'c con ree bén rdxin lidxaman, gac tëëman tijb bén rignia' par gulúúman bejn ree. ³ Ad rayalt gacaman bengui', ni'qui bén rguil wadijl ad rayal tëët yaguuilaman mod par tia'man xmlia ree bejn, rayal gacaman benza'c con chutëëz, gac tëëman bén naxanlax ad zazëëbladx tëëtaman mlia. ⁴ Rayal nabee lidxaman zi'c rayal din gulúú ree xi'nman xhienaag gap reex respejt guzoob tëë reex diidx. ⁵ Din bal id rajc rniabee lidxaman, xhieza naag nabeeman bén rliidx ree Jesucrist? ⁶ Zeel tijb bén qui guzulojri rliidx Jesucrist, ad rayalt nabeeman loj ree bén ma rliidx chitëë guilies xvalor gajczaman abi' yayalaman lasa' casti ni bayal xindxab. ⁷ Bén rajp guialrniabee guin xt ree bén ad rliidx Jesucrist rayal güünbee laaman guial najczaman benza'c chitëë yaya'nxtuman abi' güün xindxab laaman gan.

Ni güün ree bén rünj yudar bén rniabee ree

⁸ Yan ziangajc ree bén ma cwabee par güün reeman yudar bén rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guié' tëë reeman, ad yaguil tëë reeman mod par tia' reeman xmlia ree bejn. ⁹ Con xgabza'c chinal reeman ni ma balúú Dios dunuj ree. ¹⁰ Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar bén rniabee ree. ¹¹ Ziangajc ree béngunaa ni ma cwabee par güün reeman yudar, rayal güün reeman zi'c rayal din gap bejn laa reeman respejt ad zaneeguidx reeman bejn, rayal guiban reeman zagdxo abi' güün cumplid xtiidx reeman. ¹² Abi' ree xinguaaw cwabee guin par güün ree yudar bén rniabee loj ree xbejn Cristo, tijbzi lacheel reex rayal chu', nabee tëë lidx reex con xi'n reex zi'c rayal. ¹³ Din bén rünj ree sirv zi'c rayal ad respejtzi rajp bejn laa reeman, sin gualrdxeb ma zile' guiëb reeman xhienaag rliidx reeman Jesucrist.

Naroob naj bén raliiduladx ree

¹⁴ Gagnë Dios chile' guialan guidganan lüj. Per cucas gui'ch guie, ¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, bén ma naj ree xbejn Dios naban, abi' za'dxi'ch reeman rulúú tëë reeman xtiidxliman. ¹⁶ Dunuj ree rayagbee guial dád bén naroob najman, bén raliiduladx ree: Bi'taman loj guidxliuj zi'c tijb bénguidxliuj, rëb xSprijt Dios guial laaman naj bén naya abi' baguiaa ree anjl laaman bi'taman loj guidxliuj. Bre'ch xtiidxaman loj ree bén ad najt bén Israel, guidibczi bililadx bejn laaman abi' baca' Dios laaman xanyabaa.

4

Bén rusa'n ree guialrliidx reeman Jesucrist

¹ Ma bagojnchaaw xSprijt Dios guial zëed ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiiidx ree bénrusquiee nè gra ree ni zëed por xindxab. ² Mazri guidxga' reeman bénrusquiee ree, bén wed rüjnz ree, bén achetri ree rzajc guial rüjn reeman dol din ma naya' reeman zian. ³ Guiëb reeman guial ad najt guial guxhliia ree bejn ad zajw tëët reeman graloj. Per Dios badxe' graloj guialraw par gaw ree bén rliladx laaman, bén ma ragbee ree conin naj diidxli abi' gudëed reeman quixtëe lojman. ⁴ Din gra ni badxe' Dios naj zagdxë, achet ni rayal cwexuu bejn tia'man bal gudëeman quixtëe chi cayawaman laan. ⁵ Din chi rarejdx ranaab ree Dios con xtiidxaman rüjnle'man guijc ni yadaaw ree.

Bén rüjn sirv zagdxë loj Jesucrist

⁶ Zeel bal rulüül bén rliladx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusunuu gusiidil mazri guial loj ni ma rajquel xcwent guialrliladx guin nè ree diidzxa'c ni zinalil. ⁷ Per ad guidxga'l ni rbëëguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios. ⁸ Zagdxë naj par güün bejn graloj ejercijs par gacaman gojl, per loj gra xhietëeznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblyaa. ⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan. ¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rliladx ree laaman.

¹¹ Zian rayal gusiidil bejn ree güjdx tëe loj reeman din güün reeman zian. ¹² Gojp cudad chitëe guiëb ree bejn guial achet sirv lüj guial ad wayajctil bengol. Mejrli been naguiejn din gaquil tijb ejempl par ree bén rliladx Jesucrist, zi'c xhienaag rül diidx, zi'c nabanl, zi'c rën ben ren ree, zi'c rliladxil Dios nëtëe por ree xixgabza'quil. ¹³ La'tgaj guialan, basnuu biil xtiidx Dios loj ree bejn, guneenë reeman balüü tëe reeman xhie rën guiëb xtiidx Dios. ¹⁴ Ad yayanladxil güünl zi'c rayal güünl por quiarguiejn ni banee Dios lojl chi badxiib yaa ree bengol guijquil chi gogbee reeman guial lüj naj bén gule Dios.

¹⁵ Badxe'guijc diidx guie ree din gagbee gra ree bejn guial cusnuu zël delant. ¹⁶ Gojp lüj con ni rusiidil bejn ree. Guzujdxi'ch loj ni ma ragbeel, zian yabëe lüj gajc loj casti yabëe tëel bén cucaagdiaj ree xtiidxil.

5

Xhienaag güün Timoteo con ree bén rliladx Jesucrist

¹ Ad tilnël tijb bengol, badëeman consejw zi'cgajc xdadil, abi' xin naj ree xinguiag, badëe reex consejw zi'cgajc bijchil. ² Ziangajc béngunaa bengol ree badëe reeman consejw zi'cgajc xniaal, abi' biinguiag ree, badëe reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp. ⁴ Per bal tijb béngunaa bizëjb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguix reex ni baslaa xdad xniaa reex laa reex. Din zian naj zagdxë, zian tëe ruladx Dios. ⁵ Béngunaa naj diidxli bén bizëjb, bén ad rajpri chunin loj guidxliuj guie, tijbzi Dios naj bén yu'guijcaman güün laaman yudar dxel ad rucwëëzt rbejdx rniabaman laaman dxej guiaal. ⁶ Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷ Bagojn gra ree diidx guie bén ma rliladx ree Jesucrist chitëe chu guinieeguidj laa reeman. ⁸ Din bén ad rüjnt yudar xcompniar, abi' ni'qui xfamilaman bén zøj ree lidxaman ad rüjntaman yudar, laaman ma basa'n ni rliladxaman abi' piorli najman guial loj ree bén ad rliladxt Jesucrist.

⁹ Ad tia'l laj chutëez béngunaa bizëjb par gac reeman yudar, naabzi ree béngunaa bizëjb bén ma nadëd ree gayojn ijb abi' ad guzunëetaman ben ren la'tgaj naban lacheelaman. ¹⁰ Bal nünbee tëe ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëe lidxaman baya'n ree bejn bal gojcaman benza'c con ree bén rliladx Jesucrist bén bidxin ree lidxaman, bal beenman yudar bén rzagdiaj ree, bal been tëeman naguiejn beenman ganax ni zagdxë.

¹¹ Per ad tia'l laj ree béngunaa bizëjb benguiag ree, din despuejs rën reeman guxhliia reeman abi' ad rüjntri reeman ni rayal güün reeman por Cristo guial rën reeman guxhliia reeman stijb. ¹² Dxel rüjn reeman dol guial ad rüjntri reeman ni ma been reeman compromis con Cristo. ¹³ Abi' tëe ree benguiag guin zë reeman yu yu, zianz rajc reeman costumbr achetdzi rüjn reeman. Abi' ad laatzan, rzuloj ruza't reeman bejn, ru reeman loj xhietëeznin abi' rniee reeman ni ad rayalt guiniee reeman. ¹⁴ Zeel rënan guial bén naj ree béngunaa bizëjb benguiag, mejorli guxhliia reeman stijb, chu' xi'n reeman nabee tëe lidx reeman zi'c rayal, chitëe gudëed reeman mod guinieeguidj ree bén ralen ree dunuj ree

laa reeman. ¹⁵ Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

¹⁶ Abi' bal tijb bén rlladlx Jesucrist naj xfamilaman tijb bén baya'n bizëjb, dxel laaman rayal güün yudar béngunaa bizëjb guin chitëë gacan mazri carg par ree dux compniar ree bén rlladlx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷ Bén rlladlx ree Jesucrist rayal gap reeman respejt bén rniabee laa reeman në ree bén rniee rulüü tëë xtiidlx Dios zi'c rayal, gudëë tëëdi loj reeman gra ni ryaadx reeman. ¹⁸ Din loj xtiidlx Dios rëb: "Ad gudxe'di guijxh ro' ree begui'xh la'tgaj cayüjn reeb dxiin", rëb tëë loj xtiidlx Dios: "Rayal gax bén rüjn dxiin".

¹⁹ Ad guidxga'di ni ruxdiib ree bejn guijc tijb ree bén rniabee ree bén rlladlx Jesucrist, bal id yu' tio'p choon ree bejn rëb guial diidxli naj ni rniee reeman por laaman. ²⁰ Per bal tijb bén ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijc been tëë zi'c ma rnin ad cwel loj ree bejn, tiblojzi been con gra reeman. ²² Gojp cudad cwel tijb bén ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc lüj ruladx ni cayüjnman. Gojp cudad graloj ree dol.

²³ Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayüjn reeman diidz chi gad reeman gudëëd cwent loj Dios, per yu' reeman ad rguient xhie dol cayüjn reeman xt chi yadëëd reeman cwent loj Dios. ²⁵ Ziangajc yu' ree bén ni laa rguien gajc ni zagdxe ni cayüjn reeman, abi' yu' reeman ni'quid rguient ni zagdxe ni cayüjn reeman, per yu' dxej gagbee ree bejn laan.

6

¹ Gra ree mojs rayal gap reeman respejt xpatron reeman chitëë chu guiniee diidxguijdx contr Dios o contr xtiidxaman ni caylüün. ² Abi' bal rlladlx patron guin Jesucrist dxel rayal gap reeman laaman mazri respejt guial nëman rlladlx Jesucrist zi'cgajc laa reeman. Abi' tëë rayal güün xchiin reeman zi'c rayal guial cayüjn reeman sirv tijb xcompniar reeman bén rlladlx Jesucrist compniar ni rën reeman. Zian balüü ree bejn güjdx tëë loj reeman din güün reeman zian.

Guialnaza'c ni naj diidxli

³ Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulüütaman bejn ree, ⁴ najzaman bendxal. Din ruladxaman tildiidxaman abi' ni'quid xnejzt rnieeman, dxel ni zëëd guialnadëdloj, guial rdxe'ch, guial rniee diidxguijdx abi' ad rlladlxtrix lasa' reeman, ⁵ ad rucwëëzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. ⁶ Dad ben rijcw naj bejn chi ma rlladlxaman Jesucrist, per bén za' conform con ni rajptzaman. ⁷ Din achet budnë' ree loj guidxliuj ache tëët zajc yunë' ree chi yayëjt ree. ⁸ Bal raya'p ree ni yadaaw ree në lajd ni yadojt ree con laan rayal yaya'n ree conform. ⁹ Per ree bén rzëëbladx gac reeman rijcw loj guidxliuj guie ad rilet' sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. ¹⁰ Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rlladlx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc bén naxanladx, gojp pacens guyën tëë ree ben ren. ¹² Been da't naguiejn guizudxi'ch loj ni rlladxlil xtiidlx Jesucrist. Ad gusëëbil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rlladxlil Jesucrist. ¹³ Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin guialrdxeb loj Poncio Pilato, naj rniabee lüj ¹⁴ din guzoobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. ¹⁵ Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëëman gra guialrniabee, bén naj xrey ree rey naj tëëman xDad ree dad. ¹⁶ Bén ni ad yu't dxej guië't. Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguaiaa bejn laaman. ¶Par laaman naj respejt në guialrniabee par tiblayaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tēē reeman guial ni rajp reeman najn par tiblayaa, ðin guialnaza'c ni rajp bejn yu' dxej yaran. Mejrli cu'guijc reeman Dios bén naban ðin laaman razaladx da't dunuj ree graløj ðin chu' du luxdoo ree nix. ¹⁸ Güjdx loj reeman ðin güün reeman ni zagdx, güün reeman zien ree ni rüjn sirv, cu' tēē luxdoo reeman zagdx güün reeman yudar bénprob ree. ¹⁹ Abi' zian guto'p reeman guialnaza'c ni güün laa reeman yudar loj ree dxej ni zēēð ðin yayal reeman guialnaban tiblayaa xanyabaa.

Xconsejw Pab

²⁰ Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. ²¹ Din yu' ree bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

Gui'ch barojp guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëëdaman guialnaban tiblyaya loj ree bën rliiladx Jesucrist. ² Naj caxhal gui'ch guie par lüj Timoteo bën rënan zi'c da xi'nän. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guiairulüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con gudid luxdon zi'c been ree da bengol gulalan been reeman laaman sirv. ⁴ Chi rusaaladxan ni biinl, ma rën nejzdoon guguan lüj din yayu luxdon zagdx. ⁵ Yu'guican guial lüj diidxli rliiladxil Jesucrist, yaloj xnaxüjsil Loida con xniaal Eunice bililadx laaman zian, zeel ragbeeçaawan guial ziangajc rliiladxil laaman.

⁶ Zeel rmin lojl, been naguiejn din guiguen quiarguiejn ni banee Dios lojl chi badxib yan guijquil. ⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdx. ⁸ Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tëdil guial guitie'chil xtiidxza'c Jesucrist. ⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidx chi gad guidxliuj gacçaaw beenman xgab guial por Jesucrist gulüüman dunuj ree xhienaag rënman dunuj ree. ¹⁰ Yan bi't Jesucrist bën güit por dux tol ree, rayagbee ree guial diidxli rën Dios dunuj ree. Abi' Jesucrist naj bën biquiej guialrniabee loj guialgüjt abi' zian biguiejn guial yu' guialnaban, guialnaban tiblyaya par ree bën rliiladx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëën laan bën ad najt ree bën Israel, ¹² abi' por zian cadëëdan guialzi ni cadëëdan. Per ad ratutan por zian, din naj ragbee chu rliiladxan, abi' ragbeen guial laaman rajp guialrniabee par cu'çaawaman ni basa'nän lojman xt dxej ni gui'taman stijb.

¹³ Badxe'guicj binal tëë ree diidxza'c ni ma balün lüj, tant zi'c rliiladxil Dios në zi'c rën ree lasa'l guial ma nayajc ree tijbzi con Jesucrist. ¹⁴ Abi' con xyudar xSprijt Dios bën naban con dunuj ree, gojp ni banee Dios güünl.

¹⁵ Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes. ¹⁶ Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguuib, ¹⁷ naabzi bi'taman Rom baguuilaman naj xt lodzi badxejlanan naj. ¹⁸ Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

2

Zi'c tijb xsuldad Jesucrist

¹ Guiáad lüj xi'ngaan, guzujdxi'ch loj yudar ni raya'p ree por Jesucrist. ² Abi' ni biguiejn rën delant loj zien ree bejn, balüün loj ree bën diidxli rliiladx, bën ni zajc gulüü ree ben ren.

³ Zi'c tijb suldadza'c, zian gudaan ree guialzi, zi'c najl xbejn Jesucrist. ⁴ Ni'qui tijb bën naj suldad ad rut loj ni ad najt xcwent ree suldad par chile' yaya'nman zagdx loj bën rniabee laaman. ⁵ Ziangajc bën ni rguijt xhie tijb nin, rayal quitaman xnejz din chile' tia'man prem. ⁶ Abi' bën rüjn dxiin dajn, yaloj xgaj rüjn da'taman dxiin din gac yaca'man guialnaza'c. ⁷ Been xgab ni canin lojl, abi' Dad Jesucrist gagnë lüj din chignia'l gra. ⁸ Basaaladx Jesucrist, bën güit abi' babanman, bën zëë loj xdiaa rey Davi, zian naj xtiidxza'c aman ni catiechan. ⁹ Abi' por zian cadëëdan guialzi, xt naxiin lën ladxguuib zi'c tijb benmal, per xtiidx Dios ad naxitan. ¹⁰ Zianan zeel rdaanan gra par günan yudar bën ni ma naj ree par Dios, din gap reeman perdon por Jesucrist yayal tëë reeman guialnaban za'cdxoon ni naj par tiblyaya.

¹¹ Wali'qui ree diidx ni rëb:

Bal ma bayëjt ree con laaman,
ziangajc yabajn ree con laaman.

¹² Bal radaan ree xhietëez ni raza'c ree,
ziangajc yanabee ree con laaman.

Bal raguie'ch ree guial ad naguieenbeet reeman,
ziangajc guiëbaman guial ad nünbeetaman dunuj ree.

¹³ Bal id raguieen ree cumplid dux tiidx ree,
per laaman rüjn cumplid xtiidxaman

din ad zajct guidxaa zi'c najman.

Tijb bén raya'n zagdx con xchiin

¹⁴ Gújdx loj ree bejn din gusaaladx reeman ni guie ree, abi' por Dios gújdx loj reeman guial ad rdilidix reeman por ree ni ad rújnt yudar, ruxhiinzan bén ni riguiejn ree laan. ¹⁵ Been xt lod chile' güünl din yaya'nl zagdx loj Dios, din chibiguil lojman zi'c tijb bén ni rújn dxiin abi' achet ni gustu laaman, guial cayüjn xnejz con xtiidx Dios. ¹⁶ Ad güldiidx ni ad rújnt sirv, ni ad rújnt yudar bejn ree. Din bén rújn ree zian zi'cri zinal reeman nejz mal, ¹⁷ abi' xtiidx reeman naj zi'c tijb guialguijdx ni rigaa. Lasa' ree bén guin naj Himeneo con Fileto, ¹⁸ din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rújndxa reeman xguialrliladx tio'p choon ree bejn. ¹⁹ Per xtiidx Dios ad zajct guidxaa ni zi'c tijb guial ni zojbdxi'ch. Abi' loj xtiidx Dios rëb: "Dios nünbee bén naj ree xbejnman", rëb tëë loj xtiidxaman: "Graczi ree bén rëb guial nünbee reeman Dios rayal gusa'n reeman gra ni mal."

²⁰ Lën tijb yu narooob, ad ganax ree ni or yu' o ni plajt, nëgajc ree ni goc con yag në con bajn yu'. Din yu' reen rújn sirv guixie guixie, yu' tëë reen ma naj dxej rújn reen sirv. ²¹ Yan ziangajc bén ni rújn naguiejn guiban naya, laaman naj zi'c ni rújn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdx.

²² Zeel basa'n xixgab xinguiag, xgab ni ad rújnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. ²³ Ad tildiidxil por tijb ni ad zújntil gan, o por tijb ni ad lasajct par tildiidxil, din lúj ragbee guial por zian rzuloj wadijl. ²⁴ Abi' tijb bén ni rújn sirv Dad Jesucrist ad rayalt gacaman bén ruladx wadijl, rayal gacaman benza'c con chutëëz, rayal gacaman tijb bén ni gac gulüü ree bejn, gacaman bén pacens ²⁵ guzuxnejz tëëman con ree diidxzagdx bén ni rújn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli. ²⁶ Par laa reeman loj xtramp xindxab ni rniabee laa reeman güün reeman ni rënnan.

3

Xhienaag gac ree bejn dxej ni bigra ree

¹ Rayal tëë gagbeel Timoteo guial dxej ni bigra ni zëëd ree, dád nawëëg gacan par ree bejn guial guiban reeman. ² Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, ³ ad zëntri reeman ad zaya tëëtri reeman bejn ree. Ganax diidx rusquiee guiniee reeman bejn ree, ad zucwëëz güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdx. ⁴ Yayü reeman laagajc ree bén ni rajp laa reeman confians, sin guialrdxeb guiniee reeman xhietëëz ni gui't guijc reeman, dád guilies xvalor reeman, mazri ma güün reeman ni rëntzi reeman guial loj zi'c rën Dios. ⁵ Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian. ⁶ Din loj reeman no'ch bén ni ru ree lidx ree bejn, abi' rújn reeman gan béngunaa ni naban ree con gadxagayaa ree dol, con gadxagayaa ree xgab ni ad rújnt sirv, tibrajtzi rliadx reeman laa reeman ⁷ béngunaa guin ree zianczi rusiidx reeman, per ad ragbeetzci reeman ni diidxli. ⁸ Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman. ⁹ Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

Rniabee Pab sudxi'ch Timoteo loj ni basiidaman

¹⁰ Per lúj Timoteo, ragbeel zagdx xhie rulün bejn ree, xhienaag naban, xhienaag naj da xgaban, xhienaag rliadxan, xhienaag ra'pan pacens, xhienaag rënan bejn ree, xhienaag rdaanan, ¹¹ xhie ma been ree bejn naj, xhie tëë ree guialzi ma gudëëdan. Lúj ragbee xhienaag guza'can luguiedx Antioquia, Iconio con Listra. Dád ma guzaagdiajn por gra ni ma been ree bejn naj, per Dios babëë naj loj gra ree guialrzagdiaj guin. ¹² Abi' dunuj ree rayagbee guial gra ree bén ni rën guiban zi'c rën Dios guialrliladx reeman Jesucrist, naj sagdiaj reeman por ni güün ree bejn laa reeman. ¹³ Per ree ben mal con ree ben rusquiee, zi'cri zinal reeman nejz mal, rusquiee reeman bejn ree rusquiee tëë laagajc reeman.

¹⁴ Per lúj basnuu guzudxi'ch loj ni ma basiidil, në loj ni ma rliadxil, din lúj ragbee chu ree nin basiid lúj. ¹⁵ Abi' lúj diidx xindool nünbeel xtiidx Dios, diidx ni zile' güün lúj yudar gagbeel xhienaag naj perdon ni zëëd por guialrliladx Jesucrist. ¹⁶ Gra ni zëëd loj xtiidx

Dios, por Dios zëedan. Abi' rüjnan sirv par gusiid bejn ree, par gudëe bejn consejw, par guzuxnejz bejn bejn ree, në par gagbee bejn xhienaag rayal guibanman, ¹⁷ din gagbee xbejn Dios guidiblagaa din güünman graloj ni naj ni zagdxë.

4

¹ Delant loj Dios në delant loj Jesucrist, bën gui't zi'c tijb rey par güünman guialguxtis loj ree bën naban në loj ree bën ma güjt, naj rni lojl, ² gutie'ch xtiidx Dios. Been naguiejn guneë xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bën ad ruzoobt diidx, badëë tëë consejw loj ree bejn, balüü reeman sin guial yalenyal. ³ Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguiil reeman zien ree bën guliü laa reeman ganax ni ruladx reeman gucaagdiajg reeman. ⁴ Ad zidxga'tri reeman ni naj diidxli, mazri ma guidxga' reeman ni rbëëgüijc ree bejn. ⁵ Per lüj Timoteo, gubajn nadëdguien, gudaan xhietëëz guialrzagdiaj tädil, gutie'ch xtiidxza'c Jesucrist, been mandad ni baneë Dios lojl güünl.

⁶ Din naj zamer gugüjt reeman naj, ma zidbig guialgüjt par naj. ⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni riladxan. ⁸ Yan prem ni rayalan ma cabëzan naj, prem ni guneë Dad Jesucrist lon chi guidxin dxej, bën rüjn guialguxtis zi'c rayal. Abi' ad lotzan guneeman prem guin, në loj gra ree bën yu' luxdoo nix cabëz reeman laaman.

Ni rayal güün Timoteo

⁹ Been naguiejn diob guidganajl naj, ¹⁰ din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. ¹¹ Tijbzi Lujc za' con naj. Chi gui'til tanë Marcw din zile' güünx yudar gutie'ch xtiidx Dios. ¹² Tíquico ma guxhalan laaman luguiedx Éfeso. ¹³ Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëël guidnël da gui'ch reen.

¹⁴ Lejandr bën naj herrer, dád zien ree ni mal ma beenman naj, per con Dios yaguijxaman gra ni beenman. ¹⁵ Gojp cudad con laaman, din laaman dád rüjn xcontraman ni ranee ree.

¹⁶ Yaløj chi guzun loj ree guxtis achutczì been naj yudar, graczi reeman guro'nladx naj. Gagnë Dios ad zidxga'taman ni been reeman. ¹⁷ Per Dad Jesucrist been naj yudar baneë tëëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. ¹⁸ Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczì! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesiforo. ²⁰ Erasto baya'nman Corinto, guiáad Trófimo ragxuuman basa'nan laaman luguiedx Mileto. ²¹ Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën riladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch guxhaal San Pabl loj Tito

Rxhiaal Pab xtiidx Dios

¹ Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaag chililadx reeman laaman din gagbee tëë reeman diidxli xhienaag guiban reeman delant loj Dios, ² din yu'guijc ree guial zian yaya'p ree guialnaban tiblyaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' denuj ree rayagbee ree zagdxe guial ad rnieet Dios diidx rusquiee. ³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon. ⁴ Cuccan gui'ch guie par lüj, Tito, guial najl zi'c da xi'n'an guial tiblojzi raliduladx Jesucrist. Dux Dad ree Dios con Jesucrist bén günt por dux tol ree, yaya reeman lüj, güünle' reeman lüj yabe'cdxe tëë reeman luxdool.

Dxiin ni been Tito guiedx Creta

⁵ Naj basa'n lüj niz Creta din güünl ni ryaadx günan ni. Abi' tijbgaj luguedx gucaabeel bén ni nabee ree loj ree xbejn Cristo zi'c ma rnin. ⁶ Chi gucaabeel laa reeman rayal gucaabeel bén ni naban ree zi'c rayal chitëë chu guinieeguijdx laaman, bén ni yu' tijbzi lacheel, rililadx tëë ree xi'nman Jesucrist, bén ni nünbee ree bejn guial ad nabant ree xi'nman zi'ctzi rën reex ad najt tëët reex xin rusagloj. ⁷ Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengu', ni'qui ben ruladx wadijl, ad zaguuil tëëtaman mod xhienaag tia'man xmilia ree bejn. ⁸ Rayal gacaman bén ni gudëë lidx yaya'n ree bejn chi rüjn naguijn, bén ruladx güün ganax ni zagdxe, gac tëë nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman. ⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tëëman bén ni rnieeguijdx ree xtiidxli Dios.

¹⁰ Din dád zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin. ¹¹ Lasa' ree bén guin ad rayaltri yatiëëb ree guluü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

¹² Tijb gajc bén ladx reeman bén rëb reeman naj bén badëë xtiidx Dios loj ree bejn, laaman rëb guial ree bén Creta ganax diidx rusquiee rniee reeman, dád nadoxh reeman, dád bén nala naj reeman abi' achetctzi rën reeman güün reeman. ¹³ Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, ¹⁴ ad guidxga'ri reeman ni rbëëguijc ree bén Israel, ad güün teë reeman ni rniabee ree bén ni ma guro'nladx ree ni naj diidxli.

¹⁵ Bén naya ree xquiarguejn, achet xgab mal rüjn reeman. Per ree bén rüjn ganax xgab-dxuudx, bén ad rililadx, achetctzi xgab zagdxe rüjn reeman guial ad nayat xquiarguejn reeman, ganax ree xgab mal yu' guijc reeman. ¹⁶ Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tëë reeman, ni'qui tijb ni rüjn sirv ad rajct rüjn reeman.

2

Ni rayal guluü Tito

¹ Per lüj Tito, balüü ree bejn gra zi'c tal naj xtiidxza'c Dios. ² Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tëë reeman xhietëëz ni sac reeman. ³ Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal guluü reeman bejn ree xhienaag naj ni zagdxe, ⁴ rayal guluü reeman béngunaa guiag ree din guiën lacheel reeman con xi'n reeman, ⁵ din guiban tëë reeman naya delant loj Dios, nadëdguien, guinia lidx reeman, gac reeman benza'c guzoob tëë reeman xtiidx lacheel reeman chitëë chu guinieeguijdx xtiidx Dios.

⁶ Ziangajc lüj Tito, badëë consejw loj ree xinguaaw guiag din guiban reex nadëdguien. ⁷ Been naguiejn din güünl gra xnejz din guguiaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, ⁸ con ganax ree diidx zagdxe chitëë xhie

gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxelj gudxiib reeman duguij ree.

⁹ Badëë tëë consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. ¹⁰ Ad cwan reeman xhie xieen xpatron reeman, gac reeman bén confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

¹¹ Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. ¹² Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie ¹³ la'tgaj caylëjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. ¹⁴ Laaman gü't por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

¹⁵ Gra ni ma rnin lojl balüün laa reeman sin guialrdxeb badëëd reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

3

Ni rayal güün ree bén rliiladx Jesucrist

¹ Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiajg susin tëë reeman par güün reeman ni naj zagdxe.

² Ad guinieeguijdx reeman bejn ree, ad quuil reeman wadijl, gac reeman benza'c në bënchaawladx con chutëëz bënan.

³ Gocli nëgajc dunujn baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman.

⁴ Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën tëëman bejn. ⁵ Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. ⁶ Por Dad Jesucrist bén baguijx por dux tol ree, Dios bazaladx dunuj ree zro' da't xSprijtaman. ⁷ Dxel zi'cgajc laaman ma nulabaman dunuj ree sin dol guial najman benza'c, yalay ree guialnaban tiblayaa ni ralëjz ree.

⁸ Laan naj diidxli. Zeel rënan gusnuu gugojnl diidx guie ree bén ni rliiladx ree Dios din güün reeman naguiejn güün reeman ni naj zagdxe. Abi' nine ree naj ni zobjloj në ni güün sirv par gra ree bejn. ⁹ Per ad guidxga'l diidx ni ad rüjnt ree sirv ni rnëe ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gulal ree bejn. Ad guidxga' tëël bén ni rdildiidx ree por xley Moisejs, din ad najtan ni zobjloj achet tëët lasajc ni rnëe reeman, achetzi sirv rüjn ree ni guin.

¹⁰ Bal por tijb lëjt rzuloj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi. ¹¹ Din lüj ragbee guial lasa' ree bén guie ma guro'nladx reeman ni naj diidxli abi' laagajc reeman cunijt laa reeman por xtol reeman.

Ni rayal güün Tito

¹² Chi gaxhalan Artemas o Tíquico lod zobjbil, been da't naguiejn tagnaj naj luguiedx Nicópolis, din ni ma benan xgab gadëëdan tiamp nayaag. ¹³ Been tëë yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitëë xhie guiyaadx reeman. ¹⁴ Në ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitëë guiban xlia'zi reeman.

Diidx bigra ca ree loj gui'ch guie

¹⁵ Gra ree bén za' con naj rugajpdioz reeman lüj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

Gui'ch guxhaal San Pabl loj Filemón

¹ Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayèn da'tan lüj. ² Raxhaal tëën gui'ch guie par gra ree bèn rililadx Jesucrist bèn rado'p ree lidxil, në par Apia nètèè par Arquipo, bèn naj dux compniar ree caytie'ch ree xtiidx Jesucrist. ³ Dux Dad ree Dios në Dad Jesucrist güünle' lëjt yabe'cdxe tëè reeman luxdoodi.

Rudëë Pab quixtëë loj Dios por Filemón

⁴ Beegaj chi rbedx rniaaban Dios rudën quixtëë lojman por lüj, ⁵ din ma cwa'n ruson guial dád rën rililadx tëël Dad Jesús dád rën tëël gra ree bèn ma naj xbejn Dios. ⁶ Rniaab tëën lojman guial lüj cayüjn dunujn yudar par yatie'ch ree mazri xtiidx Jesucrist, gusnuu gagbeel gra ni zagdxe ni raya'p ree guial ma nayajc ree tijbzi con Jesucrist. ⁷ Dád nix yu' luxdon rabaat tëën guial rën dux compniar ree bèn rililadx ree Jesucrist, din por lüj bijch ma bayu luxdoo reeman zagdxe.

Rniee Pab por Onésimo

⁸ Zeel majsi ra'pan guialrniaabee par ganin conin rayal güünl guial najn tijb xi apóstol Jesucrist, ⁹ per guial rayèn du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist, ¹⁰ rniaaban lojl por Onésimo, bèn naj zi'c da xi'n'an guial ma bililadxaman xtiidx Jesucrist ni ben lojman lën ladxguuib guie.

¹¹ Gocli achet sirv been Onésimo lüj, per yan zi'c rünman naj sirv ziangajc güünman lüj sirv. ¹² Yan caydxi'n laaman lidxil, gunajchi'man zi'c rniaajchi'l naj. ¹³ Guyënan nizujman con naj din nünman naj yudar luar lüj, la'tgaj yu'n ladxguuib guial rtiechan xtiidx Jesucrist. ¹⁴ Per ad guyëntan nünan xhienin sin xtiidxbeel din xhietëëz favor güünl por naj ad züjntilan nagueijn, güünlan guial guiën. ¹⁵ Bal brii Onésimo lidxil tiblädëd, per gojc zian din chile' sunëman lüj tiblyaa, ¹⁶ per ad zi'ctri tijb mojs, mazri zagdxe guial loj tijb mojs, zi'c tijb bijchil bèn rën. Dád rënan laaman, per lüj rayal guiën laaman mazri ad zi'ctzi tijb bejn, rayal guiën laaman zi'c tijb bijchil por Jesucrist.

¹⁷ Yan bal walil nayajc ree compniar por Jesucrist, baca' Onésimo gunaladx naj gajcan. ¹⁸ Bal yu' xhie beenman lüj, o bal yu' xhie ralaman lojl, naj yaguix laan. ¹⁹ Abi' naj Pab, quijb naj cuca diidx guie ree: Naj yaguixan, majsi ruluü ad rüjnt nagueijn ganin lojl din gusaaladxil guial xt xguialnabanl rali lon. ²⁰ Yan been naj favor guin guial rën Jesucrist, zian bagu' luxdon guial nayajc xbejn Jesucrist.

²¹ Naj caxhal gui'ch guie lojl abi' ragbeechaawan guial guzoobil da diidxan, ragbee tëën guial mazri naj ni güünl guial loj ni canin lojl. ²² Been tëè porvinid lënu lidxil lod yaya'n'an, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafra, bèn yu'në'n ladxguuib guial ratie'chan xtiidx Jesucrist, rugajpdiozaman lüj. ²⁴ Nëgajc Marcw, Aristarco, Demas në Lujc, bèn cayüjn gajc ree naj yudar caytie'chan xtiidx Jesucrist në reeman rugajpdioz lüj. ²⁵ Dad Jesucrist güünle' lëjt.

Gui'ch par ree bèn Hebreos

Ma guneë Xi'n Dios xtiidx xDadaman

¹ Tiamp gual, Dios guneenë ree dux béngulal ree zien volt në gadxagayaa mod por ree bèn badëë xtiidx Dios loj ree bejn, ² per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj por Xi'nman. Abi' gra basa'n loj Xi'nman. ³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por gualrniabee ni rajpaman.

Xi'n Dios naj mazri bèn zobjloj guial loj ree anjl

⁴ Zianan zeel laaman naj mazri bèn zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bèn rajp gra gualrniabee ⁵ Din ad yu't dxej rëb Dios loj ree anjl:

Lüj naj da xi'nan,

abi' diizd yan gulün guial lüj naj da xi'nan.

Achut tēët loj anjl rëbaman:

Naj gac Xdadil, abi' lüj gac da xi'nan.

⁶ Per chi guxhaal Dios Xi'nman loj guidxliuj, Xi'nman bèn rajp gualrniabee zi'cgajc laaman, dxel rëbaman:

Gra ree da anjlan,

gol guyën da Xi'nan, gol gojp tēëman respejt.

⁷ Abi' chi guneë Dios por ree anjl, rëbaman:

Naj rün ree da anjlan zi'c bi, rün tēën laa reeman zi'c bäl.

⁸ Per por Xi'nman rëbaman:

Dad Dios, xgualrniabeel naj par tiblayaa,

abi' guidib tiamp nabeel zi'c rayal.

⁹ Lüj ruladxil ni naj zagdxë

abi' rdxe'chil ni mal.

Zeel Dios bèn naj xDiosil

baneeman lüj mazri guial rabaa guial loj gra ree bèn za'nël.

¹⁰ Rëb tēëman:

Dad, diizd yaløj lüj been guidxliuj në xanyabaa

con gra ni yu' loj reen.

¹¹ Gra reen yu' dxej nit reen,

per lüj ma nabanl tiblayaa.

Gra reen yayox zi'c tijb lajd,

¹² gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per lüj ad yu't dxej guidxaa zi'c najl

abi' zianczi gapil guialnaban.

¹³ Ad yu't dxej rëb Dios loj tijb ree xianjlaman:

Gurej da ladbeen xt günan gan nabeel bèn rdxe'ch ree lüj.

¹⁴ Din gra ree anjl sprijt cayün ree sirv loj Dios, abi' rxhiaalaman laa reeman din güün reeman yudar bèn ni gap ree guialnaban tiblayaa delant loj Dios.

2

Ad yasa'n ree diidx ni yabëë dunuj ree loj dol

¹ Zeel rün nagueijn yayidxga' ree xtiidx Dios ni ma bacaagdiaj ree chitëë yasa'n ree xnejzaman ni ma zunaal ree. ² Din zi'c goc cumplid gra xtiidx Dios ni guneë ree anjl diizd gocli, bèn ad bazoobt diidx, bèn been ree dol, laa reeman bayal casti ni rayal reeman.

³ Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaløj, abi' ree bèn bigueijn laan, laa reeman bagojn dunuj ree. ⁴ Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaløj bejn, zian ma balüü Dios guial ni diidxli naj ree diidx guin.

Jesucrist rabëë bejn loj dol

⁵ Dios ad badëëtaman gualrniabee loj ree xianjlaman par nabee reeman lod yaya'p ree guialnaban cüb ni cayza't ree, ⁶ din yu' tiblajt loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs ma beenl laaman bèn zobjloj,

badëel guialrniabee lojman din nabeeman gra ree ni beenchaawil,

⁸ abi' gra basa'nl lojman.

Chi badëe Dios guialrniabee lojman par nabeeman gra, achetctzi ni baya'n ni ad zanabeetaman majsi dunuj ree sta ad cayguiaa ree guial nabeeman gra. ⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respejt por guialzi ni gudédaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudéd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. ¹¹ Bèn ma naya ree delant loj Dios, por Jesucrist naya reeman. Abi' tant Jesucrist tant ree bèn ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. ¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdx.

¹³ Rëb tëeman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nman xin bazaladx Dios naj.

¹⁴ Abi' zi'c bénguidxliuj tibloj najman rejn con bëel, ziangajc gojc Jesucrist chi bi'taman loj guidxliuj persi gojc güjtaman, abi' por xguialgütaman beenman gan loj guialrniabee ni gop xindxab loj guialgüjt. ¹⁵ Zian beenman persi babëeman bejn ree loj guialnadxeb xieen guialgüjt, bèn ni guidib tiamp ni naban reeman rdxeb reeman guialgüjt zi'c rdxeb bejn xpatronman. ¹⁶ Din laaman ad bi'ttaman loj guidxliuj par gagnëman anjl ree, bi'ttaman par gagnëman bèn naj ree xdiaa Abraham. ¹⁷ Zeel gojcman zi'cgajczi bénguidxliuj, persi bidxin dxej gojcman tijb bixhioz zobjloj delant loj Dios, bixhioz ni raya bejn, bèn rüjn tëe cumplid xtiidx Dios persi gojc gudijxaman por xtol ree bejn. ¹⁸ Abi' guial laagajcman guzagdiaj been tëe xindxab guial ad zuzoobtaman xtiidx Dios, zeel laaman zajc gagnë ree bèn ni cayüjn xindxab naguiejn güün reeman dol.

3

Jesús naj mazri bèn zobjloj guial loj Moisejs

¹ Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guic Jesucrist guial laaman naj bixhioz zobjloj, bèn raliduladx ree, bèn guxhaal Dios loj guidxliuj. ² Din Jesucrist bazoobaman xtiidx Dios bèn bacaabee laaman zi'c bazoob Moisejs xtiidx Dios delant loj ree bèn Israel. ³ Per mazri rayal Jesucrist respejt guial loj Moisejs guial mazri zobjlojman, zi'c tijb bèn ni rüjn yu mazri ruza't reeman laaman zagdx guial loj yu guin. ⁴ Gra yu yu'czi tijb bèn rüjn laan, per Dios laaman been gra ni yu'. ⁵ Abi' Moisejs bazoobaman xtiidx Dios, beenman sirv lojman chi badëédaman xtiidxaman loj ree bèn Israel persi bagojnman laa reeman ni rëb Dios. ⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yaleny'a' ree abi' yalëez ree xt dxej bigra.

Gol guzujdxi'ch loj xnejz Dios

⁷ Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

⁸ ad cwexuudi zi'c been ree bèn ad bacaagdiajgt xtiidxaman

chi been reeman laaman prueb chi guzu reeman loj yujbidx.

⁹ Abi' yagaj naj lod ad bacaagdiajgt ree xbéngulalidi xtiidx Dios

majsi baguiaa reeman milagr ni beenman delant loj reeman

loj tiuu ijz niz loj yujbidx.

¹⁰ Zeel bidxe'ch Dios bèn guin ree, abi' rëbaman:

“Xgab ren rüjn reeman, ni'quid rüjnt reeman naguiejn

din gagbee reeman xhienaag rënan güün reeman.”

¹¹ Zianan zeel bidxe'ch Dios abi' rëbaman

guial ad yu't dxej gap reeman xguialraziiladx Dios.

¹² Zeel gol gojp cudad compniar raliduladx ree Jesucrist, chitëe chu' tijbidi guial por xixgab malidi ni rudxoon chililadxidi, guibi'cadi loj xnejz Dios bèn naban. ¹³ Mejrli guixie guixie gol guneeñe gol badxe' tée luxdoo ree lasa'di naga yu' tiamp, chitëe ad zuzoobtridi xtiidx Dios guial ma been dol lèjt gan. ¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan,

ad bal gaquidi nad zi'c goc ree bèn ad bazoobt xtiidx Dios gocli.

¹⁶ Abi', çchuza ree nin ad bazoobt xtiidx Dios majsi bigueijn reeman ni guneeaman? ÇNid bèn Israel ni babëe gajc ree Moisejs Egipton ya? ¹⁷ Abi', çnid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? ¹⁸ Abi', çnid bèn guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? ¹⁹ Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

4

¹ Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëe awa raya'p ree promejs guin yaya'n tijb dunuj ree guial ad zaya'pt ree guialraziiladx guin. ² Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. ³ Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bèn ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman, ⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

⁵ Per par ree bèn ad bazoobt xtiidxaman rëbaman:

Ad yu't dxej gap reeman da guialraziiladxan.

⁶ Bèn bigueijn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bèn ryaadx gap guialraziiladx guin. ⁷ Zeel chi gudëd zien ijz, Dios gulëeca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal rigueijndi xtiidx Dios yandxej,

gol bazoob xtiidxaman.

⁸ Din bal por Josué niijp ree bèn Israel guialraziiladx, ad nuza'tt Dios zatijb dxej. ⁹ Zeel xt yandxej yu' guialraziiladx guin par ree xbejn Dios. ¹⁰ Din bèn rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. ¹¹ Zeel rayal yagueen ree nagueijn yaya'p ree guialraziiladx guin, chitëe chu güün zi'c been ree bèn ad bazoobt xtiidx Dios.

¹² Din xtiidx Dios nabanan rajp tëen guialrniabee. Mazri rëezan guial loj tijb espad ni nadoxh grop lad, rëezan lën luxdoo bejn në lën xsprijtaman. Xt lën dxijt në lën yob rëezan, abi' por laan ragbee bejn bal ni mal o ni zagdxë naj ni rënman güünman. ¹³ Achetdzi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

Jesús naj bixhioz mazri zojbloj

¹⁴ Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bèn ma zojb xanyabaa, rayal yasnuu yadxu'dxi'ch ree loj ni raliladx ree laaman. ¹⁵ Din Jesucrist bèn naj dux bixhioz zojbloj ree laaman zajc gagnë dunuj ree chitëe güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol. ¹⁶ Zeel con confianz ma zajc yabiig ree loj Dios yarejdx yanaab reeman, bèn rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

5

¹ Gra bèn rajc bixhioz mazri zojbloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëe bejn gon par Dios në ree be ni guiët por ree xtol ree bejn. ² Abi' guial bënguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bèn ni ad ragbeet xhienin rüjn, në ree bèn ad zinalt xnejz

Dios. ³ Abi' guial yu' chi rúnj bixhioz guin dol zeel ńeman rugújt tijb be zi'c gon par Dios por xtolaman, zi'cgajc rúnjman por ree bejn.

⁴ Abi' achut zajc guièb guial gacaman bixhioz zobjbloj, Dios naj b́en rbe laaman zi'c guleman Aarón. ⁵ Ziangajc gojc con Jesucrist, ad laataman ŕeb guial gacaman bixhioz zobjbloj par dunuj ree, Dios bacaabee laaman, chi ŕebaman:

Lúj naj da Xi'nán, abi' diizd yan
gulún guial lúj naj da Xi'nán.

⁶ Ziangajc ŕeb zatib lajt loj xtiidx Dios por Jesucrist:

Lúj naj bixhioz par tiblayaa zi'c goc Melquisedec bixhioz.

⁷ Chi guban Jesucrist loj guidxliuj guie dád biinman gurejdx gunabaman Dios b́en zajc yabèe laaman loj gualgújt ni gudédaman. Dxel bidxga' Dios Jesús badèeman laaman valor guial bazoobaman gra xtiidxaman. ⁸ Majsí Xi'n Dios najman, per basiidaman bazoobaman diidx majsí guzagdiajman. ⁹ Abi' guial guidiblagaa beenman gra ni ŕen Dios gúunman, zeel por laaman tiblayaa ma yu' perdon par gra ree b́en guzoob xtiidxaman. ¹⁰ Abi' Dios naj b́en gule laaman par gacaman bixhioz zobjbloj zi'c goc Melquisedec bixhioz.

Royal yasnuu yaguieenbee ree xtiidx Dios

¹¹ Dád zien ni yu' ganin ĺejt por ree ni guin, per nawèeg najn par ganinan zi'c ŕenan guial dád nen rignia'di. ¹² Ma gojc xchej da't núnbeedi xtiidx Dios, yan bal zajcan, ĺejt ma rayal gulúü ben ren ree, per ĺejt sta ryaadx chu' b́en gulúü ĺejt xtiidx Dios stíjb ni basiididi guia'xchej. Ĺejt naj zi'c tijb xindoo ni ŕe' ganax lejch luar gawix graloj. ¹³ Abi' gra ree b́en naj zi'c xindoo ad wayajct gaw graloj, ad zilé't gagbee reeman conin naj xnejz. ¹⁴ Per ree b́en ni cusnuu cayignia' xtiidx Dios, laa reeman naj zi'c b́en ma raw graloj guial ma rignia' reeman conin naj zagdx con t́enin naj ni mal.

6

¹ Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, ² o xhienaag tiobnijs bejn, o xhienaag yadxiib du yaa ree guíj bejn, o xhienaag yashan Dios bengút ree, o xhienaag gúün Dios xguialguxtisaman chi guidxin dxej yadèed ree cwent lojman, ³ zagdxeli naj guial yasnuu ree yasiid ree xtiidxaman. Abi' Dios gagnè dunuj ree din chile' yaguieen ree zian.

⁴ Din b́en ma ragbee ree xcwent Dios, b́en ma núnbee ree xcwent ree ni yu' xanyabaa, b́en ma gubajn ree con xSprijt Dios, ⁵ abi' bayuladx reeman xtiidxza'c Dios, ma ragbee t́ee reeman xhienaag nabee Dios, ⁶ dxel rusa'n reeman guial chinal reeman xtiidxza'c Jesucrist, par laa reeman dád nawèeg naj chu' reeman loj xnejz Dios, din zi'c rulúü cucaa reeman Jesucrist Xi'n Dios loj crújz zatíjb din guze' ree bejn laaman. ⁷ Bénguidxliuj ree naj reeman zi'c tiblia' guidxliuj ni ŕe' guibidx guia ni ryajb, abi' bal rajc da't guiniaa guin par b́en rúnj dxiin lojn dxel rúnjle' Dios laan. ⁸ Per bal ganax guièjch nè ree gui'xh mal rliejn lojn, dxel ad rújntan sirv, abi' mazri zèed gajxh casti par guidxliuj guin abi' casti guin naj guial che'can.

Ni nuzujdxi'ch dunuj ree loj xnejz Dios

⁹ Ad cayntan zian por ĺejt, din dunuj rayagbee guial zagdxen cayújndi, guial zinalquidi ni rayal gúündi din laadi loj xcasti Dios. ¹⁰ Abi' laaman rúnj xguialguxtisaman zi'c rayal, abi' ad zayanladxtaman ni zagdx ni beendi nè guial ma balúüdi guial ŕendi laaman, abi' beendi yudar cusnuu t́ee cayújndi yudar dux compniar ree b́en raliduladx ree Jesucrist. ¹¹ Per dunujn rayénan guial gusnuu gúündi zian xt dxej chigra, sin guial yalenyadi din yalaidi ni cabèzidi tia'di. ¹² Ad gaquidi b́en ploj, gol been zi'c been ree b́en bililadx Dios sin gualralenya' tia' reeman ni ŕeb Dios tia' reeman.

¹³ Chi been Dios promejs loj Abraham, baza't laagajcaman din achut b́en mazri lasajc guial lojman, ¹⁴ abi' ŕebaman loj Abraham: "Naj diidxli günle' lúj abi' dád zien ree xdiaal chu'." ¹⁵ Abi' Abraham guyuman pacens ad balenya'taman persi cwa'man ni ŕeb Dios gudèeman lojman. ¹⁶ Chi rúnj bejn jurar, rúnjman jurar por stíjb b́en mazri lasajc guial lojman din guiguien guial diidxliqui gúünman ni ŕebaman. ¹⁷ Ziangajc yan, guial ŕen Dios gulúüman loj ree b́en ni tia' ni ŕebaman guial ad yu't dxej guchaa xixgabaman por promejs ni beenman, zeel beenman jurar. ¹⁸ Tio'p ni ad zaze'nt been Dios, beenman promejs been t́ee man jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din gúünman dunuj ree yudar guial ma raya'p ree confianz guial gac zi'c ma ŕebaman. ¹⁹ Abi' guial rayagbee ree guial gac zi'c ma ŕeb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guíib tijb barcw. Abi' guial nadxu'dxi'ch ree

diizd xanyabaa zëédan, ²⁰ lod ma guyu Jesús par guixhialaman nejz par dunuj ree, bèn ma naj bixhioz zojbloj tiblayaa zi'c goc Melquisedec.

7

Jesús naj bixhioz zi'cgajc gojc Melquisedec

¹ Melquisedec gojc rey Salem gojc tèéman xbixhioz Dios bèn yu' xanyabaa. Chi baza Abraham loj wadjil lod beenman gan rey gudilnè ree laaman, dxel bigchaagloj Melquisedec laaman, abi' beenle'man Abraham. ² Dxel loj gra ree ni been Abraham gan, beenman laan chii lala' abi' badëéman tijban loj Melquisedec. Melquisedec rën guiéban “rey ni rüjn xguialguxtis zi'c rayal”, Abi' guial gojcaman xrey Salem rën guiéban “rey rabe'cdxe luxdoo ree bejn”, din Salem rën guié “ni rabe'cdxe luxdoo ree bejn”. ³ Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tèé güjtaman. Laaman goc bixhioz zi'cgajc Jesús Xi'n Dios bèn ma naj bixhioz par tiblayaa.

⁴ Gol been xgab xi bèn lasajc gojc Melquisedec nadxel. Zeel xt dux béngulal ree Abraham badëé tib part loj chii ni beenman gan loj ree rey ni gudilnëman. ⁵ Loj ley rëb guial ree bixhioz Israel ni zëéd loj xdiaa Levi rajp reeman derejch tia' reeman tib part loj chii ni rajp ree bèn Israel, majsi tijbzi loj xdiaa Abraham zëéd gra reeman. ⁶ Melquisedec majsi ad zëédaman loj xdiaa Levi, per cwa'man tib part loj chii ni been Abraham gan. Dxel beenle'man Abraham bèn cwa' xpromejs Dios. ⁷ Abi' dunuj ree rayagbee guial bèn rüjnle' stijb bejn, mazri lasajcaman guial loj bèn rüjnle'man. ⁸ Per gra ree bixhioz ni rtia' tib part loj chii la' ni rajp ree bejn, rëjt gajc reeman zi'cgajc dunuj ree. Sa'n Melquisedec bèn cwa' tib lia' ni been Abraham gan, loj xtiidx Dios ruza't laaman zi'c ruluü sta nabanman. ⁹ Yan zi'c ruluü yaguie'ch ree guial Levi con ree bixhioz ni zëéd loj xdiaaman bèn ni rtia' ree tib part loj chii ni rajp ree bejn në reeman badëé tib part guin loj Melquisedec loj hor ni bigchaagloj Melquisedec dux béngulal ree Abraham. ¹⁰ Din chi bigchaagloj Melquisedec dux béngulal ree Abraham, ad wayut Levi, per loj xdiaa Abraham zëéd Levi.

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree bèn Israel, dxel ad rüjntri naguiejn ni't stijb bixhioz bèn naj zi'c Melquisedec ad zi'c Aarón. ¹² Din chi bidxaa bixhioz nëgajc ley bidxaa, ¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz zëédaman, loj diaa ren zëédaman abi' ni'qui tijb ree xdiaaman ad gojct bixhioz. ¹⁴ Dunuj ree rayagbee guial loj xdiaa Judá zëéd dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec, ¹⁶ guial ad lojt xdiaa Levi zëédaman zi'c rëb loj ley par gac bejn bixhioz, najman bixhioz guial rajpaman guialrniabee guibanman tiblayaa. ¹⁷ Din ze rëb loj xtiidx Dios por laaman:

Lüj naj bixhioz par tiblayaa,

lasa' bixhioz ni goc Melquisedec.

¹⁸ Zianan zeel gojc ley guin tiblad guial ad beentan sirv guial nüjn bejn zi'c rniabee ley guin.

¹⁹ Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. ²⁰⁻²¹ Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rëb:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

²² Zeel zian zagdxe naj nejz cüb ni guxhal Jesús par yadxin ree loj Dios. ²³ Gulal zien gojc ree bixhioz per guial rdxin dxej rëjt reeman ad bile't niajc reeman bixhioz par tiblayaa.

²⁴ Per Jesús ad yu't dxej guiétaman ad yu' tèét dxej lox guial najman bixhioz. ²⁵ Zianan zeel rila' rabëéman bejn ree loj xcasti Dios, bèn rën ree gap nejz par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. ²⁶ Zeel laaman naj bixhioz zojbloj bèn rayaadx ree gagnë dunuj ree. Din laaman naj bèn naya nali, achet ni mal rüjnman, nayaman loj Dios, garen najman guial loj béndol, abi' zojbaman xanyabaa cwë' Dios. ²⁷ Laaman ad ryadxt güünman zi'c rüjn ree bixhioz zojbloj guial guixie guixie rugüjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiétaman stijb. ²⁸ Por ley bile' gojc ree bejn bixhioz zojbloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zojbloj, laaman nayaaloj nayaman niz loj Dios zianczi.

8

Jesús naj dux bixhioz zojbloj ree

¹ Loj gra diidx ni cayd  ree ni mazri lasajc naj guial Jesucrist naj dux bixhioz zobjloj ree, b n ni ma zobj xanyabaa xladbee Dios b n rniabee. ² Ni ma r nman sirv guialbixhioz, l n yadoo ni bazoob Dios, ad b nguidxliujt. ³ Gra ree bixhioz zobjloj loj guidxliuj guie xchiin reeman naj guial rin  reeman gon rug jt t   reeman be ree zi'c gon par Dios. Ziangajc Jesucrist b n naj dux bixhioz zobjloj ree yu' ni bad  man loj Dios. ⁴ Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rin  ree gon loj Dios zi'c rniabee ley ni basa'nn  Dios Moisejs. ⁵ Per gra ni r jn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh g  n Moisejs yadoo, dxel r b Dios lojman: "Baguiaa zagdx  din g  nl zi'cgajczi bal n l j ruguia' Sinai." ⁶ Per mazri zagdx  naj ni r jn Jesucrist, b n bayal naj dux bixhioz zobjloj ree, din mazri zagdx  naj nejz c b ni guxhalaman din chile' yadxin ree loj Dios. Abi' por nejz c b guin mazri zagdx  naj ree xpromejs Dios par bejn.

⁷ Bal por ley nile' nibajn bejn zagdx  delant loj Dios, dxel ad r jnt naguiejn niu nejz c b.

⁸ Per baguiaa Dios guial ad cay jnt ree bejn zi'c rayal zeel r baman:

Naj rni guial guidxin dxej gaxhalan nejz c b
par ree b n Israel n  ree b n Jud .

⁹ Per nejz c b guin ad najtan zi'c ley ni basa'nan
loj xbenqulalidi chi bab n laa reeman Egipto.

Abi' guial ad bazoobt reeman da diidxan
zeel gul ladxan laa reeman, zian r b Dios.

¹⁰ R b t  man:

Zian ma baya'n diidx gac con ree bejn chi guidxin dxej
guijc reeman yasa'nan da leyan
abi' l n luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad r jntri naguiejn gusiid ree bejn lasa' reeman.

Ni'qui bijch reeman par g  nbee reeman naj,
din gra reeman g  nbee naj,
diizd xindob z xt bengol.

¹² Abi' naj g n perdon gra ree ni mal ni ma been reeman,
abi' ad yu't dxej gusaaladxan xtol reeman.

¹³ Chi r b Dios guial guixal nejz c b guin r n gui ban guial achetri sirv r jn nejz gulal guin ni gop ree bejn par guidxin reeman lojman, abi' ni ad r jntri sirv nayob nitan.

9

Yadoo ni yu' loj guidxliuj n  yadoo ni yu' xanyabaa

¹ Dunuj ree rayagbee guial chi binal bejn ley ni cayguie'ch ree naj nejz gulal, loj ley guin z  d xhienaag gui n bejn Dios, xhie t   naag rayal g  n reeman tijb yadoo loj guidxliuj guie. ² L n yadoo guin guz  b tijb lajd persi gojcan tio'p l n. Tijb l nan ni naj niz ro' port, lod brii laj lod nada abi' l n guin guzobj ni ru gandel n  tijb mex ni gudxib ree guiadxtil ma gogle'. ³ Dxel stijb l n guin xijch lajd guin brii laj lod mazczi nada. ⁴ L n guin guyu tijb altar ni or lod rgu' reeman goxyal n  tijb caj ni brii laj xcaj xpromejs ree Dios. Abi' caj guin nad  ban or zi'c l nan zi'c xijchan. L n caj guin yu'chaaw guiaj ni ca ree guidxii xmandamient Dios n  xvar Aar n ni baga' con stijb re or ni guyuchaaw mana. ⁵ Dxel guijc caj guin guzobj tio'p xfigur ree anjl b n la ree querubines abi' con xhiil reeman rusiaaw reeman guijc lod ruroob bixhioz zobjloj xrejn ree be por xtol ree bejn. Per por yan ad r jnt naguiejn guzatan mazri ree ni guin lojdi.

⁶ Chi gulox been reeman gra zi'c rayal gac l n tijb yadoo loj guidxliuj guie, dxel guixie guixie guyu ree bixhioz l n yadoo guin per naabzi lod brii laj lod nada, lod rguieen reeman ni rayal g  n reeman par Dios. ⁷ Per stijb l n guin lod la mazcsi nada, tijbzi bixhioz zobjloj ru ni tib v l l n tib ijz. Abi' ad zajct chu'man bal id zin nman xrejn ree be din g  n Dios perdon xtolaman n  xtol ree bejn. ⁸ Por ree ni guin rulu  xSprijt Dios dunuj ree guial la'tgaj r jn sirv lod brii laj lod nada ad yu't mod chu' bejn lod la mazcsi nada. ⁹ Gra ree ni guin najzi reen tijb ejempl par dunuj ree yan, din gon n  ree be ni bin  ree bejn par Dios, ad beent reen sirv par nayaaloj ninialadx reeman guial ma naya reeman loj Dios. ¹⁰ Gra ree costumbr ni gop reeman zi'c ree con ni gudaw reeman, n  ree ni gu' reeman n  gra ree ni rayal g  n reeman din naladx reeman guial ma naj reeman naya, laan naj ni gunabee ley g  n ree bejn xt dxej ni bachaa Dios gra.

¹¹ Din yan ma bi't Jesucrist, b n naj bixhioz zobjloj par dunuj ree, abi' por laaman ma raya'p ree yaya'p t   ree ni ma r b Dios yaya'p ree. Abi' mazri zagdx  naj l n yadoo lod

ma guyuman mazri lasajc yadoo guial ad zobjtan loj guidxliuj guie ad gojc tēetan por ree bēnguidxliuj guie. ¹² Jesucrist ma guyuman lēn yadoo lod nada da't, per ad con xrejt ree go'n dobēz o xrejn ree dxib, guyuman con quijb xrejnman. Laaman con tib volt guyuman, ad rūjnt naguiejn güünman zian stijb abi' por laaman raya'p ree perdon par tiblyaa. ¹³ Tiamp gulal xrejn ree dxib o xrejn ree go'n o cobdēj ni we'c ree vagdobēz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, ¹⁴ diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rēn Dios bèn naban. Din por xguialrniabee xSprijt Dios, Jesucrist bèn ad beentczi dol, badēē laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xguialgūjt Jesucrist ma yu' perdon par dux tol ree nē xtol ree bèn ni binal ley, gra ree bèn naj xbejn Dios zian yaca' ree ni rēb Dios yaya'p ree par tiblyaa. ¹⁶ Din zi'cgajc tijb bēn rlies tijb gui'ch guial chu yaya'nnē ree ni rajpaman, ad zūjnt gui'ch guin dxiin xt chi ma gūjtaman. ¹⁷ La'tgaj naban bēn guin achet sirv rūjn gui'ch guin, rūjnan sirv xt chi ma gūjtaman. ¹⁸ Zeel diidz tiamp gulal par guzuloj been sirv ley ni basa'n Dios loj Moisejs, bagūjt reeman tio'p choon ree be gui'xh persi gulēē reeb rejn. ¹⁹ Din chi gulox bagojn Moisejs gra ree bejn gra ni zēēd loj xley Dios dxel cwa'man guidxlad xil ni nayē' culor xnia bacaaman laan guijc tib xidx yag ni la hisopo, dxel badxe'man laan loj nijs ni no'ch xrejn ree go'n dobēz con xrejn ree dxib dxel bacojpaman laan loj libr ley nē guijc ree bejn ²⁰ rēbgajman: "Rejn guie naj tijb sen guial ma baneel Dios xleyaman lojdi par güündi laan cumplid." ²¹ Bacojp tēeman rejn guin lēn yadoo nē guijc gra ree ni rūjnnē ree bixhioz dxiin lēn yadoo. ²² Ley guin gra gunabeen gagle' con rejn dīn guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennē ree bixhioz dxiin lēn yadoo guin, gojc naguiejn bagūjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. ²⁴ Abi' Jesucrist ad lēnt yadoo ni been bēnguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. ²⁵ Jesucrist ad biaadxt niējtaman zien volt por dol ree, ad beentaman zi'c been ree bixhioz zobjloj guial gazobijz binē reeman xrejn ree be lēn yadoo lod brii laj lod nada da't. ²⁶ Din bal id zian, zien volt niējtaman diidz chi gocchaaw guidxliuj. Per chi bidxin dxej bi'taman, con tib voltzi badēē laagajcaman par guiētaman dīn chiquied dux tol ree. ²⁷ Zi'cgajc gra bejn tib voltzi rējt reeman, dxel zēēd ni yadēēd reeman cwent loj Dios. ²⁸ Ziangajc Jesucrist tib voltzi badēē laagajcaman par guiētaman dīn quixaman por xtol ree bejn. Abi' chi gui'taman stijb ad zi'ttaman por dol, gui'taman dīn chignēman bēn cabēz ree laaman.

10

Ad leyt riquied dol

¹ Ley ni basa'nnē Dios Moisejs najzan tijb sen xcwent ree ni gac, per ad por ziant gojc ni ryal gac. Din majsi gazobijz gūjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. ² Din bal ninialadx reeman guial ma naya reeman con tib volt ni bagūjt reeman be ree par Dios, dxel ad ryaadxtri nūjn reeman zian guial ma ragbee reeman achetri xtol reeman. ³ Per ad gunaladxt reeman zian, gazobijz rusaaladx xtol reeman chi rugūjt reeman be ree par Dios, ⁴ dīn xrejn ree go'n nē xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rēbaman loj Dios:

Ad rēntil xrejn ree be

ni'qui los demazri ree ni ridnē bejn par lūj,
zeel baneel naj cuerp ni ra'pan loj guidxliuj guie.

⁶ Ad rēntril guial ruze'c reeman be ree par lūj
ni'qui xrejn ree be ni ridnē reeman por xtol reeman.

⁷ Zianan zeel rēn:

"Laa naj guie, Dad Dios,
zialan par günan zi'c rēnl,
zi'c ca loj libr por naj."

⁸ Jesucrist yaloj rēbaman guial ad rēnt Dios xrejn ree be, ni'qui los demazri ree ni rinē bejn par laaman, ni'qui guial ruze'c reeman be ree por xtol reeman zi'c rniabee ley güün reeman. ⁹ Chi gulox rēb Jesús zian, dxel rēb tēeman: "Laa naj guie, Dad Dios, zialan par günan zi'c rēnl." Zianan baloox Jesucrist guial rinal ree costumbr ni rēb loj ley abi' guxhalaman

tijb nejz c b par yadxin ree loj Dios. ¹⁰ Yan ma nayajc ree naya delant loj Dios guial ma been Jesucrist zi'c r n Dios, bad ed laagajcaman g jtaman por xtol ree bejn, con tib volt par tiblayaa, ad ryaadxt g nman zian stijb.

¹¹ Gra ree bixhioz Israel guixie guixie za' reeman cay jn reeman gra ni rniabee ley g n reeman, abi' guixie guixie rug jt reeman be ree par Dios. Abi' majsi zien volt r jn reeman zian per ad rquiedt gualrug jt be guin ree xtol ree bejn. ¹² Per Jesucrist con tib volt bad ed laagajcaman g jtaman por xtol ree bejn, ad ryaadxt g nman zian stijb. Dxel gurejman xladbee Dios, ¹³ lod cab zaman guidxin dxej nabeeman loj gra ree b n rdxe'ch laaman. ¹⁴ Din laaman con tib volt bad ed laagajcaman g jtaman por xtol ree bejn dxel tiblayaa ma naya ree b n rliadx laaman. ¹⁵ Abi' dunuj ree rayagbee ree guial walin din por xSprijt Dios z ed ree diidx ni ca loj xtiidx Dios guial r b Dios:

¹⁶ Zianan ma baya'n diidx gac con ree bejn chi guidxin dxej: Guijc reeman gusa'n da leyan abi' l n luxdoo reeman gucanan

¹⁷ Abi' r b t eman:
Ad yu't dxej gusaaladxan xtol reeman n  graloj ree ni mal ni ma been reeman.

¹⁸ Abi' zi'c ma yu' perdon par dol, ad r jntri naguiejn gui t ree be por dol.

Royal yubiig ree loj Dios

¹⁹ Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejn Jesucrist, ²⁰ din chi bad ed xcuerpaman persi g jtaman, guxhalaman tijb nejz c b ni zidn  guialnaban par dunuj ree. ²¹ Yan zi'c ma rniabee Jesucrist dunuj ree, b n naj bixhioz zojbloj xanyabaa, ²² con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. ²³ Zeel royal yadxu'dxi'ch ree loj ni raliduladx ree Dios, din laaman z jn cumplid xtiidxaman zi'c ma r baman. ²⁴ Royal yaguieen ree xgab xhienaag yalu' ree luxdoo ree dux compniar ree yay n t e du lasa' ree yaguieen t e ree ni naj zagdx. ²⁵ Ad rayalt yaguieen ree zi'c r jn ree b n ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

²⁶ Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon. ²⁷ Ni cab si dunuj ree naj xguialguxtis doxh Dios, tijb bajl lod yalal ree b n ad ruzoobt xtiidxaman. ²⁸ Chi bal id been tijb bejn zi'c rniabee ley ni basa'nn  Dios Moisejs, abi' yu' tio'p choon testiw guial ad beent been guin zi'c rniabee ley guin, dxel ad yu'tri mod laaman loj gualg jt ni rayalaman. ²⁹ Yan gol been xgab, jixixi mazri castiro' yayal b n rnieeguijdx xSprijt Dios b n ragn  dunuj ree! B n ni naladx guial achet lasajc Xi'n Dios, abi' r jnman desprejs xrejnman, rejn ni rul u guial gac zi'c r b Dios, rejn ni rusia xtol bejn. ³⁰ Dunuj ree rayagbee guial r b Dios: "Naj royal g n gualguxtis, naj gud  ni rayal bejn." R b t eman: "Dios naj b n ni yaca' cwent por ni cay jn bejn." ³¹ jAbi' nadxeb yayal bejn xcasti Dios b n naban!

³² Per l jt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gud didi. ³³ Yu'di zien loj da't guialzi bad ed ree bejn l jt, abi' baze' reeman l jt delant loj ree bejn, yu' t edi ad gul eladxtidi b n guzac ree zian. ³⁴ Ad gul eladxtidi b n ni guyu ree ladxguib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, n  ree ni rajpidi ni, taan reen tiblayaa. ³⁵ Zeel ad gusa'ndi gualrliladxidi Jesucrist, din por gualrliladx guin d d zagdx naj ni tia'di. ³⁶ R jn naguiejn gapidi pacens din chile' g undi zi'c r n Dios, zian tia'di ni ma r baman guneeman lojdi. ³⁷ Din loj xtiidx Dios r b:

Nayob, d d nayob gui't b n naj gui't,
ad zaglaataman.

³⁸ Abi' b n naban zi'c r nan,
guidib tiamp ni nabanman rliadxaman naj.
Per bal gusa'nman ni rliadxaman naj,
ad zabaan tan laaman.

³⁹ Per dunuj ree ad nayajc ree zi'c ree b n rusa'n ni rliadx reeman Jesucrist abi' royal reeman casti, dunuj ree nayajc ree b n rliadx Jesucrist diidxli par chit e yayal ree casti.

¹ Yan, çxhienin naj guialrliladx? Guialrliladx naj guial guidiblagaa yaliduladx ree gac zi'c caylêjz ree gac, nè guial waliqui ni raliduladx ree ni ad raguiaat ree. ² Dux béngulal ree baya'n reeman zagdxé delant loj Dios guial bililadx reeman laaman.

³ Zi'c raliduladx ree Dios, dunuj ree rayagbee guial con xtiidxaman beenman xanyabaa nè guidxliuj nè gra ni raguiaa ree, achetczy ni beenman con ree ni raguiaa ree yan.

⁴ Guial bililadx Abel Dios, zeel zagdxé naj gon ni badëeman guial loj Cain, abi' baya'nman zagdxé delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta raguiajt xhienaag bililadxaman Dios.

⁵ Guial bililadx Enoc Dios zeel ad güjttaman, guidib nabanman ziaman xanyabaa abi' ad badxêjt ree bejn laaman guial ma zigné Dios laaman. Per chi gadaman chigné laaman, loj xtiidx Dios rëb guial bayuladx Dios zi'c gubanman. ⁶ Abi' achut zajc gütn zi'c rën Dios bal id rililadxaman laaman. Chutééz bèn rën gap nejz par guidxinman loj Dios rayal chililadxaman guial yu' Dios chililadx tëëman guial laaman rudëë ni rëbaman gudëëman loj ree bèn raguuil laaman.

⁷ Guial bililadx Noé Dios dxel chi rëb Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni rëb Dios gac. Dxel por guialrliladx guin biguien guial gra bénguidxliuj royal casti ni rëb Dios, abi' baya'n Noé zagdxé delant loj Dios guial bililadxaman xtiidxaman.

⁸ Ziangajc Abraham guial bililadxaman Dios, bazoobaman xtiidxaman chi rëbaman lojman din grii ladxaman cheman lod tia'man guidxliuj ni gudëëd Dios lojman. Abi' brii ladxaman ni'quid ragbeetaman banguin cheman. ⁹ Guial bililadxaman Dios, gubajnmán zi'c benzit loj guidxliuj ni rëb Dios gudëëdaman lojman. Gurejman lën ree carp ni naj nè guid, ziangajc Isaac nè Jacob nè laa reeman rayal guidxliuj guin. ¹⁰ Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹ Ziangajc Sara, por xguialrliladxaman, majsi ma najman bengol par chu' xi'nman, per guymán gojl par gacaman na abi' guyu tijb xi'nman guial bililadxaman guial rÿjn Dios cumplid xtiidxaman. ¹² Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree ùx ni riga' ro' nijsdoo ni ad zile't guiyab.

¹³ Gra ree bèn ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promeys ni been Dios loj reeman, per guial rililadx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëëd reeman loj guidxliuj guie ad tiblayaat. ¹⁴ Abi' ree bèn rníee zian, zian rguienchaaw guial sta rguuil reeman lod diidxli gac ladx reeman. ¹⁵ Din bal por guidxliuj lod guza reeman cayÿjn reeman xgab, dxel zile' nayejc reeman ni stijb. ¹⁶ Per laa reeman mazri rÿjn reeman xgab por tijb luar lod naj mazri zagdxé, mazri rÿjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷ Guial bililadx Abraham Dios, dxel chi been Dios laaman prueb din gugÿjt xi'nman Isaac din gudëëdaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëëman guial rëb Dios lojman: ¹⁸ "Por xi'nl Isaac gacxhieje da't xdiaal." ¹⁹ Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudëëdaman prueb guin.

²⁰ Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. ²¹ Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagrliladxaman abi' gurejdx gunabaman Dios. ²² Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bèn Israel Egipto, abi' rëbaman loj reeman xhienaag güünnë reeman xdxijttaman.

²³ Por guial bililadx ree dxad xniaa Moisejs Dios chi gol Moisejs guin, baquie'ch reeman laax choon bëëw guial baguiaa reeman najx xindoza'cdxoon, abi' ad bidxebt reeman guial rëb bèn naj rey guial guiët gra ree xindobëz. ²⁴ Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. ²⁵ Par laaman zagdxeli naj sagdiajman con ree xbën Israelaman, luar nÿjnman dol niro'nladxaman laa reeman din niajpaman ni rënman, ni ad rdaant ree par tiblayaa. ²⁶ Par laaman mazri lasajc sagdiajman zi'c Cristo luar niajpaman gra ree gualnaza'c ni yu' Egipto, din mazri yu'guijcaman gualnaza'c ni yalalaman delant loj Dios. ²⁷ Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguaaaman Dios bèn ad zajct guguaa ree bejn.

²⁸ Nè guial bililadx Moisejs Dios, beenman lanij pascw, abi' gunabeeman baroob ree bèn Israel rejn ro' xport lidx reeman, din chi téd xianjl gualgÿjt, ad zugÿjttaman xi'n yaloj ree bèn Israel. ²⁹ Guial bililadx ree bèn Israel Dios, gudëëd reeman zi'c loj yujbidx lod bixal loj

nijsdoo la nijsdoo xnia. Per chi guyèn ree bèn Egipto nidèd reeman, loj hor guin bayaaw nijs guin dxel gu' reeman nijs abi' gùjt reeman.

³⁰ Guial bililadx ree bèn Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. ³¹ Abi' Rahab bèn goc bégunaa dxuudx luguiedx Jericó, guial bililadxaman ad gùjtaman chi güt ree los demazri ree bèn ladxaman bèn ad bazoobt ree diidx, guial baca'man bèn Israel ni we ree bigla'ch luguiedx guin.

³² Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel nè xcwent ree bèn badëë xtiidx Dios loj ree bejn. ³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. ³⁴ Guzuj reeman loj bajl ro' abi' achet goc reeman, gulaa reeman loj guialgùjt con espad, guyu reeman gojl chi ruluüczzi ad yu't reeman gojl, guzudxi'ch reeman loj wadijl abi' balaagdx reeman benzit ni gudilë reeman. ³⁵ Nè ree bégunaa ni güt ree xfamil, por guial bililadx reeman Dios baban ree xfamil reeman stijb.

Per yu' ree bejn majsi gùjt reeman, per par laa reeman mazri zagdxe guzagdiaj reeman loj ree bèn bagùjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. ³⁶ Yu' t'ë reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguuib. ³⁷ Yu' reeman bagùjt ree bejn con guiaj, yu' t'ë reeman bagùjt reeman gulëxhün reeman laa reeman con sierr, gùjt t'ë reeman con espad. Yu' t'ë reeman biza gra lad najcw reeman guid xab xiil nè guid xab dxib, probza laa reeman naya biza reeman, graloj beennè ree bejn laa reeman. ³⁸ Biza reeman niz loj yujbidx, niz ruguia' ree, nè graloj lën ree guiajbiliaa. Bèn guin ree ad rayal nibajn reeman loj guidxliuj guial dád benza'c gojc reeman. ³⁹ Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. ⁴⁰ Din laaman beenman xgab tijb ni mazri zagdxe par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

12

yunaal ree Jesús

¹ Zeel, zi'c ma bacaagdiaj ree por zien ree bejn xhienaag bililadx reeman Dios, rayal yasa'n ree tiblad gra dol nè gra ree ni rudxoon yaguieen ree zi'c rayal, ad zalenya' t'ëet ree yunaal ree nejz ni ma balüü Dios dunuj ree. ² Rayal yadxeguijc ree Jesucrist din por laaman zëéd guialrliladx ni raya'p ree abi' por tijbzi laaman rayaaloj guialrliladx ni raya'p ree. Gudaanman guialzi ni gudëdaman loj crüz, ad batutaman gùjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

³ Gol been xgab xhienaag guzagdiaj Jesucrist chi basagdiaj ree bëndol laaman, chitëe yadxaguidi, ad yalenyadi por ni cazajquidi. ⁴ Din majsi cusagdiaj ree bejn lëjt guial cayüjndi naguiejn ad cayüjntidi dol, per ad wazujtidi loj guialgùjt por zian. ⁵ ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb: Xi'n, bidxga' zi'c runee dux Dad ree Dios lüj consejw, ad bal yalenyal' chi guzuxnejzaman lüj.

⁶ Din rüjnamaan bèn ni naj ree xi'nman, ruzuxnejzaman laa reeman guial rënman laa reeman.

⁷ Zeel gol gudaan guialzi, din zagdxe najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejzt xi'n ya? ⁸ Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. ⁹ Lëjt ragbee guial chi bayajc ree xindoo, gudijn dux dad ree dunuj ree din yacaagdiaj ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bèn yu' xanyabaa, din yaya'p ree guialnaban con laaman? ¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdxe. Per Dios ruzuxnejzaman dunuj ree par tijb ni mazri zagdxe par dunuj ree, ruzuxnejzaman dunuj ree din yabajn ree naya zi'c laaman. ¹¹ Diidxliczi achet guialnaa naj nix loj hor ni cadëdilan, ragnaalil. Per ree bèn ni rusiid ruzoob diidx zian, laa reeman naban zagdxe, naalyuj delant loj Dios.

Ad cwëladxidi xtiidx Dios

¹² Zeel gol bagu' luxdoodi, gol badëed valor lëjt gajc zi'c tijb bèn raca'ladx chi ma badxag da'taman. ¹³ Gol been naguiejn gol gubajn xnejz, din ree bèn ragdxa xhie güün reeman, ad gusa'n reeman xnejz Dios, chu' luxdoo reeman zagdxe chinal reeman laan.

¹⁴ Gol been naguiejn guibandi zagdxe con gra ree bejn, gol gubajn naya delant loj Dios din bèn ad nabant naya ad zile't guguiaaman dux Dad ree Dios. ¹⁵ Gol gojp cudad

chitëe chu' tijbidi gusa'n tiblax zi'c rën Dios gagnëman lëjt chitëe chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. ¹⁶ Ni'qui tijbidi ad rayalt sunëdi bën ad najt lacheelidi, ad cwe'quidi tiblax ni zagdxë ni zëed ree por Dios chitëe saquidi zi'c guzac Esaú, por tijb guialraw bato'man guialrniabee ni rayalaman guial najman bën yaloj loj bijchaman. ¹⁷ Abi' lëjt ragbee guial chi guyën Esaú nünjle' xdadaman laaman ad beenle'taman laaman zi'c rayalaman. Majsi dád biinman gunabaman laan, per ad bile't nuchaaman ni beenman.

¹⁸ Lëjt gadidi chibig lod ad najt par gugaalidi zi'c gubig ree bën Israel gulal guijc guia' Sinaí lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidojdi. ¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. ²⁰ Din ragbee reeman guial nawëëg naj ni gunabee Dios güün reeman chi rëbaman: "Chutëëz bejn o be gui'xh ni gugaal guijc guia' guie rayal guietaman o guietib con guiaj o con lans." ²¹ Nadxeb naj ni baguiaa reeman xt Moisejs rëb: "Rnijn guial tant rdxeban."

²² Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios bën naban, lod nadxag lasa' ree zien da't ree anjl, ²³ dád nix yu' luxdoo reeman rën reeman laaman lod yadxajg lasa' ree xbejn Dios bën ni ma ca ree laj loj libr xanyabaa. Ni zojb Dios, bën yanab cwent loj gra bejn, ni tëe za' xSprijt ree bën guban zi'c rayal laa reeman ma naya reeman por Dios. ²⁴ Ni gajc zojb Jesucrist, bën guxhal nejz cüb ni raya'p ree par yadxin ree loj Dios. Chi güit Abel xrejnman gunab gac guialguxtis, per con Jesucrist ad gojct zian, güjtlaman, guxhie' tëe xrejnman par yayajc ree perdon.

²⁵ Zeel gol gojp cudad gol bidxga' Dios, laaman najman bën rnieenë dunuj ree. Din bal bën ni ad bidxga't ree xtiidx Moisejs bën badëed xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bën guza diizd xanyabaa din guinieenëman dunuj ree. ²⁶ Chi guneë Dios bëngulal ree ruguia' Sinaí, binj guidxliuj. Per yan ma rëbaman: "Gunin guidxliuj zatijb, per ad guidxliujtzi, në xanyabaa." ²⁷ Chi rëb Dios guial güünman zian zatijb, rën guieban guial gunijnman gra ni beenman, din chiquied ni rayal chiquied din yaya'n ni ad rayalt chiquied. ²⁸ Zeel rayal yadëed ree quixtëe loj Dios guial ma rayal ree lod canabeeman, lod ad yu't dxej nit, abi' con respejt në guialrdxeb yaguieen ree ni ruladxaman. ²⁹ Din dux Dios ree naj zi'c tijb bajl ni ruze'c gra.

13

Xhienaag güün bejn ni yayuladx Dios

¹ Ad cwëz guiëndi xcompniaridi bën rliladx ree Jesucrist. ² Ad yayanladxidi gudëe lidxidi yaya'n ree bën ri't, din zian yu' ree bën baca' ree xianjl Dios sin guial gagbee reeman chunin.

³ Gol basaaladx bën yu' ree ladxguuib, gol gunaladx guial në lëjt yu' ladxguuib con laa reeman. Gol been tëe xgab por ree bën ni cazagdiaj, gol gunaladx guial në lëjt cazagdiaj.

⁴ Gol gojp respejt guialruxhliia, ad gusquiee lacheelidi. Din Dios zudëedaman casti bën za'në xinguaaw o bëngunaa ren, në gra ree bën ni rüjn ree ni dxuudx con ree bën ad najt lacheel reeman.

⁵ Ad sëëbladxidi milia, gol baya'n conform con ni rajpidi din Dios ma rëb: "Gra dxej za'n con lüj, abi' ad yu't dxej gabëladxan lüj." ⁶ Abi' con confianz zajc yaguie'ch ree:

Da Dadan Dios naj bën ragnë naj

ad rdxebtan majsi xhietëëz güünnë ree bejn naj.

⁷ Gol basaaladx ree bën ni gunabee ree lojdi, bën ni balüü ree lëjt xtiidx Dios. Gol been xgab xhienaag gubajn reeman gol binal tëe zi'c bililadx reeman Jesucrist.

⁸ Abi' Jesucrist laagajcaman nieey, laagajcaman yan në zianczi. ⁹ Ad tiëbidi gusquiee graloj ni rulüü ree bejn lëjt, din ad najt reen zi'c rayal chinalidi Cristo. Mazri zagdxë gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

¹⁰ Dunuj ree raya'p ree tijb bën güit por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz rüjn ree sirv lën yadoo guin. ¹¹ Bixhioz zojbloj guin, laaman rinë xrejn ree be ni rudëed ree bejn zi'c gon por xtol reeman, rinëman rejn guin lën yadoo lod rayal chinëman laan. Dxel ree begüt guin re'c reeb ro' guiedx lod achut zojb. ¹² Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman. ¹³ Zeel yunaal ree Jesucrist majsi gulëë reeman laaman luguedx

Jerusalén, në majsi xhietëez gualxtu o gualrzagdiaj yadüüd ree zi'c laaman. ¹⁴ Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. ¹⁵ Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree gual nayajc ree xbejnman. ¹⁶ Ad yayanladxidi güüнди ni zagdxe güün tée lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree bén rniabee lojdi, bén rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, gual ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din gual ad ruzoobt diidx achet sirv güünan lëjt.

¹⁸ Gol gurejdx gunab Dios por dunujn. Dunujn rayagbee gual achet ni mal cayguieenan, abi' rayënan gual gra ni yaguieenan, yaguieenan laan xnejz. ¹⁹ Rniaaban lojdi din cwedx guiniabidi Dios por naj, din guneeman permis diob gualan din gazun con lëjt zatijb.

Diidx bigra ni bacan loj gui'ch guie

²⁰ Dios bén rabe'cdxe luxdoo ree bejn, bén basban Jesucrist, rajpaman dunuj ree zi'c rajp tijb bejn xiil, por xgualgütaman zianczi ma raya'p ree nejz par yadxin ree loj Dios, ²¹ laaman gagnë lëjt par gra ni naj zagdxe din chile' güüнди zi'c rënman. Laaman gagnë dunuj ree din yayajc ree zi'c rënman gual ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²² Compniar raliduladx ree Jesucrist, ad narooft gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw. ²³ Rugojn tēen lëjt gual ma barii dux compniar ree Timoteo ladxgüiib abi' bal nayob gui'taman niz guie, dxel du gropan yo'p yudganajn lëjt.

²⁴ Gol bagajpdioz gra ree bén rniabee lojdi bén ni rulüü ree lëjt, në gra ree dux compniar ree bén rliladx ree Jesucrist. Abi' ree bén Italia rugajpdioz reeman lëjt.

²⁵ Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

¹ Naj naj Santiaaw, cayünan xchiin Dios në xchiin Dad Jesucrist, rugajpdiozan gra ree bën naj xdiaa Israel, nare'chidi guidib guidxliuj.

Quiarguejn zëed loj Dios

² Gradi compniar raliduladx ree Jesucrist, rnin lëjt, gol babaa majsi xhietëez loj guial-rzagdiaj tédidi. ³ Lëjt ragbee, chi rdëdidi gralojn guial rliadixidi Dad Jesucrist, zian rusiididi gapidi pasens. ⁴ Per gol been naguiejn güün pasens guin lëjt yudar din gaquidi zi'c rën Dios, gusuudi loj xnejzaman, chitëë guiyadixidi xhienin.

⁵ Bal chu lëjt riaadx chu' mazri xquiarguejn, gol gunab xquiarguejndi loj Dios. Laaman gunee gra ni riaadixidi, ad zabexuutaman guneeaman laan. ⁶ Per rayal chililadixidi guial guneeaman laan, ad rayalt chu' nawëëguidi, din bën ru nawëëg luxdoo naj zi'c xtüjp nijsdoo ni rinë bi ni guiezi. ⁷ Bën naj zian ad cwëzidi gunee Dios ni guiniabidi, ⁸ din bën ru nawëëg, ad rüjntaman tijbzi xgab, ad rinal tëtëtaman tijbzi nejz.

⁹ Lëjt guial najdi bënprob gol babaa, din loj Dios najdi bën zojbloj. ¹⁰ Guiáad lëjt benrijcw, gol babaa guial ma ragbeedi achet lasajc guialrijcw loj Dios, din guialrijcw guin najn ni téd zi'c rdëd guiaa rial dajn. ¹¹ Lëjt ragbee chi rbëë loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguienan. Ziangajc benrijcw yu' dxej guiëtaman majsi galay gra ree ni rajpaman.

Bën rdaan ree rdëd loj guialrzagdiaj

¹² Chabaa bën rzudxi'ch loj xnejz Dios rdaan tëtëman xhietëez rzajcaman guial rliadixaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblyaa ni cwëb Dios yazaladixaman loj ree bën rën laaman.

¹³ Bal chu rüjn xgab güün ni mal, ad najtan ni naladixaman guial Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëtëtaman xgab guijc bejn güünman ni mal. ¹⁴ Xixgabmal gajc bejn rudëë laaman gan güünman ni mal. ¹⁵ Zeel por xgabmal guin rüjn bejn dol, dxel chi ma rniabee dol guin laaman, stibzi xcasti Dios rayalaman.

¹⁶ Gradi compniar raliduladx ree Jesucrist, diidxli rënan lëjt, ad gusquiee lëjt gajc. ¹⁷ Graczi xgab zagdxë në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaaman, zianczi rüjnman ni zagdxë.

¹⁸ Guial guyënman, zeel baneeman guialnaban tiblyaa duloj ree, guial ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman. ¹⁹ Zeel yan ma ragbeedi nine ree.

Rayal yasa'n ree gra ni mal riga' loj guidxliuj

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yooblaxidi guial guinieedi ni'qui guial yalendi, ²⁰ din bën ralen ad zajt güünman ni rën Dios. ²¹ Zeel gol gulëëladx gra ni ad najt zagdxë në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëë lëjt loj dol. ²² Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc. ²³ Din bën rucaagdiajgzi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn, ²⁴ per chi ma ziaman, rayanladixaman xhienaag naj lojman. ²⁵ Per bën ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaloj rabëë tëen dunuj ree loj dol. Rzudxi'chaman loj nejz guin, rüjn tëtëman ni rën Dios. Bën güün zian chu' luxdooan zagdxë por ni cayüjman.

²⁶ Bal chudi naladix zinalidi xnejz Dios zagdxë per ad rajptidi cudad xhienin guinieedi, cusquiee lëjt gajc, dxel achet lasajc guial naladixidi zinalidi xnejz Dios. ²⁷ Din par dux Dad ree Dios bën zinal xnejzaman zagdxë naj bën rüjn yudar xindo bizëjb ree në ree bëngunaa bizëjb chi rzagdiaj reeman, rajp tëtëman cudad chitëë yabaman loj ni mal riga' loj guidxliuj.

2

Ad rayalt yalej ree loj ree bejn

¹ Gradi compniar raliduladx ree Jesucrist bën rniabee, ad rayalt cwedi loj ree bejn. ² Yagui'e'ch ree, chu' tijb bejn lod rado'pidi, najcwaman lajd zagdxë yu' tëtë guilbnil or yaaman, chu' tëtë tijb bënprob najcwaman lajd senci, ³ abi' mazri güüncwentidi bën najcw lajd zagdxë guin, guiëbidi lojman: "Gurej guie, laan naj luar zagdxë", guiáad loj bënprob guin guiëbidi: "Yagaj guzuli o gurej luyuj zii ya." ⁴ Chi rüjndi zian, çnid cabedi bejn loj gajquidi

ya?, çnid rula'chidi ya chi rüjndi gra ree xgabmal guin? ⁵ Gradi compniar raliduladx ree Jesucrist, rënan lëjt, gol bacaagdiagj nine: Dios gule bën naj ree bënprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree bën rën laaman. ⁶ Guiáad lëjt rusa'n xtudi bënprob ree. Wen, çid benrijcw guin ree rusagzi lëjt ya rudxig tëë reeman lëjt loj guxtis? ⁷ Çid laagajc reeman rnieeguijdx Jesucrist ya, bën naj bënlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

⁸ Bal walidi rüjndi ni ca loj xley Dios, zi'c ca loj xtiidxaman ni rëb: "Guyën bejn ree zi'c rën lüj gajc", dxel zagdxequi cayüjndi. ⁹ Per bal mazri rüjncwenti di tijb bejn guial loj stijbaman, dxel ma cayüjndi dol, ma rajpidi dol guial ad rüjntidi cumplid xley Dios. ¹⁰ Din bal chutëëz zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. ¹¹ Dios gajc rëb: "Ad sunël xinguaaw ren o béngunaa ren", rëb tëëman: "Ad gugüjtil bejn." Per bal id za'nël xinguaaw o béngunaa ren ya per rugüjtil, dxel ma cusaglojl xley Dios. ¹² Zeel gol guneë gol been tëë zi'c ree bën yadëëd cwent diidxli loj Dios por xtiidxaman ni rabëë dunuj ree loj dol. ¹³ Din bën ad rayat ree lasa', ad zayat Dios laa reeman dxej güün xguialguxtisaman. Per bën raya ree lasa' ad najtan ni guidxeb reeman dxej guin.

Royal yaguieen ree ni rën Dios

¹⁴ Zeel rnin lëjt, çxhie sirv güün bal chu guiëb, rliladxan Dios, abi' ad rüjntaman ni rënman? çWen, guialzi rliladxaman ya gacaman perdon? ¹⁵ Yaguie'ch ree, tijb dux compniar ree, bën rliladx Jesucrist, najman xinguaaw o béngunaa ya, guiyaadx xabaman con ni gawaman, ¹⁶ abi' guiëb tijb lëjt loj reeman: "Yaguiajdi zagdxë, gawidi zagdxë ad gagnajl tëëdi." Per bal id rudëëdi ni riaadx reeman, çxhieci gan guiëbidi zian? ¹⁷ Ziangajc rzajc bën rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

¹⁸ Xt zajc chu na lojl: "Lüj na rliladxil Dios, guiáad naj rünan ni rënman." Yan balüü naj guial rliladxil laaman guial ad rüjntil ni rënman, guiáad naj güün guial rliladxan guial rünan zi'c rënman. ¹⁹ Zagdxë rüjn bal rliladxil yu' tijbzi Dios, per në ree xindxab rliladx zian, abi' xt rnij reex guial rdxeb reex. ²⁰ Zeel ad bal natontil, bignia' achet lasajc guial chililadx bejn Dios bal id rüjnman ni rënman. ²¹ Basaaladx, dux béngulal ree Abraham, bayagbee Dios laaman zi'c bën ad beent dol, guial beenman ni guyën Dios, chi rëbaman lojman din nugüjt xi'nman Isaac nudëë tëëman laax zi'c gon lojman. ²² Ma qui ruguiaal, guial bililadxaman, zeel beenman ni guyën Dios. Guial beenman zian, zeel biguëen guial diidxli bililadxaman laaman. ²³ Zian gojc cumplid ni ca loj xtiidx Dios, lod rëb: "Bililadx Abraham Dios, zeel bayagbeeman laaman zi'c bën ad beent dol", bayagbee tëë ree bejn laaman zi'c tijb xmiw Dios.

²⁴ çMa bignia'di yan ya? Rayagbee Dios bejn zi'c tijb bën ad wayüjnt dol guial rüjnman ni rënman, ad guialzi rëbtaman rliladxaman laaman. ²⁵ Ziangajc gojc con tijb bën brii laj Rahab, bën goc béngunaa dxuudx, bayagbee Dios laaman zi'c bën ad beent dol guial beenman ni rën Dios, chi badëëd lidxaman baquie'chloj tio'p ree bën Israel we ladxaman biquiaa reeman xhienaag chu' ree xsuldad reeman, been tëëman laa reeman yudar persi zia reeman nejz ren. ²⁶ Din bën achet xsprijt ad zajc guialbeenman. Ziangajc rzajc tijb bën rliladx Dios: bal id züjzman zi'c rënman, achet lasajc guial rëbaman rliladxaman laaman.

3

Du lüdx ree naj zi'c tijb luar lod guidxa ni mal

¹ Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunuj guial ralüün xtiidxaman, mazri zro' naj guialguxtis ni güün Dios con dunuj bal id zagüieenan zi'c rayal. ² Du graczi ree rüjn xhietëëz dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tëët ro'di, najdi bën naya delant loj Dios, rajc zëë rniabeë lëjt gajc. ³ Lëjt ragbee, chi ralu' ree fren ro' ree way din che reeb lod rayën ree, zian ragüieen ree gan ranabee reeb. ⁴ Ziangajc ree barcw, majsí narooob reen, majsí por mazt rucadxaa bidoxh laa reen, per con tijb guibdobëz ni la timón, con laan ma zajc chinë bejn laan lod rëntzaman. ⁵ Ziangajc naj du lüdx ree, najn ni dobëz, per narooob guialquia rüjnan. Najn zi'c tijb guij dobëz, per majsí najn ni dobëz, rüjnan guialquia narooob ruze'can dajn narooob. ⁶ Du lüdx ree naj zi'c tijb guij, zajc yaneë në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zëëd loj xindxab du ro' ree. ⁷ Rayagbee ree guial graloj ree bedoxh zajc gagnadoo, xt në ree be rzuj në ree bëël nëtëë ree be yu' loj nijs, yan ma gagnadoo reeb por ree bénguidxliuj. ⁸ Per lüdx bejn achut wayüjñ gan nabee laan, najn zi'c tijb ni ad zajc gagnadoo, zi'c tijb ni guidxa venen rugüjt. ⁹ Con du lüdx ree ranee ree diidx zagdxë par dux Dad ree Dios, abi' con laagajcan raneeguijdx ree bejn, bën been gajc Dios zi'c najman. ¹⁰ Gradi compniar raliduladx ree Jesucrist, du ro' ree ririi diidx zagdxë në diidxguijdx, per ad rayalt gacan zian. ¹¹ Lëjt ragbee, lod rajch nijs zagdxë ad zajc grii nijs naxij, ¹² ad zajc

tëët tia aceitunas loj yag higo, ad za zajct tia higo loj yag uv, ad zajc tëët grii nijs zagdxë lod ririi nijs naxij.

Ni rüjn bën ca' quiargueijn rudëë Dios

¹³ Bal chu lëjt naladx rajc rignia' tëë gra xtiidx Dios, rayal gacaman bënchaawlaxd guiban tëëman zi'c rayal, zian guiguien guial yu' xquiargueijnman. ¹⁴ Per bal guidxa guialnadëdloj luxdoodi rën tëëdi gra par lëjt gajc din gaquidi mazri bën zojbloj, ad güüdi benro' guial rajquidi xtiidx Dios, cusquieezidi guial rüjndi zian. ¹⁵ Lasa' quiargueijn guin ad Diost rudëë laan, xquiargueijn gajc bën riga' loj guidxliuj guien, zëëd tëën loj xindxab. ¹⁶ Din lod yu' guialnadëdloj lod yu' tëë bën rën gra par laagajcaman, ni yu' wadijl në gra loj ni mal. ¹⁷ Per bën rajp quiargueijn runee Dios, yaloj rünman nagueijn guibanman zagdxë lojman, gac tëëman bën ad rüjnt nabë, në benza'c, gap tëëman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tëëman cumplid ni guinieeman. ¹⁸ Bën rüjn ree nagueijn ribajn sin wadijl, raguuil reeman mod guinieenë reeman bejn zagdxë, zian rbajn reeman zi'c rën Dios.

4

¹ ¿Ban zëëd guial ralen lasa'di në guial rdilidi? ¿Id zëëdan por xgabmal ni rüjndi ya? ² Rzëëbladxidi gapidi ni ad rajptidi, zeel xt rugüjt lasa'di din tia'di ni rëndi, rdëdloj tëëdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rëndi, din ad rniabtidan loj Dios. ³ Abi' bal rniabidan, ad runeetaman laan, din ad rniabtidan par güüdi ni zagdxë, rënzidan din guibandi zi'ctzi rëndi. ⁴ ¿Bën rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rën chinal ni mal guin, laagajcaman za' contr Dios. ⁵ Ad ca xlia'tzi loj xtiidxaman lod rëb: “Badxe' xSprijt Dios du luxdoo ree, rënman Sprijt guin, xt neelojman laaman.” ⁶ Dád zro' naj yudar rüjn Dios dunuj ree, zi'c ca loj xtiidxaman lod rëb: “Dád naza'c Dios con ree bën rüjn naya lojman, per ad rüjn cwenttaman bën rüjn ree benro'.” ⁷ Zeel gol bazoob xtiidx Dios, ad gudëëdi mod güün xindxab lëjt gan, zian chiquiedix loj xnejzidi. ⁸ Gol gubig loj dux Dad ree Dios din güün cwenttaman lëjt, guiáad lëjt bëndol, gol bariica loj dol, guiáad ree bën yu' nawëëg luxdoo guial chinalidi xnejz Dios, con guidib luxdoodi gol binalaman. ⁹ Gol guyu xgab, gol guyu naya gol biin tëë por xtolidi, luar guxijdxidi gol biin, luar chu' luxdoodi nix gol guyu naya, ¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bën rnieeguijdx o bën rula'ch lasa', ma caneguijdxaman cula'ch tëëman xley Dios. Bal rula'chidan, ad cayüntridi zi'c rniabeen, lëjtli ma canabee laan. ¹² Per tijbzi Dios basa'n ley guin rüjn tëëman guialguxtis, laaman ca' guialrniabee guial yabëëman në guial gunijtaman. Per lüj, ¿chu najl zeel rula'chil bejn?

Dux guialnaban ree naj ni tibrajtzi

¹³ Yan gol bacaagdiag nine lëjt bën rëb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” ¹⁴ Ni'quid ragbeetidi xhie gac guixie, din dux guialnaban ree naj zi'c tijb bëj rguien tibrajt, stibrajt ma gunidlojn. ¹⁵ Zagdxeli naj guiëbidi: “Bal gunee Dios dunujn guialnaban, yaguieenan nine o ni ni ya.” ¹⁶ Per lëjt mazri zinalidi xtiidx dxalidi, abi' laa reen naj ni mal. ¹⁷ Zeel bën ragbee xhienaag güünman ni zagdxë abi' ad rüjntaman laan, ma cayünman dol.

5

Ni rüjn ree benrijcw

¹ ¿Lëjt, najdi benrijcw! Gol bacaagdiag nine, gol biin gol gurixdiaj tëë, din ma zëëd lod sagdiajdi, ² tant zieni ni rajpidi xt rxin reen, guiáad xabidi xt raw be laa reen. ³ Gra or në plajt ni rajpidi xt rzobëj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie. ⁴ Gol baguiaa, laa ree bën been xchiindi canab din quixidi laa reeman, xt Dios bën ca' gra guialrniabee ma bigueijn guial caygu' reeman guialquia. ⁵ Nabandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios. ⁶ Din xt baguüilidi mod persi bagüjtidi bën ad beent ree xhienin, abi' achet gojc nüjn reeman chitëë niëjt reeman.

Royal yarejdx ree Dios yaya'p tëë ree pasens

⁷ Gradi compniar raliduladx ree Jesucrist, gol gojp pasens xt dxej guil't dux Dad ree Jesucrist stijb, zi'c rdaan tijb bën rüjn dxin dajn, rbëzaman guia yaloj xt guia bigra din

yalesaman ni guxübinman. ⁸ Ziängajc lëjt gol gojp pasens, ad yaleny'a'di, din ma zidyob dxej gui't dux Dad ree Jesucrist.

⁹ Rni tëën lëjt, ad yaleny'a' nē lasa'di, chitëë xhie casti yayalidi, din ma zidyob dxej güün xguialguxtis Dios. ¹⁰ Gol binal zi'c been ree bēn badëë xtiidx Dios loj ree bejn, gojp reeman pasens gudaan tëë reeman graloj guialrzagdiaj gudëd reeman. ¹¹ Rayagbee ree guial xiquilbaa ree bēn rdaan loj guialrzagdiaj. Ma biguiejndi xcwent bēn brii laj Job, xhienaag gudaanman chi guzagdiajman, ragbee tëëdi xhienaag beennë Dios laaman, chi gulox gudëdaman loj gra guialrzagdiaj guin, din Dios dād naza'caman raya tëëman bejn ree.

¹² Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëë gudëëd Dios lëjt casti, zagdxeli naj guinieedi diidxli güün tëë xtiidxidi cumplid.

¹³ Bal chu lëjt cazagdiaj, gol gurejdx Dios, o bal yu' luxdoodi zagdx, gol biil par laaman.

¹⁴ Guiáad bal ragxuu tijb lëjt, rayal guinieedi bēn rniabee ree lëjt guial najdi bēn riladx Jesucrist, din cwedx reeman Dios por laaman quiëëb tëë reeman laaman sejt por laj Jesucrist.

¹⁵ Bal cwedx reeman Dios con guidib luxdoo reeman, zayajc bēnragxuu guin, yales Dios laaman, abi' bal xhie dolan ma beenman, güünman laan perdon. ¹⁶ Zeel gol baxhoobdol loj lasa'di gol gurejdx tëë Dios por lasa'di din yayajquidi, din tijb bēn zinal xnejz Dios, chi rbejdxaman laaman, rüjn cwentaman laaman. ¹⁷ Zi'c bēn brii laj Elías bēn badëë xtiidx Dios loj ree bejn, gojcaman bēnguidxliuj zi'cgajc dunuj ree, abi' chi gudi'n gunabaman loj Dios guial ad zalt guia, dxel ad golt guia choon ijz garol. ¹⁸ Chi guredxaman Dios zatijb, zianz bazuloj gol guia, dxel bayu guialnaza'c loj guidxliuj.

¹⁹ Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yajejquidi, ²⁰ gol gogbee guial chutëëz bēn rasiëjc tijb bēndol loj nejz zagdx chitëë chinalaman ni mal, laaman rabëë bēndol guin loj casti, abi' majsi ma beenman zien dol, gran gac perdon.

Gui'ch yaløj bacaa San Pedr

Rxhiaal Bëd xtiidx Dios loj ree bejn

¹ Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor nê Bitinia. ² Ma gulej dux Dad ree Dios lëjt diidx gocli, zi'c goc xixgabaman. xSprijtaman gulëeca lëjt din guzoobidi diidx gac tëë luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëëman luxdoodi.

Ni ralëjz ree gunee Dios

³ Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. ⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan. ⁵ Guial rliadxidi Dios, laaman rniaj lëjt con xguialrniabeeman, din chi guidxin dxej nit guidxliuj, dxeel gagbee gra bejn guial ma beenman lëjt perdon.

⁶ Zeel rabaa da'tidi majsi tëdidi graloj guialrzagdiaj tiblädëd, ⁷ din por guialrzagdiaj guin guiguie chu diidxli rliadx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rniidloj, zeel mazri lasajc guialrliadx laaman, bal chu taan xhietëëz loj guialrzagdiajn, din ad yu't dxej nit xguialrliadxidi. Abi' dxej gui't Jesucrist stijb, lasa' guialrliadx guin naj ni ruladx Dios, guiaad ree bejn nê ree anjl guza't reeman laaman zagdxe gap tëë reeman laaman respejt guial rusnuu rliadxidi laaman.

⁸ Ad waguiaatidi Jesucrist per rëndi laaman, abi' yan rliadxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiebidi, ⁹ din lëjt ragbee, guial rliadxidi, ma nüjn Dios lëjt cwent zi'c ree bën achet xtol.

¹⁰ Diidx gocli, bën badëë ree xtiidx Dios loj ree bejn basid reeman been tëë reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. ¹¹ Por xSprijt Jesucrist gogbee reeman diidx gocli guial sagdiajman zianz qui gapraman guialrniabee, dxeel been reeman naguiejn niagbee reeman chu benan sac zian goc tëë gac zian. ¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëëd xanyabaa. Nê ree anjl ma rën nejzdoo gagbee nine ree.

Ze ryal guiban ree xi'n Dios

¹³ Zeel gol guzusin gol bastëdguiein tëë, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. ¹⁴ Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. ¹⁵ Laaman gule lëjt, zeel gol been naguiejn guibandi naya delant lojman, din laaman naj bën naya nali. ¹⁶ Zi'c rëb loj xtiidxaman: "Gol gubajn naya delant lon, din naj naj bën naya nali." ¹⁷ Yan bal rnieedi Dios "Dad", bën rüjn xguialguxtis tibloj, bal conin rüjn tijb gaj bejn, ryal gapidi laaman respejt guidib tiamp guibandi loj guidxliuj guie. ¹⁸ Din lëjt ragbee guial babëëman lëjt loj costumbr ni basa'nnë ree xbéngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rniijt, zi'c or o plajt ya, ¹⁹ gojx con xrejn za'cdxoon Jesucrist ni guxhie'man loj crüjz chi gütaman zi'c tijb xiil zagdxe be ad naxint, be rugüjt reeman par Dios por xtol ree bejn. ²⁰ Diidx chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lëjt. ²¹ Zeel por laaman rliadxidi Dios bën basban laaman badëë tëëman guialrniabee lojman, yan con guidib luxdoodi ma rliadxidi Dios rbëz tëëdi ni guneeaman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiein lasa'di zi'c ryal, zeel gol guyën lasa'di con guidib luxdoodi. ²³ Din ma bidxaa mod nabandi, zi'c rulüü gojlidi stijb, abi' guialnaban zinalidi ad zëëdtan por tijb bën nit, zëëdan por xtiidx Dios, diidx naban, diidx ni ad zanijt, ²⁴ din loj xtiidxaman rëb:

Gra bénguidxliuj naj zi'c gui'xh dajn,
 guiaad ni rajp reeman naj zi'c xguiaa gui'xh guin.
 Rbidx gui'xh guin, abi' riajb xguiaan,
²⁵ per xtiidx Dios ad yu't dxej nitan.
 Abi' laan naj xtiidxza'c Jesucrist ni ma biguiejndi.

2

¹ Zeel gol basa'n gra ni mal, gra ni rusquiee, ad bal rüjnzidi, gol basa'n gualnadédloj në gual rnieeguijdx lasa'di. ² Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusunuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb, ³ bal walidi ma ragbeedi gual naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tiblax, per par Dios najman bën lasajc, laaman gule laaman. ⁵ Ziangajc lëjt, gual ma rliladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëedi lojman zi'c gon por Jesucrist. ⁶ Rëb loj xtiidx Dios:

Gol baguiaa, guzoban tijb guiaj zagdx luguiedx Jerusalén.

Laan naj guiaj nabee, guiaj zojbloj, nilasajc tëë.

Bal chu chililadx laan,

ad yu't dxej yaya'nxtuman.

⁷ Par lëjt, gual rliladxidi Jesucrist, laaman naj zi'c guiaj lasajc da't. Per par ree bën ad rliladxt rajc cumplid ni rëb loj xtiidx Dios, lod rëb:

Guiaj ni gulëëgo'n ree bën rüjn yu,

yan laan naj guiaj zojbloj.

⁸ Rajc tëë cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,

abi' rureeyujn laa reeman.

Rzajc reeman zian, gual ad ruzoobt reeman xtiidx Dios, zian rajc ni rëbaman xcwent reeman.

⁹ Per lëjt naj bën guleman, najdi bixhioz rüjn ree sirv lojman, gual najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdx rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman. ¹⁰ Gocli achutczu najdi, per yan ma najdi xbejn Dios. Gocli ad ragbeetidi gual raya Dios lëjt, per yan ma ragbeedi.

Zi'c rayal guiban ben rliladx Dios

¹¹ Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianci din gusa'n ree bejn nejz Dios. ¹² Gol gubajn zagdx loj ree bën ad nünbeet laaman, zian majsi rnieeguijdx reeman lëjt yan, rëb reeman najdi benmal, per chi guguiaa reeman gual zagdx naj ni cayüjndi, dxel guza't reeman laaman zagdx, dxej ni yadëed reeman cwent lojman.

¹³ Gual rliladxidi Dad Jesucrist, gol bazoob xtiidx gra ree bën rniabee loj guidxliuj guie. Gol bazoob xtiidx pristent rniabee xnaciondi ¹⁴ në xtiidx gobernador bën rxhiaalaman din gudëëdaman casti bën rüjn ree ni mal guilies tëëman xvalor ree bën rüjn ni zagdx. ¹⁵ Din rën Dios güündi ni zagdx ree din gucwëëzidi ro' ree bentont ad rignia't abi' rnieeguijdx reeman lëjt.

¹⁶ Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios. ¹⁷ Gol gojp respejt gra bejn zi'c rayal, gol guyën ree bën rliladx Jesucrist, gol bidxeb Dios, gol gojp tëë respejt pristent rniabee xnaciondi.

Gol gudaan loj gualrzagdiaj

¹⁸ Lëjt bën naj ree mojs, gol bazoob xtiidx ree xpatrondi, gol gojp tëë reeman respejt, ad bën najtzi ree benza'c raya tëë reeman lëjt, në ree bën naj bendxuudx. ¹⁹ Din zagdx naj gual chu rdaan loj gualrzagdiaj, majsi ad rayaltaman laan, rdaanman laan gual rënman güünman ni ruladx Dios. ²⁰ Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdx rüjndi abi' rdaandi loj gualrzagdiaj guin, laan lasajc delant loj Dios, ²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. ²² Ad yu'tczi dxej beenman dol abi' ni'qui tijb diidx rusquiee ad briit ro'man. ²³ Chi rëb reeman diidxgujdx lojman, ad badxi'taman laan con diidxgujdx, chi basagzi reeman laaman, ad rëbtaman loj reeman gual yaguijx reeman ni cayüjnnë reeman laaman, graczan basa'nman loj Dios bën rüjn xgualguxtis zi'c rayal. ²⁴ Guzagdiaj Jesucrist loj crüjz por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelgujdxaman ma bayüjnman du luxdoo ree naya. ²⁵ Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tëëman lëjt zi'c tijb bën rajp xiil.

3

Zi'c rayal guiban ree bën ca' lasa'

¹ Nē lējt bēngunaa ma yu' ree lacheel, gol bazoob xtiidx lacheelidi, din bal chu lacheelidi ad rliiladxt xtiidx Dios, per chi guguaiaa reex zi'c nabandi, dxel guililadx reex. Ad rūjnt naguiejn xhie guiēbidi loj reex, ² chililadx reex guial guguaiaa reex nabandi zi'c rayal rajp tēēdi laa reex respejt. ³ Chi rzujchaawidi, ad bal rdēdlaj rūjnchaaw guidxguijquidi ni'qui guial gūūndi ujs ganax ni or o gacwidi ganax lajd lasajc. ⁴ Mazri zagdxe naj guial gūūndi naguiejn gac luxdoodi naya delant loj Dios, gol gojc benza'c nē bēn chaawladx, din laan ad yu't dxej nitan, abi' laan mazri lasajc delant lojman. ⁵ Din zian gubajñ ree bēngunaa binal ree xnejzaman goc da't, bililadx reeman laaman bazoob tēē reeman xtiidx lacheel reeman. ⁶ Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rūjndi ni zagdxe sin gualrdxeb.

⁷ Ziangajc lējt xinguaaaw, gol gubajñnē lacheelidi zagdxe, gol gojp reeman respejt ad gualzi najt reeman bēn nada, rayal gūūndi zian guial nē reeman rayal gualnaban tiblyaa razaladx Dios, guial najman benza'c. Zian gol gubajñ, chitēē xhie gudxe' nawēēg lējt chi cwedx guiniabidi laaman.

Xhie rayal gūūndi chi xhie gūūn nē reeman lējt

⁸ Zeel rnin loj gradi: Gol gubajñnē lasa'di zagdxe, gol bachajg lasa'di, gol been xgab tijbzi, gol guyēn lasa'di zi'c rayal, gol gojc benza'c nē bēn chaawladx. ⁹ Ad yadxi'di ni mal rūjn ree bejn lējt, ad yadxi'di diidxguijdx ni na reeman lojdi, gol gurejdx Dios din gagnēman laa reeman, din Dios gulej lējt par gagnēman lējt. ¹⁰ Din rēb loj xtiidxaman:

Bēn rēn guiban zagdxe chu' tēē luxdoodan zagdxe, rayal gapaman cudad ad guinieeman diidxguijdx ad guinee tēēman diidx rusquiee.

¹¹ Cwēēladxaman ni mal, gūūnman ni zagdxe gūūn zagdxe naguiejn guibannē ree lasa'man zagdxe, zian rayal guibanman zianczi.

¹² Din dux Dad ree Dios rniaj bēn rūjn ree ni rēnman rūjncwent tēēman xtiidx reeman chi rbejdx reeman laaman, per ralenman bēn rūjn ree ni mal.

¹³ Achut gūūn lējt ni mal, bal cayūjndi naguiejn gūūndi ni zagdxe. ¹⁴ Per xiquilbaadi bal cusagdiaj bejn lējt guial cayūjndi ni zagdxe. Ad chu'di xgab ad guidxeb tēēdi por zian, ¹⁵ gol gojp respejt gol badxe'guijc tēē dux Dad ree Jesucrist. Gol guzujsin din yadxi'di xtiidx ree bēn guiniabdiidx lojdi xcwent ni rliiladxidi, per gol badxi' xtiidx reeman zagdxe con diidx zagdxe ree. ¹⁶ Gol gubajñ zagdxe din guiguiejn guial achet ni mal yu'guijquidi din yaya'nxtu ree bēn rnieeguijdx lējt, guial rūjndi ni zagdxe rliiladx tēēdi Jesucrist. ¹⁷ Mazri zagdxe naj sagdiaj bejn guial gūūnman ni zagdxe, bal zian rēn Dios, luar sagdiajman guial gūūnman ni mal.

¹⁸ Din xt Jesucrist guzagdiaj, gūjtaman tib voltzi por dux tol ree majsi ad beentaman dol, per gūjtaman duxcwent ree nayajc ree bēndol, zian guxhalaman nejz din gac yadxin ree loj Dios, gūjtaman zi'c bēnguidxliuj per babanman por xSprijtaman. ¹⁹ Chi gadaman yaban, wej xSprijtaman bigneenēman xsprijt ree bengūt lod nayaaw reeman. ²⁰ Sprijt guin ree naj xsprijt ree bēn ad bazoob diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayūjn Noé barcw, abi' xhujnzi bejn gulaa loj nijs banijt guidxliuj tiamp zii. ²¹ Nijs guin naj zi'c gualrirobnijns ni ruluū guial ma nayajc ree perdon. Gualrirobnijns guin ad rēnt guiēban guial najn par gusian dux cuerp ree, ruluūn guial caynaab ree loj Dios din yaya dux quiargueijn ree, guial ma raya'p ree gualnaban cūb guial baban Jesucrist loj ree bengūt. ²² Bēn bayē'p xanyabaa abi' za'man xladbee Dios lod canabeeman anjl ree nē ree sprijt ca' gualrniabee.

4

Gol beennē quiargueijn ni banee Dios dxiin

¹ Zeel zi'c gudēd Jesucrist loj gualrzagdiaj, nē lējt rayal taan lojn. Din por gualrzagdiaj guin rūjn bejn dol tiblād, ² din gūūnman zi'c rēn Dios guidib xgualnabanman luar gūūnman zi'c naj xixgabaman. ³ Xchej da't gubajndi zi'c naband ree bēn ad nūnbeet Dios, gubajndi zi'ctzi guyēndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzūdx da'tidi, guyēn tēēdi ni ad najt ree Dios, laan naj ni rbijxhladx Dios. ⁴ Per yan guial ad zinaltridi zi'c naband ree bēn naband zian, zeel radxa loj reeman, rnieeguijdx tēē reeman lējt. ⁵ Per rayal yadēēd reeman cwent loj Dios bēn za' par gūūn xgualguxtisaman con ree bēn naband nē ree bēn ma gūjt. ⁶ Din nē ree bēn ma gūjt bigueijn xtiidx Dios chi guban reeman loj guidxliuj guie, din guiban reeman loj Dios majsi par ree bēnguidxliuj ma gūjt reeman.

⁷ Ma zidyob dxej nit guidxliuj, zeel gol bastēdguien gol guzujsin tēē din cwedx guiniabidi Dios con guidib luxdoodi. ⁸ Ad yayanladxidi guial guiēn lasa'di zi'c rayal, din bēn rēn lasa'

rūjnman perdon majsi xhietēēz rūjnnē reeman laaman. ⁹ Bal yu' tijb xcompniaridi rniab luar lixdidi din yaya'nman, gol badēēdsii lixdidi con guidib luxdoodi ad yaleny'a'di. ¹⁰ Loj tijb gajdi ma baneē Dios quiarguejn din gūūndi ni rayal gūūndi. Zeel gol been lasa'di yudar con ni rajc rūjndi, din guiguiein guial cayūjndi zi'c rayal con quiarguejn ni bazaladxaman lojdi. ¹¹ Bal chu lējt ca' quiarguejn par gulūū xcompniaridi, rayal guinieedi ni naj diidxli zi'c tal rēb loj xtiidx Dios, ziangajc bēn ca' quiarguejn par gūūnman yudar dux compniar ree, rayal gūūnman laan con gojl razaladx Dios lojman. Gra ni cayūjndi, gol beenan din guza't ree bejn Dios zagdxē por Jesucrist, bēn rayal respejt nē gualrniabee zianczi. Amēn.

Gol gudaan gra gualrzagdiaj

¹² Gradi compniar raliduladx ree Jesucrist, rēnan lējt, zeel rnin lojdi, ad ru nawēēguidi guial zro' naj loj gualrzagdiaj cadēdidi, din laan naj zi'c prueb par lējt. Ad rudi xgab chexc zeel cazajquidi zian. ¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb. ¹⁴ Xiquilbaadi bal chu na diidxgujdx lojdi guial zinalidi Jesucrist, din gra dxejczzi za'nē xSprijt Dios lējt, bēn ca' gualrniabee. ¹⁵ Achet lasajc bal cazagdiajdi guial bagūjtidi bejn, o por gualgubaan, o por guial rūjndi ni mal o guial rudi lod ad rayaltidi. ¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudēēman quixtēē loj Dios guial ma najman xbejn Jesucrist.

¹⁷ Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhiecczi naag sac ree bēn ad rēnt guzoob xtiidzxa'caman. ¹⁸ Nacli ree bēn zinal xnejz Dios nawēēg naj guial yaguij reeman xanyabaa, piorli ree bēndol bēn ad nūnbeet ree Dios, xhiecczi naag naj luar lod yayal reeman. ¹⁹ Zeel bēn cazagdiaj ree zi'c naj xixgab Dios, rayal gusnuu gūūn reeman ni zagdxē gusa'n tēē reeman gran loj Dios, laaman gagnē laa reeman. Laaman bazaladx gualnaban rūjn tēēman zi'c rayal.

5

Consejw par ree bēn rliladx Jesucrist

¹ Yan rēnan gudēdan consejw loj ree bēn rniabee ree lojdi, naj guial ca'n gualrniabee zi'cgajc laa reeman, naj tēēn testiw xcwent ni guzagdiaj Jesucrist, zi'cgajc laa reeman guguijn xbianiman dxej gui'taman stijb, zeel rēnan guiēn nine ree loj reeman. ² Rnin lojdi, gol gunaj ree xbejn Jesucrist, bēn rayal ree gulūūdi din gusnuu chinal reeman xnejz Dios. Ad gūūndi dxiin guin gualzi ragbeedi rayal gūūndi laan, gol beenan guial yu'di gan gūūndi laan, con guidib luxdoodi gol beenan, ad bal gūūndi laan gualzi rzēēblaxdidi milia. ³ Ad guial ca'tidi gualrniabee din nabeedi zi'c tal rēndi, rayal guibandi zagdxē din guguaa ree bēn rliladx Jesucrist din guiban reeman zian, ⁴ din chi gui't bēn rniabee dunuj ree stijb, dxel guneeman tijb niza'cdxoon ni ad yu't dxej nit.

⁵ Ziangajc lējt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēē xtiidx ree xcompniaridi, din: Ralen da't Dios bēn rūjn ree benro', per dād benza'can con ree bēn rūjn naya.

⁶ Zeel gol been naya loj Dios, bēn ca' gra gualrniabee, din guiliesaman xvaloridi chi guidxin dxej. ⁷ Gol basa'n gra xgab yu'di loj Dios, din laaman rniāj lējt.

⁸ Gol guzujsin, gol gojp cudad, din xinxab xin ralen da't lējt, za'x zi'c tijb beedx rliaan, rguuilix chu gūūnx gan. ⁹ Zeel ad tiēbidi gūūnx lējt gan, gol guzujdx'i'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bēn rliladx Jesucrist guidib guidxliuj. ¹⁰ Per chi ma gudēdidi ta'n loj gualrzagdiaj, dxel gagnē Dios din gusnuu gūūndi nagueijn guibandi zi'c rēnman, su tēēdi rejs, sudxi'chidi, gap tēēdi segur guial zinalidi xnejzaman. Laagajcaman naj Dios cayūjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist. ¹¹ Laaman rayal respejt, din tijbzi laaman ca' gualrniabee zianczi. Amēn.

Diidx bigra ca ree loj gui'ch guie

¹² Silvan, tijb dux compniar ree, bēn ragbeen naban zi'c rēn Dios, laaman been gui'ch guie din ganin lojdi tio'p choon diidx, par gunen lējt consejw nētēē par gugojnan lējt guial diidxli rēn Dios lējt, zeel gol basnuu gol guyēnman gol guyēn tēē lasa'di. ¹³ Bēn rliladx ree Jesucrist, bēn ma gulej Dios zi'cgajc lējt, bēn zojb ree Babilonia, rugajpdioz reeman lējt. Nē Marcw xin nūnan zi'c da xi'nān rugajpdioz lējt. ¹⁴ Guial rēn lasa'di, gol bagajpdioz lasa'di xhietēēz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Gui'ch barojp bacaa San Pedr

Rxhiaal Bêd xtiidx Dios loj ree bejn

¹ Naj, Simón Bêd, najn tijb xi apóstol Jesucrist rün tëen sirv lojman, cucas gui'ch guie par lèjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bèn rabëë bejn ree loj dol. ² Güünle' Dios lèjt mazri, yabe'cdxe tëëman luxdoodi guial ma nünbeedi laaman nè dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tëë ree naya delant lojman, din ma naguieenbee ree Dios bèn gule dunuj ree guial ca'man guialrniabee naj tëëman benza'c. ⁴ Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tëëdi tiblax gra ree ni ad rüjnt sirv nè ree ni mal riga' loj guidxliuj guie. ⁵ Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi. ⁶ Abi' guial gagbeedi xhienaag guibandi, ma zajc gucwëëz xixgabmalidi, abi' guial gucwëëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷ dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

⁸ Bal yu'guijquidi nine ree cusnuu tëë cayüjndi naguiejn guibandi zian, dxel ad naban xlia'tzidi, ad beenbee xlia' tëëtidi dux Dad ree Jesucrist. ⁹ Per bèn ad rüjnt naguiejn guiban zian, laaman naj zi'c tijb bën lutia'p o zi'c tijb bèn ad ruguiaat zijt, ma bayanladxaman guial biquied Dios xtolaman ni beenman guia'xchej. ¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lèjt ma gulej tëëman lèjt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. ¹¹ Zian gapidi nejz nali din chu'di lod rniabee dux Dad ree Jesucrist tiblayaa, bèn babëë dunuj ree loj dol.

¹² Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tëëdi ni diidxli ni ma bacaagdiajguidi. ¹³ La'tgaj naban loj guidxliuj guie, naladxan rayal gunen consejw lojdi con ree diidx guin. ¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienë'n lèjt, din gusaaladxidi da diidxan majsi ma güjtan.

Bên baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tëë naag gui'taman stijb, ad balëëguijctan ni banan lojdi. Din con quijb du lojn baguiaan xbianiman ¹⁷ chi biguien cha' Dios diizd xanyabaa, gulesaman xvaloraman baza't tëëman laaman zagdx, rëbaman: "Xin guie naj da xi'n'an, rënan laax rabaanë' tëën laax." ¹⁸ Abi' dunuj nayajc bèn biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rëb ree bèn badëëd xtiidx Dios loj ree bejn, zeel zagdx naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lèjt chaawlax cusnuu cayagbeedi xcwent Dios xt chi gui't Jesucrist stijb, bèn naj bajl rusni par dunuj ree, dxel ma gagbeedi graczan zi'c tal najn. ²⁰ Per gol gogbee guial ni'qui tijb xtiidx Dios ad zajt chignia' bejn por xixgabzaman. ²¹ Din bèn badëëd ree xtiidx Dios loj ree bejn, ad guneeet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

2

Bên ruliüü ree diidx rusquiee (Judas 4-13)

¹ Zian zi'c guyu ree bèn rusquiee loj ree bèn Israel tiamp gulal rëb reeman rudëëd reeman xtiidx Dios loj ree bejn, ziangajc chu' ree bèn rusquiee guluü lèjt ni rusquiee ree, yaguuil reeman mod din guluü reeman lèjt ni ad najt diidxli par gagdxadi. Ad zatiëjt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. ² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. ³ Abi' guial rzëëbladx reeman milia, yaguuil reeman xhie ni rusquiee guluü reeman lèjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bèn rüjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman.

⁵ Ad been tëetaman perdon benmal guyu ree tiamp gulal, banijtaman laa reeman con nijs. Tijbzi Noé bèn balüü xhienaag chinal ree bejn xnejz Dios, laazaman naj bèn gulaa con zagajdx ree bejn. ⁶ Ziangajc chi been xguialguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi' laan naj ejempl par ree bèn guiban nadxuudx zi'c ree bèn guiedx zii ree. ⁷ Per baslaa Dios bèn brii laj Lot, bèn guban zi'c rën Dios guyu tëëman xgab guial baguiaaman zi'c guban ree benmal guin. ⁸ Abi' guial gubajnman zagdx, zeel guixie guixie guyunaya da'taman por ree nidxuudx bigueijnman baguiaa tëëman been ree bèn guin. ⁹ Rajc rüjn Dios yudar bèn ruzoob ree xtiidxaman xhietëez loj prueb cadëd reeman, abi' ma naj xhie güünnëman benmal ree dxej güün xguialguxtisaman.

¹⁰ Laan naj ni yaya ree bèn naban zi'ctzi rën reeman, ad rënt reeman nabee Jesucrist laa reeman, dád nad reeman, ad ratut reeman, ad rdxeb tëët reeman rnieeguijdx reeman bèn naj ree xianjl Dios. ¹¹ Abi' ni'qui ree xianjl Dios, majsi rajp reeman mazri gojl në guialrniabee, per achet diidxguijdx rëb reeman lojman contr laa reeman.

¹² Lasa' ree bèn guin naban reeman zi'c ree be, ad yu't xquiarגיעjn reeman abi' rnieeguijdx reeman ni ad rignia't reeman, guidiblagaa rüjn reeman ni rëntzi reeman sin xgab. Zi'c ree be zëedzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rüjn reeman ma cusëëb laagajc reeman, ¹³ abi' yaguijx reeman gra ni rüjnnë reeman bejn ree.

Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbzi, abi' rabaa da't reeman guial rusquiee reeman lëjt.

¹⁴ Ad zajc guguaa reeman tijb béngunaa sin guial ad züjnt reeman xgabdxuudx, ad rucwëetz rüjn reeman dol rusquiee tëë reeman bèn ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzëëbladx reeman, laa reeman ma naj par yaya reeman xcasti Dios. ¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bèn badëëd xtiidx Dios loj ree bejn, xi'n bèn brii laj Beor, chi guyënman nünjman gan milia por ni mal nünjman. ¹⁶ Per chi zëman ziguieenman ni mal guin, bacwëëz Dios laaman, basneeman xburaman zi'c tijb bejn, zian bacwëëz Dios xixgabtotaman.

¹⁷ Yan bèn rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman. ¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bèn qui cusa'nri ree nejzmal. ¹⁹ Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëëz rüjn ree bejn, laan naj ni rniabee laa reeman. ²⁰ Chi ma beenbee ree bejn dux Dad ree Jesucrist guial laaman naj bèn babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtjëb reeman rniabeen laa reeman stibj, dxel piorli guiban reeman guial chi gad reeman güünbee laaman. ²¹ Zagdxeli naj ad nünjbeet reeman xnejzaman, guial beenbee reeman laan abi' basa'n reeman xtiidxza'caman ni ma bigueijn reeman. ²² Con laa reeman rajc cumplid diidx ni rëb: "Rayaw bë'cw ni bayëbib, guiáad cüch qui gojzri con nijs naya rayub loj nizbajn."

3

Ni gac chi gui't Jesucrist stibj

¹ Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan nagueijn ganenë'n lëjt din güündi xgab zi'c rayal. ² Gol basaaladx ni rëb ree bèn badëëd xtiidx Dios loj ree bejn tiamp gulal, gol basaaladx tëë xtiidx dux Dad ree Jesucrist, bèn babëë dunuj ree loj dol, xtiidxaman ni balüü ree apóstoles lëjt.

³ Gol badxe'guicj, chi ma zidyob nit guidxliuj, chu' ree bèn guze' lëjt abi' guiban reeman zi'ctzi rën reeman. ⁴ Abi' na reeman lojdi: "¿Gon promisejs been Jesucrist guial gui'taman stibj? Ma güjt gra ree dux béngulal ree, abi' graczi ni yu' loj guidxliuj guie sta naj gajc diidx chi gocchaaw guidxliuj." ⁵ Na reeman zian, guial ad rënt reeman yayagbee reeman guial diidx tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. ⁶ Gojc xchej, dxel con nijs gajc banijt Dios bèn gocli ree. ⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bèn ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb béngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. ¹² Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. ¹³ Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tëë lasa'di. ¹⁵ Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, ziangajc naman lojdi loj ree xtiidxaman, zi'ctzi naj quiarguejn ni bazaladx Dios lojman.

¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bën ad rajctzi ree në ree bën ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëëd ree loj xtiidx Dios, zeel laagajc reeman cusëëb laa reeman.

¹⁷ Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bën rën ree gusquiee lëjt gan, chitëë gucwëëz sudxi'chidi loj xnejz Dios. ¹⁸ Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.

Gui'ch yaløj bacaa San Juan

Jesucrist runee guialnaban tiblayaa

¹ Gui'ch guie naj par gugojan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaaadiajgan, ma baguiaan ni beenman, baguiaan laaman zagdx, ma baqui' tēen laaman con quijb du yaan. Laaman naj bën runee guialnaban, ² ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblayaa, najman bën guzunē Dios diizd gocli bi't tēeman loj guidxliuj. ³ Zeel ragojan lëjt ni ma baguiaan ni ma baguejñ tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. ⁴ Ragojan lëjt nine ree loj gui'ch guie din chu' luxdoodi zagdx, zi'c yu' du luxdoon zagdx.

Royal yanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragojan lëjt guial naj Dios biani, achetzi dol nabannēman. ⁶ Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

⁸ Bal yaguie'ch ree achot dux tol ree yu', rasquiee dunuj gajc ree, ad cayguie'ch tēet ree diidxli. ⁹ Per bal yaxhoobdol ree loj Dios, rayagbee ree zagdx guial güünman ni naman, güünman perdon dux tol ree, chiquied tēeman gra ni mal yu' du luxdoo ree. ¹⁰ Per bal yaguie'ch ree ad waguieent ree dol, raguieen reeman zi'c bēnrasquiee, ad raliduladx tēet ree xtiidxaman.

2

Bën rēn Dios royal guzoobaman xtiidxaman

¹ Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntczi dol. ² Por xguialgüjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

³ Bal razoob ree xtiidx Dios, zian raya'p ree segur guial ma naguieenbee reeman zagdx. ⁴ Per bal chu rēb: "Nünbeen Dios", abi' ad ruzoobtaman xtiidxaman, rusquieeman, din ad walit ni rēbaman. ⁵ Per bēnruzoob xtiidxaman, diidxli rēnman laaman con guidib luxdooan, zian rayagbee ree guial ma nabajñnē' reeman. ⁶ Bën rēb nabannēman Dios, royal guibanman zi'c guban Jesucrist.

Bën zinal ree xnejz Dios rēn lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma bigueiejndi diizd yaløj, laagajcanan canin lojdi yan. ⁸ Per canin laa reen zi'c rulüü diidx cüb reen, din por Jesucrist nē por lëjt ma rguien guial ma cusa'ndi ni mal abi' zinalidi ni zagdx.

⁹ Bal chu rēb zinal xnejz Dios abi' ralen lasa'man, sta zinalaman nejz mal. ¹⁰ Bën rēn lasa' zinalaman xnejz Dios, abi' ma naj nawēēg guial güün dol laaman gan. ¹¹ Per bën ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bēnlutia'p.

¹² Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist. ¹³ Cucan nine ree par lëjt guial najdi bën ma rignia' mazri chunin naj Jesucrist. Bën ma yu' gocli diizd chi gad guidxliuj gacchaaw, cucan ni ne ree par lëjt bën ma rignia' ta'n chunin naj Jesucrist din ma beendi gan ad züjntidi ni zēēd loj xindxab, cuca tēen nine ree par lëjt bën qui guzulojri ree cayignia' chunin naj Jesucrist din ma nünbeedi dux Dad ree Dios.

¹⁴ Bacan nine ree par lëjt guial ma rignia'di mazri chunin naj Jesucrist bën ma yu' gocli diizd chi gad guidxliuj gacchaaw, bacca tēen nine ree par lëjt guial ma rignia'di ta'n chunin naj Jesucrist, din za'dxi'chidi zinal tēēdi diidxli xnejz Dios con guidib luxdoodi, ma been tēēdi gan ad züjntidi ni zēēd loj xindxab.

¹⁵ Ad sēēbladxidi ni ad najt zagdx ni rüjn ree bejn loj guidxliuj, bal chu rēn mazri ni riga' loj guidxliuj guie, ad rēntaman dux Dad ree Dios, ¹⁶ din achetzi ni mal yu' loj guidxliuj guie zēēd loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzēēbladx reeman gap reeman gra ni ruguiaa reeman, rüjn tēē reeman benro' por gra ni rajp reeman. ¹⁷ Per guidxliuj guie yu' dxej nitan con guidib ni mal yu' lojn, per bën naban zi'c rēn Dios rajpaman guialnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguejndi guial rayal gui't tijb bèn su contr Jesucrist guièb tèëman laaman naj Jesucrist. Yan zien ree bèn ralen laaman ma balüüloj, zeel rayagbee ree guial ma zidyob dxej nit guidxliuj. ¹⁹ Bén ralen ree Jesucrist, duloj gajc ree brii reeman nayajc ree bèn rliadx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. ²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli. ²¹ Cucan nine par lèjt, ad guial ad ragbeetidi conin naj ni diidxli, cucanan guial ma ragbeedan, abi' lèjt ragbee guial ni'qui tijb ni rusquiee ad zajct gui't loj ni diidxli guin. ²² Yan, ¿chu naj bèn rusquiee? Bén rusquiee naj bèn rëb guial ad Jesúst naj bèn guxhaal Dios loj guidxliuj. Bén rëb zian naj zi'cgajc naj bèn za' contr Jesucrist guial ad rliadxtaman Dios ni'qui xi'nman Jesucrist. ²³ Din chutéëz bèn rëb guial ad najt Jesucrist Xi'n Dios, laaman ad nünbeet dux Dad ree Dios, per bèn rëb Jesucrist naj Xi'n Dios nē dux Dad ree Dios nünbeeman.

²⁴ Zeel gol binal diidx ma biguejndi diidz guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist. ²⁵ Abi' ni ma rëb Jesucrist guneeman naj guialnaban tiblayaa.

²⁶ Cucan diidx guie ree par lèjt por ree bèn rën rusquiee lèjt. ²⁷ Per nabannëdi xSprijt Dios, bèn banee Jesucrist, ad riaadxtidi bèn gulüü lèjt, din Sprijt guin gajc rullüü lèjt gra, abi' ganax diidxli ad ni rusquieet, zeel gol gubajn zi'c rniabeeman din gusunuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitéë yadxeb ree chi gulüülojman, ad zaya'nxtu tēët ree lojman chi gui'taman. ²⁹ Lèjt ragbee guial rüjn Dios zi'c rayal, ragbee tēëdi guial graczi ree bèn rüjn zi'c rayal, laa reeman naj xi'n Dios.

3

Bèn naj ree xi'n Dios

¹ Gol been xgab, placr rën dux Dad ree Dios dunuj ree, zeel balëë dulaj ree xi'n Dios, abi' waliczan nayajc ree xi'nman. Per bèn ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. ² Gradi compniar raliduladx ree Jesucrist, rënan lèjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, por rayap' ree segur guial yayajc ree zi'c najman, din xt nadxel yaguaa ree diidxliczi xhienaag najman. ³ Graczi ree bèn rliadx guial gac zian, rüjn reeman nagueijn guiban reeman naya delant loj Dios zi'c laaman, guial achet xtolaman.

⁴ Per graczi ree bèn ad zinalt ni rniabee Dios, cayün reeman dol, din dol naj guial ad rüjnt reeman ni rniabeeman. ⁵ Lèjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczí dxej ad yu' tēët dxej nünjman dol. ⁶ Zeel bèn naj ree tijbzi con laaman rüjn reeman nagueijn ad rüjnt reeman dol, per graczi bèn rüjn dol zianczi ad wayignia'tt reeman chu najman, ad wayünbee tēët reeman laaman. ⁷ Xi'n, ganin lèjt, ad bal tiëbidi chu gusquiee lèjt, din bèn cayün ni rën Dios, laaman naya delant lojman zi'c naya Jesucrist delant lojman. ⁸ Per bèn yu' loj dol xbejn xindxaban, din xindxab rüjn dol diidz yaløj, abi' Jesús Xi'n Dios bi'taman loj guidxliuj par zianczi din giünman gan loj xguialrniabee xindxab.

⁹ Zeel ni'qui tijb ree bèn ma zinal xnejz Dios ad rusnuutri rüjn dol, din ma nabannëman Dios, ad rayal tēëtri giünman dol din ma najman xi'nman. ¹⁰ Laa rguien gajc chu reenin naj xi'n Dios chutéë reenin naj xi'n xindxab, din chutéëz ad rüjnt ni rën Dios ad rën tēët lasa'man, dxel ad najtaman xi'n Dios.

Royal yayën du lasa' ree

¹¹ Abi' lèjt ma biguejndi xtiidx Dios diidz guia'xchej guial rayal yayën dulasa' ree. ¹² Ad rayalt yaguieen ree zi'c been Cain, cwëjbaman gunabee xindxab laaman, zeel bagüjt bijchaman. Cain been zian, din beenman ganax ni mal, guiáad bijchaman been ni zagdxe.

¹³ Zeel gradi compniar raliduladx ree Jesucrist, ad gagdxadi bal yalen ree bënguidxliuj lèjt guial ma zinalidi xnejz Dios. ¹⁴ Dunuj ree rayagbee guial ad nayajct ree zi'c bengüt par laaman, ma rayap' ree guialnaban delant lojman, guial rayën du lasa' ree. Per bèn ad rënt lasa', sta najman zi'c bengüt par Dios. ¹⁵ Graczi bèn ralen lasa' najman zi'c bèn rugüjt bejn, abi' lèjt ragbee, tijb bèn rugüjt bejn ad rajtaman guialnaban tiblayaa delant loj Dios. ¹⁶ Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree royal yayën dulasa' ree xt yayëjt ree por laa reeman. ¹⁷ Per bal chu tijb dunuj ree ad riaadxt xhienin loj guidxliuj guie abi' ruguiaaman tijb bèn cayaadx laan abi' ad rüjntaman laaman yudar, dxel, ¿xhienaag guiëbaman guial rënman Dios? ¹⁸ Xi'n, ganin lèjt, ad con diidxtizi yaguie'ch ree guial rayën dulasa' ree, royal guiguien guial rayën dulasa' ree por ni raguieen ree.

Raya'p ree segur guial za' në Dios dunuj ree

¹⁹ Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. ²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. ²¹ Zeel zi'c rënan lëjt rnin lojdi, bal ragbee du luxdoo ree guial cayguieen ree ni zagdxë, dxel raya'p ree segur guial cayguieen ree ni zagdxë delant loj Dios. ²² Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman. ²³ Ni ne naj ni rniabeeman yaguieen ree guial yaliduladx ree Jesucrist naj xi'nman yayën tõe dulasa' ree zi'c gunabeeman dunuj ree. ²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tõe ree guial za'man con dunuj ree por xSprijtaman bën baneeman duloj ree.

4*Bën ad rliadx Jesucrist ad yu't xSprijt Dios luxdooan*

¹ Gradi compniar raliduladx ree Jesucrist, rënan lëjt, rni tõe lojdi: ad rliadxidi chutëez bën rëb rnieeman xtiidx Dios. Yaløj xgaj gol gogbee zagdxë bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bën rusquiee, rëb reeman rniee reeman xtiidxaman. ² Yan din gagbeedi chu reenin rniee xtiidx Dios: Laa reeman naj bën rliadx guial Jesucrist bi't zi'c bënguidxliuj. Bén rliadx ree zian yu' xSprijt Dios luxdoo reeman. ³ Per bën ad rliadx ree zian ad yu't xSprijtaman luxdoo reeman, laa reeman naj bën ralen Jesucrist. Ma biguiejndi guial rayal gui't tijb bën su contr laaman. Abi' diidz yan ma za' sprijt guin guidxliuj, zeel zien ree bën ralen Jesucrist ma yu' loj guidxliuj guie.

⁴ Per lëjt xi'n ma najdi xi'n Dios, guiáad ree bën ralen Jesucrist ad zajct güün reeman lëjt gan, din mazri narooob guialrniabee ca' bën nabannë lëjt guial loj bën nabannë bën zinal ree nejz mal loj guidxliuj guie. ⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree bën ad rliadx Jesucrist rüjncwentt reeman ni rëb reeman. ⁶ Per dunuj ree ma nayajc ree xbejn Dios, abi' bën ma nünbee ree Dios rucaagdiagj reeman ni ranee ree, guiáad ree bën ad nünbeet Dios ni'guid rüjncwentt reeman ni ranee ree, zian rayagbee ree chu nabannë xSprijt Dios bën rulüü dunuj ree diidxli chutëenin nabannë sprijt ni rulüü ganax ni rusquiee.

Rën Dios dunuj ree

⁷ Rënan lëjt, rnin lojdi rayal yayën dulasa' ree, din guialrën lasa' zëed loj Dios. Gra bën rën lasa' naj xi'n Dios nünbee tõe reeman laaman. ⁸ Abi' bën ad rënt lasa' ad wayünbeetaman Dios, din guialrën lasa' zëed loj Dios. ⁹ Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. ¹⁰ Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. ¹¹ Rënan lëjt, zeel rnin lojdi, zi'c rën Dios dunuj ree, ziangajc rayal yayën dulasa' ree. ¹² Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma baneë xSprijtaman duloj ree. ¹⁴ Abi' dunuj gajcan baguiaa ragojn tõe guial guxhaal Xi'n Dios loj guidxliuj guie persi güjtaman por xtol gra ree bejn. ¹⁵ Chutëez rëb guial Jesucrist naj Xi'n Dios nabannëman Dios, abi' Dios nabannë laaman. ¹⁶ Dunuj ree rayagbee raliadx tõe ree guial rën Dios dunuj ree. Por laaman zëed guial rayën dulasa' ree. Abi' bën rën lasa' nabannëman Dios, guiáad Dios nabannë laaman.

¹⁷ Bal wali rayën ree Dios zi'c rënman, ad najtan ni yadxeb ree dxej güün xgualguxti-saman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie. ¹⁸ Bén rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walitaman rënman laaman. ¹⁹ Dunuj ree rayën Dios, din yaløj laaman guyën dunuj ree. ²⁰ Bal yu' bën rëb: "Rënan Dios", abi' ralen lasa'man, rusquieeman. Din bal id rën lasa'man bën ruguiaaman, çhienaag guienman Dios bën ad waguiaataman? ²¹ Laagajcaman na: Bén rën Dios rayal guien lasa'man.

5*Guial raliadx ree Jesucrist zeel raguieen ree gan loj ni mal*

¹ Gra ree bën rliadx guial Jesús naj bën guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman. ² Chi rayën ree Dios raguieen tõe ree ni

rniabeeman, dxel rayagbee ree guial rayën ree gra ree xi'nman. ³ Guial guiën bejn Dios naj guial güünman ni rniabeeman. Abi' ad nawëëgt naj guial güünman ni rniabeeman, ⁴ din gra bën naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. ⁵ Bén rliadx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

Ni ruliü Dios dunuj ree xcwent Jesucrist

⁶ Jesucrist bi't loj guidxliuj, gurobnijsaman guxhie' tée xrejnman loj crüzj. Ad gurobnijsztzaman, në guxhie' xrejnman. XSprijt Dios naj testiw, laaman rü diidxli xcwent ree nine. ⁷ Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

⁸ Yu' tée choon testiw loj guidxliuj: XSprijt Dios, në guial gurobnijs Jesucrist con ni guxhie' xrejnman loj crüzj, guiyon reen rü diidx tijbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. ¹⁰ Bén rliadx Xi'n Dios, laaman rliadx ni rëb Dios xcwentaman. Per bën ad rliadx laaman, rüjnman Dios zi'c bën rusquiee, din ad rliadx tamen ni rëbaman xcwent Xi'nman. ¹¹ Abi' ni rëbaman naj guial ma baneeman guialnaban tiblayaa duloj ree, guialnaban guin zëed por xi'nman. ¹² Bén za'në Xi'n Dios tijbzi, laaman naban tiblayaa delant loj Dios, per bën ad za'nët laaman tijbzi, laaman ad ca't guialnaban guin.

Ni bigra ca loj gui'ch guie

¹³ Cuan nine ree par lëjt najdi bën rliadx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

¹⁴ Rayagbee ree zagdx: chi yanaab ree xhienin lojman, rüjncwentaman dunuj ree, bal yanaab ree zi'c rënman. ¹⁵ Bal rayagbee ree rüjncwentaman dunuj ree chi ranaab ree xhienin, ziangajc rayagbee ree zagdx guial guneman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëe Dios guialnaban tiblayaa lojman, bal zajc gac dol guin perdon. Yu' dol ni ad zajc gac perdon, abi' ad canitan guial cwedxidi Dios por bën rüjn dol guin. ¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bën ma naj ree xi'n Dios ad rusnuutri rüjn reeman dol, din Jesucrist Xi'n Dios naj bën rniaj laa reeman, abi' xindxab ad zajctri nabeex laa reeman. ¹⁹ Rayagbee ree guial nayajc ree xbejn Dios, per ree bénguidxliuj, bën ad najt ree xbejn Dios, xindxab rniabee laa reeman. ²⁰ Rayagbee tée ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bën naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tëeman yu' guialnaban tiblayaa. ²¹ Xi'n, gol gojp cudad chitëe chinalidi ni naladx ree bejn naj Dios.

Gui'ch barojp bacaa San Juan

Rxhial Waj xtiidx Dios loj ree bejn

¹ Naj, bën rniabee loj ree bën rliladx Jesucrist, rxhialan gui'ch guie lojdi najdi bën gulej Dios rliladx tēēdi Jesucrist, diidxli rēnan lējt, abi' ad tijbtizi naj, nē gra ree bën zinal xtiidx Dios. ² Rēnan lējt guial ma nabannē' ree xtiidx Dios abi' laan nabannē dunuj ree zianczi. ³ Dux Dad ree Dios con Xi'nman Jesucrist güünle' lējt, yaya reeman lējt, yabe'cdxe tēē reeman luxdoodi guial zinalidi xtiidxaman rēn tēē lasa'di.

Rniabee Dios yayēn du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tēē reeman zi'c rniabee dux Dad ree Dios. ⁵ Yan, zi'c rēnan lējt najdi dux compniar ree, gol been wen gol guyēn lasa'di. Ni canin lojdi ad nicūbtan, diidx ni bacaagdiajg gajquidi diidx guia'xchejn. ⁶ Guial rēn Dios naj guial guiban bejn zi'c rniabee Dios, abi' ni rniabeeman ni bacaagdiajguidi diidx guia'xchej naj guial rayal guiban bejn, guiēn lasa'man.

Bēn rusquiee ree bejn

⁷ Rnin zian, din gra ladczi guidxliuj ziza zien ree bën rusquiee ree bejn, guial ad rliladxt reeman bi't Jesucrist loj guidxliuj zi'c bejn, bën rūjn zian rusquieeman abi' za'man contr Jesucrist. ⁸ Gol gojp cudad chitēē gusēēbidi ni rayalidi por ni cayūjndi, din tia'di gra ni rayalidi delant loj Dios.

⁹ Chutēēz bën racaa guijc zi'c balüü Jesucrist bejn ree ad nabannētaman Dios, per bën zinal xtiidx Jesucrist zi'c balüüman bejn ree, laaman nabannē Dios con Xi'nman. ¹⁰ Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lēnū, ad güüncwent tēēdi ni rnieeman. ¹¹ Din bën rūjncwent xtiidxaman, rēn guiēban guial ma za'man conform con ni rusquiee bën guin.

Diidx bigra ca ree loj gui'ch guie

¹² Zien ree ni rēnan ganin lējt, per ad rēntan gucanan loj gui'ch, din wed ad zaglaat guialan guidganan lējt din ganenē' quijb naj lējt din chu' du luxdoo ree zagdxē tijbzi. ¹³ Bēn naj ree bën ma gulej Dios, dux compniar raliduladx ree Jesucrist bën zojb ree niz guie, rugajpdioz reeman lējt.

Gui'ch bayon bacaa San Juan

Rugajpdioz Waj Gayo

¹ Naj, b́en rniabee loj ree b́en rliladx Jesucrist, rxhialan gui'ch guie par lűj Gayo najl da miwan diidxli ŕenan lűj.

² Zi'c ŕenan lűj rniabaan loj Dios zi'c źel zagdx e loj xnejzaman ziangajc grii zagdx e gra ni cayűjn l gunee t́eeman lűj guialnadaan. ³ Dád nix guyu luxdon chi guna garol dux compniar ree guial diidxli nabanl zi'c ŕeb loj xtiidx Dios. ⁴ Achet mazri ni rgu' luxdon zagdx e zi'c chi riguejnan guial diidxli naban ree da compniaran zi'c ŕeb loj xtiidx Dios.

⁵ Zi'c ŕenan lűj Gayo, rnin lojl guial zagdx e da't naj ni cayűjn l con dux compniar ree b́en rliladx Jesucrist abi' mazczi zagdx e naj ni rűjn l con ree b́en źeəd lood ren. ⁶ Din laa reeman na delant loj gra ree b́en rliladx Jesucrist, b́en rado'pně' reen guie, guial gunajchi'l laa reeman, zeel zagdx e gűn l guial gűn l laa reeman yudar con ni ryaadx reeman guial cayűjn reeman sirv loj Dios din gusnuu xnejz reeman. ⁷ Din brii reeman zigtie'ch reeman xtiidx Jesucrist abi' ad rtiějbt reeman tia' reeman ni ruděe ree b́en ad rliladxt laaman. ⁸ Zeel dunuj ree b́en raliduladx ree Jesucrist, rayal yaguieen ree yudar b́en catie'ch ree xtiidxaman, zian yaguieen ree yudar guire'ch ni naj diidxli.

Ad ruzoobt Diótrefes diidx

⁹ Ma guxhalan tijb gui'ch loj ree dux compniar ree b́en rliladx ree Jesucrist, per Diótrefes guial ruladxaman nabeeman ad rűjncwenttaman dux tiidxan. ¹⁰ Zeel bal guidganan lějt dxel ganeně'n laaman xcwent guial rnieeguijdxaman rniee t́eeman diidx rusquiee contr dunujn abi' ad tijbtzi laan rűjnman ně ad ruděēt lidxaman yaya'n dux bejn ree b́en źeəd ree lood ren, ad rtiějb t́eētaman guděəd lidx ree ben ren yaya'n reeman, abi' ree b́en ruděəd lidx ad rtiějbtaman chu' reeman lěn yadoo.

¹¹ Zi'c ŕenan lűj Gayo rnin lojl ad chinalil nejz mal, been ni naj ni zagdx e din b́en rűjn ni zagdx e laaman naj xbejn Dios per b́en zinal ni mal ad nűnbeetaman Dios.

¹² Graczi reeman ruza't Demetrio zagdx e guial binalaman zi'c rayal, laa nen gajc xhienaag nabanman xt dunujn raza't laaman zagdx e abi' lűj ragbee guial diidxli naj ni raguie'chan.

Diidx bigra ca ree loj gui'ch guie

¹³ Zien ni ŕenan ganin lojl per ad ŕentan gucanan loj gui'ch, ¹⁴ din wed ad zaglaat guialan guidganan lűj, dxel ganeně' quijb naj lűj.

¹⁵ Yabe'cdxe Dios luxdool, dux miw ree b́en riga' ree guie rugajpdioz lűj, bagajpdioz t́eē dux dux miw ree.

Gui'ch bacaa San Judas

Rugajpdioz Judas bén naj ree bén gule Dios

¹ Naj, Judas bijch Santiaaw, cayünan sirv Jesucrist, cücan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. ² Gusnuu yaya Dios lëjt, yabe'cdxeman luxdoodi guiën tëedi laaman.

Bén ad rnieet ree diidxli

(2Pe. 2:1-17)

³ Gradi compniar raliduladx ree Jesucrist, rënman lëjt, diidz gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaløj, guial nayajc ree xbejn Jesucrist. ⁴ Din yu' ree bén rüjn bén rliladx naabzi par go'ch reeman lojdi. Bén guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

⁵ Majsi ma ragbeedi ni ganin lëjt, per ganinan din gusaaladxidi guial majsi babëë Dios bén Israel ree Egipto, per despuëjs banijtaman bén ad bililadx ree laaman. ⁶ Në ree anjl ad bazoobt xtiidz Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. ⁷ Nëtëë ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tëëman laa reeman, laan naj ni rayal yaguaia ree chitëë yaguieen ree zian.

⁸ Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjbt tëët reeman nabee Jesucrist laa reeman, rnieeguijdx tëë reeman bén naj ree xianjl Dios. ⁹ Per chi gudildiidz ree arcangel Miguel con xindxab guijc xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxaa Dios gusa'nan lüj." ¹⁰ Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

¹¹ jProb laa reeman!, guial zinal reeman ni mal zi'c been Cain, mazri zinal reeman milia zi'c been Balaam, guiët tëë reeman zi'c güt Coré chi guyënan niniabeeman luar Moisejs. ¹² Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tëët reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. ¹³ Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tëë reeman zi'c ree bajl xanyabaa ni basëëb xnejz, dxel tiblayaa ma rayal reeman lod nacay da't.

¹⁴ Abi' bén brii laj Enoc, laaman gojc gajdx loj ree xdiaa Adán, guneeman xcwent ree bén guin chi rëbaman: "Naj baguiaa dux Dad Dios zidnë zien da't ree xianjlanan ¹⁵ zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gunee reeman laaman guial naj reeman bëndol!" ¹⁶ Lasa' ree bén guin achetctzi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdxe ruza't tëë reeman bejn ree zagdxe din cwentzi güün ree bén guin ni rën reeman.

Mod rayal guiban ree xbejn Dios

¹⁷ Per lëjt compniar raliduladx ree Jesucrist, rën da'tan lëjt, gol basaaladx guial bén goc ree xi apóstoles Dad Jesucrist ¹⁸ rëb reeman: "Chi ma zidyob nit guidxliuj, chu' ree bén guze' gra ni zëëd loj Dios güün tëë reeman zi'ctzi naj xixgabdxuudx reeman." ¹⁹ Lasa' ree bén guin naj bén rlia' lasa' ree bén ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

²⁰ Per lëjt compniar raliduladx ree Jesucrist, gol guzudxi'ch loj ni rliladxidi, din guial-rliladx guin zëëd loj Dios. Gol gurejdx gunab Dios con xyudar xSprijtaman. ²¹ Gol basnuu gol binal guial rën Dios la'tgajc cabëzidi guidxin dxej gunee Jesucrist guialnaban tiblayaa duloj ree guial rayaman dunuj ree.

²² Gol been yudar bén sta yu' nawëëg ree luxdoo. ²³ Gol been yudar bén zë ree loj nejzmal, zi'c rüjn tijb bejn rüjn yudar bén cayajb loj bajl, gol guyën reeman per ad chu'ladxidi zi'c rüjn reeman, gol goj cudad chitëë yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxe sin dol chi guidxindi xanyabaa lod za'man. ²⁵ Laaman naj tijbzi Dios bën babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din guluüman ni guin ree lon, naj Waj xbejn Jesucrist, bën cayüjn laaman sirv. ² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par lejtr najdi xbejn Cristo, lejtr bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz gocli në yan, në guigajdx ree sprijt za' lod canabeeman, në Jesucrist, laa reeman güünle' lejtr yabe'cdxe tée reeman luxdoodi. ⁵ Jesucrist been gra ni naj güünman, laa tēeman goc bën yaloy baban loj ree bengüt abi' laaman rniabee gra ree bën rniabee loj guidxliuj. Laaman rēn dunuj ree abi' con xrejnman basiaman dux tol ree ⁶ abi' beenman dunuj ree zi'c bën rniabee, been tēeman dunuj ree bixhioz rüjn sirv xDadaman Dios. Zeel Jesucrist rayalaman respejt në gualrniabee zianczi. Amén.

⁷ ¡Gol gogbee guial gui'taman loj zaj! Gra ree bejn guguaia laaman xt ree bën ni guliiz lans cwē'lēnman, abi' gra ree bēnguidxliuj goon da't chi guguaia reeman laaman. Laan naj diidxli. Zian gac.

⁸ Dux Dad ree Dios bën rajp gra gualrniabee. Laaman gui't, laaman naj Dios diidz guia'xchej, në yan, laaman rēb por laagajcaman: "Naj naj zi'c lejtr A con Z, lejtr ni rzuloj në ni rlixoxnē alfabeto, naj ca' gra gualrniabee."

Baguaia San Juan xgualrniabee Cristo

⁹ Naj Waj tijb ree lasa'di bën riladx Jesucrist. Tijbzi nadxu' ree loj xgualrniabeeman, tijbzi cayzaagdiaj ree abi' caydaan ree por laaman. Naj guyu'n ladxguib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. ¹⁰ Chi yu'n ladxguib loj yuj riga' loj nijsdoo guin, guyu' tijb dumingw chi guza'can zi'c bën rnie'xhchaal por xgualrniabee xSprijt Dios, abi' xichan biguejnan zi'c cha' trompejt abi' biguien rejs da't cha' tijb ¹¹ bën ni rēb:

—Naj naj zi'c lejtr A con Z, lejtr ni rzuloj në ni rlixoxnē alfabeto, din tijbzi naj naj bën rniabee. Bacaa loj gui'ch gra ni cuguiaal dxel guixhiaalil gui'ch guin loj guigajdx cwaa ree da bejnan bën zojb ree niz Asia, luguiedx Éfeso, Esmirna, Pérgamo, Tiatura, Sardis, Filadelfia në Laodicea.

¹² Dxel chi badxi' lon par guguian chunin rnieenē naj dxel baguian gajdx ree candeler or. ¹³ Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdoooman. ¹⁴ Naquichbēj guijcaman zi'c naj guidxlad xil, zi'c naj guiajnayaag naquich naj guidxguijcaman abi' zi'c bajl re'criani guiaalojman. ¹⁵ Abi' guia'man rdiinan bacha' zi'c guib ni la bronce chi yu'n loj guij, abi' cha'man naj rejs zi'c rüjn nijs naquie' chi rguiajtan. ¹⁶ Guiaad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiaad lojman rulaa bacha' zi'c chi rusni gubijdx gojl da't.

¹⁷ Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bën rniabee diidz guia'xchej abi' par tiblayaa. ¹⁸ Ma güjtan, per yan ma babanan, abi' ma nabanen tiblayaa, abi' naj rniabee gualgüjt në gabijl. ¹⁹ Yan bacaa ni ma baguaial në ni cuguiaal në ni qui gacri. ²⁰ Ni në rēn guieb guigajdx ree bajl xanyabaa ni baguaial yan ladbee, në guigajdx ree candeler or. Guigajdx ree bajl xanyabaa guin rēn guieban gajdx ree bën rniabee guigajdx cwaa ree da bejnan niz Asia, abi' guigajdx candeler or guin rēn guieban guigajdx cwaa ree da bejnan.

2

Diidx par ree bën Éfeso

¹ Yan bacaa ni guixhiaalil loj bën rniabee ree da bejnan luguiedx Éfeso. Bacaa: "Bën ni ziza galay ree candeler or, bën ni ca' gajdx ree bajl xanyabaa con yaa ladbeeman, laaman na lojdi: ² Naj ragbee xhie cayüjndi. Naj ragbee xhie tarbajw cadēdidi, ragbee tēen guial ad ralenya'tidi. Naj ragbee guial ad rdaantidi bën mal ree, abi' ma beendi prueb bën na ree naj xi apóstoles Jesucrist majsi achut naj reeman abi' ma gogbeedi guial ganax diidz

rusquiee rniee reeman. ³ Naj ragbee guial rajpidi pacens abi' ma guzagdiajdi guial rëndi naj sin guial yalenyadi. ⁴ Per yu' ni ad ruladxtan rüjndi: guial ad rëndridi naj zi'c guial'xchej. ⁵ Gol basaaladx xhienaag guyëndi naj guial'xchej guial zi'c cayüjndi yan. Gol bayüjn xgab, gol been zi'c beendi guial'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. ⁶ Per yu' ni cayüjndi zi'c rayal, guial rdxe'chidi ni rüjn ree ben nicolaifas, zi'cgajc rdxe'chan por ni rüjn reeman. ⁷ Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zobj xanyabaa lod zobj Dios."

Diidx par ree bén Esmirna

⁸ Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: "Bén rniabee diidx guial'xchej në par tiblyaa, bén ni güt abi' babanman stijb, laaman na lojdi: ⁹ Naj ragbee xhienaag cadëdidi tarbajw por ni rüjn bejn lëjt, ragbee tëën loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab. ¹⁰ Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguuib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdx'i'ch xt dxej guiëtidi, abi' naj yazaladx lëjt guialnaban tiblyaa. ¹¹ Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüt ni rarojp laaman."

Diidx par ree bén Pérgamo

¹² Yan bacaa ni guixhiaalil loj bén rniabee ree da bejnan luguiedx Pérgamo. Bacaa: "Bén ca' espad ni nadoxh grop lad ro', laaman na lojdi: ¹³ Naj ragbee guial luguiedx zobjidi xindxab rniabee ni. Per majsi zian lëjt za'dxi'chidi con naj ad rucwëëzt riladxidi naj ni'qui lën ree dxej ni bagüjt reeman Antipas, tijb ree xcompiariidi bén ad bacwëëzt bililadx naj, bén bagüjt reeman ladxidi lod rniabee xindxab. ¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graloj ree nidxuudx con ree bén ad najt lacheel reeman. ¹⁵ Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaifas. ¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. ¹⁷ Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëën tijb guiaj naquichdoo lod ca laj cübaman ni achutczu ragbee, tijbzi bén tia' guiaj guin gagbee."

Diidx par ree bén Tiatira

¹⁸ Yan bacaa ni guixhiaalil loj bén rniabee ree da bejnan luguiedx Tiatira. Bacaa: "Xi'n Dios, bén re'criani guiaaloj zi'c bajl, bén rdiin bacha' guial' zi'c guuib ni la bronca, laaman na lojdi: ¹⁹ Naj ragbee ni cayüjndi, ragbeen xhienaag rëndi naj, xhienaag riladxidi naj, xhie cayüjndi por naj abi' ad ralenya'tidi. Naj ragbee guial mazri zagdxe cayüjndi yan guial loj guial'xchej, ²⁰ Per yu' ni ad ruladxtan cayüjndi: Rdaandi Jezabel, bëgunaa ni na rudëëd xtiidx Dios. Abi' rtiëjbidi rulüüman da bejn reen dxeel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bënguidxliuj. ²¹ Ma badën tiamp din yayünman xgab, din gusa'n xguialdxuudxaman, per ad rëntaman. ²² Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnman, bal id reeman guichaa mod ni naban reeman ziangajc zro' naj guialzi ni tëd reeman, ²³ gugüjtan gra ree bén ma been xgab guiban zi'c naban bëgunaa guin. Zian gagbee ree da bejnan guial naj ragbee xhie yu' guijc bejn xhie tëë yu' luxdooman, xhie xgab rüjnman. Naj gune lëjt ni rayalidi bal gonin rüjndi. ²⁴ Par gra ree da bejnan bén zobj ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi. ²⁵ Tijbzi ni rnin lojdi: Gol guzujdx'i'ch loj ni ma ragbeedi xt chi guialan stijb. ²⁶ Bén güün gan loj dol, abi' gusunu güünman zi'c rënan guidib tiamp ni guibanman, naj gudë guialrniabee lojman din nabeaman loj ree nacion. ²⁷ Nabeaman loj ree nacion guin zi'c tijb bén ni ca' tijb var guuib, zi'czi rlia' bejn tijb guiajs zian güünnëman bén ni ad rënt ree guzoob diidx. Gudën guialrniabee guin lojman zi'c banee da Dadanan lon, ²⁸ gudë tëën lojman bajl xanyabaa ni rliejn rsildoo. ²⁹ Bén rën ree gucaagdiajg, gol bacaagdiajg ni rëb xSprijt Dios par ree da bejnan."

3

Diidx par ree bén Sardis

¹ Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tēen guial ma güjtidi, majsi par ree bejn nabandi. ² Zeel gol bati'e'ch xbacaalidi, gol been nagueijn chitēē nit ni sta cayüjndi, din naj ruguian guial ad cayüjntidi xnejz delant loj da Dadan Dios. ³ Gol basaaladx ni ma biguejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbacaalidi zi'c cayüjndi, dxel zi'c ri't tijb bēngubaan ziangajc chi gagbeedi ma bi't casti par lējt. ⁴ Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. ⁵ Bén güün gan loj dol, chi guidxin hor, zian gacwaman lajd naquich abi' ad zuse'n tēetan lajman loj xliber guialnaban. Abi' delant loj Dios në loj ree anjl guien guial laaman naj da bejnan. ⁶ Bén rēn ree gucaagdiajg, gol bacaadiajg ni rēb xSprijt Dios par ree da bejnan.”

Diidx par ree bén Filadelfia

⁷ Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: ⁸ Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din guti'e'chidi da diidxan sin guial chu gutēē lojdi, din zinalquidi da diidxan abi' ad goct rēbidi guial ad najtidi da bejnan. ⁹ Lējt guguaa ni günan con ree xbejn xindxab bén rēb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tēē reeman xhienaag rēnan lējt. ¹⁰ Abi' zi'c ma bazoobidi diidx gapidi pacens guial chinalidi da diidxan, ziangajc ganan lējt chi guidxin dxej gui't guialzi loj guidib guidxliuj, zi'c tijb prueb par gra ree bēnguidxliuj. ¹¹ Nayob guialan loj guidxliuj stijb. Gol guzujdxi'ch loj ni ma ragbeedi chitēē tia' ben ren ni rayalidi. ¹² Bén güün gan loj dol, naj gudē lojman tijb luar zobloj lēn yadoo zobj xanyabaa lod naban da Dadan Dios, ni guibanman tiblayaa. Dxel tibljataman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zobbaman. ¹³ Bén rēn ree gucaagdiajg, gol bacaadiajg ni rēb xSprijt Dios par ree da bejnan.”

Diidx par ree bén Laodicea

¹⁴ Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, bén ni been gra ni rayal güünman, bén naj diidxli, bén rniabeenē Dios diidx gocli chi gad guidxliuj gacchaaw, laaman na lojdi: ¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. jBalzianclaa tiblayaa niajquidi zi'c nijs nayaag o zi'c nijs laa! ¹⁶ Per lējt najdi zi'c nijs nayool, ni'qui nadxa' ni'quidza nayaagt, dxel zi'c laa rabēē gajc ro' bejn nijs nayool guin, zian ma rēnan gabēladxan lējt. ¹⁷ Lējt rēb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bēnprob, bén zibēēl, achet sirv lējt, najdi bēnlutia'p niz lon guial ad nabantidi xnejz. ¹⁸ Zeel rnin lojdi, zi'c rzii bejn ganax or, zian gol been nagueijn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guialoj bejn din guguaaman zagdx, zian gol been nagueijn din gapidi da guial rignia'n din guguaadi zagdx. ¹⁹ Rdilnēn abi' ruzuxnejzan gra ree bēn rēnan. Zeel gol bagu' lxdoodi gol bayüjn tēē xgab xhienaag nabandi. ²⁰ Gol gogbee guial naj cabedx lējt, zi'c chi rniee tijb bejn rulidx stijb bejn. Cabēēsan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannēn laaman abi' laaman nabannēman naj. ²¹ Bén güün gan loj dol naj gudē cwē'n cweman lod canabeen, zi'cgajc naj chi gulox benan gan loj dol, gure cwē' da Dadan Dios lod canabeeman. ²² Bén rēn ree gucaagdiajg, gol bacaadiajg ni na xSprijt Dios par ree da bejnan.”

4

Rlies reeman xvalor Dios xanyabaa

¹ Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bēn guneenē gajc naj diidx guia'xchej bén naj cha' zi'c trompejt, laaman na lon:

—Wē'p guie din gulün lūj ni gac ree chi ma gojc ree ni rnin lojl.

² Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdx zi'c xi yagxhil tijb rey, lojn zobj tijb bejn. ³ Abi' bēn zobj loj yagxhil guin rulaaman bacha' zi'c ree guiaj zagdx ni lasajc wayējx, ni la jaspe në cornalina.

Abi' gui'c yagxhil guin ca tijb guidgij ni rulaa bacha' zi'c guiaj zagdxe ni la esmeralda. ⁴ Abi' gadëd ro' yagxhil guin baguian zagajlbitap ree yagxhil zagdxe abi' loj ree yagxhil guin zojb ree gajlbitap ree bengol najcw reeman lajd naquich yu' coron or gui'c reeman. ⁵ Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. ⁶ Baguia tëën delant loj yagxhil guin zi'c nijsdoo, per nayadxujn zi'c tijb guiaawajan.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaalaj reeb. ⁷ Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. ⁸ Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaalaj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,
luj guial ca'l gra guialrniabee,
luj guial najl Dios diidx guia'xchej në yan abi' gui'til.

⁹ Beegaj chi rlies ree be guin xvalor bën ni zojb loj yagxhil guin, bën naban tiblayaa, beegaj ruza't reeb laaman zagdxe rudëëd reeb quixtëë lojman, ¹⁰ guigajlbitap ree bengol zojb yagaj, bazuxib reeman lojman, bën ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

¹¹ Dux Dad ree Dios, luj rayal guiya'p respejt,
diidxza'c në guialrniabee.

Din luj beenchaaw gra ni yu'
abi' luj rëb guial chu' gra ni yu',
abi' yu' reen.

5

Tijb gui'ch ni nadüüb con bën naj zi'c xi xiil Dios

¹ Dxel baguian guial bën zojb loj yagxhil zagdxe ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguüidan con gajdx se chitëë chu guixhial laan. ² Loj hor guin baguian tijb anjl bën gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

³ Per ni'qui xanyabaa, ni'qui loj guidxliuj, ni'qui lën liuj ad bidxejlt bën ni rayal guixhial gui'ch guin, ni'qui par guguaaman ni ca loj gui'ch guin. ⁴ Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. ⁵ Dxel na tijb ree bengol guin loj:

—Ad roonl, baguiaa nial ma yu' tijb bën ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bën naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bën naj zi'c xi xiil Dios rguien xsen lod bidxeelguijdxaman chi gütaman. Abi' yu' gajdx xcaxchaman con gajdx guiaalajman, guigajdx guiaalajman naj guigajdx xSprijt Dios bën rxhiaalaman guidib guidxliuj. ⁷ Bibig bën naj zi'c xiil guin cwa'man gui'ch guin ladxaa bën zojb loj yagxhil guin. ⁸ Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tëë reeman cojp or ni guidxa goxyaal, go'xh guin naj xtüidx ree xbejn Cristo chi rbejdx rniab reeman Dios. ⁹ Bengol guin ree rool reeman tijb cant cüb ni rëb:

Luj rayal tia' gui'ch guin
abi' guixhialil se ni naguüidnën.

Din luj güjtijl
abi' con xrejnl ni guixhie'l gudijxil
por graloj bejn din gac reeman xbejn Dios,
achet güünan xhietëëz diidx rniee reeman,
o xhie loj diaa, o xhie guiedx o xhie nacion zëëd reeman.

¹⁰ Beenl laa reeman rey
been tëël laa reeman bixhioz par dux Dad ree Dios,
abi' laa reeman nabee loj guidxliuj.

¹¹ Baguia tëën biguiejn tëën cha' zien ree anjl gadëd ro' yagxhil zagdxe guin con guidap ree be guin në ree bengol guin. Abi' bënguixiujczi naj reeman por mil naj reeman. ¹² Abi' dád rejs rniee reeman rëb reeman:

Bén naj zi'c xi xiil Dios, bén gü't,
laaman rayal tia' guialrniabee,
laaman rayal gap guialnaza'c,
quiarguejñ, në gojl,
respejt, guza't reeman laaman zagdxé,
guilies tëë reeman xvaloraman.

¹³ Dxel biguejñan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen:

Bén zobj loj xyagxhil guialrniabee në bén naj zi'c xi xiilaman,
par laa reeman naj
respejt, diidxza'c, guialrniabee,
abi' guilies reeman xvalor reeman
zianczi në par tiblayaa.

¹⁴ Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi në par tiblayaa.

6

Guigajdx ree se

¹ Dxel baguian biquied bén naj zi'c xi xiil Dios se yaløj guin, abi' zi'c chi rbidxa' guziaaw zian biguejñan guneë tijb ree be guin, rëbib:

—jGuda!

² Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi zigüeenman gan mazri.

³ Chi biquied bén naj zi'c xi xiil Dios se barojp guin biguejñan rëb be barojp guin:

—jGuda!

⁴ Dxel gulentie tijb way xnia, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugüjt lasa' reeman.

⁵ Chi biquied bén naj zi'c xi xiil Dios se bayon, biguejñan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr. ⁶ Abi' galay guidap ree be guin biguejñan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

⁷ Chi biquied bén naj zi'c xi xiil Dios se badajp guin, biguejñan rëb be badajp guin:

—jGuda!

⁸ Dxel baguian gulentie tijb way nagüiech, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por guialrliiaan, o por guialguijdx, o por ree be doxh yu' loj guidxliuj.

⁹ Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdxi'ch tëë reeman loj xtiidx Dios. ¹⁰ Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjn! zi'c rayal, ¿za plact gaglaal par güün xguialguxtisil con ree bén ni bagüjt dunujñ loj guidxliuj din yaguijx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c gü't reeman, bén ni cayüjn gajc ree sirv Dios.

¹² Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëw gojcan naxnia zi'c rejn, ¹³ abi' ree bajl xanyabaa bjajb reen loj guidxliuj zi'c ryajb ree higo ni ya' loj yag higo chi rbi' bidoxh.

¹⁴ Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. ¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj. ¹⁶ Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tää dunujn loj bén zojb loj xyagxhil guialrniabee në loj xcasti bén naj zi'c xi xiil Dios, ¹⁷ din ma bidxin dxej doxh ni gudëed reeman casti, abi', çchu zajc taan casti guin?

7

Tibgayuu tiubitap mil ree bén Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëez reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. ² Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneeñeman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, ³ rëbaman loj reeman:

—Ad xhie güüdi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dxel biguejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj. ⁵ Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. ⁶ Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, ⁷ con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, ⁸ chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

béngxiuij najcw lajd naquich

⁹ Dxel baguian béngxiuij ree, per béngxiuij ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniece ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tää reeman zijn. ¹⁰ Abi' rëb reeman rejs da't:

Dunujn raya'pan perdon por dux Dadan Dios

bén zojb loj xyagxhil guialrniabee

në por bén naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt, ¹² rëb reeman:

¡Amén! guialrniabee, gojl,

guialrajc, respejt, diidza'c,

guialrlies xvaloraman në quixtëë,

naj reen par dux Dad ree Dios zianczi në par tiblyaa. Amén.

¹³ Loj hor zii tijb ree bengol guin gunabdiidx lon:

—ÇChu ree bén ni najcw lajd naquich guin, ban tää ree bénan?

¹⁴ Badxi'nan rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejn bén naj zi'c xi xiil Dios. ¹⁵ Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. ¹⁶ Ad yu'tri dxej guiliaan reeman, ad ze'c tää reeman nijs, ad zudxüü tää gubijdx laa reeman, ad zagnalaa tää reeman. ¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

8

Guigajdx se

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. ² Dxel baguian gajdx ree anjl za' reeman delant loj Dios, cwa' reeman gajdx trompejt. ³ Dxel bi't stijb anjl con tijb chaabacwi ni or, guzuliman delant lo altar guin abi' yu' Bén badëed zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rniece reeman chi rbejdx rniab reeman laaman. ⁴ Dxel diidz ladxaa anjl guin brii goxyaal guin con ree xtiidx ree xbejn Dios, diidx ni rniece reeman chi cabejdx canab reeman laaman, abi' wë'p reen niz loj Dios. ⁵ Dxel bacha anjl guin chaabacwi guin guij ni yu' loj altar guin abi'

bazurlojman laan loj guidxliuj. Abi' dád rejs guridxa' guziaaw, gojc naquie', wè'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl në rejn. Dxel cost gurol guidxliuj we'c con ree yag në ree gui'xh naga' yu' lojn.

⁸ Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. ⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban. ¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

¹³ La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—¡Prob, per prob, per probza ree bën ni yu' loj guidxliuj por zachoon trompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. ² Chi guxhalan ro' bizë guin tijb go'xh yo'xhchab brii lën bizëë guin zi'c chi ririi go'xh lën tijb horn narooob, xt bascajy go'xh guin gubijdx në bi. ³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. ⁴ Per gunabee reeman laa reeb chitëë xhie güin reeb guixya' ree, ni'qui ree yag, ni'qui ree gui'xh naga'. Naabzi ree bën ni ad yu't ree xse Dios lucwaj. ⁵ Per ad par gugüjt reeb bejn, naabzi par sagdiaj reeman gaay bëew. Abi' lod rudidxa' reeb riyajnan zi'c ryajn lod rudidxa' nixüb. ⁶ Lën ree dxejzii quiil ree bejn gualgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. ⁸ Abi' guidxguijc reeb naj zi'c guidxguijc bëngunaa, guiaád dxidlay reeb naj zi'c dxidlay beedx. ⁹ Guidib luxdoo reeb nada'cwan zi'c guuib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl. ¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëew. ¹¹ Abi' lod rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëh reen bën ruloox.

¹² Zian rliox gualzi yaloj, dxel gui't zatio'p gualzi.

¹³ Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios. ¹⁴ Cha' bën biguiejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëew në ijj ni naj par laa guidap ree anjl guin din gugüjt reeman garol ree bënguidxliuj. ¹⁶ Abi' biguiejnan bël naj xsuldad reeman bën dxiib ree way. Naj reeman tio'pgayuu millon. ¹⁷ Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guuib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. ¹⁸ Abi' garol ree bënguidxliuj güjt por bajl guin, go'xh guin në azufre guin ni ririi ro' reeb. ¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupuntan xbaan reeb najn zi'c guijc bëel.

²⁰ Per los demasri ree bën ni ad güjtt por ree gualzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct rigueijn ad rajc tēët rza reeman. ²¹ Ad bacwëëz tēët rugüjt reeman bejn ree, ad basa'n tēët reeman gualbidxaa, ad basa'n tēët reeman ni dxuudx ni rüjn reeman con bën ad najt lacheel reeman, ad basa'n tēët reeman gualgubaan.

10

Tijb anjl ca' gui'ch

¹ Dxel baguian stijb anjl bén gojl da't, zidguiajtaman xanyabaa lén tijb zaj abi' guijcaman dxiib tijb guidguj. Lojman naj zi'c gubijdx, abi' guia'man naj zi'c tio'p bajl ziool. ² Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. ³ Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. ⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb bén na lon diizd xanyabaa: —Ad gucaal ni guneë guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, ⁶ abi' badëë xtiidxaman por bén naban tiblyaaa, bén been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni royal gac. ⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bén badëë xtiidx Dios loj ree bejn bén ni rüjn ree sirv lojman.

⁸ Dxel zatijb gaj guneë bén ni guneenë naj diizd xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

⁹ Dxel wan lod za' anjl guin, rën lojman din guneeman librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lënl nala yaban.

¹⁰ Dxel cwa'n librdo guin ladxaa anjl guin, abi' gudawan. Ro'n biguiajtan nejxh zi'c dxijn, per chi gulox gudawan nala biguiajtan lënan. ¹¹ Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëëz diidx rnieë reeman.

11

Tio'p ree testiw

¹ Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil Bén cayajp ree Dios respejt lën yadoo guin. ² Per ad tia'beel lule' yadoo guin din lule' guin ma badëë Diosan loj ree bén ad najt ree bén Israel, laa reeman naj Bén gusagdiaj ree Bén Jerusalén loj choon ijz garol. ³ Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guinee da diidxan choon ijz garol.

⁴ Grop ree Bén guin naj grop ree yag olivo në grop ree candeler ni za' loj dux Dad ree Dios Bén rniabee loj guidxliuj. ⁵ Bal chu Bén rën güünnë laa reeman xhienin, ro' reeman grii bajl din gugüjt reeman Bén rdxe'ch ree laa reeman. Zian guiët ree Bén rën güün laa reeman xhienin. ⁶ Grop ree Bén guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guinee reeman da diidxan. Rajp tëë reeman guialrniabee par gucaa reeman nijs gacan rejn, abi' zajc guiniab reeman din gui't graloj guialz loj guidxliuj bëltëëz volt rën reeman. ⁷ Per chi ma bayaaloj tiamp ni guinee reeman da diidxan, dxel tijb monstuo, tijb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. ⁸ Dxel gaa xcuerp reeman lunejz luguiedx Jerusalén lod gü't xdad reeman Jesucrist loj crüjz, luguiedx ni naj yan zi'cgajc Sodoma në Egipto. ⁹ Dxel graloj ree bejn Bén rnieë ree gadzagayaa diidx, Bén gralad ree, Bén za graloj ree nacion zuguaa reeman gaa xcuerp ree Bén guin lunejz choon dxej garol, per ad zatiëjbt reeman guiguie'ch ree Bén guin. ¹⁰ Abi' ree Bén naban loj guidxliuj dád yabaa reeman guial ma güjt ree Bén guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree Bén guin laa reeman. ¹¹ Per chi ma bayaaloj choon dxej garol guin, yasban Dios Bén guin ree dxel chixche reeman abi' gra ree Bén guiguiaa dád guidxeb reeman. ¹² Dxel dád rejs biguien cha' tijb Bén ni guneë xanyabaa, rëbaman loj grop ree Bén guin:

—Gol wë'p guie.

Abi' wë'p reeman xanyabaa lén tijb zaj delant loj gra ree Bén rdxe'ch laa reeman. ¹³ Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiáad gra ree Bén ad güjtt dád bidxeb reeman abi' gules reeman xvalor Dios Bén yu' xanyabaa. ¹⁴ Zian rliox guialzi rarojp, dxel laa zëëd gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee guidxliuj loj dux Dad ree Dios

në loj Jesucrist abi' nabee reeman zianczi në tiblyaaa.

¹⁶ Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojrp reeman laaman respejt, ¹⁷ rëb reeman:

Dux Dadan Dios, lüj rajp gra guialrniabee

abi' najl Dios yan në diïzd gocli abi' gui'til.

Quixtëë lüj guial ma culüü xguialrniabee naroo bil ni rajpil

abi' ma guzulojl canabeel.

¹⁸ Bénguidxliuj ree bidxe'ch reeman,

per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt

par gudëë ni rayal tia' ree xbejn

bén badëëd ree xtiidxil, në ree Bén bililadx lüj.

Në ree Bén rajp lüj respejt.

Ma bidxin dxej zi'c ree benzojbloj në ree Bén ad zojblojt tia' reeman ni rayal reeman,

dxel gunidlojl Bén ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcax promisejs ni been Dios diïzd gocli. Dxel guzuloj rë'p nijs, rajc naquie', rëëz guziaaw, bi't xudo'xh abi' dád zro' bïajb guïajyabaa.

12

Tijb béngunaa në tijb dragon

¹ Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guïa'man loj bëëw abi' guïjcman yu' coron ni gocchaaw con chiptio'p bajl xanyabaa. ² Yu' xi'n béngunaa guin abi' rbixdiajman ragnaa lënman guial ma gal xi'nman. ³ Per gojc stijb sen xanyabaa. Balüüloj tijb dragon ro', tijb bedoxh najb culor xnïa. Yu' gajdx guïjquib, chii xcajchib yu' tëë tijb coron tijb gaj guïjquib. ⁴ Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. ⁵ Gojl xi'n béngunaa guin tijb xindo nigüiaaw, abi' laax nabee loj guidxliuj con tijb var guïb. Dxel biquied reeman laax loj xnïaax, bidxin lod zojb Dios lod canabeeman. ⁶ Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëëd reeman ni gawaman choon ijz garol.

⁷ Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. ⁸ Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. ⁹ Zïanan zeel bazaal reeman dragon guin loj guidxliuj con ree xi anjlib. Dragon guin naj bëëë gulal ni la xindxab në satanás xin rusquiee gra ree bénguidxliuj.

¹⁰ Dxel biguien cha' tijb bejn rejs da't diïzd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied Bén rbe'c xguialquia ree dux compniar ree, Bén rdxinnë ree guialquia guin loj dux Dad ree Dios dxej guïaal. ¹¹ Abi' dux compniar ree been reeman gan por rejn ni guxhie' Bén naj zi'c xi xiil Dios në por ni rëb reeman xhïenaag rililadx reeman xtiidx Dios, ad bidxebt reeman majsi niëjt reeman. ¹² Zeel gol badxe' luxdoodi nix gra ree Bén zojb xanyabaa per, jprobza lëjt Bén zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, dád rdxe'chix guial ragbeex sta'nz dxej raya'n par laax.

¹³ Chi baguiaa dragon guin guial ma bïajbib guidxliuj, dxel briinalib béngunaa naj xnïaa xindo guin. ¹⁴ Dxel badëë reeman tio'p xiil béngunaa guin zi'c xiil bisiaro' din gac suman loj bëëë guin xt lod naj ganax yujbidx, lod gudëëd reeman ni gawaman choon ijz garol. ¹⁵ Abi' gulëë ro' dragon guin tijb guïiw nijs din chinën béngunaa guin. ¹⁶ Per bixal loj guidxliuj persi gu'n guïbidx nijs gulëë ro' dragon guin. Zïan been guidxliuj béngunaa guin yudar. ¹⁷ Dxel dád bidxe'ch dragon guin béngunaa guin, abi' zitilnëb sta'n ree Bén ni za loj xdiaaman, Bén ruzoob ree xtiidx Dios zinal tëë reeman xtiidx Jesucrist.

13

Tio'p ree bedoxh

¹ Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guïjc, chii xcajchib abi' loj tijb gaj cajch guin yu' tijb gaj coron, abi' loj guïgajdx guïjquib ca tijb diïdx ni rnieeguijdx Dios. ² Bedoxh ni baguian naj zi'c tijb tigr, per guïa'b najn zi'c naj guïa' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstroo guin xluarib lod rniabeeb abi' guïalrniabeero' ca'b par nabeeb. ³ Tijb guïjc monstroo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxaløj abi' binal reeman

monstruo guin. ⁴ Dxel gojp da't reeman respejt dragon guin guial badëëdib guialrniabee loj monstruo guin gojp da't tëë reeman respejt monstruo guin, rëb reeman:

—¿Chu naj zi'c monstruo guin abi' chu zajc til con laab?

⁵ Monstruo guin gojccaaw ro'b par guilies xvalor gajquib, abi' guinieeguidxib Dios, gojpib guialrniabee par güünb zian loj choon ijz garol. ⁶ Abi' guneeguidxib Dios, guneeb diidxmal ree por laaman, por xadooman në por gra ree bën zobj xanyabaa. ⁷ Gojp monstruo guin permis par sub conr ree xbejn Dios abi' güünb laa reeman gan. Abi' gojpib guialrniabee par nabeeb graloj ree bejn, bën ni rniee ree gadxagayaa diidx, bën gra lad ree, gra ree nacion. ⁸ Gra ree bën ad cat laj loj xlibr guialnaban diidx chi gad guidxliuj gacchaaw, loj xlibr bën naj zi'c xi xiil Dios bën güt por ree bejn, gra reeman gap da't respejt monstruo guin. ⁹ Bën rën ree gucaagdiajg, gol bacaagdiajg. ¹⁰ Bën naj che ladxguuib, cheman ladxguuib. Bën naj guiet con espad, con espad guietaman. Zeel bën naj ree xbejn Dios ad yadxaguidi ad gucwëëz tëë chililadxidi Dios.

¹¹ Dxel baguian stijb monstruo ren briib loj guidxliuj, yu' tio'p xcaxchib zi'c xcaxch xiil, per cha'b naj zi'c cha' dragon. ¹² Abi' lasa'gajc guialrniabee ca' monstruo ni brii loj nijsdoo lasa'gajcan ca'b abi' por laab gojp da't ree bejn respejt monstruo ni brii loj nijsdoo, monstruo ni bayajc lod nadxeelguidx ni rulüüci gugüjt laab. ¹³ Abi' monstruo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diidx xanyabaa xt loj guidxliuj delant loj ree bejn. ¹⁴ Zian rusquieeb bénguidxliuj ree por ree milagr ni rüjn delant loj monstruo ni brii loj nijsdoo, abi' rniabeeb rüjn ree bénguidxliuj tijb xfigur monstruo ni brii loj nijsdoo, monstruo ni bidxeelguidx con espad abi' gubajnb. ¹⁵ Abi' monstruo ni brii loj guidxliuj xt gojpib guialrniabee par gudëëdib guialnaban loj xfigur monstruo ni brii loj nijsdoo, par guiniee figur guin në par gugüjtib gra ree bën ni ad rajpt respejt figur guin. ¹⁶ Gunabee tëë monstruo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bënprob, bën naj ree zi'c bën nado' në ree bën ad najt zi'c bën nado', din chu' sen yaa reeman ladbee o lucwaj reeman. ¹⁷ Abi' achut zajc sii o guto' ya bal id ca reeman sen guin, abi' sen guin naj laj monstruo guin o xinumbrub.

¹⁸ Guie ryaadx guialrignia'. Bën rajp guialrignia' cwëë xcwentaman con xnumbr monstruo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

14

Cant ni biil tibgayuu tiuubitap mil ree bejn

¹ Baguia tëën guial za' bën naj zi'c xi xiil Dios guijc dajn ni la Sión. Bën naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bën naj zi'c xi xiil Dios në laj xDadaman. ² Abi' bigueijnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. ³ Dxel rool reeman tijb cant cüb delant loj yagxhül lod zobj bën rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bën tibgayuu tiuubitap mil guin, laa reeman naj bën gulaa loj ree bénguidxliuj. ⁴ Abi' laa reeman naj ree xinguiiaaw ni ad bagaalt béngunaa, gojc reeman naya abi' zinal reeman bën naj zi'c xi xiil Dios bantëëz guin rejman. Laa reeman naj ree bën gulaa loj ree bénguidxliuj abi' zi'c guialnaza'c yaloy ni rinë bejn loj Dios zian naj reeman delant loj Dios në delant loj bën naj zi'c xi xiil Dios. ⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzuiman xanyabaa con tijb ruson ni naj par tiblyaaa par gugoijnman gra ree bën naban loj guidxliuj, xhietëëz diidx rniee reeman, o xhietëëz loj diaa zëëd reeman, o xhietëëz ciuda o nacion zëëd reeman. ⁷ Dxel dád rejs guneë anjl guin rëbaman:

—Gol bidxeb Dios, gol gules xvaloraman, din ma bidxin hor yadëëd ree bejn cwent lojman. Gol gojp da't respejt bën been xanyabaa, guidxliuj në nijsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bénguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't guneë anjl bayon guin rëbaman:

—Bal chu gap da't monstruo guin respejt con xfigurib abi' tiëbaman tia xsenb lucwajman o yaaman, ¹⁰ bën zii yayal xcasti narooob Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bën naj zi'c xi xiil Dios. ¹¹ Ad yu' tëët dxej yayü' bajl guin. Ni'qui radxe ni'qui guiaal achet guialraziiladx par ree bën rajp da't respejt monstruo guin con xfigurib, o bën ca ree xsenb. ¹² Zeel bën naj

ree xbejn Dios bén ruzoob ree xtiidxaman abi' rililadx reeman Jesucrist, ad rayalt yalenya' reeman.

¹³ Bigueijn tëën cha' bén ni na lon diidz xanyabaa:

—Bacaa ni ganin lojl: “Diidz yan xiquilbaa ree bén rëjt con guialrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

Guialnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. ¹⁵ Dxel brieri stijb anjl lën yadoo abi' rejs da't guneeman bén ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bén zojb loj zaj guin badëëd xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brieri stijb anjl lën yadoo ni naj xanyabaa, ca' gajcaman tijb hoz ni nadoxh ro'.

¹⁸ Dxel niz loj altar brieri stijb anjl bén rajp guialrniabee par bajl, abi' dád rejs guneenëman bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëëd anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios.

²⁰ Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15

Bén naj ree xi anjl Dios con guigajdx ree guialzi

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

² Baguia tëën zi'c nijsdoo, per najn zi'c tijb vidr xcolor bajl. Dxel lojn za' ree bén been ree gan loj monstroo, loj figur con loj xnumbrib, ca' reeman arp ni badëëd Dios loj reeman.

³ Abi' cayool reeman xcant Moisejs xbejn Dios në xcant bén ni naj zi'c xi xiil Dios, rëb cant guin:

Naroob në ni diidxli radxaloj bejn

naj ree ni rüjnl, dux Dadan Dios Bén rajp gra guialrniabee.

Xnejz da't në zi'c rayal rüjnl,

lüt guial rniabeel gra ree bénguidxliuj.

⁴ ¿Chu ad zadxeht lüt?

¿Chu ad zuza'tt lüt zagdx, dux Dadan Dios?

Tijbzi lüt naj bén naya nali

abi' bénguidxliuj gui't gap da't reeman lüt respejt

guial ma balüül bejn ree guial xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. ⁶ Abi' lën yadoo guin brieri gajdx ree anjl bén ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. ⁷ Abi' tijb guidap ree be ni za' lod za' Dios, badëëb loj tijbgaj ree anjl guin tijb cojp or ni guidxa xcasti Dios bén naban guidib tiamp në par tiblayaa. ⁸ Abi' lën yadoo guin gudxan xgo'xh xbacha' Dios në xguialrniabeeman. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

16

Cojp ni guidxa ree xcasti Dios

¹ Dxel bigueijnan cha' bejn rejs da't guneeman diidz lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojpaman loj guidxliuj. Abi' gra ree bén ni yu' xsen monstroo guin bén gop da't ree respejt xfigurib, brieri guidaxyoodx lad reeman, ni rdoob da't.

³ Abi' anjl barojp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojpaman loj ree guiiw në lod rajch ree nijs abi' nijs guin ree bayajc reen rejn. ⁵ Abi' biguiejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xguialguxtisil, Dad Dios, lüj naj bën naya nali, najl Dios yan në diizd gocli. ⁶ Din bénguidxliuj ree guxhie' reeman rejn bagüjt reeman xbejn reel në ree bën badëéd ree xtiidxil. Zeel ma badëédil rejn guië' reeman, abi' zian royal reeman.

⁷ Abi' niz loj altar biguiejnan cha' stijb bën rëb:

—Walican, Dad Dios bën rajp gra guialrniabee. Xnejz në zi'c royal cayüjn xguialguxtisil.

⁸ Abi' anjl badajp guin bala't ni yu' loj xcojpaman loj gubijdx din guze'can bejn ree zi'c bajl. ⁹ Gra reeman we'c por xguialnalaa da't gubijdx guin. Per ni'gui zian ad bayüjnt reeman xgab por xtol reeman, ad baza'tt reeman Dios zagdx guineeguidxli reeman laaman, laaman guial najman bën rniabee ree guialzi guin.

¹⁰ Anjl bagaay guin bala'taman ni yu' loj xcojpaman lod rbej monstroo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. ¹¹ Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guida'x ni gudxib lad reeman, guineeguidx reeman Dios bën zojb xanyabaa.

¹² Anjl baxo'p guin bala't ni yu' loj xcojpaman loj guiiwro' la Eufrates abi' gubidx nijs loj guiiw guin. Zian bixal nejz din téd ree rey bën zëéd ree lad lod rliejn gubijdx. ¹³ Dxel baguian ro' dragon guin, con ro' monstroo guin në ro' bën rusquiee rëb rudëé xtiidx Dios loj ree bejn brii choon ree sprijt mal ni naj zi'c bidx. ¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxex ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guijc guial dxeczi guialan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi guialan din chitëé yaya'nxtu reeman zi'c chi rniaaz bën za' zibëél.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojpaman loj bi, abi' diizd lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaløj gojc ni royal gac.

¹⁸ Abi' guzuløj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuløj yu' bejn loj guidxliuj, din xu guin naj ni mazczi ni doxh. ¹⁹ Abi' gula' ciuda naroo guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëé xcasti ro'man loj ciuda naroo guin. ²⁰ Abi' gunijt ree gra yuj riga' loj nijsdoo në ree guia'. ²¹ Biajb tëé guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guineeguidx reeman Dios, por ree guialzi guin, guial dád ni doxh gojc chi biajb ree guiajyabaa guin.

17

Guialguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni royal béngunaa dxuudx ni zojb loj nijsro', ² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguuiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxiibaman stijb monstroo xnia, abi' guidib ladib ca diidxguijdx par Dios, yu' gajdx guijquib con chii xcajchib. ⁴ Abi' béngunaa guin najcwaman lajd murad në ni xnia, najcchaawnën ganax or në ree guiaj zagdx në ree perl. Abi' ca'man tijb cojp or guida'x ree ni nabixhladx lojn në ree ni dxuudx ni rüjnman. ⁵ Abi' lucwajman ca tijb letrer ni achutczri rignia' ni rën guiëban, rëb loj letrer guin: “Babilonia, ciuda naroo ni naj xniaa ree béngunaa dxuudx në xniaa ree ni dxuudx ni rajc loj guidxliuj,” ⁶ Dxel gogbeen guial rzüdx béngunaa guin con xrejñ ree xbejn Dios, con xrejñ ree bën ni güt guial guneee reeman xtiidx Jesús. Abi' dád badxalon chi baguian zian. ⁷ Dxel na anjl guin lon:

—¿Chexc zeel dád radxalojl? Naj gusignia' lüj ni rën guiëb béngunaa ni baguiaal në monstroo ni dxiibaman, be ni yu' gajdx guijc con chii xcajch. ⁸ Monstroo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rliox dxelri nidlojb tiblyaa. Abi' ree bën naban loj guidxliuj, bën ni ad cat ree laj loj xlibr guialnaban diizd gocli chi gad guidxliuj gacchaaw, laa reeman yadxaloj chi guguiaa reeman monstroo ni guban gocli, be ad nabant yan per gui'tib.

⁹Guie ryaadx quiargueijn. Guigajdx guicj monstroo guin rën guiëban gajdx guia' lod zojb béngunaa guin ¹⁰rën tëë guiëban gajdx ree rey. Gaay ree rey guin ma gudëëd xguialrniabee, abi' bën baxo'p guin naj bën canabee yan. Dxelri nabee bën bagajdx guin, per ad xchejt nabeeman. ¹¹Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblayaa.

¹²'Guidxii cajch ni baguiaal rën guiëb chii ree rey ni ad wazulojn nabee. Per chi tia' reeman guialrniabee, ad xchejt nabee reeman con monstroo guin. ¹³Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin, ¹⁴abi' til reeman con bën naj zi'c xi xiiil Dios. Per güün bën naj zi'c xiiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' bën za' ree con bën naj zi'c xi xiiil Dios, laa reeman naj bën bazoob xtüidx Dios, bën ma naj ree par laaman abi' diidxli zinal reeman xnejz Dios.

¹⁵Na tëë anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree bën rnıee graloj ree diidx, bën gra lad ree, bën zëed ree gra loj ree nacion. ¹⁶Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëëlamam, gaw reeman xbëëlamam abi' guze'c reeman laaman. ¹⁷Dios yazaladx loj guidxii ree rey guin quiargueijn din güün reeman zi'c rëman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac. ¹⁸Abi' béngunaa ni baguiaal, laaman naj ciuda naroo ni rniabee ree rey yu' loj guidxliuj.

18

Biajb guiedx Babilonia

¹Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, ²abi' rnieeman rejs da't rëbaman:

—Ma biajb, ma biajb Babilonia ma naj ciuda naroo guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. ³Din zi'c chi rusüdx bejn stijb bejn, zian ma batiaalguuiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bën rüjn negojs loj guidxliuj ma naj reeman rijcw por graczi ree ni dxuudx rajc ni.

⁴Dxel biguejnan cha' stijb bën gunee diidx xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tëdidi guialzi ni gac ree loj ciuda guin. ⁵Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. ⁶Gol beennë ciuda guin zi'cgajc beennë ben ren ree, gol been din yaguijxan xcastin tio'p volt mazri guial loj ni beennë bejn ree abi' gol basagdiajn tio'p volt mazri guial loj ni basagdiajn ben ren ree. ⁷Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bën rniabee, ad najtan bën bizëjb ad yu' tëët dxej chu'nayan.” ⁸Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din naroo xguialrniabee dux Dad ree Dios bën gudëëd casti ciuda guin.

⁹Abi' ree rey ni yu' loj guidxliuj, bën babaa ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can. ¹⁰Abi' zijt su reeman chi guguaa reeman casti ni cadëdan, dxel guiëb reeman:

—jProba lüj, probza lüj Babilonia, ciuda naroo ni guyu gojl par gra! Din tibrajtzi bi't casti par lüj.

¹¹Abi' ree bën rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, ¹²zi'c or, plajt, guiaj zagdx ree, perl, lajd zagdx ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdx, bronce, guib con marmol në marfil. ¹³Ad zajc tëëtri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdx, trigo, go'n, xiiil, way, carrej, ad zajc tëëtri ree guto' reeman bejn ree. ¹⁴Abi' guiëb reeman loj ciuda guin:

—jAd rajptril guialnaza'c ni bayuladx da'til, tiblayaa ma banijtil zi'c guban con gra ree ni za'c ni gopil!

¹⁵Gra ree bën been negojs, bën gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. ¹⁶Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdx, lajd culor murad con ni xnia, laan guial guzujchaawan con or, con perl nē con guiaj zagdx 17 din, ¡tibrajtzi gunidloj gra ree guialnaza'c guin!

Gra ree bēn zē lēn barcw, zi'cgajc xcapitan ree barcw, gra ree mariner nē los demazri ree bēn rüjn dxiin lēn barcw, guzudxe reeman zijt 18 chi baguiaa reeman go'xh ni cay'e'c ciuda guin, abi' gurixdiaj reeman rēb reeman:

—¿Goc guyu tijb ciuda lasa' ciuda ro' guie?

19 Abi' barooob yuj guijc reeman, roon reeman abi' guyunaya luxdoo reeman rēb reeman:

—¡Probza!, probza ciuda narooob guin por xguialnaza'can gra ree bēn been negojs bēn rajp ree barcw gojc reeman rijcw, din tibrajtzi gunidlojn.

20 Dxel biguien cha' bēn na:

—Per lējt bēn zojb ree xanyabaa, lējt najdi xi apóstoles Jesucrist, lējt bēn rudēēd ree xtiidx Dios nē los demazri ree bēn naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennē ciuda guin lējt.

21 Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rēbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguiaa Babilonia guin stijb. 22 Ad zaguietri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguietri loj ciuda guin. Achutri bejn güün dxiin ni, ni'qui xnaquie' mulin ad zaguietri ni. 23 Achetri guij che'c loj ciuda guin, achutri guxhliaa. Gra ree bēn been negojs loj ciuda guin ganax bēn zojbloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

24 Abi' loj ciuda guin bagüjt reeman bēn badēēd ree xtiidx Dios, nē ree bēn rliladx Dios, abi' por ciuda guin bagüjt reeman los demasri ree bēn ma güjt loj guidxliuj.

19

1 Chi gulox baguian biguiejn tēen zian, dxel dád rejs biguiejnan cha' zien da't ree bēn canee xanyabaa rēb reeman:

¡Quixtēē Dios! Por dux Dad ree Dios

zēēd perdon, respejt nē guialrniabee,

2 din laaman waliman abi' xnejz rüjn xguialguxtisaman,

ma badēēdaman casti bēngunaa dxuudx ni bazaalguiiw

bēnguidxliuj ree con ree xni malaman,

ma been Dios guialguxtis con laaman persi baguijxaman ni bagüjtaman xbejnman.

3 Abi' biguiejnan rēb reeman stijb:

—¡Quixtēē Dios! Ad yu't dxej yayü' go'xh ni cay'e'c ciuda guin.

4 Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rēb reeman:

—¡Quixtēē Dios! ¡Dixdza'c guin ree naj par laaman!

5 Abi' niz lod za' yagxhil guin biguiejnan cha' bēn rēb:

Gradi zi'c bengol zi'c xindoo

gol gules xvalor dux Dad ree Dios,

lējt rüjndi laaman sirv abi' rajpidi laaman respejt.

Xguialruxhliaa bēn naj zi'c xi xiil Dios

6 Biguiejn tēen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtēē Dios! Din ma canabee dux Dad ree Dios,

bēn ca' gra guialrniabee.

7 Yan yadx' du luxdoo ree zagdx, yabaa ree yales tēē ree xvaloraman.

Din ma bidxin dxej guxhliaa bēn naj zi'c xi xiilaman

abi' bēn gac lacheelaman ma za'chaawaman.

8 Najcwaman lajd zagdx, ni naquich, naya rulaa tēen bacha'.

Din lajd naquich guin rēn guiēban ni zagdx ni been ree xbejn Dios.

9 Abi' na anjl guin lon:

—Bacaa: “Xiquilbaa ree bēn naj gui't loj xguialruxhliaa bēn naj zi'c xi xiil Dios.”

Na tēē anjl guin:

—Ni guie ree naj xtiidxli Dios.

10 Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bēn wali ree rüjncwnt xtiidx Jesucrist. Gojp da't respejt Dios.

Din por Jesús zēēd ni rniee ree bēn rudēēd xtiidx Dios.

Bén dxiib tijb way naquich

¹¹ Dxel baguian zojbyal xanyabaa baguia tëën tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xguialguxtisaman në xwadijlaman, ¹² guiaalojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban, ¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxë ni naquich ni naya tëë. ¹⁵ Ro'man ririi tijb espad ni nadoxh ro', con espad guin gudëëdaman casti bénguidxliuj, në con var guib nabeeman laa reeman. Zi'c rë'p bejn guijc uv par guixiin, zian gudëëdaman loj reeman casti narooob ni zëëd por Dios bén rajp gra guialrniabee. ¹⁶ Loj xcajpaman con cüdaman ca ree diidx ni rëb: "Rey bén rniabee loj ree rey në Dad bén rniabee loj ree dad."

¹⁷ Dxel baguian tijb anjl za'laman loj gubijdx, dád rejs rbidxa'man, rbejdxaman gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, ¹⁸ zi'c xbëël ree rey, xbëël ree capitan, xbëël ree bén achut rüjn gan, zi'c xbëël ree way, xbëël ree bén rbib laa reeb, xbëël gra ree bejn, zi'c xbëël ree bén naj zi'c bén nado' në xbëël ree bén ad najt zi'c bén nado', zi'c xi bëël ree bengol në ree xindoo.

¹⁹ Dxel baguian monstroo con ree rey yu' loj guidxliuj në ree xsuldad reeman, nadxag lasa' reeman par til reeman con bén dxiib way naquich guin con ree xsuldadaman. ²⁰ Per laa reeman gunaaz reeman monstroo guin con bén rusquiee rëb rudëë xtiidx Dios loj ree bejn, bén rüjn milagr niz loj monstroo guin. Abi' por ree milagr guin basquieeman bén guyu ree xsen monstroo guin gojp tëë reeman respejt xfigurib. Abi' monstroo guin con bén rusquiee ni rëb rudëë xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. ²¹ Abi' los demazri ree xbejn monstroo guin güjt reeman con espad ni ririi ro' bén dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëël reeman.

20*Ti mil ijz*

¹ Dxel baguian zidguiajt tijb anjl xanyabaa, ca'man xguibliaw bizë ni ad yu't lod rliox, ca' tëëman tijb caden narooob. ² Abi' gunaazaman dragon, bëël gual ni la xindxab në satanás, guxhiiman laab con caden guin por timil ijz. ³ Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëë gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

⁴ Dxel baguian yagxhil zagdxë ree lasa' xyagxhil ree rey, lojn zojb ree bén ni ma cwa' guialrniabee par güün reeman guialguxtis. Baguia tëën xsprijt ree bén ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. ⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. ⁶ iXiquilbaa ree bén yaban yaloj! Laa reeman ma naya niz loj Dios abi' ad yazaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

⁷ Chi ma bayaaloj timil ijz guin, dxel yarii xindxab guin lod nayaawix ⁸ Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. ⁹ Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diidz xanyabaa guixhiaalaman bajl ni guze'c bén guin ree xt yadëj reeman. ¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con bén rusquiee rëb rudëë xtiidx Dios loj ree bejn, lod ad yu't dxej yarii reeman lod sagdiaj tëë reeman dxej guiaal.

Yadëëd ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblyaaa. ¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. ¹³ Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëëd reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. ¹⁴ Dxel guialgüjt con lod guzu

ree bengüt gulëjz reeman guidxin dxej yadëëd reeman cwent loj Dios, grop reen bazaal reeman loj bajl, bajl guin naj gualgüjt barojp. ¹⁵ Abi' loj gajc bajl guin bayal ree bën ad cat laj loj xlibr gualnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. ² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhlaam con xin gac lacheelim. ³ Abi' dád rejs biguiejnan cha' bën gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. ⁴ Laaman gutiaa loj reeman nijs biin reeman, dxel achetri gualgüjt chu', gualroon, gualrunaya në gualzi, din gra ree ni guyu gocli ma gudëd reen.

⁵ Abi' bën zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni ryal chililadx bejn.

⁶ Dxel naman:

—Ma gojc ni ryal gac. Naj naj zi'c A con Z, din tijbzi naj rniabee diizd guia'xchej në par tiblyaaa. Bën re'c nijs, naj yazaladx nijs lojman nijs ni ririi lod rajch nijs ni runee gualnaban.

⁷ Bën ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nan. ⁸ Per ree bën rdxeb sudxi'ch loj ni riladx reeman naj, bën ad riladxt ree naj, bën ruladx ree güün ganax ni mal, bën rugüjt ree bejn, bën rüjn ree nidxuudx con ree bën ad najt lacheel reeman, bën rüjn ree gualbidxaa, bën rën ree ni naladx reeman naj ree Dios, në gra ree bën rusquiee, laa reeman ryal loj bajl lod caye'c azufre, bajl guin naj gualgüjt rarojop.

Jerusalén cüb

⁹ Dxel tijb guigajdx ree anjl bën ca' ree guigajdx ree cojp ni guidxa guigajdx ree gualzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bën naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios. ¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdx n la Jaspe, nayni zi'c tijb vidr. ¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaaw ree bën Israel, tijb gaj lad port guin ca zi'c la tibcwaaw gaj reeman. ¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. ¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bën naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. ¹⁷ Dxel cwa'man midid ze' guin, abi' ze' guin najn gayojnbitap mejtr zi'c naj xmidid bënguidxliuj zi'c bare'xh anjl guinan.

¹⁸ Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. ¹⁹ Xguiaj cimiant ze' guin najcchaawnën gadxagayaa ree guiaj zagdx. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, ²⁰ guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. ²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

²² Ni'qui tijb yadoo ad baguiatan loj ciuda guin din dux Dad ree Dios bén ca' gra guialrniabee con bén naj zi'c xi xiilaman, laa reeman naj xyadoo ciuda guin. ²³ Abi' loj ciuda guin ad rüjnt naguejñ gusni gubijdx ni'qui bëëw, din xbacha' Dios rusni ni abi' bén naj zi'c xi xiilaman laaman naj bajl ni. ²⁴ Bén zëéd ree lod rent lod ren sa reeman loj bacha' guin, bén ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. ²⁵ Xport ciuda guin ad yu't dxej yaaw reen radxe, abi' ni ad zut guiaal. ²⁶ Gra xguialza'cdxoon con gra xguialzagdx ree bén zëéd lood rent lood ren, guidxin reen loj ciuda guin. ²⁷ Per ad yu't dxej chu' ni dxuudx loj ciuda guin, ni'qui ree bén rüjn ni dxuudx ni'qui ree bén rusquiee, bén cazi ree laj loj xlibr guialnaban ni ca' bén naj zi'c xi xiil Dios, laaz reeman chu' loj ciuda guin.

22

¹ Balüü tëë anjl guin lon tijb guiiw naya ni razaladx guialnaban, naynidxuj zi'c tijb guiaawajn. Rirri nijs guin lod za' xyagxhil Dios con bén naj zi'c xi xiilaman, ² abi' zën galay loj nejz narooob ni naa galay ciuda guin. Galay nejz guin naa guiiw guin, abi' grop lad guiiw guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. ³ Achetri ni mal chu' ni, abi' Dios con bén naj zi'c xi xiilaman cwe loj xi yagxhil reeman guiaád ree xbejn reeman gap da't laa reeman respejt. ⁴ Abi' ni guguaalaj reeman Dios, bén ni ca ree lajman lucwaj. ⁵ Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bén razaladx diidx loj ree bén rudëéd xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. ⁷ Dad Jesucrist rëb guial nayob gui'taman.

¡Xiquilbaa ree bén ridxga' ni ca loj libr guie ni rugojn ni gac!

⁸ Naj Waj, baguian biguejñ tëën ni guin ree. Abi' chi gulox baguian biguejñ tëën ni guin ree, dxel bazuxiban par ga'p da'tan respejt anjl ni balüü ree ni guin lon. ⁹ Per naman lon:

—Ad güün! zian. Din naj zi'cgajc lüj, xmandadzi Dios cayguieen, zi'cgajc ree xcompniaril bén rudëéd ree xtiidx Dios, në ree bén ridxga' ree ni ca loj libr guie. Zeel Dios gojp da't respejt.

¹⁰ Na tëëman lon:

—Ad guquie'chil diidx ni zëéd ree loj libr guie, diidx ni rugojn ree ni gac, din ma zidyob gac reen. ¹¹ Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. ¹³ Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diidx guia'xchej në par tiblayaa.

¹⁴ Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban. ¹⁵ Abi' ijch ciuda guin yaya'n ree benguijdx, bén rüjn ree guialbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni naladx reeman naj dios, në ree bén ruladx cwëëgujic ni rusquiee rniece tëë reeman diidx rusquiee ree. ¹⁶ —Naj Jesús ma guxhal da anjlan din gugojnman lëjt gra ree ni guie din guie'biidi laan loj gra ree bén rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildo.

¹⁷ XSprijt Dios con biinxdüb ni gac lacheel bén naj zi'c xi xiil Dios rëb reeman:

—Guda.

Abi' bén riguejñ rniece reeman zian, rëb gajcaman:

—Guda.

Chutëéz bén re'c nijs, gol guda, abi' bén rën zajc guië'man nijs runee guialnaban lagajzi.

¹⁸ Gra ree bén riguejñ ree diidx ni zëéd loj libr guie ni gac, naj rni lojdi bal chu bén gucaa gujic ni zëéd loj libr guie, ziangajc zusro' Dios guialzi ni zëéd loj libr guie par laaman. ¹⁹ Ziangajc bal chu chiquied xhie diidx gujic ree diidx ni zëéd loj libr guie ni gac ziangajc chiquied Dios gujic ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

²⁰ Bén ragbee guial diidxli naj gra ree ni guie, rëbaman:

—Walín, nayob guialan.

Zian gacan Dad Jesús, ¡Guda!
21 Dad Jesús güünle' gradi. Amén.